

近代中國史料叢刊第二十四輯

沈雲龍 主編

劉襄勤公（毅齋）奏稿

劉錦棠著

文海出版社印行

哭 哭

奏 襄

稿 勤

光緒廿四年歲次  
戊戌剝於長沙

1898/11

劉襄勤公奏稿總目

卷一

由騎都尉世職晉爲二等男遇有三品京堂缺出開  
列在前謝 恩摺

補授太常寺卿謝 恩摺

補授通政使司謝 恩摺

御賞白玉柄小刀火鑷荷包等物謝 恩摺

御賞福字荷包等物謝 恩摺

幫辦新疆軍務謝 恩摺

著 欽差大臣督辦新疆軍務謝 恩摺

御賞福字荷包等物謝 恩摺

授 欽差大臣督辦新疆軍務謝 恩摺

御賞福字荷包等物謝 恩摺

賞假三月並人蔘六兩謝 恩摺

旌賞祖母陳氏五世同堂謝 恩摺

御賞福字荷包等物謝 恩摺

補授兵部右侍郎謝 恩摺

御賞福字荷包等物謝 恩摺

京察交部從優議敘謝 恩摺

御賞福字荷包等物謝 恩摺

謝年終 恩賞摺

賞假三月並人蔘八兩謝 恩摺

賞福字及荷包等物謝 恩摺

賞假六月並人蔘八兩謝 恩摺

賞福字及荷包等物謝 恩摺

賞假回籍省視祖母謝 恩摺

賞加太子少保銜謝 恩摺

賜祭原任廣東陸路提督劉松山謝 恩摺

卷二

遵 旨密陳新疆西路邊防情形摺

前赴哈密籌商邊防善後事宜暨起程日期摺

布置南路暨哈密等處防務摺

增設行營糧臺並遴員督辦臺務片

遵旨統轄哈密及鎮迪道屬文武辦理緣由摺

請免余虎恩騎射片

奏籌邊重寄才力難勝再陳下悃摺

請旌烈婦劉李氏摺

首逆逋誅請飭使臣向俄理論解送懲辦摺

新疆命盜案件請暫行變通辦理摺

請飭河南照額協解嵩武軍餉片

新疆南路五次剿平邊寇摺

籲懇 節哀摺

請 卹蕭迎祥摺

請 旌烈婦蕭賀氏片

烏魯木齊提標營制未復請 飭部暫緩行催造冊

摺

提標及各路副參游都關防遺失請 飭部補鑄片

新疆南路西四城興修各工完竣並籌辦應修各工

摺

湘軍文武員弁積勞病故請 卹摺



請 卹丁翰片

接收伊犁及分界事宜現籌辦理情形摺

科布多所屬布倫托海無庸撥營駐紮片

回子郡王之子承襲世爵摺

回部坎巨提呈進 貢沙金片

擒獲安夷監禁已久分別辦理摺

### 卷三

顧懇 收還成命另 簡賢能接替摺

請免鄭錫溥繳捐復銀兩片

請 優卹楊杰片

賑恤吐爾扈特南部落銀兩請 飭核銷摺

刊換督辦西征糧臺關防片

俄商往來新疆貿易不得行銷中國土貨摺

保舉提督董福祥片

神靈顯應懇 賜匾額封號摺

新疆六年分征收額糧稅釐數目片

遵 旨覆陳裁撤營勇並挑選標兵改坐糧摺

新疆七年分夏秋冬三三季變通辦結命盜各案摺

辦結纏回阿不拉等糾眾謀亂片

請給病假一月在營調理片

庫車回子郡王承襲摺

新疆北路雷營照舊分防卓勝軍分別雷遣摺

銷病假片

遵 旨擬設南路郡縣摺

裁撤阿奇木伯克等缺另設頭目並考試回童分別  
給予生監頂戴片

新疆各道廳州縣請歸甘肅爲一省摺

各城旗丁併歸伊犁滿營添設撫標增置總兵等官  
額兵片

卷四

請撥部款彌補新疆所免釐金並接濟軍餉摺

請飭部預籌解濟西征欠餉摺

請飭山西彌補卓勝軍墊款片

請飭籌解金順張曜軍協餉片

審訊甘秦澍捏造逆書奏請定奪摺

請卹道員張宗翰並事蹟宣付史館摺

遵旨覆陳哈密大營未便移紮烏魯木齊及南北  
兩路布置情形摺

俄國駐喀領事權飭局員兼顧片

請假兩月在營調理片

請按約索還烏什之貢古魯克地方摺

請開缺回籍治病並懇簡員接辦邊事摺

請止安集延商人領俄路票赴新疆貿易並附俄漢纏各回及哈薩克人眾越界滋事摺

借撥吐爾扈特福晉銀兩片

請將遣犯釋回片

覆陳裁勇補兵暨未裁之營仍舊支給行餉摺

覆陳前墊卓勝軍餉銀應由晉補解現裁該營須銀散給摺

爲湘楚嵩武卓勝各軍病故文武員弁請卹摺

刊送新疆南路分界大臣關防片

卷五

請旌楊溢中祖母陳氏五世同堂摺

特參庸劣不職知縣分別降革摺

委員試署准設新疆南路道廳州縣各官並籌現辦情形摺

請換鑄巴里坤總兵官印信並補發哈密協副將敕書片

請彙獎防戍人員摺

核辦蒙部案件請照變通章程摺

新疆南北兩路命盜案件照章按季摘由彙報摺

力疾銷假仍懇開缺 簡員接替摺

遵 旨保薦人才摺

關外駐防馬步營旗弁勇數日處所開單請立案摺  
關外各軍行糧坐糧章程善後臺局一切應發款目  
開單請立案摺

委署南路道廳州縣員缺片

### 卷六

懇 獎敘江甯藩司摺

請 飭各省關趕解協餉片

請補鎮迪道所屬廳縣員缺摺

請獎敘興築烏垣城工片

已革縣丞酒醉戡斃武職大員審明定擬摺

發遣回城爲奴之犯請變通改歸南路州縣官管束  
片

請給南北兩路官員辦公津貼摺

南疆新設郡縣工費懇撥實餉摺

請將奇臺縣治移建古城片

補授兵部右侍郎籲懇收回成命摺

請旌節婦李周氏摺



刊給委署南路道廳州縣木質關防鈐記片

請頒回子郡王番篆摺

請將道員魏炳蔚畱營差遣片

喀什噶爾界務請由金順覆陳片

請給庫車吐魯番兩處回子郡王三年廉俸並卹銀片

關外營旗局站實在數目暨陸續裁併新收繕單立案摺

南路城廨工作礙難中止仍懇 飭發銀兩片

覆陳呈控統兵大員並駐京委員侵蝕各節摺

卷七

請 卹道員羅長祜並戰績事實 宣付史館摺

遵 旨統籌新疆情形以規久遠摺

哈密辦事協辦衙門員役暫照向章支廉片

新疆南路軍臺一律安設驛站酌擬經費章程摺

哈密巴里坤軍臺擬改驛站分段管理片

請 卹總兵何作霖並附祀忠壯專祠片

請更正湯彥和陳美仙官階片

酌裁馬步各營改併成旗並實存數目繕單立案摺

查明喀城底臺遞送摺件遲延片

請率師與法夷決戰摺

遵 旨酌度仍申前請摺

遵保各省籌餉人員並各督撫將軍關心協餉懇懇

恩施摺

懇 恩賞加張曜錫綸等頭品頂戴片

酌保關外諸軍出力人員摺

### 卷八

覆陳新疆遣犯酌量變通摺

已故道員羅長祐懇 恩允照成案附祀片

請註銷革員永不敘用字樣並 賞六品頂戴片

張曜一軍開拔遴員替防酌添營伍情形摺

懇恩豁免關外鎮迪道屬歷年民欠各項銀糧摺  
請豁免鎮西應征額糧片

投新疆巡撫瀝陳下悃摺

軍餉涸竭請嚴催趕解摺

擬借款行用補水等銀片

新疆南路擬設佐雜及分防巡檢各缺摺

哨弁戕斃營官脅眾譁潰隨即撲滅摺

試署直隸州知州員缺請實授摺

新疆命盜重案難照內地舊制遵部議擬辦摺

請 卹文藝等片

新疆驛站經費請參酌部議量爲變通摺

歷年欠發軍餉請 飭提款清釐摺

移營烏魯木齊日期摺

登覆各營應支雜支章程摺

辦結精騎馬隊潰勇片

伊犁匪徒勾勇劫殺經防軍撲滅摺

譚拔萃在營病故請 卹摺

### 卷九

請實授黃光達喀什噶爾道員缺摺

行抵烏魯木齊行省片

請加鎮迪道按察使銜摺

檄委藩司總理營務片

遣犯到配安插詳細章程摺

巴烏滿營移併古城並請改設城守尉摺

擬設城守尉請於領隊協領內簡放片

請將折平銀兩撥歸古城片

請卹王鎮墉方希林片

伊犁禮字後營勇丁譚變戕官摺

劉文和新招勇丁譚潰片

新疆建省請改設添設各官摺

巡撫布政使廉俸應照江蘇例支給片

譚上連生母年逾八旬籲懇 恩施摺

和闐于闐驛站經費照變通章程支給片

提臣金運昌請開缺摺

會商揀員署理烏垣提缺片

哈密通判劃歸鎮迪道管轄並添設書役片

刊按察司關防啟用片

伊塔各大臣分別應裁應留摺

酌議新疆補署各缺留省補用人員章程摺

籍隸甘肅人員准按序班毋庸迴避片

薩凌阿交卸回京片

查明新疆防營臺局十年分實在數目摺

裁撤糧員改設同知巡檢等缺摺

委譚上連署理烏提篆務片

請 旌烈婦譚金氏摺

### 卷十

揀補王鳳鳴等副將員缺摺

顧得喜勾結匪類謀變事聞登時撲滅片

酌裁回官懇 賞回日頂戴摺



報馳赴伊犁會辦起程日期及布置情形摺

辦結伊犁殺斃俄屬陝回命案片

懇恩豁免被旱奇臺縣額糧摺

緩征迪化各屬被旱額糧片

馳抵伊犁日期片

各省應解工程銀兩懇飭掃數解清片

報都統升泰丁憂日期摺

都統員缺應否派員護理片

請將袁奎齡補授阿克蘇道員缺摺

開源節流就新疆情形逐條分晰覆陳摺

欠餉未清懇 飭部指提有著實餉分限解甘摺

關外營餉雜支章程再按部議登覆摺

懇發奇臺縣屬春賑摺

新設古城城守尉擬由撫臣兼轄請 簡放摺

代奏哈密回子親王謝年終 恩賞摺

估修新疆省城垣及撫藩衙署等工摺

古城修理完竣哈密將次完工請立案片

伊犁營勇查明裁併分成發給存餉摺

報由伊犁回省日期并陳吉江馬隊由將軍安等籌遣

撤摺

南路建置已定請令署提督移防摺

請將董福祥署阿克蘇鎮總兵片

報由伊犁抵省日期及照常辦事片

覆陳伊犁屯務防務擬辦大概情形摺

卷十一

地方瘠苦擬請酌加公費摺

聲復道員袁圭齡保案並請 准補缺片

請將新疆南路各官初任交代寬免起限片

恭報十二年正月分糧價得雪情形摺

代奏回王展緩期滿呈懇按班朝 覲摺

恭報啟用關防日期並請繳回 欽差大臣關防摺

新疆需才治理照章揀員畱省摺

估修吐魯番廳綏來縣兩城需用數目立案片

揀員署理塔爾巴哈臺參贊大臣員缺摺

發給伊犁勇營存餉逐款陳明請 飭核銷摺

請將潘效蘇補和闐直隸州知州員缺摺

魁福交卸回京片

訊明不法鄉約正法片

擬將義塾學童另行酌獎備取僧生摺

新疆新設佐雜並添設正佐各官請 飭鑄印頒發

摺

阜康縣需用祭祀山神祭品由司庫支發片

鎮迪二屬歲科兩考改歸撫臣辦理摺

登覆七八兩年關外報銷部駁摺

臚陳已故大臣賢勞事實懇 旨付史館摺

請 卹張恩濬等片

烏魯木齊四次查明陣亡殉難官紳兵民請 卹摺

新疆人命重案懇暫 准變通辦理摺

恭繳 欽差大臣關防摺

庫爾喀喇烏蘇同知請添設照磨兼司獄員缺摺

新疆應設撫標及城守等營員缺擬辦情形摺

查明新疆用款無可刪減存儲報部摺

新疆 大計鉅典懇緩至下屆辦理摺

## 卷十二

請 旨嚴催協解西征欠餉摺

查明伊犁新設副都統二員均應與將軍同城駐紮摺

新疆司道各員循例年終密考繕單具陳摺

辦理吐魯番廳屬偏災擬分別蠲緩片

新疆助墾人犯籌款安插情形摺

興辦屯墾並安插戶口查報隱糧摺

增庫爾喀喇烏蘇同知公費片

庫車等五廳州縣交代請寬免起限片

請開缺回籍省親就醫摺

調補莎車直隸州知州要缺摺

續查烏垣等處陣亡殉難官紳兵民請旌卹摺

查明毛運如積勞病故並眷屬殉難情形片

西征欠餉逾期未到懇撥庫款摺

新疆田賦戶籍造冊咨部立案摺

擬設伊塔道府等官摺

古城城守尉到省日期並會商滿營遷併事宜摺

請將譚拔萃附祀片

請將王德溥並其母姚氏妻郭氏分別 旌卹片

揀員請補葉城縣知縣要缺摺

提督呈請復姓歸宗摺

新疆無秋審人犯請 飭核議冊式及截止日期摺

伊犁將軍病勢較輕毋庸馳往摺

請設撫署筆帖式摺

蒙部纏回改歸地方官管轄並改鑄關防片

卷十三



請頒司道傳 敕摺

請 王命旗牌片

溫宿州烏什廳被水大概情形片

節婦李歐陽氏請 旌摺

新省額設壇廟祠宇祀典請 飭立案摺

拜城縣報被水雹情形片

查明呼圖克圖徒眾無處可徙並籌哈巴河防務摺

請 賞坎巨提頭目翎頂片

新省添設稅務局試辦情形摺

前烏魯木齊銀印及木質關防分別繳銷片

塔爾巴哈臺營勇潰變籌辦大概情形摺

查明潰勇就撫擬籌整頓摺

新屬十二年征收額糧徵信冊遵章印發摺

新疆城署各工告竣請獎摺

催解清南路工程銀兩並籌撥北路工程專款片

籌發欠餉懇請續假摺

查明司庫支絀請立案備撥摺

旗營遷併古城酌擬旗制餉章摺

臚陳戴宏勝戰績請卹摺

調王久銘赴新疆差遣片

登星萬公奏利  
請 卹鄒魯彥等六員片

新疆暫難規復制錢摺

遵 旨籌辦塔爾巴哈臺事務摺

請 旌節婦張楊氏摺

鎮西廳禾稼被災情形片

綏來濟木薩秋禾被災情形片

### 卷十四

庫爾喀喇烏蘇廳稻穀被災情形片

新疆提鎮標路員缺營制餉章倣照撫標擬議摺

估修古城衙署兵房等工立案摺

病難速痊仍請開缺回籍就醫摺

查明被災各屬來春分別接濟摺

新疆十四年實需餉數並應議各條分晰覆陳摺

新疆總兵城守尉司道等官年終密考摺

已故大臣明春請建專祠摺

遵保提鎮各員摺

陳明欠餉清理就緒懇指撥以清借款摺

請 卹道員雷聲遠等片

修建南路提鎮衙署並擬續修通省武官營摺

估修迪化府及經歷衙署監獄銀數片

查明新疆現辦稅務情形摺

已故大臣左宗棠專祠告成請 飭部立案摺

巴里坤東關捐建左大臣祠宇並附祀死事立案片

新疆省捐修湘軍忠義祠立案片

請設迪化府學額摺

酌定伊塔旗營員缺並籌辦勇營事務摺

龍神靈應請 敕加封號摺

請 旌節婦陳王氏摺

訊明潰弁就地正法片

關外七八兩年報銷覆陳部駁懇 飭准銷摺

卷十五

烏垣滿營官兵遷併古城到防日期摺

請將提督董福祥等十四員畱甘肅新疆補用片

清欠不敷動用司庫商借銀兩分別抵銷歸還摺

假期已滿病難速痊懇准開缺回籍就醫藉遂烏

私摺

哈密吐魯番庫車回子王等年班懇分年分班赴京

摺

新疆撫標城守各營添改副參游都守等缺均作題

缺摺

伊犁營勇亟宜裁汰整頓摺

布政司魏光燾暫緩  陸見摺

烏魯木齊提標參游以下一律開缺分別咨補摺

請  旌烈婦周羅氏摺

新疆助墾人犯在配脫逃請  飭部議罪名摺

援案估計光緒十五年新疆餉銀懇  飭部核撥彙

入關內新餉統收分支摺

新疆第一次遵辦鄭工新例捐輸懇  飭分別獎敘

摺

代奏回子親王懇請暫緩進京  朝賀摺

請將提督黃萬鵬等二十一員名留於甘肅新疆儘先補用片

籌議移併古城滿營官兵隨缺地畝並懇暫緩屯墾摺

遵旨整頓伊犁勇營先將擬辦情形陳明摺

南路已修城署經費懇飭部核銷並請飭催各省關欠餉銀兩以清墊款摺

請旌節婦王劉氏摺

覆陳光緒九十兩年報銷部議刪除行查各款懇

飭核銷摺



懇 恩展假數月回籍省親摺

請 簡放新疆提督總兵各員缺摺

陳喀什提督阿克蘇總兵可否以譚上連董福祥補

授片

遵 旨清結中俄積案並陳交涉情形摺

光緒十二年分司庫收支懇 飭核銷摺

巴里坤鎮標原補副游都守一律開缺另行請補摺

伊犁新設正佐各官關防印信請 飭鑄造類發摺

光緒十二年分防軍善後收支懇 飭核銷摺

卷十六

籌議承化寺僧眾遷徙事宜摺

伊犁及塔爾巴哈臺等處事權不一請旨定奪摺

關外七八兩年徵收釐金支發薪糧局費報銷摺

巴里坤八旗官兵及古城滿營遷併到防摺

代繳巴里坤領隊大臣銀印及左右翼協領銅質關

防片

委黃萬鵬等署喀什噶爾提屬並阿克蘇鎮屬各副

將員缺片

請卹故員趙奉樂等八員片

懇將畱營軍犯張得太釋回片

報交卸起程日期摺

轉解伊犁勇餉日期片

抵籍日期片

以下湘撫代奏

請俟祖母病勢稍痊卽行起程回任片

祖母病勢增劇懇開缺終養摺

謝年終 恩賞摺

恩賞祖母陳氏緞匹謝 恩摺

祖母病勢增劇懇暫行開缺摺

懇辭 賞加太子太保銜片

賞加太子太保銜謝 恩摺

陳請開缺終養摺

請俟假滿後起程赴京摺

賞祖母匾額綢緞謝 恩摺

謝年終 恩賞摺

丁祖母承重憂例應開缺片

服闋後俟病體稍痊卽行遵 旨赴京摺

晉封一等男謝 恩並請詣 闕祝 嘏摺

金華縣志卷之四

三

劉襄勤公奏稿卷一

起光緒四年三月訖光緒十五年五月謝摺彙此卷

目錄

由騎都尉世職晉爲二等男遇有三品京堂缺出開列在前謝 恩摺

補授太常寺卿謝 恩摺

補授通政使司謝 恩摺

御賞白玉柄小刀火鑷荷包等物謝 恩摺

御賞福字荷包等物謝 恩摺

幫辦新疆軍務謝 恩摺

署理 欽差大臣督辦新疆軍務謝 恩摺

御賞福字荷包等物謝 恩摺

授 欽差大臣督辦新疆軍務謝 恩摺

御賞福字荷包等物謝 恩摺

賞假三月並人蔘六兩謝 恩摺

旌賞祖母陳氏五世同堂謝 恩摺

御賞福字荷包等物謝 恩摺

補授兵部右侍郎謝 恩摺

御賞福字荷包等物謝 恩摺

京察交部從優議敘謝 恩摺

御賞福字荷包等物謝 恩摺

謝年終 恩賞摺

賞假三月並人蔭八兩謝 恩摺

賞福字及荷包等物謝 恩摺

賞假六月並人蔭八兩謝 恩摺

賞福字及荷包等物謝 恩摺

賞假回籍省視祖母謝 恩摺

加太子少保銜謝 恩摺

賜祭原任廣東陸路提督劉松山謝 恩摺





由騎都尉世職晉爲二等男遇有三品京堂缺出開列在

前謝

恩摺

光緒四年三月二十四日

奏爲恭謝

天恩仰祈

聖鑒事竊

臣

於三月二十二日在喀什噶爾行營接奉督

辦新疆軍務大學士陝甘督

臣

左宗棠恭錄行知准兵部

火票遞到光緒四年二月十二日內閣奉

上諭候補三品京堂劉錦棠智勇深沈出奇制勝用能功

宣絕域著由騎都尉世職晉爲二等男遇有三品京堂缺

出開列在前欽此聞

命自

天銜感無地謹卽恭設香案望

闕叩頭謝

恩伏念

臣

兩世從軍久隨節鉞三邊于役更領師干每虞

駑鈍之庸材莫靖鴟張之驕虜幸播

威聲於

天討兼承方略於元戎直擣龍荒廓清鶻部鼠五能而俱  
盡朽折枯摧兔三窟而俄空爍灰冰泮聊効馳驅於薄伐  
敢希甄錄之

殊恩乃荷

聖慈疊膺

懋賞執蒲濫晉殿居高爵之班列棘遙躋首備清曹之選  
榮非意及感極涕零惟有勵翼從公靖邊塵而疆以周索  
傾忱圖報馴異族而漸以華風所有感奮榮幸下懷謹繕  
摺恭謝

天恩伏乞

皇太后

皇上聖鑒謹

奏

軍機大臣奉

列聖力人、長壽

明倫彙編 家範典 卷一百一十一

旨知道了欽此

二

補授太常寺卿謝

恩摺

六月初四日

奏爲恭謝

天恩仰祈

聖鑒事竊

臣

在喀什噶爾行營接奉督辦新疆軍務大學

士陝甘督

臣

左宗棠恭錄咨行准吏部咨光緒四年四月

初四日奉

旨劉錦棠補授太常寺卿欽此謹卽恭設香案望

闕叩頭祇謝

天恩伏念

臣

猥以凡庸久參行列偶呈薄效疊拜

殊施前以師靖花門

懋賞忝分列爵茲復班聯棘寺清秩更晉儒官問朝儀而未嫻罔知攸措叨容臺之濫厠曾不逾時是誠夢寐所難期曷禁感慙之交集臣惟有恪勤勵志敬慎從公冀據葵藿之微忱少答

生成於

大造所有

微臣

感激榮幸下懷謹繕摺具

奏恭謝

天恩伏乞

皇太后

皇上聖鑒謹

奏

軍機大臣奉

旨知道了欽此

大清高宗純皇帝實錄

四





補授通政使司謝

恩摺

九月二十日

奏爲恭謝

天恩仰祈

聖鑒事竊

臣

在喀什噶爾行營承准督辦新疆軍務大學

士陝甘督

臣

左宗棠恭錄咨行准吏部咨欽奉光緒四年

七月初八日

諭旨劉錦棠補授通政使司通政使欽此謹卽恭設香案  
望

闕叩頭祇謝

天恩伏念

臣

湘中下士樗散庸材猥緣行列微勞倖晉臺

劉襄勛公奏稿

五

階顯秩

恩承

三錫躡躋同位之榮任重太常曾厠崇班之列凡茲便蕃  
之

異數已非寤寐所能安矧復

玉陛恩來銀臺忝領懍傳宣於

堯殿喉舌攸司慎出納於

虞廷敷陳宜允

殊施曩被薄效難期感激悚惶罔知所措惟有導揚  
威德永清戎索之風塵宣布

仁恩俾識

天家之雨露他日全銷兵氣漢關看振旅而還斯時速奠  
遐荒邊戶盡啟扉而臥席伸蟻悃稍慰

鴻慈所有微臣感激榮幸愚忱謹繕摺具

奏恭謝

天恩伏乞

皇太后

皇上聖鑒謹

奏

軍機大臣奉

卷之二

七

旨知道了欽此

御賞白玉柄小刀火鑷荷包等物謝

恩摺光緒五年五月初六日

奏爲恭謝

天恩仰祈

聖鑒事竊

臣

閏三月二十三日在喀什噶爾行營承准督

辦新疆軍務大學士陝甘督

臣

左宗棠恭錄咨行准兵部

火票遞到光緒五年三月十六日內閣奉

上諭劉錦棠運籌決策調度有方用能迅赴戎機實堪嘉  
尙著賞給白玉柄小刀一把火鑷一把大荷包一對小荷  
包二箇等因欽此謹卽恭設香案望

闕叩頭謝

恩祗領伏念臣防秋乏策用夏鮮功致茲餘孽之鴟張尙待勞師於鵬勦雖不逾時而告捷迅掃邊氛然既先事之莫防敢言戰績乃荷

恩言下逮兼膺

懋賞優加

鸞綵輝煌驚

寵褻之溢量鵝膏拂拭御法製於

尙方佩左分

賜火之榮光生金燧疊雙表垂紳之度彩絢錦囊

錫自

彤廷頌來紫塞瞻

天銜感伏地拜登

臣

惟有韜略窮研鉛刀勉效狼煙永靖

銷鋒鏑以長安雁磧無驚橐弓矢於不用以期仰答

鴻慈於萬一所有

微臣

感激榮幸下忱謹繕摺具

奏恭謝

天恩伏乞

皇太后

皇上聖鑒謹

奏

軍機大臣奉

軍機大臣奉



旨知道了欽此

御賞福字荷包等物謝

恩摺

光緒六年三月初九日

奏爲恭謝

天恩仰祈

聖鑒事光緒六年三月初六日准兵部火票遞到軍機處咨行齋奉單開交出

恩賞福字並荷包銀錢銀鏤食物諸珍謹卽恭設香案望闕叩頭祇領伏惟

皇上福被九垓

文同八表

乾學展珠囊之祕

大清高宗純皇帝

聖皇萬壽公壽和  
坤珍啟銀甕之祥

禹甸孟安修金貢之三品

堯廚鼎養隆玉食於萬方

臣

幸際

昌熙遠從征役領綠營於西徼未伸寸效於涓埃瞻紫氣  
之東來更沐

湛恩之汪濊

芝綸寵賁欽承

錫嘏之文

藻繪遙臨普仰

垂裳之治寶則形成麟趾

泉府源流珍則味擬龍膏

上方下逮

鴻施渥被鼇戴難勝從此永託

福林三邊溢慶同依

仁宇九塞銷兵樂包容而來獻其琛遐荒進銀鏤弩磬蒙  
煦育而既飽以德邊氓悉含甘吮滋所有微臣感激榮幸

下忱謹繕摺具

奏恭謝

天恩伏乞

皇太后

皇上聖鑒謹

奏

軍機大臣奉

旨知道了欽此

幫辦新疆軍務謝 恩摺 三月二日

奏爲恭謝

天恩仰祈

聖鑒事竊

臣

於三月十三日在喀什噶爾行營承准督辦

新疆軍務大學士陝甘督

臣

左宗棠恭錄咨行准兵部火

票遞到光緒六年正月二十一日內閣奉

上諭通政使司通政使劉錦棠著幫辦新疆軍務欽此謹

卽恭設香案望

闕叩頭謝

恩任事伏念

臣

猥以凡庸久從征役前驅勉效幸無豕突

小長功人蒙高

上

之虞

懋賞疊承時懷鵜濡之義涓埃未報夢寐難安乃復

恩綽榮頒邊籌忝佐感非常之

知遇祇倍切夫悚惶查新疆地處極西幅員遼闊朔南路  
別種族既屬蕃多中外界連藩籬尤爲緊要雖餘氛蚤經  
淨掃而武備究難稍鬆邊防之關繫匪輕幫辦之仔肩甚  
重如臣禱昧深懼弗勝惟有勉竭駑駘益加勤恪隨時咨  
商督辦新疆軍務大學士陝甘督臣左宗棠暨幫辦新疆  
軍務伊犁將軍臣金順統籌時勢妥慎圖維枕戈立先事  
之防同澤收和衷之益以仰副

皇上廩念西陲至意庶伸愚悃少答

寵施所有微臣感激下忱謹繕摺具

奏恭謝

天恩伏乞

皇太后

皇上聖鑒謹

奏

軍機大臣奉

旨知道了欽此





署理 欽差大臣督辦新疆軍務謝 恩摺 十月十日

奏爲恭謝

天恩瀝陳下悃仰祈

聖鑒事竊 臣於本年八月二十一日由喀什噶爾起程前

赴哈密緣由當經恭摺馳陳在案九月二十七日在吐魯

番途次承准督辦新疆軍務大學士陝甘督 臣左宗棠恭

錄咨會承准軍機大臣字寄光緒六年八月二十二日奉

上諭左宗棠現在料理起程來京關外一切事宜應卽交

替劉錦棠威望素著辦理新疆善後事宜諸臻妥協著署

理欽差大臣督辦新疆軍務俟劉錦棠到哈密後左宗棠

即將欽差大臣關防交給祇領所有新疆一切布置並著  
詳細告知妥爲籌辦卽行迅速北上等因欽此跪聆之下  
感悚莫名十月初六日行抵哈密十二日承准左宗棠移  
交

欽差大臣關防前來謹卽恭設香案望

闕叩頭謝

恩祇領任事伏念臣起家寒畯材質庸愚年未及冠卽隨

臣叔父已故廣東陸路提督臣劉松山轉戰各省廿載馳

驅習慣勞苦於戰守之道尙能粗窺崖略每自揣綿薄身

領偏師爲

國敵愾但令餉需接濟遇事勤慎或可倖免債事至於督師重任地方吏事自顧不學無術識闇才麤實難勝任乃蒙

聖恩高厚

倚畀非常五內屏營罔知攸措

臣

維新疆地處極邊幅員

遼闊屬茲餉源日縮隱患方殷一切軍務善後暨中外交涉諸事宜最爲艱鉅以左宗棠耆勳碩望用達體閔猶且竭慮殫精兢兢業業乃克有濟

臣

之才力旣萬不及左宗棠

棠

臣

之資望則尤不但不及左宗棠卽如金順楊昌濬暨

張曜等亦皆老成宿望非

臣

後起新進所能比竝內揆愚

聖上聖堯公利和圖 卷一  
分外審事勢重寄忝膺實不足以孚眾心而維全局設有  
貽誤 微臣 之貪榮戀棧固無解於當世之譏評而萬里巖  
疆必更煩

朝廷之擘畫捫心自省寢饋難安合無仰懇

恩施垂念邊陲重地

另簡賢能大員

畀以欽符督辦新疆軍務庶西事藉免疏虞而 臣 亦得以  
自安愚拙至現在左宗棠奉

旨陛見剋期起程 臣 自應暫行署理一切恪守左宗棠成

規與金順楊昌濬等和衷商辦恭候

欽派大員前來交代

臣

兩世叨受

國恩自關外用兵一二年間由道員

時擢卿班並邀

爵賞

異數頻仍有加無已捐軀糜頂未足云酬現際時事多艱  
臣具有天良苟心力之所能爲正當藉效涓埃勉圖報稱  
何敢意存規避自外

生成祇以力有不逮不得不據實瀝陳籲懇

矜全區區苦衷惟乞

聖明察諒邊事幸甚

微臣

幸甚所有感激悚惶下悃謹繕

摺具奏恭謝

天恩伏乞

皇太后

皇上聖鑒訓示施行謹

奏

軍機大臣奉

旨覽奏具見敬慎之忱惟朝廷正深倚畀劉錦棠務當恪守左宗棠成規將新疆一切事宜妥爲籌辦與金順張曜等和衷共濟用副委任毋庸固辭欽此

御賞福字荷包等物謝

恩摺

光緒七年正月二十四日

奏爲恭謝

天恩仰祈

聖鑒事竊

臣

於光緒七年正月十四日准兵部火票遞到

軍機處咨行齎奉單開交出

御賞福字荷包銀錢銀鏢食物等項謹恭設香案望

闕叩頭祇領訖欽惟

皇上文德誕敷

福基永紹

聖學括珠囊之祕



天庥迓銀鬻之祥

堯廚萃水陸珍奇勤萬幾而不遑暇食

虞殿頽星雲糾縵覆羣生而與物皆春六琯調陽

一人有慶

臣

仰叨

福蔭忝佩兵符職列銀臺時懷素餐之詠

寵邀錫典猥蒙

紫陛之恩

璇題與義畫同垂墨和

露湛

寶翰揭箕疇之旨福自

天申縮魚袋以章身霞裳並耀鏤鯨文而利用雪錠交輝  
擷草木之精英義不忘乎懷核沐醍醐之

醲澤味更渥於投醪甘分

八膳之珍餐傳玉屑瑞應雙歧之麥製妙銀絲備荷

鴻施曷勝鼇戴從此書紳誌感役萬里而心慄

綸言挾纊騰歡祝三多而

釐凝黼辰

帝德之包涵至廣島人皆貢寶輸琛

皇仁之煦育維深邊戶盡豐衣足食所有

微臣感激榮幸

下忱謹繕摺具陳恭謝

天恩伏乞

皇太后

皇上聖鑒謹

奏

軍機大臣奉

旨知道了欽此

授 欽差大臣督辦新疆軍務謝 恩摺 十一月二日

奏爲恭謝

天恩仰祈

聖鑒事竊 臣前准吏部咨開光緒七年八月二十四日內

閣奉

上諭通政使司通政使劉錦棠著授爲欽差大臣督辦新疆軍務等因欽此當於十月初一日拜摺

奏懇

天恩

收還成命

另簡賢能接替以重邊疆而免貽誤茲於光緒七年十一月二十日接准兵部火票遞回原摺後開軍機大臣奉旨覽奏情辭懇切具見寅畏之忱惟念劉錦棠任事經年辦理一切頗臻妥協該大臣膺茲重寄惟當將防務善後及中外交涉諸事竭力籌辦以期邊圉久安用副委任毋許固辭欽此跪聆之下感悚莫名謹卽恭設香案望闕叩頭謝

恩伏念臣猥以凡庸仰蒙

倚畀忝膺督師之任愧非負重之材自接篆以來遇事每形竭蹶內揆愚分隕越堪虞是用再三懇辭屢瀆

天聽迺復

綸綽欽承

垂訓勉之溫旨

寓驅策之深心自顧何人邀茲

殊寵不禁慙懼汗下感激涕零臣具有天良更何敢終蹈

拂

命之咎以自外

高厚生成惟有矢慎矢勤任勞任怨就才識之所克逮慄

遵

聖誨將防務善後及中外交涉諸事竭力籌辦以期邊圉

久安庶效涓埃少酬

知遇所有感悚下忱謹繕摺具

奏恭謝

天恩伏祈

皇太后

皇上聖鑒謹

奏

軍機大臣奉

旨知道了欽此

御賞福字荷包等物謝

恩摺

光緒九年正月二十八日

奏爲恭謝

天恩仰祈

聖鑒事竊

臣

承准兵部火票遞到軍機處咨行齋奉光緒

八年十一月二十八日由

內交出年終

御賞福字荷包銀錢銀鏢食物等項

臣

適患病未痊謹恭

設香案力疾強起望

闕叩頭謝

恩祇領訖欽惟我

列履力人高



皇上一永肇福基包舉宇內

富有四海法無須龜貝金刀

玉食萬方味不外舜蔥堯韭

康庶事而無遠弗屆

覆羣生而與物皆春六琯調陽

一人有慶臣久叨

福蔭忝佩兵符握銀槍而赴戎機餉嘉穀而羞每飯猥荷  
九重之賜不遺萬里而遙

揮毫揭錫福之經墨如

湛露束帶叶括囊之象服取章身緡錢譜而輪郭攸宜溢

銀坑而重輕惟準醞醕酪乳飫

聖澤以如膏困圓鹿方燦

御園之碩果凡此

鴻施之稠疊實覺鼇戴之難勝

臣惟有配命自求同袍學

賦效卻金而修清節常懷核以慄素餐從茲三命益恭載

賡戩穀罄宜之什更祝

萬年有道永庇豐衣足食之庥所有

微臣感激榮幸下忱

謹繕摺叩謝

天恩伏乞

皇太后

皇上聖鑒謹

奏

軍機大臣奉

旨知道了欽此

賞假三月並人澆六兩謝

恩摺

四月初九日

奏爲恭謝

天恩仰祈

聖鑒事竊

臣

承准軍機大臣字寄光緒九年三月初三日

奉

上諭劉錦棠著再賞假三月在營安心調理毋庸開缺並發去人澆六兩以資調攝等因欽此當卽恭設香案望

闕叩頭祇領謝

恩訖伏念

臣

質同蒲柳養愧澆苓屬以邊寄忝膺未先奏

起癥之效深恐病軀貽誤遂瀝陳乞退之情方五夜以難

安莫報涓埃於此日冀餘生之靜攝猶供驅策於將來迺  
蒙

天語渥褒

造命之微權獨運

聖慈曲逮駐年之珍藥遙頒此在耆舊夙勳已屬非常之  
寵遇矧以淺資強齒尤爲異數之

榮施感悚私衷淪肌浹髓臣惟有恪遵

諭旨專意服調如其仰荷

殊恩沈疴漸起卽當勉圖效命盡瘁何辭斷不敢稍耽安  
逸自外

生成以期仰答

高厚鴻慈於萬一所有微臣感激下忱謹繕摺叩謝

天恩伏乞

皇太后

皇上聖鑒謹

奏

軍機大臣奉

旨知道了欽此

222 1

旌賞祖母陳氏五世同堂謝

恩摺

九月二十六日

奏爲

微臣

叩謝

天恩恭摺仰祈

聖鑒事竊

臣

閱邸鈔光緒九年六月十九日內閣奉

上諭卞寶第奏命婦五世同堂籲懇恩施一摺原任廣東提督劉松山之母現任通政使司通政使劉錦棠之祖母陳氏年近八旬親見七代五世同堂洵爲熙朝人瑞加恩著賞給御書匾額一方頒發以示殊榮所有例應旌賞之處著禮部議奏欽此祇領之下欽感莫名謹卽恭設香案望



闕叩頭謝

恩伏念

臣

祖母并日躬操桑榆景迫遭逢

皇世早分一命之榮渥被

皇仁疊晉五花之

誥茲復以五世同堂之慶荷

九重

逾格之施

寵錫褒嘉

天語則輝生子舍

璇題綽楔

奎章則捧出

上方凡茲未盡之年華悉沐非常之

雨露臣邊陲于役侍奉久疏聞

命自

天感

恩無地惟有益矢勤慎圖報涓埃遵慈訓而勉竭駑駘體

宸廑而永清瀚海以期仰答

高厚鴻慈於萬一所有微臣感激榮幸下忱謹繕摺具陳

叩謝

天恩伏乞

外  
事  
力  
人  
事  
同  
卷  
一

登臺堊堊公身和

皇太后

皇上聖鑒謹

奏

軍機大臣奉

旨知道了欽此

三

御賞福字荷包等物謝

恩摺

光緒十年正月十六日

奏為恭謝

天恩仰祈

聖鑒事竊

臣

承准兵部火票遞到軍機處咨行齋奉光緒

九年十一月二十八日由

內交出年底

御賞福字荷包銀錢銀鏢食物等項謹恭設香案望

闕叩頭謝

恩祇領訖欽惟我

皇上文教覃敷

列傳卷之八十五

聖皇聖德  
福基永奠

珠囊絢彩包容大一統之規

銀甕翔機珍異卻萬方之貢

康庶事而不遑暇食交梨火棗並獻

堯廚

覆羣生而與物皆春燕粉雞絲同歌

舜日

一人有慶億姓臚歡臣忝竊兵符遠違

黼座念何日得酬萬一伏地滋慙感頻年拜

賜九重自

天申命

恩流藻翰堯文偕義畫同昭

寵佩荷囊紫綬共金章一色泉爲府而利用敢忘撲滿之  
箴銀湧地以呈祥卽是不貪之寶而且香浮麥隴隨瓊糜  
玉糝以齊

顏潔比蓮房合絳質紅襦而並

錫凡

鴻施之俯逮實鼇戴以難勝臣惟有益矢慎勤仰承

福蔭佩韋絃而力籌邊備式金玉而砥礪廉隅果拜

天家詩懍素餐之訓甘分士卒食先正席之嘗從茲貢寶

列聖勳公家高

三

聖皇聖公多利圖一  
輸琛鬯

皇風者卅六國還祝

宵衣

旰食介

景福於億萬年所有

微臣

感激榮幸下忱謹繕摺具陳恭

謝

天恩伏乞

皇太后

皇上聖鑒謹

奏

軍機大臣奉

旨知道了欽此

列聖勅諭高宗

三





補授兵部右侍郎謝

恩摺

正月十六日

奏爲恭謝

天恩仰祈

聖鑒事竊

臣

於上年十一月初八日承准吏部咨開欽奉

諭旨補授兵部右侍郎旋經繕摺瀝陳下悃籲懇

收回成命茲於光緒十年正月初五日准兵部火票遞到

原摺後開軍機大臣奉

旨覽奏情詞懇摯具見悃忱該侍郎向來辦事認真朝廷  
深資倚任惟當勉圖報稱將新疆應辦事宜妥爲經畫一  
面加意調治以慰塵系毋許固辭欽此跪讀之餘沐

金華先生公考和  
三  
幃覆之深仁愈寵驚以無地拜除固懷慚於午夜瀆請又  
恐負夫

生成當卽恭設香案望

闕叩頭謝

恩伏念

臣

學愧芸編材同樗散會遠征於西塞已忝鷓班

復晉貳於中樞未嫻豹略馳驅敢許苦二豎之侵尋艱大  
益投非孱軀之可任謹蟻忱之披瀝懇

鸞綽之允收迺荷

溫詔褒嘉苟有微長必錄更蒙

聖懷眷顧若惟其疾之憂感

君父之矜全極臣工之遭際論階資則尚多先達對儕輩以何顏論科目則起自我行實縹緲之失業勞師遠戍功未奏乎趙屯無術貽譏讀久疏於霍傳戴

恩至重循分曷安

臣

惟有暫領偏師恆枕戈以勵志權持

使節願銷甲以事農體

大造之好生期祛夙疾飭邊庭之要治力固巖疆庶以稍答

高厚鴻慈於萬一至若新設各官現已次第委署其有未盡事宜以及營餉兵制臣必當力疾統籌迅速擬辦恭候聖裁屆時再乞

恩准收銷兵符俾臣開缺卸差回籍調養以圖異日得效  
犬馬之勞合併陳明所有微臣感激榮幸下忱謹繕摺叩

謝

天恩伏乞

皇太后

皇上聖鑒謹

奏

軍機大臣奉

旨知道了欽此

御賞福字荷包等物謝

恩摺

光緒十一年二月初二日

奏爲恭謝

天恩仰祈

聖鑒事竊

臣

承准兵部火票遞到軍機處咨行齋奉光緒

十年十一月二十八日由

內交出年終

御賞福字荷包銀錢銀鏢食物等珍品到

臣

行營謹卽恭

設香案望

闕叩頭謝

恩祇領訖伏念

臣

猥以庸愚從征塞徼驟領封圻之寄已

深惶悚之忱茲以鳳籥新更

鴻施復逮

頒御題之

嘉福

敷錫九疇

普春色於太和

包容萬類重以白榆星朗輝映裏蹠絳果霞鮮勻圓鶴頂  
劈將珠顆配宜剝棗之甘屑作瓊糜潤到滴酥之味領入  
珍之貴品

寵渥醴酬拜

十資於

尚方香生匕箸凡此

恩榮之特被實非夢寐所敢期

臣

惟有震恐省愆師干勵

職勉攄丹悃辯貞亮爲一縈慎懍素餐矢忠誠以百鍊懸  
奎章於日月永靖鑄兵帶劍之風羣

鼎祚之河山仰紆

旰食

宵衣之念所有

微臣

感激下忱謹繕摺叩謝

天恩伏乞

皇太后



皇上聖鑒謹

奏

軍機大臣奉

旨知道了欽此

京察交部從優議敘謝

恩摺

四月初九日

奏爲恭謝

天恩仰祈

聖鑒事竊

臣

閱邸鈔光緒十一年正月二十四日奉

上諭朕奉

慈禧端佑康頤昭豫莊誠皇太后懿旨三載考績爲國家  
激揚大典中外滿漢諸臣有能恪共職守勞勩最著者允  
宜特加獎敘以示優眷茲當京察屆期吏部開單題請甘  
肅新疆巡撫劉錦棠鎮撫邊陲才猷卓著著交部議敘欽  
此跪聆之下感悚莫名伏念臣起自戎行忝膺疆寄未有

涓埃之報屢蒙

高厚之施分封而

寵以男任晉秩則儕諸卿長溯整旅出關而後旋領

欽符際設官經野之時何知吏治乃以

激揚之大典遽邀

甄別於邊陲間

命滋榮撫躬知愧臣惟有冰兢自凜勉竭愚誠以期仰答

鴻慈於萬一所有微臣感激下忱謹摺恭謝

天恩伏乞

皇太后

皇上聖鑒謹

奏

軍機大臣奉

旨知道了欽此



御賞福字荷包等物謝

恩摺

光緒十二年  
二月十二日

奏爲恭謝

天恩仰祈

聖鑒事竊

臣於光緒十二年正月二十九日承准軍機處

咨開年終

恩賞福字荷包銀錢銀鏢食物等項交兵部由驛馳遞到

臣當卽恭設香案望

闕叩頭祇領訖伏念臣幸際

昌期愧無報稱望

北辰於萬里賦天保以彌殷處西域者十年物土宜而未

辨茲以始和布令

慶賜遂行

昭雲漢以摛文衍箕疇而

賜福綴服耀纓纒之色

寵重銀章登筵增七鬯之光

珍頒玉食

臣

惟有謹加什襲時懷素餐勸戎索以農桑務

安鴻雁戴

堯天之日月上頌鴛鴦所有

微臣

感激榮幸下忱謹繕摺

恭謝

天恩伏祈

皇太后

皇上聖鑒謹

奏

軍機大臣奉

旨知道了欽此





謝年終 恩賞摺

光緒十三年二月初八日

奏爲恭謝

天恩仰祈

聖鑒事竊 臣承准軍機處咨開光緒十二年

恩賞福字荷包銀錢銀鏤食物等項交兵部由驛馳遞到

臣當卽恭設香案望

闕叩頭祇領訖伏念 臣濫膺邊寄未效寸長鵜濡恆慄夫

丹忱鶴俸滋慚於素食茲以新更歲紀仰沐

宸慈

法義畫以垂型自

天錫祉敷箕疇而

建極而地熙春重以章燦七襄紫羅紉佩幣登三品赤仄

同頌果餌風香潤到滴酥之味粉醅雪潔佐將餐玉之方

寵渥鴻施悚深黿戴臣惟有倍加震省冀叶履綏體

宵衣旰食之勤下修職守際嶽貢川珍之盛上頌

昇平所有微臣感激下忱謹繕摺恭謝

天恩伏乞

皇太后

皇上聖鑒謹

奏

硃批知道了欽此

三  
...  
...

...

卷一

三

賞假三月並人蔭八兩謝

恩摺

閏四月二十七日

奏爲恭謝

天恩並陳愚悃仰祈

聖鑒事竊

臣

承准軍機大臣字寄光緒十三年三月二十

六日奉

上諭劉錦棠奏請開缺賞假一年省親就醫一摺覽奏情詞肫摯殊深廬系現在新疆地方緊要所有屯田遣勇各事宜尙須妥籌經理該撫久膺邊寄辦事認真於新疆一切情形尤爲熟悉朝廷眷顧西陲正資倚畀雖據陳情懇切惟當此時事艱難自應國爾忘家益圖報稱劉錦棠著

賞假三月並加恩賞給人薄入兩在任安心調理毋庸開  
缺將此諭令知之欽此跪聆之下感激涕零當卽恭設香  
案望

闕叩頭祇領伏念

臣

謬膺重寄時懷素餐屬當二豎之侵

尋仰荷

九重之眷注

寵頒異數珍藥頻加

獎勵微勞

溫綸曲逮

擴天地生成之量極古今際遇之榮刻骨何言糜身莫報

臣敢不節宣其氣飲食以時冀延草木之年庶獲涓埃之效惟臣自遠離鄉土久缺晨昏負相依爲命之心抱貪祿忘親之愧西山景短

北闕恩長非蒙

天鑒垂憫照於此時恐至人子不忍言之一日查邊事屯田爲要現已

奏定章程卽各軍欠餉未清亦荷指提協濟計協款到臣之日正假期屆滿之時臣自當力疾從公妥籌布置發清舊欠募補新軍悉改坐糧以資節餉期於事濟不敢後時願及親存再申前請未到還家之日魂夢皆驚倘邀



錫類之恩須臾亦幸寸私可遂萬險奚辭臣近來痰嗽未除猶苦昏眩幸交夏令腳氣漸平日事按摩強能步履仍當趕緊醫治以期上慰

宸廑謹恭摺叩謝

天恩並陳愚悃伏乞

皇太后

皇上聖鑒謹

奏

味批知道了欽此

賞福字及荷包等物謝

恩摺

光緒十四年二月初五日

奏爲恭謝

天恩仰祈

聖鑒事竊

臣於光緒十四年正月二十八日承准軍機處

咨開十一月二十八日由

內交出年終

恩賞福字荷包銀錢銀鏢食物等項交兵部由驛馳遞到

臣適微臣患病未痊謹恭設香案力疾望

闕叩頭祇領伏念臣猥以弱植忝綰邊符以采薪而疊被

溫綸期勿藥而久無明效終朝竊位清夜疚懷茲當歲紀

新更復荷

宸慈下逮承

御題之殊寵

敷錫九疇仰

聖化於太和

包含萬類重以金登三品輝映天錢果列百名華徵地產

調玉屑而粉養色潔擘銀絲則匕箸香來叨逾格之

鴻施實悚衷而鼇戴臣惟有冰淵震省衣帶恆銘胥飲和

食德之倫歡臚含哺上納賚歸琛之頌慶紀

昇平所有微臣感激下忱謹繕摺叩謝

天恩伏乞

皇太后

皇上聖鑒謹

奏

硃批知道了欽此



賞假六月並人蔭八兩謝

恩摺

十一月二十二日

奏為恭謝

天恩仰祈

聖鑒事竊

臣

前奏假期已滿病難速痊仍懇開缺回籍就

醫藉遂烏私一摺茲於光緒十四年十一月十六日差弁

齎回原摺奉

硃批據奏病久未痊殊深系念新疆地處邊陲責任綦重

該撫威望素著倚畀正殷著再賞假六月安心調理毋庸

開缺並賞給人蔭八兩俾資調攝欽此並由兵部火票遞

到

列傳卷之八

恩賞人濩八兩臣當卽恭設香案望

闕叩頭祇領伏念臣邊符久玷夙疾未瘳屢瀆

宸嚴時深內疚茲復仰邀

眷注渥荷

矜全

賞逾格之假期

溫綸曲逮

出尙方之珍藥

異數頻頒

朝廷高厚之施

恩榮不次臣子遭逢之盛古近罕倫極淪肌浹髓以難名  
雖糜頂捐軀而莫報臣惟有彌加攝養殫竭愚誠冀枯榦  
之回春上紓

慈念策庸樗以效職稍答

生成所有

微臣

感激下忱謹恭摺叩謝

天恩伏乞

皇太后

皇上聖鑒謹

奏

硃批知道了欽此

大清高宗純皇帝實錄卷一百一十五





賞福字及荷包等物謝

恩摺

光緒十五年二月初二日

奏爲恭謝

天恩仰祈

聖鑒事竊

臣於光緒十五年正月二十五日承准軍機處

咨開十一月二十八日由

內交出年終

恩賞福字荷包銀錢銀鏢食物等項交兵部由驛馳遞到

臣當卽恭設香案望

闕叩頭謝

恩祇領伏念

臣猥以輕材久庸重寄荷

恩慈之疊沛慚報稱之毫無茲當鳳籥新更復沐

龍綸下逮

九疇敷錫拜

特眷於

奎章

萬類包容

凝太和於

辰極貢金品重赤仄同頒

賜果名嘉瓊芬並屑潤到滴酥之味

寵渥醍醐參將切玉之方潔伴冰雪凡此

鴻施之被實滋鼇戴之深臣惟有震省身心咸銘衣帶進  
天保升恆之祝上答

丹宸惟日用飲食之經下詒黎庶所有微臣感激下忱謹

繕摺叩謝

天恩伏乞

皇太后

皇上聖鑒謹

奏

硃批知道了欽此



賞假回籍省視祖母謝

恩摺

二月二十五日

奏爲恭謝

天恩仰祈

聖鑒事竊

臣

於光緒十五年二月二十三日准吏部咨開

光緒十四年十二月二十八日內閣奉

上諭劉錦棠奏懇恩展假回籍省視祖母一摺覽奏情詞懇切自應勉如所請劉錦棠著再賞假六箇月准其回籍省視假滿卽行回任以資倚畀甘肅新疆巡撫著魏光燾暫行護理欽此跪聆之下感激涕零伏念臣自膺邊寄未效涓埃祇緣烏烏之私莫解黃牛之執屢申曲請上冒

宸嚴方兢惕以弗遑乃

矜全之備至

特頒溫語憫一念之愚忱

優展假期拜

重申之

寵命雖碎骨粉身而莫報亦淪肌浹髓以何言省親而

詔奉

九重固臣子非常之遇

錫類而

恩銜萬里尤古今罕有之

榮臣惟有趕緊料理遄歸省視一俟假期屆滿遵卽馳回  
本任仍舊供職以冀仰答

高厚生成於萬一除交卸起程日期恭摺陳報外所有微  
臣感激下忱謹繕摺叩謝

天恩伏乞

皇上聖鑒謹

奏

硃批知道了欽此





賞加太子少保銜謝

恩摺

五月初十日

奏爲恭謝

天恩仰祈

聖鑒事竊照臣於本月初二日行次蘭州恭閱邸鈔光緒十五年正月二十二日欽奉

慈禧端佑康頤昭豫莊誠壽恭欽獻皇太后懿旨各省封疆大吏均爲國家倚任之臣其久歷戎旃熟諳韜略者懋建殊勳賢勞尤著現在歸政伊邇允宜分別施恩甘肅新疆巡撫劉錦棠著賞加太子少保銜等因欽此當卽恭設香案望

闕叩頭謝

恩伏念臣志慕請纓術疏鼓篋偶與小戎之列遂領疆圻未登大雅之堂何堪師保茲以

建中德茂

歸政禮成合萬國之歡心

帝隆孝養

邁百王之大法世仰

徽音乃復

俯念微勞

溥加懋賞輔導而愧無心學職備

東宮聯翩而

寵晉頭銜輝生西域自

天聞

命伏地滋慙臣惟有倍矢靖其力圖報稱考漢代屯邊之

策時幸能逢釋禮經教胄之文身先思慎所有微臣感激

下忱理合繕摺叩謝

天恩伏乞

皇上聖鑒再臣此摺係借用陝甘總督關防合併陳明謹  
奏

硃批知道了欽此

列聖力人



賜祭原任廣東陸路提督劉松山謝

恩摺

五月初十日

奏爲恭謝

天恩仰祈

聖鑒事竊照臣於本月初八日行次蘭州恭閱邸鈔光緒十五年正月二十二日欽奉

慈禧端佑康頤昭豫莊誠壽恭欽獻皇太后懿旨邇來各省軍務一律敕平朝廷安不忘危每思疆場之臣身經百戰齋志捐軀亮節孤忠時深憫念本年二月舉行歸政典禮論功行賞普徧寰區更宜澤及九原以褒忠蓋原任廣東陸路提督劉松山著賜祭一壇等因欽此伏念臣少遭

家難惟臣叔是依長事戎行亦臣叔所教忠義實根諸性命至今如見其生平

恩榮且及於子孫永世不忘夫報稱茲復仰蒙

慈命

追念成勞

秩元祀而記功宗三代之典章斯重

聽鼓鼙而思將帥四方之觀感尤深臣敢不慎守前型勉

圖後效奉晨昏於萬里祖孫懷

錫類之仁通魂夢於九原存沒共匪躬之義所有微臣感

激下忱理合繕摺叩謝

天恩伏乞

皇上聖鑒再此摺係借陝甘總督關防合併陳明謹  
奏

硃批知道了欽此





劉襄勤公奏稿卷二

起光緒六年四月  
訖光緒七年八月

目錄

遵 旨密陳新疆西路邊防情形摺

前赴哈密籌商邊防善後事宜暨起程日期摺

布置南路暨哈密等處防務摺

增設行營糧臺並遴員督辦臺務片

遵 旨統轄哈密及鎮迪道屬文武辦理緣由摺

請免余虎恩騎射片

奏籌邊重寄才力難勝再陳下悃摺

請 旌烈婦劉李氏摺

首逆逋誅請 飭使臣向俄理論解送懲辦摺

新疆命盜案件請暫行變通辦理摺

請 飭河南照額協解嵩武軍餉片

新疆南路五次剿平邊寇摺

額懇 節哀摺

請 卹蕭迎祥摺

請 旌烈婦蕭賀氏片

烏魯木齊提標營制未復請 飭部緩催造冊摺

提標及各路副參游都關防遺失請 飭部補鑄片

新疆南路西四城興修各工完竣竝籌辦應修各工

摺

湘軍文武員弁積勞病故請 卹摺

請 卹丁翰片

接收伊犁及分界事宜現籌辦理情形摺  
科布多所屬布倫托海無庸撥營駐紮片

回子郡王之子承襲世爵摺

回部坎巨提呈進 貢沙金片

擒獲安夷監禁已久分別辦理摺



遵 旨密陳新疆西路邊防情形摺

光緒六年四月初二日

奏爲遵

旨密陳新疆西路各城邊防情形一摺仰祈

聖鑒事竊

臣

於三月十三日承准軍機大臣密寄正月二

十一日奉

上諭本日據王大臣等會議籌備邊防事宜一摺此次俄國與崇厚所議條約章程多所要求斷難允准已改派曾紀澤前往再議惟該國不遂所欲恐其伺隙啟衅必須有備無患以折狡謀新疆防務緊要左宗棠熟悉邊情老於軍事卽著將南北兩路邊防通盤籌畫務臻周密本日有

旨令劉錦棠幫辦新疆軍務劉錦棠金順兩軍均在前敵尤爲喫重並著隨時偵探防範會商左宗棠妥爲布置錫綸現駐塔城兵力太單且與俄人偪處宜策萬全如能就地選募邊人招徠蕃屬亦可壯我聲威著與左宗棠商酌辦理棍噶札拉參久在邊疆聞爲俄人所憚該呼圖克圖前經給假三年現當用人之際著錫綸傳旨令其銷假赴營統帶所部以爲犄角錫綸駕馭有方當可收指臂之助左宗棠前有移營哈密之奏究竟移紮該處能否聯絡聲勢有裨前敵是否於後路不致懸隔可以兼顧該督當斟酌情形妥籌進止至練生軍以防師老足糧食以計久長

聯兵勢以完後路均係目前要著並著悉心經畫以固疆  
圍現在時勢艱難全賴該督等爲國宣勤同仇敵愾所有  
一切機宜著於奉旨一月內迅速具奏以慰廑系將此由  
五百里各密諭知之欽此竊惟俄國前乘回變攘竊伊犁  
迫官軍廓清天山南北又復藪我逋逃不行縛送血氣之  
倫固已同深憤懣此次因退還伊犁多所要挾界務商務  
各條枝節橫生居心尤爲險譎現在曾紀澤銜

命往俄再與辯議該國知前約決難允准或者稍抑狡謀  
俯首以從亦未可定惟戎心叵測凡在邊疆將士自應先  
事預防以期有備無患若果兵衅一開則天山南北兩路



均關緊要自非合力圖之不可 臣承准督辦新疆軍務大學士陝甘督 臣左宗棠咨送二月二十三日拜發摺稿以精河一帶堅扼要隘之任責之伊犁將軍金順以塔爾巴哈臺防務責之參贊大臣錫綸而派廣東陸路提督張曜率師由阿克蘇亦嶺逕趨伊犁派 臣分兵取道烏什西繞布魯特遊牧地亦指伊犁以斷俄人圖援伊犁之路如此路難進則屯兵喀什噶爾外卡遙張窠入俄境之勢使知內患堪虞時勤狼顧不敢復爲豨突老成至計固已無微弗喻 臣查烏什繞赴伊犁從前本有換防官兵往來捷徑果能由此直擣大城則避實擊虛出奇制勝洵爲兵家上

策惟該處布魯特向屬回地是以官兵往來如行衽席之上自同治年間回疆不靖該布魯特卽爲俄人誘往服屬現在烏什北行二百餘里出拜代里達坂卽係俄境今昔情形倏然迥異烏什地勢偏北由喀什噶爾前往該城已十餘站與臣現駐之回疆西路四城相距寫遠難於兼顧此烏什之西未便進兵之實在情形也回疆幅員廣莫纏回土回布魯特族種繁多民志未定控制安撫本未易言而喀什噶爾英吉沙爾葉爾羌和闐四城尤有甚難者按阿克蘇拜城一帶與伊犁相值以地勢考之西路四城斗出伊犁幾二千里沿邊卡倫與俄國圖爾齊斯坦總督所

駐之塔什罕七河巡撫所駐之阿里木臺均不甚遠而納  
林橋托和瑪克窩什阿來等俄城在在緊鄰伏讀  
諭旨尤爲喫重等因仰見

聖明洞燭無遺下懷莫名欽服臣自肅清新疆逐日訓練  
士馬如臨大敵而四年之九月十月五年之正月八月陝  
回安集延布魯特等逆四次犯邊幸仗

天威隨時撲滅其爲不可一日弛備已可概見再查喀什  
噶爾由伊斯里克小路出卡至俄地之亦特木梭計程一  
千二百餘里與烏什往伊犁之路相會較烏什前去約多  
七百餘里而可省繞走烏什之十餘站似進兵稍爲便利

然由喀什噶爾啟行三百四十里至鐵勒克達坂下亦卽  
俄屬布魯特各部若以孤軍深入不特運道必有疏虞卽  
軍行亦難暢達臣現部馬步萬人防守瑪喇爾巴什以至  
和闐各城綿長三千里差敷分布如分隊涉歷俄境遠圖  
進取就現在兵力實屬有所未逮且所部將士久從征役  
疲病頗多上年咨商陝甘督臣左宗棠派隊出關以資換  
補已經左宗棠

奏明調派題奏提督陝西漢中鎮總兵譚上連記名提督  
甯夏鎮總兵譚拔萃等統率前來雖餉項奇絀軍數未能  
多增而挑補生軍裁汰疲弱仍可足成萬人原額擬俟陸

續到齊加以整頓可期士氣常新將來天山北路一有舉動或須抽撥隊伍分屯喀什噶爾外卡以張窠入俄境之勢自應遵照左宗棠原

奏妥慎辦理至偵探敵情本屬要務惟彼族稽查嚴密必使夷類前往方不致滋生事端

臣

於四年夏間商明左宗

棠招募有身家之布魯特兩哨充當馬隊並令該管頭目出具切實保結俾其輪班扮作商民往俄偵探較易得實遇有俄國確實舉動仍隨時咨報左宗棠以便代爲馳奏仰慰

宸廑所有一切機宜

臣

才識短淺何敢率陳緣欽奉

諭旨於一月內迅速具奏謹將西路四城防務情形撮舉  
大概恭摺密陳伏乞

皇太后

皇上聖鑒訓示施行謹

奏

軍機大臣奉

旨另有旨欽此



軍機大臣字寄光緒六年五月十三日奉

上諭劉錦棠奏覆陳新疆西路各城邊防情形一摺所陳進兵道路及偵探敵情各節尙爲詳悉該京卿所部現在防守瑪喇爾巴什以至和闐各城地段遼闊務當就現有兵力嚴密布置以期有備無患喀什噶爾等城邊境多與俄境毗連尤宜不動聲色勤加偵探隨時咨商左宗棠相機防範毋稍疏虞將此由五百里諭令知之欽此





前赴哈密籌商邊防善後事宜暨起程日期摺

八月二十一日

奏爲

微臣

前赴哈密籌商邊防善後各事宜暨由喀什噶

爾啟程日期恭摺陳明仰祈

聖鑒事竊維新疆西四城地方毗連夷境道路綿長邊防

事宜較他處尤爲喫重

臣

以菲材駐防要地兼之善後諸

務頭緒繁多恆恐勿克勝任致有貽誤因擬輕騎減從親

赴哈密與督辦新疆軍務大學士陝甘督

臣

左宗棠面商

一切機宜八月十四日接閱左宗棠來函亦有沿邊防務

如已周密應卽赴哈一行以便詳細熟籌等語自當遵照

辦理查俄國前有兵屯紮喀屬界外嗣據探報業已悉數

撤回現在邊卡地方一律安靜布魯特各部落亦俱恭順  
惟安集延種族切近邊卡向稱狡悍聞臣遠赴哈密難保  
不旬結不逞野回復圖滋擾當經傳集所部將領道員羅  
長祐陝西陝安鎮總兵余虎恩陝西漢中鎮總兵譚上連  
記名提督董福祥張俊等密示戰守機宜並飭令和衷共  
濟分任防剿毋得互相推諉至各營暨善後稅釐各局日  
行尋常文件檄委羅長祐代拆代行其事關緊要者包封  
遞臣行次自行覈辦以昭慎重現在布置業已就緒擇於  
八月二十一日攜帶木質關防自喀什噶爾起程查由喀  
至哈往返一萬餘里倍道兼行年內當可回喀什不致久延

除咨報左宗棠知照外所有微臣前赴哈密暨由喀什噶  
爾起程日期謹恭摺馳陳伏乞

皇太后

皇上聖鑒謹

奏



軍機大臣字寄光緒六年九月二十八日奉

上諭劉錦棠奏前赴哈密與左宗棠籌商邊防善後各事宜一摺覽奏已悉左宗棠現在來京陛見前有旨令劉錦棠署理欽差大臣督辦新疆軍務劉錦棠行抵哈密卽祇領關防任事所有新疆一切布置務向左宗棠詳細諮商遵照辦理並將邊防事宜與金順張曜和衷商榷切實籌辦諸將士久戍西陲亦宜威惠兼施俾得踴躍用命隨時分飭各軍認真防守不得稍涉大意亦不得輕舉妄動以靖邊疆將此由五百里諭令知之欽此



軍機大臣字寄光緒六年十一月初四日奉

上諭左宗棠奏交卸起程並酌帶馬步隊入關各摺片已  
明降諭旨以劉錦棠署理欽差大臣督辦新疆軍務命張  
曜署理幫辦軍務楊昌濬護理陝甘總督矣西陲軍事緊  
要劉錦棠責無旁貸務當按照左宗棠布置成規妥爲籌  
辦以期動合機宜張曜已署理幫辦軍務著劉錦棠與金  
順張曜隨時彼此會商和衷共濟毋得各存意見以副委  
任左宗棠現在馳赴蘭州交卸督篆楊昌濬一切有所遵  
循地方應辦事宜卽著悉心經理毋得稍有貽誤所有藩  
臬篆務著左宗棠揀派妥員署理該督此次酌帶馬步二



千餘名入關赴張家口駐紮應抵京後再行相機辦理另片奏請將哈密鎮迪道歸劉錦棠統轄等語哈密及鎮迪道所屬文武地方官均暫歸劉錦棠統轄將此由六百里諭知左宗棠劉錦棠金順張曜並傳諭楊昌濬知之欽此

布置南路暨哈密等處防務摺

十一月二十日

奏爲布置南路暨哈密等處防務恭摺馳陳仰祈

聖鑒事竊

臣

於本年十月十九日在哈密行營承准軍機

大臣字寄光緒六年九月二十八日奉

上諭劉錦棠奏前赴哈密與左宗棠籌商邊防善後各事宜一摺覽奏已悉左宗棠現在來京陛見前有旨令劉錦棠署理欽差大臣督辦新疆軍務劉錦棠行抵哈密卽祇領關防任事所有新疆一切布置務向左宗棠詳細諮商遵照辦理並將邊防事宜與金順張曜和衷商榷切實籌辦諸將士久戍西陲亦宜威惠兼施俾得踴躍用命隨時

分飭各軍認真防守不得稍涉大意亦不得輕舉妄動以靖邊疆將此由五百里諭令知之欽此跪聆之下仰見朝廷綏定邊陲之至意寸衷欽感莫可名言伏念臣才麤識闇望淺資輕猥蒙

聖恩高厚

倚畀非常力小任重時懼弗勝臣自本年十月十二日接

篆任事謹於十五日專摺恭謝

天恩並瀝陳下悃籲懇

另簡賢能接替以免貽誤區區苦衷計邀

聖慈察諒然臣在事一日自當盡一日心力以藉圖報稱

於萬一竊查新疆南北兩路形勢並重北路防務歷經左宗棠金順會同籌辦諸臻妥協卽將來有應相機變通之處臣當與金順等體察情形隨時會商辦理惟南路防務左宗棠現由哈密抽隊北行臣仍應駐哈扼南北總匯之地以便兼顧局面一變不得不另爲布置西四城爲極邊衝要內則幅員遼闊諸事草創種類蕃雜厥性難馴外則鄰邦密邇沿邊一帶路徑紛歧在在皆屬要害以言安內靖外實非容易臣在彼數載凡事與左宗棠隨時商辦幸免隕越自本年八月間由喀什噶爾東赴哈密當經傳集文武各員面授機宜飭令分任營局各務數月以來接據

文報知各員尙能循分供職和衷共濟地方一律安謐塞上烽火無驚惟此乃一時權宜之計實非可久之道臣旣移駐哈密西四城軍民諸事件自難一一遙制而各將領局員才分相埒事權不一非得文武兼資威望夙著之大員前往督率局勢終嫌渙散邊事難期萬全現已緘商張曜請其率帶全部移防喀什噶爾英吉沙爾兩城總辦西四城邊防善後暨中外交涉諸事宜喀英兩城與俄境尤爲切近張曜宜自喀城就近調度壹是嵩武一軍近新募生力軍千餘人壁壘一新移防後臣當於現駐喀英兩城各軍內飭題奏提督董福祥所統之董字軍步隊中左右

三營題奏提督張俊所統之定遠軍步隊中左右三營記名提督夏辛酉張宗本所帶之恪靖馬隊右後兩營併交董福祥統領移駐葉爾羌和闐等處並飭喀什噶爾防營步隊一旗纏回布魯特馬隊各一旗仍駐喀城計共馬步十一營旗概行撥歸張曜節制調遣俾厚兵力至阿克蘇烏什兩城籌備亦須周密嵩武軍開拔後擬於現駐西四城各軍內飭總理營務處道員羅長祐將所部老湘右軍五營中軍右營一營共步隊六營裁汰疲弱併爲四營另撥記名提督譚慎典陳建厚所帶之白旗壽字馬隊各一營共馬步六營歸其統帶移防阿克蘇瑪納爾巴什一帶

飭陝西漢中鎮總兵譚上連率所部恪靖馬隊中前左三營並將現駐葉和兩城陝西陝安鎮總兵余虎恩所部老湘左軍步隊五營裁汰疲弱併爲三營共馬步六營交譚上連統帶移駐烏什又甘肅甯夏鎮總兵譚拔萃記名提督譚和義上年經左宗棠

奏明檄由湖南招募步隊二千數百人西來時以老湘馬步諸軍弁勇有久役思歸疲病不堪復用者擬分別假遣以譚拔萃等所募新勇填補缺額茲旣於老湘步隊十一營內裁減四營所有譚拔萃等新募隊伍可無庸再行裁拆併哈密原有親軍步隊暨旌善馬隊各起前經左宗棠

奏派營務處鹽運使銜分省補用知府王詩正帶赴張家口駐紮已於本月二十日啟行臣須添設親軍現於譚拔萃等新募四營中提撥兩營並檄調臣原駐喀城親兵一併來哈填紮營壘俾免空虛譚拔萃等新募之軍除調駐哈密兩營外其餘兩營以一營交譚和義督帶暫駐吐魯番聽候調撥以一營交譚拔萃督帶進駐庫車查庫車哈喇沙爾兩城馬步各防營向歸記名提督易開俊節制調遣易開俊業經病故現委譚拔萃接統以一號令而專責成以上布置各情形臣前與左宗棠當面諮商亦以爲然卽當趕爲部署用速戎機屬茲時事多艱邊防喫緊臣當



與金順張曜督飭諸將認真整頓嚴密戒備仍不准先事  
張皇稍動聲色務期在在不露戰之迹時時不忘戰之念  
養精蓄銳靜以觀變臣維古之善用兵者每多意思安閒  
如不欲戰而戰則必勝臣雖不足以語此竊願與金順張  
曜互相勉勵以期上紓

宵旰西顧之憂所有

微臣

布置南路八城暨哈密等處防

務各緣由理合恭摺陳明是否有當伏乞

皇太后

皇上聖鑒訓示謹

奏

軍機大臣字寄光緒六年十二月十五日奉

上諭劉錦棠奏布置防務一摺劉錦棠現在駐紮哈密新疆南路防務自應另籌布置西四城事務繁雜且近俄疆一切尤關緊要各將領事權不一必須才兼文武之大員前往督率劉錦棠商令張曜移紮喀什噶爾就近調度所籌甚合機宜卽著張曜統率全部迅赴喀城將西四城邊防善後暨中外交涉事宜隨時妥籌與劉錦棠會商辦理所有提督董福祥等馬步十一營旗均歸節制至阿克蘇烏什等城並著劉錦棠飭令道員羅長祐等分途扼紮認真防守其餘布置各節均著照所議行北路防務將來有

應變通之處著劉錦棠金順相機酌辦左宗棠現在來京該大臣等責任綦重惟當遇事和衷相期共濟以副委任將此由五百里各諭令知之欽此

增設行營糧臺並遴員督辦臺務片

二十一日

再西征餉糈諸務最爲繁劇左宗棠督辦軍務時除奏銷歸後路各糧臺彙造外其餘鈎稽出納向派行營支應處幕僚分任其事由左宗棠綜覈辦理以左宗棠精心強記自可措之裕如臣於理財一道素非所長自顧才力遠不逮左宗棠而軍需關係重大條緒紛雜深恐或有疎失前經諮商左宗棠議增設行營糧臺揀員督辦所有奏銷案件照舊歸西征糧臺陝甘後路糧臺會同彙辦其各軍營臺局銀糧出入諸事宜此後概歸督辦之員一手經理遇有應行籌酌之處仍由臣裁決飭遵至原設支應處則專

管 臣行營餉事如此分別辦理庶界限清而責成專 臣得以藉免貽誤惟督辦糧臺之任實非賢能可靠之員不足以當之茲查有三品銜浙江補用道候補知府陳寶善老成諳練廉正明達堪以勝任卽當派令承辦以資得力該員原係在浙候補人員經左宗棠奏調來營總查新疆善後事宜北路各城業經該員查勘周遍將地方諸事稟由左宗棠斟酌損益惟南路尙未前往現在行營糧臺舍該員無可當斯任者不得不移彼就此其南路善後事宜 臣自秋間由喀什噶爾前來哈密沿途畱心訪察各處情形早已得其大概仍當另派妥員周歷各城過細查察陳寶

善久官牧令政聲卓著吏治深諳將來當舉臣夙所聞見  
併另員巡察情形與該員商酌興革以期妥善而規久遠  
所有增設行營糧臺遴員督辦各緣由謹附片陳明伏乞  
聖鑒訓示謹

奏

軍機大臣奉

旨知道了欽此

五言集卷之六

七

遵旨統轄哈密及鎮迪道屬文武辦理緣由摺

光緒七年正月

十九日

奏爲奉

旨統轄哈密及鎮迪道屬地方文武官員謹將欽遵辦理緣由恭摺具陳仰祈

聖鑒事竊臣承准軍機大臣字寄光緒六年十一月初四

日奉

上諭左宗棠另片奏請將哈密鎮迪道歸劉錦棠統轄等語哈密鎮迪道所屬文武地方官均著暫歸劉錦棠統轄等因欽此跪聆之下感悚莫名伏念臣猥以凡庸荷蒙非



常

知遇

命署欽差大臣篆務受代以來辦理邊防及回疆善後中外交涉諸事宜已覺時形竭蹶茲復奉

旨統轄哈密及鎮迪道屬地方文武官員事件益繁責任益重自顧軍旅粗材廿年戎馬於從政之道未嘗學習膺茲

寵命何以克勝查哈密以西舊設一直隸州四縣三廳幅員遼闊政務殷繁其一切事宜經左宗棠極力籌辦固已綱舉目張秩然有成規可守惟是兵燹之後民困未蘇亟

宜撫綏安集以期漸次復元其餘澄清吏治整飭營伍在  
在胥關緊要臣既奉

旨暫行統轄自當振刷精神認真辦理仍與護理陝甘督  
臣楊昌濬伊犁將軍臣金順烏魯木齊都統臣恭鏗烏魯  
木齊提督臣金運昌隨時商榷務臻周妥用副

朝廷軫念邊陲之至意所有微臣奉

旨統轄哈密及鎮迪道屬地方文武官員欽遵辦理緣由  
謹繕摺具

奏伏乞

皇太后

皇上聖鑒訓示謹

奏

軍機大臣奉

旨知道了欽此

請免余虎恩騎射片

二月二十五日

再分統老湘左軍陝西陝安鎮總兵余虎恩於咸豐九年  
 隨同官軍在江西饒州府攻克浮梁縣城右腿受矛傷二  
 處又是年在廣東連州剿賊右乳下受矛傷一處又於咸  
 豐十一年在安徽徽州府力解城圍右膝蓋受子傷一處  
 又於同治七年在直隸吳橋縣追剿遊賊身受矛傷七處  
 又於同治八年攻克甘肅靈州右手受矛傷二處是年復  
 攻克吳忠堡賊巢右腿受礮傷一處骨損子未出雖經隨  
 時醫愈然筋骨被損時作痛楚以致騎射均屬不便據稟

請

奏免騎射前來臣覆核無異合無仰懇

天恩俯准將陝西陝安鎮總兵余虎恩免其騎射之處出自

逾格鴻慈除咨部外謹附片具陳伏乞

聖鑒訓示謹

奏

軍機大臣奉

旨著照所請兵部知道欽此

奏籌邊重寄才力難勝再陳下悃摺

三月二十二日

奏爲籌邊重寄微臣才力難勝再陳下悃籲祈

聖鑒事竊臣於上年恭奉

恩命署理欽差大臣督辦新疆軍務當經具摺陳謝並聲明督師任重非臣所能勝仰懇

天恩另簡賢能接替在案旋於十二月三十日差弁齎回原摺欽奉

諭旨覽奏具見敬慎之忱惟朝廷正深倚畀劉錦棠務當恪守左宗棠成規將新疆一切事宜妥爲籌辦與金順張曜等和衷共濟用副委任毋庸固辭等因欽此跪聆之下

感悚莫名時以俄約未定防務正殷未敢再事瀆陳仰勞宸廑數月以來一切邊務及善後事宜與金順張曜等隨時酌商雖幸邊境敕安實覺時形竭蹶兢兢祇懼夙夜屏營伏念臣起自寒畯效命疆場兩世荷

高厚之仁匹夫膺非次之寵斯卽捐糜頂踵莫報涓埃苟有寸長可效何敢自外

生成致涉飾讓沾名之嫌辭難諉責之誚惟量能而處人臣之職尸位妨賢古今所戒查新疆地處邊衝幅員遼闊外則夷部鄰接內則種族羸居在承平之日尙須才望最優者乃足以資鈐御矧值時事多艱之際地方兵燹之餘

兵則藉力各軍食則仰給他省苟非長駕遠馭之材實難  
以孚眾望而維全局現在與俄議和事尤繁劇將來通商  
劃界暨交收伊犁籌辦善後利弊動關久遠措置更宜精  
詳稍有失宜貽誤匪淺臣才識愚昧不嫻學術徒有枕戈  
之懷曾無致遠之用遽膺斯任負乘滋慚不獨難厭眾心  
亦恐見輕外夷且才德卓著者今尙不乏臣何人斯賢然  
塵忝在一時承乏已多叢脞之憂若久領重任實味覆餗  
之戒又臣自同治八九年間隨同臣叔父已故廣東陸路  
提督臣劉松山圍攻金積堡逆巢時賊引渠水灌營臣與  
諸將士竭力堵禦往來泥淖之中寢處沮洳之場者數月



自此以後臣兩腿不時作痛發輒數日困憊不堪據醫云風溼深入筋骨非靜爲調治不能卽時痊可臣屢請左宗棠代奏未蒙轉陳近年腿痛漸數勢將增劇以不才如彼而患疾如此倘復自欺何以副我

皇上殷殷綏邊之意再四思維與其貽誤而負罪於將來不若循分而瀝陳於此日區區愚忱惟有再申前請仰懇天恩俯垂曲鑒另簡賢能大員畀以

欽符督辦軍務俾臣得安愚拙之分稍免隕越之差不徒微臣感激實邊庭所深賴也如蒙

俯允寬其拂

命之愆臣仍當在營效力斷不敢偷安自逸所有巖疆重  
寄微臣才力難勝緣由謹再披瀝下忱伏乞

皇太后

皇上聖鑒訓示謹

奏

軍機大臣奉

旨劉錦棠在新疆軍營有年情形較熟朝廷量材簡任深  
資倚畀該京卿惟當將一切事宜竭力籌辦以安邊圉毋  
再固辭欽此



請 旌烈婦劉李氏摺

三月二十二日

奏爲烈婦殉夫殞命節義堪嘉籲懇

旌表以維風化恭摺具陳仰祈

聖鑒事竊准烏魯木齊都統臣恭鏜咨開據鎮迪道福裕

詳據迪化直隸州知州陶模申據前代理綏來縣知縣彭椿年烏垣採訪局委員劉高儋會詳稱查得已故同知銜甘肅補用知縣前署綏來縣知縣劉銓之妾李氏甘肅古浪縣民女同治十三年劉銓娶以爲妾光緒六年四月間劉銓在綏來縣署任赴鄉查禁罌粟過於勞瘁舊病忽發氏左右侍奉湯藥衣不解帶者數月嗣劉銓病勢益增醫

治罔效旋於七月初六日辰時病故氏痛哭暈絕幾次哀毀異於恆常親視殮殯初八日扶襯安厝後沐浴更衣自言欲以身殉眾以其悲傷過情善言勸慰猶未深信及晚傳請夫弟囑託後事又復掩面悲啼詢諸侍婢始知早已吞服金葉多方解救業已無及遂於是夜氣絕計距劉銓病故日期僅止三日洵屬節烈可風呈請轉咨具

奏等因臣查已故知縣劉銓係湖南湘陰縣人由軍營勞績經陝甘督臣左宗棠洵保今職嗣署理甘肅永昌阜康知縣復調署綏來縣篆因病身故其妾李氏矢以身殉得遂其志庸行奇節足以維持風化矜式里閭茲准烏魯木

齊都統臣恭鏜咨據鎮迪道福裕詳轉據迪化州知州陶模申據該各印委查明確實依次加結造具李氏事實清冊詳報前來臣覆查確實應請

旨旌表以慰幽魂而勵末俗除將齎到冊結送部查核並咨明湖南撫臣知照外謹會同會辦新疆善後事宜護理陝甘總督臣楊昌濬烏魯木齊都統臣恭鏜甘肅學政臣鄭衍熙恭摺具

奏伏乞

皇太后

皇上聖鑒敕部議覆施行謹

大清高宗純皇帝實錄卷之二

奏

軍機大臣奉

旨著准其旌表禮部知道欽此

首逆逋誅請

飭使

臣

向俄理論解送懲辦摺

三月二十八日

奏爲首逆逋誅請

飭行使

臣

向俄理論解送懲辦以靖後患恭摺具陳仰祈

聖鑒事竊逆酋白彥虎與其黨馬壯及安夷阿古柏之子伯克胡里等久爲叛逆關內新疆遭其蹂躪迨大軍痛剿窮竄入俄因敦睦鄰之誼姑未加兵一切情形經左宗棠奏報在案四年二月二十二日欽奉

諭旨總理各國事務衙門奏新疆首逆逃入俄界現與俄國使臣理論情形一摺逆首白彥虎與伯克胡里及馬壯等均逃入俄國境內經總理各國事務衙門與俄國使臣



布策理論據布策面稱及其照會均謂咨報本國本國於此事能查照條約所載辦理仍須左宗棠照會圖爾齊斯坦總督等語白彥虎爲積年惡首罪不容誅現與伯克胡里及馬壯等竄匿俄疆亟應執約理論令其迅速交出以免死灰復燃致貽後患著左宗棠查照總理各國事務衙門前函卽日行文俄國圖爾齊斯坦總督並令劉錦棠先行就近行知務將白彥虎等照約解回聽憑治罪未可稍涉大意該衙門王大臣仍不時催詢布策轉咨本國後究係如何辦理亦不得稍涉鬆勁等因欽此仰見

聖謨深遠除惡務盡至意左宗棠與臣先後欽遵行查而

俄官以收養難民飾詞見覆上年崇厚使俄所議條約又未載明臣等正深疑慮因已

另簡使臣未卽論列昨承准總理各國事務衙門來緘知使臣曾紀澤已換新約奉

旨准其畫押所議若何臣不得其詳旣蒙

俞允何庸再爲顧慮惟白逆等如何交出仍未聞議及愚昧之見有不能不詳陳於

聖主之前以備芻蕘之採者夫通和事關久遠利弊必須熟籌當此定約之初正可理論之際商務則宜防其收羅外部遂彼浸廣之謀累華商而擾地方猶其後矣界務則

宜防其佔踞要衝予我孤注之地失鉅費而得空城猶其小矣至索取逆酋則尤當務之急不可度外置之者也白逆等負其豺狼之性濟以剽狡之謀倡亂歷年黨羽景附其於各處之軍情形勢又無不親歷而周知當其逆燄方張固有眾莫敢撓之勢及其力窮出竄亦未忘致死於我之心數年來引奸出亡嗾黨入犯之案層見疊出現在餉項奇絀亟應酌量裁勇以節糜費亦因此而不能一旦解嚴當

天威遠震之時大軍壓境猶頻有邊警若數年之後防軍凱撤邊備稍鬆該逆黨羽之散處內地者尚懷往日樂亂

之情其隨從竄俄者亦有思歸故土之意窺隙伺便起而乘之卽不必俄人誘使不必白逆躬爲而內之奸民外之黠虜亦或有借以爲資而起者雖小醜不能有爲而師動費隨不免重煩

宸廛且各將士之與該逆角戰各地方之被該逆殘害者無不欲得而甘心若與俄通和之後卽該逆不復爲亂而昂然出入貌我將吏虐我民人坐視其橫則難銷積怒者之憤追誅前罪則易啟左袒者之嫌不惟

天討莫伸亦慮邊陲多故至其爲叛人之逋藪啟外部之戎心因事而構間是非輸誠而教敵戰陣斯又棄刑章而

養邊寇事在意中者矣自古通款尋盟必弭虞詐苟有收  
亡納叛豈爲睦鄰溯查咸豐十年所議條款內載凡有重  
罪人犯或逃入境內一經行查卽將該犯送交本國按律  
治罪等語今白逆之爲重犯人所共知成約具存豈容收  
納況此梟獍之徒飽颺饑附在我則爲法無可寬之大憝  
在俄則爲材無可取之匹夫若違約庇奸又示下以背叛  
之道想亦俄人所深惡也臣仰荷  
殊恩忝司邊役不敢緘默於此日而貽後患於無窮乘此  
和議初更尙堪補救惟有仰懇

聖明仍飭總理各國事務衙門與彼國駐京公使執約理

論或令曾紀澤向俄言明務將白彥虎等解回或就近押交<sub>臣</sub>與金順張曜營中恭候

明諭再行懲辦以彰

國法而快人心其隨該逆竄入俄境者亦悉令押回分別辦理則邊境永安而邦交益固矣至此外如何通商如何劃界使<sub>臣</sub>當已擬定無從置喙所有首逆逋誅急應執約理論以靖後患情形謹繕摺馳陳伏乞

皇太后

皇上聖鑒訓示謹

奏

軍機大臣奉

旨另有旨欽此

軍機大臣字寄光緒七年四月十七日奉

上諭劉錦棠奏首逆逋誅請飭使臣向俄理論解送懲辦一摺劉錦棠以曾紀澤已與俄國另立新約白逆等如何交出未聞議及急應執約理論不可置之度外等語白彥虎一事前於二月間據曾紀澤電寄總理各國事務衙門詢及辦法當以此事自須論及應否卽議或俟換約後再議由曾紀澤審量辦理經該衙門由電報傳旨寄覆曾紀澤接奉此旨當能相度機宜妥爲籌辦俟曾紀澤奏到時再行諭知劉錦棠遵照將此由四百里諭令知之欽此





新疆命盜案件請暫行變通辦理摺

四月初十日

奏爲新疆遠在邊荒情形迥殊內地請

旨飭將命盜案件暫行變通辦理以期妥速而歸簡易恭摺仰祈

聖鑒事竊查安集延逆酋阿古柏佔據新疆十有餘載弱肉強食民氣益囂向來纏回殺死人命均由兇犯出買命銀數兩至數十兩不等給與屍親從無抵償之說阿古柏惟利是圖變本加厲以致殷實土豪視殺人爲兒戲而搶劫之風亦因之日甚臣於光緒三年由托克遜進規南路每克一城卽傳集該地民人宣布

朝廷德威飭令蕩滌污俗其保身家並責成各頭目挨戶  
勸導如仍前不法罔知悛改立即扭送懲辦頭目容隱不  
報一經查出併行究治續經大學士前陝甘督臣左宗棠  
譯刊

聖諭十六條附律易解一卷刷印多本分發各城義塾及  
大小伯克頭目誦讀講解並令傳告鄉民共知觀感察看  
近日情形從前貪忍驚悍習氣似已稍戢間有啓不畏死  
殺斃一二命與夥眾持械搶劫訊明供證贓物確鑿無疑  
法難曲宥者以地方甫經收復民志未定即依軍法就地  
儘法懲辦其情節稍輕之犯分別擬以管押繫桿枷號答

杖並酌量時日久暫笞杖多寡取保釋放案結後均摘敘案由及辦理各節譯繕簡明通俗告示張貼市鎮通衢並犯事地方俾頑梗兇徒見之互相傳述冀可收革面洗心之效惟南路各城相距近者數百里遠者一二千里郊關之外大都戈壁鹼灘往往行數日程渺無人烟解犯就道時有戒心非節次派勇防護不可自吐魯番以西僅有善後總分各局向無州縣及例設監禁書役卽略知例案之幕友亦因離家寫遠視爲畏途無從延請是以平日辦事旣苦乏人襄助遇有過往人犯收管局內又不免疏失之虞北路雖設有印委各官而舉目荒涼民氣未復亦與南

路情形大略相同且查新疆戶民種類繁多風氣不一語言文字制度儀文衣冠嗜欲各自爲俗南路以纏回布魯特族類爲最衆蒙古次之漢回又次之北路以哈薩克族類爲最衆蒙古漢回次之纏回又次之而滿漢子遺之民則兩路均寥寥無幾該民人等久違

聲教初就範圍譬如牧羣之馬一時雖勉受羈勒其奔軼之性究難猝除臣再四思維惟有於犯案到官勤審勤結擇其尤不法者立予痛懲庶各種莠民咸生畏憚若泥於文法不遠數千里展轉解勘不獨簽解收管事事爲難而遷延日久縱將重犯處以嚴刑愚民事過卽忘亦將熟視

無覩不足以震動其心昔漢朝初定關中除秦苛政約法三章殺人者死傷人及盜抵罪厥後班超平定西域亦誠受代之任尙以水清無大魚察政不得下和宜蕩佚簡易寬小過總大綱任尙不從卒至變叛記云修其教不易其俗齊其政不易其宜誠以軍旅之後荒遠之區尤當蠲除煩苛與民休息不可以常例拘也伏查乾隆元年平定黔省苗疆開設郡縣欽奉

諭旨苗民風俗與內地百姓迥別嗣後苗民一切自相爭訟之事俱照苗例完結不必繩以官法等因欽此仰見我高宗純皇帝慎重巖疆

聖意淵深無微不至雖新疆久入版圖似非初開苗疆可比然道里綿長臺站疲困種類錯雜俗尚紛歧欲一旦用夏變夷遽臻上治實未易言臣上年在喀什噶爾行營曾將命盜案辦法咨商左宗棠旋准咨覆歷代撫馭邊氓立法最宜簡易現在草創伊始所辦各節因地制宜本無不合應俟改設行省後由新疆督撫體察情形

奏咨辦理刻下如有前項案情卽飭各善後局員酌量擬辦覆核遵行等因咨行到臣左宗棠旋卽交卸北上臣自維資質庸愚不諳吏事驟膺

拔擢權攝

欽符並奉

特旨暫轄哈密鎮迪道所屬文武地方官職任愈重兢惕滋深而改設行省又非一時所能就緒區區愚昧之見不敢緘默不言合無仰懇

天恩俯念萬里窮邊與內地省分情形不同

飭將新疆南北兩路命盜案件暫行變通辦理俾得就地迅速審擬完結由臣按季摘由彙

奏一面咨部立案似於撫治邊方大有裨益臣仍當會同

幫辦軍務伊犁將軍臣金順護理陝甘督臣楊昌濬烏魯

木齊都統臣恭鏜署幫辦軍務廣東陸路提臣張曜督飭



各善後局員各印官於一切重案悉心研鞫勿任刑求務  
期無枉無縱定讞具詳再行逐細覆核飭行以仰副  
朝廷明罰敕法刑期無刑之至意所有新疆命盜案件擬  
請暫行變通辦理緣由謹恭摺具陳伏乞

皇太后

皇上聖鑒訓示施行謹

奏

軍機大臣奉

旨著照所請刑部知道欽此

請飭河南照額協解嵩武軍餉片

四月初十日

再臣准署幫辦新疆軍務廣東陸路提臣張曜咨稱所部

嵩武軍原額馬隊二營步隊十二營按月額定餉銀三萬七千兩有奇嚮由河南省批解迨回疆肅清後各營勇丁久從征戍疲弱較多於光緒四年三月簡汰步勇二營月減額餉銀五千兩上年籌備邊防整頓隊伍由河南添募新勇一千二百人除換補外實餘壯勇五百名當此移防喀什噶爾必須多用騎兵以資得力已將餘勇改設馬隊二營仍符原額馬步十四營之數照從前額餉馬步每營月支大數相同請自光緒七年正月爲始河南省每月仍

按原定額餉三萬七千兩按月批解等因 臣維嵩武一軍  
 征戍日久將士不無疲弱上年籌備邊防經張曜招募新  
 勇挑汰換補此次移防喀什噶爾以所餘壯勇添設馬隊  
 二營原期整飭戎行以固邊圉且於原定馬步十四營額  
 數並未增加惟該軍月餉嚮由河南省專協該省連年亢  
 旱協款稀解前督 臣左宗棠隨時接濟既已不遺餘力 臣  
 自接辦軍務疊准張曜函牘商請借撥銀兩以濟要需時  
 值 臣軍餉項竭歷上年各省關欠解既多本年新餉解者  
 亦屬寥寥彼此固同在艱窘亦不能不於萬難設法之中  
 騰挪接濟其維時局現在該軍仍照原額添足馬步十四

營需餉尤殷相應請

旨飭下河南撫臣查照原定每月三萬七千兩零餉數按

月批解以冀飽騰謹附片陳明伏乞

聖鑒訓示施行謹

奏

軍機大臣奉

旨另有旨欽此同日承准知會已奉有寄信

諭旨令河南巡撫照額撥解矣



新疆南路五次剿平邊寇摺

四月初十日

奏爲新疆南路諸軍五次剿平邊寇所有在事出力文武員弁欽遵疊奉

恩旨擇尤彙案保獎謹繕清單恭摺仰祈

聖鑒事竊查大學士前任陝甘督

臣

左宗棠移交光緒四

年十一月初三日

奏陝回逃匿俄境分道寇邊經官軍截剿淨盡一摺是年十一月十六日奉

上諭在事出力將士著准其擇尤保奏等因欽此光緒四年十二月初六日

奏剿捕逆回竣事一摺是年十二月二十日奉

上諭所有出力將弁勇丁准其附入截剿陝回案內擇尤請獎等因欽此光緒四年十二月二十一日

奏安集延逆目竄匿俄境復潛入布魯特糾眾謀逆官軍剿捕蕙事首逆伏誅邊境安謐一摺五年正月初六日奉上諭此次出力員弁著准其彙案保獎等因欽此光緒五年三月初三日

奏布魯特安集延兩部合謀入寇官軍進剿大獲全捷一摺是年三月十六日奉

上諭此次在事出力各員弁著照所請彙案分別從優保

獎等因欽此光緒五年十月初一日

奏漏逸賊酋糾眾犯邊經官軍進剿大獲全勝一摺將前後剿辦陝回安布各賊迭次尤爲出力員弁併案隨摺請獎並聲明此外出力將士猶多應歸另案保獎是年十月十四日奉

上諭餘著照所議辦理等因欽此欽遵各在案均經左宗棠恭錄宣示行間將士歡呼感奮有口同聲節據各統將按照各次勞績開具請保清單呈由左宗棠核定正擬入告適奉

召北上移交

微臣

接辦查原單內開各員弁經左宗棠暨



臣將其戰功稍次者切實刪減惟勦辦邊寇勞師至四五次諸軍員弁勇丁更番出戰其中實多異常出力未可掩抑者是以人數雖仍屬不少而詳加考覈並無冒濫謹彙爲一案酌擬甄敘開單恭呈

御覽其藍翎六品武職以下各弁另彙清單照例咨部註冊臣維歷次戰狀早經

奏明有案無俟微臣贅陳第念關外征戰之苦百倍內地而湘楚嵩武諸軍五次勦辦邊寇師行絕塞多係自來人迹不到之處其險阻艱難又十倍於新疆腹地溯自光緒四五年間纏回陝回安集延布魯特各逆目於全疆肅清

後乘官軍積勞解嚴相繼竊發糾黨犯順陰狡鷙悍其鋒  
殆不可當維時各賊酋又假教祖後裔煽誘眾回人心惑  
亂譎言雷動向非勦辦得手回疆大局將不堪設想幸而  
事機順利所向克捷先後擒斬著名首要各逆以數十計  
殲除匪黨以數千計立解色勒庫爾城圍速遏伊阿瓦提  
亂萌良由諸軍將士沐

國家養兵之澤感

朝廷信賞之恩忠誠激發效命致身艱險備嘗毫無畏避  
雖調發頻仍而銳氣常新到底不懈用能消醜類滋蔓之  
患絕遠人窺伺之心

皇威遐暢邊域乂安其行役之勞義勇之氣有足錄者所  
有清單內開各員暨另單咨部註冊各弁均係戰功卓著  
伏懇

鴻慈逾格免其逐一填註考語

俯允分別照單給獎庶償前勞而策後效臣得藉勵軍心  
勉效馳驅感戴

恩施同無既極謹會同署幫辦新疆軍務廣東陸路提臣  
張曜恭摺具陳伏乞

皇太后

皇上聖鑒訓示施行謹

奏

軍機大臣奉

旨另有旨欽此

臣等謹將此旨錄

奏



光緒七年五月二十日內閣奉

上諭劉錦棠奏新疆南路諸軍勦平邊寇出力員弁開單請獎一摺光緒四五年間邊外在逃回匪暨安集延布魯特各逆目疊次糾黨入犯均經官軍勦捕斃匪甚多邊境一律安謐在事各員弁尙屬著有微勞自應量予獎敘所有單開各員弁均著照所請獎敘該部知道單併發欽此



顛懇 節哀摺 四月二十四日

奏為敬陳愴痛愚悃顛懇

節哀仰祈

聖鑒事竊 臣接准護理陝甘督 臣楊昌濬轉咨部文到營

驚悉光緒七年三月初十日

大行慈安端裕康慶昭和莊敬皇太后慈馭上賓萬里攀

號五中震裂當即會同哈密辦事大 臣明春率文武各員

舉哀成禮伏惟

大行慈安端裕康慶昭和莊敬皇太后臨朝聽政前後十

有餘年



聖皇聖德之多和  
卷二  
旰食宵衣屢平大難

湛恩闡澤深浹人心誠

坤德之難名爲宇內所共戴茲迺遽爾

升遐薄海臣民悲慕何極我

皇上仁孝性成粹承

大事愴怛曷勝惟念

列聖付託之重又值

慈禧端佑康頤昭豫莊誠皇太后體氣甫康伏懇

節哀順變善葆

聖躬上紓

慈懷之戚下慰中外之望

臣 謬蒙

知遇報稱毫無現復奉

旨無庸來京未獲叩謁

梓宮少伸犬馬依戀之忱尤覺寢饋難安惟有竭盡心力  
勉效涓埃藉圖追答

鴻恩於萬一所有愴痛愚悃謹繕摺具陳伏祈

皇上聖鑒謹

奏



請 卹蕭迎祥摺五月十九日

奏爲營員積勞病故籲懇

天恩俯准飭部從優議卹恭摺仰祈

聖鑒事竊查前管帶楚軍剛毅左營補用提督西朗阿巴

圖魯蕭迎祥湖南湘鄉縣人咸豐七年投入湘果後營從

征江西轉戰四川陝西甘肅等省前後二十餘年疊受重

傷戰功卓著光緒六年經大學士前陝甘督臣左宗棠檄

調帶隊出關在喀喇沙爾行次聞訃丁親母憂當經左宗

棠

奏請畱營奉

旨

旨允准嗣該員抵喀什噶爾防所哀痛之餘傷疾陡發屢據稟請回籍守制治傷情詞迫切臣錦棠見其形容毀瘠神志昏亂不能任事不得已給假令其南歸以示體恤詎於本年正月二十日在哈密旅次積勞病故飭據總理關內防軍營務處兼統武威剛毅等營甘肅按察使魏光燾查明稟請具

奏前來臣等覆查已故提督蕭迎祥屢立戰功素稱得力茲以痛母情切觸發舊傷遽致身故洵屬忠孝無虧殊堪矜憫可否仰懇

夫恩俯准飭部將已故補用提督西朗阿巴圖魯蕭迎祥

照軍營積勞病故例從優議卹以彰勞蓋之處出自  
逾格鴻慈除咨部外謹合詞恭摺具

奏伏乞

皇太后

皇上聖鑒訓示施行再此摺係臣錦棠主稿合併聲明謹  
奏

軍機大臣奉

旨著照所請該部知道欽此

卷之二

三

請 旌烈婦蕭賀氏片

五月十九日

再前管帶剛毅左營補用提督蕭迎祥積勞病故業經  
等查明奏請

賜卹復據關內防軍營務處甘肅按察使魏光燾稟轉據  
提督唐鳳輝李日新副將彭開星彭桂馥同知曾傳節彭  
緒瞻王開斌知縣聶邦光陳希洛龔炳奎張紀南等稟稱  
已故補用提督蕭迎祥之妻賀氏係湖南湘鄉縣賀俊卿  
之女同治十三年同縣之蕭迎祥憑媒聘定爲室因從軍  
秦隴未遑迎娶光緒六年蕭迎祥之母胡氏念其子年四  
十餘尙未娶婦攜聘媳賀氏來甘肅完婚行抵蘭州適蕭



迎祥先已帶隊起程出關蕭胡氏正料理西進忽患咳嗽之證不能就道央賀俊卿送賀氏前行及蕭迎祥於哈密合沓後蕭賀氏寓居哈城蕭迎祥遂拔壘而西嗣蕭胡氏在蘭州身亡蕭迎祥由喀什噶爾請假南歸因哀毀太過觸發舊傷醫治不愈光緒七年正月二十日在哈密旅寓積勞病故蕭賀氏痛不欲生仰藥數次因救獲甦其父賀俊卿責以不可遽死大義反覆開導始勉延殘喘扶襯入關三月初九日抵蘭州慘撫雙棺一慟幾絕時夫弟游擊蕭迎吉在旁該氏卽將衣物鎖鑰親手點交且云兩世旅櫬宜卽南返未亡人所以苟活至斯者徒以長途無夫家

親屬可託今將相從地下等語蕭迎吉及賀俊卿勸慰百  
端並囑其婢用心防護是月十三日卯刻該氏乘婢出卽  
沐浴更衣投繯自縊年僅二十三歲鳳輝等誼屬同鄉見  
聞較切謹合詞稟懇轉詳等情查蕭賀氏與蕭迎祥成婚  
未久遽喪所天因念萬里之夫骨未歸九原之姑靈莫奠  
含悲搵淚隱忍扶喪卒之慟撫姑棺殉夫地下洵屬從容  
就義節烈可嘉據情稟請鑒核具

奏前來 臣等覆查已故提督蕭迎祥積勞病故其妻蕭賀  
氏由關外扶柩行抵蘭州將衣物鎖鑰點交夫弟蕭迎吉  
收存夫棺付託得人祭奠姑靈畢事方乘間沐浴更衣投

纓殞命庸行奇節非一時激烈者可比允足維持風化矜式里閭茲據甘肅臬司魏光燾轉據提督唐鳳輝等聯名具稟前來臣等覆查無異相應籲懇

天恩俯准給予旌表以慰幽魂而勵末俗除咨部並湖南撫臣知照外謹會同甘肅學政臣鄭衍熙合詞附片具

奏伏乞

聖鑒訓示施行再此摺係臣錦棠主稿合併聲明謹

奏

軍機大臣奉

旨著准其旌表禮部知道欽此

軍機大臣字寄光緒七年五月十六日奉

上諭接收伊犁及分界事宜前派錫綸會商金順相機籌辦現在曾紀澤與俄國新訂約章業經批准一俟互換後俄國派有大員約定在何處交收卽著錫綸懍遵前旨馳往會晤並著升泰一同前往按照曾紀澤新訂條約及所繪界圖妥慎辦理此事關繫甚重務當與劉錦棠金順張曜詳細籌度總期界畫分明永昭信守不得稍涉輕心致貽後患將此由四百里諭知劉錦棠金順張曜錫綸並諭令升泰知之



烏魯木齊提標營制未復請 飭部緩催造冊摺七月關日

奏爲烏魯木齊提標營制未復無從造送兵冊懇

恩飭部暫緩行催恭摺具陳仰祈

聖鑒事竊 臣等據署理甘肅布政使李慎詳稱前奉兵部

行催通行各省將現在實存兵丁造冊送部以備纂修則

例等因當卽咨行各提鎮協飭屬遵辦咨送以便彙造總

冊嗣接准烏魯木齊提 臣金運昌咨覆烏垣自經兵燹營

制無存所有應造實存兵丁清冊無從辦理請俟關外軍

務大定營制規復再行遵辦由司詳請具

奏請

旨飭部查照前來臣等查烏垣自經兵燹營制本屬無存  
上年前任督臣左宗棠籌備邊防以烏城等處均係要地  
不可空虛曾飭署烏魯木齊中軍參將張光春署瑪納斯  
協副將余蘭桂各募土勇五百名分段防紮以補罅隙嗣  
僅據張光春報招土勇三百七十名編列成旗月需餉銀  
一千七百餘兩解由前任提臣博昌驗收分放原議此起  
土勇係爲將來改復營制之用本年春間臣錦棠因瑪納  
斯協營地當衝要准金運昌咨募精壯勇丁四十名每名  
照土勇章程月給口糧銀三兩已飭哈密行營糧臺按月  
搭解亦爲規復制兵而設但糧餉均仍係勇章究非兵額

至於提標各營員缺現雖頗有委署藉圖逐漸整飭然有官無兵官仍虛設臣錦棠疊准金運昌函請分設各營土勇暫資遣使因餉項不逮無以應之竊維復綠營以規久遠固爲新疆之要圖而裁營勇以復制兵尤屬目前之先務現在和議既定防務稍鬆雖交割伊犁劃分界限事關緊要仍須有備無患以免彼族生心果有勁旅數支緩急足恃扼吭駐紮即可壯我聲威臣等擬俟局勢稍定酌裁營勇或仍先募土勇漸復制兵卽以裁勇之餉作爲制兵之餉務使支放不至拮据兵政可收實效以期仰副朝廷慎重邊疆至意一俟營制規復再行遵造兵冊以符



定例除咨明兵部查照外所有烏魯木齊提標營制未復  
兵冊無從辦理懇

恩飭部查照緣由謹會同烏魯木齊提臣金運昌合詞恭  
摺具

奏伏乞

皇太后

皇上聖鑒再此摺係臣錦棠主稿合併聲明謹  
奏

軍機大臣奉

旨兵部知道欽此

提標及各路副參游都關防遺失請 飭部補鑄片七月  
再烏魯木齊提督總兵官印信並提標中軍參將瑪納斯日  
協副將濟木薩營參將庫爾喀喇烏蘇營游擊精河營都  
司鞏甯滿城城守營都司各關防及喀噶巴爾噶遜營守  
備條記前因地方失陷均遺失未獲茲據署甘肅布政使  
李慎造具印模清冊到營此外遺失之烏魯木齊提標左  
營游擊右營都司並迪化城守營都司以及瑪納斯協標  
左右二營都司各關防司中查無舊案印信篆文等情詳  
請具

奏頒發前來 臣等覆核無異除將齎到印模清冊並將未

造冊之烏魯木齊提標左營游擊右營都司並迪化城守營都司瑪納斯協標左右二營都司應頒各關防咨部分別查辦外相應請

旨敕部一併補鑄頒發啟用以昭信守謹會同烏魯木齊提<sub>臣</sub>金運昌合詞附片具陳伏乞

聖鑒訓示施行再此片係<sub>臣</sub>錦棠主稿合併聲明謹奏

軍機大臣奉

旨禮部知道欽此

新疆南路西四城興修各工完竣并籌辦應修各工摺月七

日初二

奏爲回疆西四城興修河渠橋路官店城倉已經完竣各工並新疆南北兩路尙有應修工程現籌辦理情形恭摺具陳仰祈

聖鑒事竊臣自光緒三年率師克復新疆南路各城治軍之暇兼籌善後事宜目擊地方彫敝情狀知最爲切要之務莫急於興水利以除民患通驛路以便行旅固城防以資守禦屢經咨商大學士前任陝甘督臣左宗棠次第舉行數載以來頗著成效回疆西四城水道以蔥嶺南北兩

河爲最著烏蘭烏蘇河由喀什噶爾城南折而東北經牌素巴特龍口橋各處以達瑪喇爾巴什又數百里入噶巴克阿克集大河是爲蔥嶺北河今所謂紅水河是也葉爾羌托克布隆河與聽雜布河合流於城東之莫克里莊東北行經愛吉特虎各軍臺繞出瑪喇爾巴什以東數百里至噶巴克阿克集地方與烏蘭烏蘇河會是爲蔥嶺南河今所謂玉河是也玉河東面大半依傍山麓河岸佔高西面自愛吉特虎臺起至阿克薩克臺止綿長四百餘里河岸較東面爲低河岸之外向築有長隄一道咸豐年間以後河道久未疏治河岸與長隄久未培補致陸續壅潰多

處從前既未隨時修濬迨經變亂逆酋不恤民困更無有  
 過而問者以致年深月久愈壅愈高愈決愈寬河水從各  
 決口洶湧四出徑由瑪喇爾巴什以上直趨喀什噶爾之  
 烏蘭烏蘇河並不率由故道自愛吉特虎臺起至察巴克  
 臺止數百里間田廬漂沒驛程梗阻城堡坍塌而瑪喇爾  
 巴什地方本爲回疆東四城赴西四城咽喉要路因地處  
 低窪遂爲羣水所匯竟成澤國臣派員前往查看勘得賴  
 里克臺東二十里決口一處邁那特臺東二里許決口一  
 處又東三十餘里決口一處阿郎格臺東十五里決口一  
 處又賴里克臺以下三百餘里河中壅有大小沙洲十餘

處估計工程極爲浩大而民瘼所關不能不急圖拯救因飭陝西陝安鎮總兵余虎恩提督湯彥和陶生林劉福田李克常已革總兵楊德俊等各帶所部營勇兼督民夫堵築決口挑挖沙洲並將老岸及長隄加高加厚軍民分段工作以次葺事隄岸均臻穩固河道一律疏通其瑪喇爾巴什一城向多膏腴之地自河水爲災渠隄盡毀居民靡有子遺臣飭提督陶生林方友升萬勝常知縣文培夏等將該處大連渠小連渠北連渠逐一修復並飭多開支渠以備蓄洩一面招徠流亡散發牛籽農具難民漸次復業此興修葉爾羌所屬河渠工程之大略情形也其喀什噶

爾烏蘭烏蘇河之水不獨喀城之民資其利以耕作卽瑪喇爾巴什地畝亦賴以灌溉因兵燹久未修治於龍口橋上面二十餘里衝決一口河水直注玉代里克各臺經提督湯彥和楊金龍等率帶勇丁民夫相度地理開挖支河以分水勢堵塞決口以截橫流由龍口橋以達玉代里克卡拉克沁屈爾蓋各臺本有可耕之地特以渠道久廢旱潦無備遂致土地荒蕪臣飭提督董福祥張俊開濬渠道引龍口橋之水以灌玉代里克一帶散給貧民牛具籽種俾資開墾自龍口橋以上如英阿瓦提牌素巴特和碩阿瓦提大阿爾圖什黑子爾普巴依托海雅賣雅七克托蘇



灣浪浪各水渠河道均以歲久失修或沙石淤墊或隄岸潰決先後飭道員羅長祐提督董福祥張俊侯名貴同知王維國等一律修整完善此興修喀什噶爾所屬河渠工程之大略情形也以驛路言之臣自光緒三年冬窮追陝回安集延賊多掘水斷橋以緩我師大軍所過率係鳧水踏冰而進倉卒不及修整重以蔥嶺南北兩河水患方殷西北自喀什噶爾城南烏蘭烏蘇河上游起西南自葉爾羌之愛吉特虎臺起均至瑪喇爾巴什察巴克臺等處止每當伏秋盛暑諸山冰雪消融河水暴漲近河各站一望瀰漫悉爲巨津道路橋梁蕩然無存凡轉運驛遞暨往來

各項差使迂道而行率多遲誤商賈裹足稅釐減色官民爲之交困自兩河工程經始卽飭道員羅長祐提督張春發段伯溪總兵劉必勝在喀什噶爾城南各路修大小橋梁三十餘座修平道路數百里飭同知王維國在七克托地方修橋梁二座飭提督湯彥和楊金龍修整龍口橋玉代里克各臺橋路並飭陝西陝安鎮總兵余虎恩提督李克常陶生林方友升已革總兵楊德俊等自愛吉特虎臺起至瑪喇爾巴什察巴克臺等處止搭造大小橋梁二十餘座道路一律平治又查回疆西四城各臺站亂後舉目荒涼居民無多凡轉運暨各往來差使員弁以無駐宿公

所每多佔住民舍居民房屋卑陋糧餉軍裝時多疏失之虞且恐不肖弁丁藉差滋擾遺黎不堪其苦因分飭各路營局就近在於各站蓋造官店以爲經過差使人等棲息之所此興修各驛工程之大略情形也以城防言之喀什噶爾葉爾羌英吉沙爾和闐漢回各城自同治初年回疆叛變以至官軍克復疊經圍攻屢有損傷各賊酋本無遠略並未隨時修葺歷年既久傾圮愈甚其各城倉廩亦多破壞以致城內不能廣積軍食因通飭各營局將各城牆垣門卡暨濠上弔橋概行補葺完善並添造倉廩以資儲峙又喀什噶爾葉爾羌兩城之外教場地當扼吭向各有

演武廳一所極爲雄峙久已頽廢亦經一體修造用復舊觀而重形勢此興修各城工程之大略情形也以上所修河渠橋路官店城倉工程本皆浩繁且回疆土地非沙卽鹵厥性輕浮消長無常興修工程非多用人力萬分結實鮮不旋修旋壞加以大亂之後百物昂貴民人稀少若一概取資公家所費不知凡幾臣辦理各項工程係半藉營勇半資民力各軍弁勇自有應領糧餉無庸另給食用此外由各善後局轉飭各回日糾集民夫民匠帶赴工次歸督修之員調遣所有夫役皆係被災窮民仿以工代賑之法每日給發食糧惟所雇民匠除日給食糧外仍按日酌

發工價銀兩其購製木料石塊甃瓦石灰鐵器暨應用各物並運腳犒賞民匠工價諸費均係挪用軍餉所用糧料係在徵收糧石項下支放各項工程係於光緒四五六三年內先後興修陸續完竣均經委員勘驗並無草率偷減情事歷經咨報左宗棠有案並經分飭各營局督率各阿奇木伯克隨時保護以期永久竊見回疆西四城自興修各項工程以來閭閻鮮水旱之憂行旅忘跋涉之苦轉輸文報無慮遲延田賦稅釐漸有起色則非諸將士踴躍從公之力其效或未易臻此也再查新疆南北兩路自遭寇亂十有餘年地方糜爛已極各處城池衙署廟宇河渠暫

難盡復舊規雖經左宗棠暨臣等極力籌辦先其所急然以言百廢具興則當期之十年以後現在南北兩路應修工程尙多卽如瑪喇爾巴什因久被水災城垣盡圯正在鳩工興修又如迪化州綏來縣精河鎮西廳等處城垣均多頽廢亟須修葺喀喇沙爾之開都河隄岸葉爾羌之圖木舒克各臺渠壩亦須整修各工程或業已興役或正在勘估疊准烏魯木齊提臣金運昌咨商並據印委各員稟請前來臣細加查核皆地方應辦之事未可以煩難勞費稍涉因循惟新疆地屬邊荒又值久亂積罷之餘一切情形與內地迥異大小各工程若必依照例章勢將拘牽窒

礙於地方轉鮮實效凡遇應修各工程臣惟有督飭承修各員切實舉辦務求完固需用銀糧卽在軍需項下暨地方入款內隨時籌發力加撙節以期費省事舉於邊疆有所裨益所有回疆西四城興修河渠橋路官店城倉已經完竣各工並新疆南北兩路尙有應修工程現籌辦理情形理合恭摺具陳伏乞

皇太后

皇上聖鑒謹

奏

軍機大臣奉

旨知道了所有應修各項工程著仍督飭承修各員實力  
舉辦務求完固以重邊疆餘依議欽此





湘軍文武員弁積勞病故請 卹摺

七月二十七日

奏爲續查新疆立功後積勞病故文武各員弁請

旨飭部議卹謹繕清單恭摺仰祈

聖鑒事竊西征各軍營屢次陣亡傷亡病故文武員弁歷

經大學士前任陝甘督

臣

左宗棠

奏請

賜卹在案茲據老湘諸軍統帶官稟稱續查積勞病故文武員弁花翎鹽運使銜分省歸候補班前補用知府胡焜等八十五員弁先後開具銜名籍貫呈懇

奏請

卹典等情前來臣維邊陲征戰之苦百倍內地自關外用兵老湘諸軍各員弁懷忠抱熱踴躍前驅仰仗

國家福威逆氛迅掃全疆敕平而各員弁備嘗險阻艱難歲事之後多因積年辛苦過甚患病身故實堪矜憫非額懇

朝廷恩卹似無以勵盡勤而慰幽魂所有花翎鹽運使銜分省歸候補班前補用知府胡焜等八十五員弁均係立功後積勞病故謹將該各銜名籍貫另繕清單恭呈

御覽仰懇

天恩俯准飭部一併照軍營立功後積勞病故例從優議

郵此外如尙有遺漏未報員弁應俟各軍續查報到再行具

奏除咨部外理合恭摺具陳伏乞

皇太后

皇上聖鑒訓示施行謹

奏

軍機大臣奉

旨胡焜等均著照所請交部議卹單併發欽此



請 卹丁翰片

七月二十七日

再花翎按察使銜前分省補用道降選知府丁翰曾經大學士前任陝甘督

臣

左宗棠以才具難勝繁劇之任

奏請以簡缺知府歸部銓選仍畱原銜於光緒五年十二月初八日軍機大臣奉

旨著照所請吏部知道欽此嗣准部咨內開該督所請該員仍畱原銜查按察使銜係知府本管上司銜應不准其戴用等因該員自降選後深自愧奮

臣

夙知其才具雖短

品學尚優且久歷戎行營務頗爲熟習因於上年咨商左宗棠調赴喀什噶爾行營辦理營務該員到營後籌畫邊

防竭慮殫精甚多裨益去冬派赴沿邊一帶巡察各處卡  
倫時值嚴寒該員踰越雪積冰梯不辭況瘁以致積勞成  
疾本年正月間復力疾來哈密行營稟商一切事宜行次  
關展地方病益加劇竟於三月二十三日身故殊堪憫惻  
合無仰懇

天恩俯准將已故花翎按察使銜前分省補用道降選知  
府丁翰開復原官原銜

飭部照軍營積勞病故例議卹以勵盡勤之處出自  
逾格鴻慈除咨部外謹附片陳明伏乞

聖鑒訓示施行謹

奏

軍機大臣奉

旨丁翰著照所請交部議卹欽此





接收伊犁及分界事宜現籌辦理情形摺

閏七月初二日

奏爲接收伊犁及分界諸事宜現籌辦理情形恭摺具陳  
仰祈

聖鑒事竊

臣

承准軍機大臣字寄光緒七年五月十六日

奉

上諭接收伊犁及分界事宜前派錫綸會商金順相機籌  
辦現在曾紀澤與俄國新訂約章業經批准一俟互換後  
俄國派有大員約定在何處交收卽著錫綸懍遵前旨馳  
往會晤並著升泰一同前往按照曾紀澤新訂條約及所  
繪界圖妥慎辦理此事關係甚重務當與劉錦棠金順張

曜詳細籌度總期界畫分明永昭信守不得稍涉輕心致貽後患等因欽此並經總理各國事務衙門咨送改訂條約前來臣維收城分界諸務事體最爲繁重非熟籌審處不足以杜流弊而規久遠欽奉

明旨命錫綸升泰與臣詳細籌度臣等自應竭識慮所能及互相商推務臻周妥斷不敢以

朝廷派有專員意存推諉惟臣駐紮哈密距伊犁喀什噶爾暨沿邊等處程途遙遠文報往還動需時日若錫綸升泰凡事必與臣會商勢將多費周折轉虞遲誤臣意收城畫界二者遇有重大緊要須臣與聞之處錫綸升泰知會

到<sub>臣</sub>卽當舉<sub>臣</sub>所見與之商酌以期有所補益至其餘一切事件均有定約可循錫綸升泰自可就近會商金順張曜辦理較爲便速其新疆通商諸務此時固宜豫爲籌及然必俟俄國領事官到日方能定妥壹是屆時<sub>臣</sub>當會同金順張曜按約開辦伊犁收還時金順自應率部進駐該城<sub>臣</sub>昨得其來緘言及所部行當拔壘深以餉項支絀爲慮<sub>臣</sub>軍餉需雖同處艱窘之會然亦不能不勉爲挹注卽當量力接濟資其前進該軍啟行時應由金順申明紀律務令秋毫無犯將來伊犁善後諸事宜卽由金順遴員設局與<sub>臣</sub>隨時會商辦理以<sub>臣</sub>愚見竊謂伊犁居民其願遷

居俄國者既須照約聽其自便官軍到彼總須嚴禁擾累善爲撫輯藉以維繫人心否則子遺之民將相率他往徒得空城亦甚無謂至從前被賊迫脅情有可原之民教人等應由金順按照新約第二條恭錄光緒五年內閏三月二十四日四月初七日兩次

恩旨會列臣等前銜就近出示曉諭以廣

皇仁再查新約第五條內開兩國特派大臣遵照督辦交收伊犁事宜之陝甘總督與土爾吉斯坦總督商定次序開辦陝甘總督奉到

批准條約將通行之事派委委員前往塔什干城知照土

爾吉斯坦總督等因自係曾紀澤訂約時因左宗棠前以陝甘總督兼

欽差大臣督辦新疆軍務故有此議臣與護理陝甘督臣

楊昌濬緘商以現在局勢變遷未便拘泥條約而所派之

員苟非諳練邊務轉恐債事哈密距伊犁太遠臣行營差

遣各員求其熟悉伊犁等處情形者一時殊難其選應卽

由金順會商錫綸升泰就近派委妥員前往以期便捷而

資得力所有接收伊犁及分界諸事宜現籌辦理情形謹

恭摺具陳是否有當伏乞

皇太后

皇朝通志卷之二  
皇上聖鑒訓示施行謹

奏

軍機大臣奉

旨覽奏均悉官軍進紮伊犁自應嚴禁擾累善爲撫輯將  
來善後諸事著劉錦棠隨時與金順會商辦理前已派金  
順督辦交收伊犁事宜錫綸作爲特派大臣該京卿當仍  
遵前旨與該將軍等妥商籌辦欽此

科布多所屬布倫托海無庸撥營駐紮片

閏七月初二日

再科布多參贊大臣臣清安等曾於上年咨請大學士前

任陝甘督臣左宗棠撥軍駐紮布倫托海地方以固邊圉

左宗棠意以調營前往則糧餉軍裝等項必須源源接濟

方能有恃無恐該處南距鎮迪道所屬之古城瑪納斯等

處程途寫遠轉饋維艱且其時新疆諸軍正議添竈無力

兼顧若僅撥一二營分駐又恐形單力薄不能禦敵多則

轉運愈難是以左宗棠躊躇未卽撥營比經咨覆清安等

令其與臣悉心籌議嗣經清安等

奏明依照左宗棠覆文由臣妥籌辦理奉



旨恭錄咨會前來臣查科布多所屬之布倫托海地處極邊毗連俄境前值防務戒嚴自不能不籌兵設守現在和約已定邊防稍鬆今昔情形迥不相侔卽令投俄之哈薩克陝回各種或有零股出沒清安等所轄兵丁當足以資捕剿自可無庸再由臣軍撥營前往且新疆南北兩路各軍現以餉源日絀正在分別裁減歸併力圖撙節所存馬步各防營僅敷分布亦實無餘力可以他及並非故存畛域之見也所有布倫托海地方現在無庸由臣撥營駐紮緣由謹附片具陳伏乞

聖鑒謹

奏

軍機大臣奉

旨知道了欽此



軍機大臣字寄光緒七年閏七月初九日奉

上諭總理各國事務衙門奏接收伊犁事宜亟應剋期舉辦一摺接收伊犁及分界事宜前已先後派令錫綸升泰前往辦理惟原定條約應特派大臣遵照督辦接收伊犁事宜之陝甘總督商定開辦現在陝甘總督曾國荃因病給假調理一時未能到任著派金順督辦接收伊犁事宜錫綸作爲特派大臣以符原約該將軍等仍當與劉錦棠升泰等詳細妥籌會同俄國所派大員在伊犁城商定次序開辦並著金順派委妥員前往塔什干城知照土爾吉斯坦總督將接收伊犁各事照約如期辦竣其分界事宜

仍著錫綸升泰懷遵前旨與劉錦棠金順張曜隨時隨地  
詳加籌度妥慎辦理勿稍輕率將此由五百里各諭令知  
之欽此

回子郡王之子承襲世爵摺

閏七月二十七日

奏爲已故回子郡王之子年已及歲請

旨飭議承襲世爵恭摺具陳仰祈

聖鑒事竊據委辦吐魯番善後局務甘肅候補道雷聲遠稟稱已故吐魯番魯克沁回子郡王阿克拉依都原任葉爾羌阿奇木伯克同治三年庫車逆回犯葉爾羌城該回王隨同官兵打仗被執於同治十二年遇害捐軀其子瑪木特現已及歲可否請襲世爵等因當飭署吐魯番同知楊大年查取宗圖冊結旋據加結蓋印詳送前來卷查光緒四年臣在喀什噶爾行營採訪回疆西四城歷年殉難

滿漢文武官員及各阿奇木伯克銜名事實據已故魯克沁回子郡王前葉爾羌阿奇木伯克阿克拉依都之子瑪木特稟稱伊父承襲魯克沁回子郡王世爵充當葉爾羌阿奇木伯克同治三年庫車等處漢回變亂犯葉爾羌城伊父隨同官兵出城打仗力竭被執擁至庫車監禁三年又移喀什噶爾監禁六年始終不屈十二年安集延逆酋阿古柏於禁中取出殺害經臣咨報大學士前任陝甘總督臣左宗棠具

奏請卹嗣經理藩院於光緒五年五月初五日議

奏本日奉

旨給卹賞銀一千一百兩等因欽此欽遵在案臣維吐魯番魯克沁回子郡王自額敏和卓肇封三傳至阿克拉依都咸豐年間曾充葉爾羌阿奇木伯克嗣因逆回倡亂隨同官軍打仗力竭被執監禁九年之久未嘗屈辱卒遇戕害大節無虧伊子瑪木特年已及歲例得承襲魯克沁回子郡王世爵相應請

旨飭下理藩院核議以便遵行除將齋到宗圖冊結一併咨院查照外謹恭摺具陳伏乞

皇太后

皇上聖鑒訓示施行謹



奏

軍機大臣奉

旨該衙門議奏欽此

回部坎巨提呈進

貢沙金片

閏七月二十八日

再新疆色勒庫爾之南回部坎巨提向例進

貢沙金該頭目俄則項前於光緒四年呈進經大學士前任陝甘督臣左宗棠奏奉

諭旨飭理藩院議奏援案賞給大緞二疋由左宗棠就近發給祇領在案茲准署幫辦新疆軍務廣東陸路提臣張曜咨稱現據該頭目俄則項循例呈到進

貢沙金一兩五錢咨請具

奏前來

臣

覆核無異除將例賞大緞二疋由

臣

發交轉給

俄則項祇領並將所進沙金一兩五錢咨送內務府呈

劉襄勤公奏稿

卷二

進外理合附片陳明伏乞

聖鑒謹

奏

軍機大臣奉

旨知道了欽此

三

擒獲安夷監禁已久分別辦理摺八月十日

奏爲前克達坂城擒獲安夷監禁肅州已久現擬分別辦理恭摺具陳仰祈

聖鑒事竊臣前於光緒三年三月初七日督師攻克達坂

城生擒夷回一千二百餘名內除訊明係南八城及吐魯番托克遜等處纏回八百六十五名喀喇沙爾吐爾扈特種人六十九名本地回民一百六十四名各給衣糧分別遣歸安插報由大學士前任陝甘督臣左宗棠

奏明外其餘所獲之安集延夷官大通哈一名其名爲愛伊德爾呼里夫通哈者猶華言大總管也又胖色提六名

一名愛什邁特一名宜牙子邁特一名毛喇阿邁特一名他亦爾呼羅一名愛里邁特一名邁買地里胖色提者猶華言營官也又安集延玉子巴什三十六名南八城玉子巴什二十二名玉子巴什者猶華言哨官也又安集延職事人等如華言什長之類者四十六名此外尙有被脅夷眾一百二名計共獲安集延人二百十三名時因大通哈供稱願遣人報知帕夏阿古柏縛送陝酋白彥虎表順歸誠再求

恩宥各胖色提亦同聲代阿古柏乞款臣比許其各遣親信數人往告阿古柏一面將大通哈并各夷眾派員羈押

以俟回報均稟由左宗棠覈明

奏報在案旋以遣去夷眾回報需時而此項擒獲安集延  
人數過多行營方長驅前進未便久押稟經左宗棠批解  
肅州暫行監禁臣於得批後委派總兵凌應高點驗起解  
除各夷目遣歸送信未還及因被擒受傷過重旋卽身死  
并在押在途病斃外計解到肅州一百一十二名左宗棠  
飭於肅城南隅隙地另修獄房一所房外四面高築圍牆  
將各夷犯圈禁其中飭肅州鎮標中軍守備撥兵防範俾  
免疏失並由肅州轉運局按月給予口糧屆冬仍各給棉  
衣以示體恤嗣因夷目大通哈胖色提並各玉子巴什等

潛謀鑿牆逃走經左宗棠查悉立將各夷目及謀逃各犯訊明軍前正法餘存安集延人七十名仍行圈禁計自三年九月十八日解肅收禁至今已逾四年之久檢查從前被獲時原訊口供現存各安集延人等多係脅從並有爲酋長勒令隨隊貿易者委非甘心從逆情本可原且達坂城一役所擒之漢纏並本地各回及吐爾扈特種人凡係脅從或遣歸原籍或就近安插均經

奏明辦理有案此起安夷雖與漢纏回民有別然核其受酋脅制之情初無二致現在豢養數載均能守法安分感激

國恩據安肅道王必達詳請核辦前來臣維達坂城所擒之安集延人等原因該夷目大通哈等自請公同上書帕夏阿古柏勸其縛獻白逆是以由營押解肅州暫行圈禁迨後阿古柏以勢窮力蹙服毒身死縛獻白逆一節亦遂無回報而大通哈等鑿牆謀逃經左宗棠訊明正法其餘各犯因係脅從又未同謀逃走仍行圈禁以至於今左宗棠原擬俟軍務大定奏懇

恩施惟此起係安集延脅從之犯較之從前擒獲纏回脅從各犯辦理頗難若遠遷內地該犯等語言不通服食不同自難望其安處若概行遣歸本國安集延地方切近回



疆竊恐遣歸之後若輩視從逆爲故常亦非所以示遠人而昭儆戒若仍久禁肅州則中俄和議已定肅州現准通商安集延近屬俄人邊部將來俄人至肅其中難保無代爲請命者允則不成事體不允又慮枝節橫生此種情形均爲事所或有若不先事慮及臨時必致差謬

臣思維再

#### 四擬懇

天恩將肅州監禁各安集延之原供貿易者遣歸本國其餘被脅勉從者酌發南八城各阿奇木伯克爲奴嚴加管束不准遠出滋事似此分別擬辦庶遣歸者共戴皇仁而分發爲奴者亦知守法安分矣如蒙

俞允再由臣將各犯行提到營宣布

朝廷撫良誅匪德意曉以利害反覆開陳務使遣歸分發各夷類咸知懷德畏威不敢妄萌異志方爲得宜所有前克達坂城擒獲安夷監禁肅州日久現擬分別辦理緣由是否有當理合恭摺具陳伏乞

皇太后

皇上聖鑒訓示施行謹

奏

軍機大臣奉

旨著照所請該部知道欽此



劉襄勤公奏稿卷三

起光緒七年十月  
訖光緒八年七月

目錄

籲懇 收還成命另 簡賢能接替摺

請免鄭錫澤繳捐復銀兩片

請 優卹楊杰片

賑恤吐爾扈特南部落銀兩請 飭核銷摺

刊換督辦西征糧臺關防片

俄商往來新疆貿易不得行銷中國土貨摺

保舉提督董福祥片

神靈顯應懇 賜匾額封號摺

新疆六年分徵收額糧稅釐數目片

遵 旨覆陳裁撤營勇並挑選標兵改坐糧摺

辦結纏回阿不拉等糾眾謀亂片

請給病假一月在營調理片

庫車回子郡王承襲摺

新疆北路畱營照舊分防卓勝軍分別畱遣摺

銷病假片

遵 旨擬設南路郡縣摺

裁撤阿奇木伯克等缺另設頭目並考試回童分別

給子生監頂戴片

新疆各道廳州縣請歸甘肅爲一省摺

各城旗丁併歸伊犁滿營添設撫標增置總兵等官  
額兵片



顓懇 收還成命另

簡賢能接替摺

十月初一日

奏爲顓懇

天恩

收還成命另

簡賢能接替以重邊疆而免貽誤恭摺仰祈

聖鑒事竊

臣

准吏部咨開光緒七年八月二十四日內閣

奉

上諭通政使司通政使劉錦棠著授爲欽差大臣督辦新疆軍務等因欽此伏念臣識淺才疏不學無術自接權篆務以來蚤作夜思時形竭蹶於邊域全無裨益自知力小



任重弗克負荷曾經兩次披瀝下忱具摺懇辭未獲仰邀  
俞允五內屏營不知所出微臣之愚猶謂暫行署理不過  
目前權宜之舉一切事宜惟有勉循左宗棠規畫成法靜  
候交代迺蒙

倚畀益隆

授爲欽差大臣督辦新疆軍務聞

命之下悚惶莫名臣自束髮從軍以洎於今受

恩至爲深重卽捐糜頂踵難言報稱前次疊辭重任均荷  
溫諭訓勉已不禁感激涕零茲復榮膺

特授

寵遇愈優臣心非木石苟爲棉力之所克逮自當黽勉以從藉答涓埃何敢飾讓沽名畏難諉責以自外

高厚生成惟新疆幅員周二萬餘里內而種族蕃雜外而強鄰密邇屬茲久亂積罷之後以防務言之則餉項日絀籌畫綦難以善後言之則事係創舉繁重異常至於中外交涉諸事件尤動關全局安危疆事之艱鉅倍於各省督辦之仔肩重於督撫是非勳望夙著卓有經世之略者不足以及策久安而資統轄臣本軍旅粗材

國家苟有緩急屬以偏師俾效馳驅仰賴

福威方略或可倖呈薄效至關外巖疆重寄實非臣之庸

陋所能濟事在一時承乏已愧建樹毫無若復貪榮戀棧居之不疑終必誤公曠職煩

朝廷異時西顧之憂迨至債事之餘卽治臣以應得之罪而貽害已屬不淺與其隕越於將來不若瀆陳於此日合無仰懇

天恩俯念西事關重

收還成命另

簡賢能大員

畀以欽符督辦新疆軍務庶邊境可期永奠而臣得藉以自循愚分如蒙

允准擬俟交替後卽行俶裝北上泥首

宮門以伸犬馬戀

主之忱臣從前勦辦關內外逆回出入鋒鏑之中者十有餘年初未嘗有所規避何至頓改效命之初心自便偷安之私計祇以才力不及不得不籲懇

矜全區區愚悃儻邀

聖慈垂諒匪獨微臣之幸實邊事之大幸也謹繕摺由驛

具

奏伏乞

皇太后

皇朝通志卷之三十三  
皇上聖鑒訓示施行謹

奏

軍機大臣奉

旨覽奏情辭懇切具見寅畏之忱惟念劉錦棠任事經年  
辦理一切頗臻妥協該大臣膺茲重寄惟當將防務善後  
及中外交涉諸事竭力籌辦以期邊圉久安用副委任毋  
許固辭欽此

請免鄭錫滥繳捐復銀兩片

十月二十日

再臣軍委員開復花翎升用同知浙江候補知縣鄭錫滥

前於新疆南路諸軍五次剿平邊寇案內在事尤爲出力

經臣於本年六月初二日附片

奏保請免其補繳加倍捐復銀兩以知縣仍留浙江補用

並俟補缺後再行送部引

見光緒七年七月初四日軍機大臣奉

旨該部議奏欽此茲准吏部咨開查鄭錫滥革職原案係

屬私罪今得有勞績請免繳捐復銀兩仍留浙江補用並

未奉

旨允准且例應引

見人員非軍務省分概不准保俟補缺後再行引

見所請免其補繳加倍捐復銀兩以知縣仍畱浙江補用  
並俟補缺後再行送部引

見之處均核與章程不符應毋庸議仍飭該員補繳加倍  
捐復銀兩俟銀兩繳清給咨赴部引

見由部另掣省分補用等因於光緒七年閏七月十四日  
具

奏奉

旨依議欽此恭錄知照到

臣

伏思此案既經吏部議駁奉

旨依議自應欽遵辦理惟查鄭錫淶前隨臣疊次剿辦邊寇打仗奮勇陣斬要逆實屬異常出力雖此次所請獎敘係屬奉

旨交議並非已蒙

允准之案然臣於本年四月初十日陳明五次剿平邊寇案內鄭錫淶應得保獎請俟剿辦階州番匪保案部覆到營再行甄敘奉

旨該部知道欽此欽遵在案是鄭錫淶著有勞績未可掩抑固已早邀

聖明洞鑒若因該員保案現經部臣一併議駁臣遂將所



立戰功置不復錄而同案出力諸員弁皆已仰蒙

恩獎獨任鄭錫淶一員向隅將何以昭公允而作士氣在

部臣謹守成法自不容不遇事循例而邊疆軍務非信賞

難以圖功臣亦不能不爲另核請獎合無仰懇

恩施准將開復花翎升用同知浙江候補知縣鄭錫淶免

其補繳加倍捐復銀兩仍俟該員經手事件完竣給咨赴

部引

見由部另行籤掣省分補用以獎前勞而策後效之處出

白

逾格鴻慈謹附片具陳是否有當伏乞

聖鑒訓示施行謹

奏

軍機大臣奉

旨著照所請該部知道欽此



請 優卹楊杰片 十月二日

再 臣 行營已故營務處委員花翎雷甘肅遇缺儘先題奏  
道楊杰自咸豐年間投效軍營夙著勤勞前值邊防戒嚴  
營務異常繁劇該員承辦一切勇於任事夙夜從公不辭  
勞瘁實軍中最爲得力之人奈該員體素清羸因用心過  
度以致元氣大虧漸成虛勞之證始猶不甚介意仍復力  
疾辦公毫無貽誤旋因關外寒熱無常水土不宜外感乘  
虛深入膏肓醫藥罔效竟於光緒七年閏七月十八日在  
哈密行營病故實係積勞所致深堪憫惻合無仰懇  
天恩俯准飭部將已故花翎雷甘肅遇缺儘先題奏道楊

杰照軍營積勞病故例從優議卹以彰勞盡之處出自  
逾格鴻慈謹附片具陳伏乞

聖鑒訓示施行謹

奏

軍機大臣奉

旨楊杰著照所請交部從優議卹欽此

賑恤吐爾扈特南部落銀兩請 飭核銷摺十一月二  
奏爲遵

旨發過吐爾扈特南部落人眾賑恤銀兩懇請  
飭下理藩院核銷恭摺具陳仰祈

聖鑒事竊查大學士前任陝甘督 臣左宗棠移交卷內光

緒四年九月間吐爾扈特南部落難民七千八百餘名口  
由伊犁西湖仍歸喀喇沙爾珠爾都斯地方游牧經喀喇  
沙爾善後局員黃丙焜防營營官黃長周妥爲安插查明  
待賑者四千餘名口比卽按名發給賑糧俾資日食嗣左  
宗棠欽奉光緒四年十二月初四日

上諭金順奏吐爾扈特南部落人眾旋回喀喇沙爾珠爾都斯地方游牧一摺吐爾扈特南部落人眾自逆回搆亂以來逃散各處顛沛流離經該署盟長派員前往收集約計一萬餘人現已遷移仍回珠爾都斯游牧該部人眾困苦情形殊堪矜念加恩著賞給銀四萬兩由左宗棠給發用示優恤藩部至意等因欽此當經左宗棠恭錄宣布並飭局員黃丙焜等察酌貧戶賑糧仍須接續給發該部落多係插帳游牧須換製帳房購買羊種卽酌給銀兩備辦用示

朝廷優恤藩部至意歷經左宗棠

奏明在案茲據局員黃丙焜稟稱該部落福晉恩克巴圖自光緒四年九月起至六年九月止陸續由該局領過各色賑糧七十二萬九千九十九斤十兩按照本地採運價值折合銀一萬四千八百二十八兩二錢四分三釐又領過羊種一千六十隻每隻採價銀五錢六分共合銀五百九十三兩六錢又領過現銀二萬四千五百七十八兩一錢五分七釐統共合算銀四萬兩取具該福晉總散領狀稟請核辦前來臣覆查無異竊維吐爾扈特人眾自遭逆回變亂以來轉徙他方流離困苦迨歸復舊土仰荷皇仁賞給銀四萬兩該部落人眾得資生活永慶安居數



年以來生齒漸繁畜牧日富莫不含哺鼓腹歌頌

高厚鴻恩於無極該部落人民渾樸近尙安靜足以上慰  
聖懷所有發過該部落賑恤銀四萬兩相應請

旨飭下理藩院核銷除分咨外謹恭摺具陳伏乞

皇太后

皇上聖鑒訓示施行謹

奏

軍機大臣奉

旨該衙門知道欽此

刊換督辦西征糧臺關防片十一月二日

再陝西按察使沈應奎蒙

恩擢授貴州布政使例應

陞見卽赴新任臣與護理陝甘督臣楊昌濬因其有經手

軍需報銷尙未辦竣不便遽易生手前經會銜

奏畱懇將沈應奎暫緩交卸西征糧臺事務以清要案奉

旨沈應奎著俟葉伯英到陝交卸臬篆將經手事件辦竣

仍遵前旨來京陞見欽此欽遵在案臣查沈應奎從前辦

理西征糧臺事務由大學士前任陝甘督臣左宗棠刊發

欽差大臣營務處辦理西征糧臺布政使銜陝西按察使

司按察使關防一顆曾經

奏明有案現在沈應奎既升貴州藩司暫行畱辦銷案自應刊換關防俾資信守茲由臣改刻木質關防一顆文曰欽差大臣奏委總理營務處督辦西征糧臺貴州布政使司布政使關防發交沈應奎啟用並飭將原用關防卽行銷毀至該臺應行

奏催及咨行各省關事件仍照舊呈由陝西撫臣覈辦一

面呈報陝甘督臣衙門暨臣行營察核以符原案謹會同

護理陝甘督臣楊昌濬陝西撫臣馮譽驥附片陳明伏祈

聖鑒謹

奏

軍機大臣奉

旨知道了欽此

列傳卷之三十四



軍機大臣字寄光緒七年十二月十五日奉

上諭戶部奏新疆局勢大定亟應裁減勇營一摺頻年以來各省關協解西征軍餉實已不遺餘力甚至迭次籌借洋款銷耗息銀國家經費有常似此年復一年斷非經久之道現在新疆平定防務漸鬆劉錦棠曾有隨時裁撤各營之請卽著該大臣與譚鍾麟楊昌濬悉心會商將關內外現存馬步若干營如何漸次裁減之處迅速酌覈奏咨辦理至光緒五六兩年欠解餉銀尙多加以裁減營勇均須發給欠款其光緒八年西征月餉自應照舊撥解十成著戶部咨行各督撫將軍監督等一體遵照將此諭知戶

部並由五百里諭令劉錦棠譚鍾麟並傳諭楊昌濬知之  
欽此

俄商往來新疆貿易不得行銷中國土貨摺

光緒八年正月  
月初四日

奏爲俄商往來新疆貿易應遵查驗不得行銷中國土貨  
以符約章恭摺具陳仰祈

聖鑒事竊

臣

前准總理各國事務衙門遞到中俄和約當

經分別咨行遵辦在案近准伊犁將軍

臣

金順咨稱現議

交收伊犁俟收城之後劃界通商當次第舉行等語大凡  
商務所關固應早爲議定各自通飭諭知俾兩國皆有遵  
守一經開辦庶幾免觸禁令弭釁端卽以固和好是亦重  
邦交之道也

臣

維新疆各城久已設局抽收稅釐商貨出

入必須查驗始准銷售今俄商運貨進卡如至新疆有稅



釐局地方自應呈請查驗於貨單貨包上蓋用查過戳記  
方可行銷如未銷完運赴別處亦應將銷過貨物開註單  
內呈局查明蓋戳放行續至有稅釐局之處均應照此辦  
理儻貨照不符卽送交俄官區處以杜包庇販運情弊約  
章載有專條在中國順事就施不過略增繁費而俄人甫  
經入市詎必盡悉約章若待臨時分辯易起爭執不如由  
俄官早自傳聞務使成範各懷迨至進卡卽踵而行之以  
是爲固然而無所遲阻於行商豈不甚善條約又載俄商  
辦運中國土貨由恰克圖及新疆回國特將回國二字標  
明則在中國途間只當逐遵查驗以防夾帶私貨原無准

其銷售之理就令已運出卡亦不得由陸路復運進卡詳考舊章有由海口辦運中國土貨復運內地銷售之說而無自俄販運中國土貨由陸路復進口內銷賣明文凡新約所未改者皆可仍舊照行而俄國邊界商民皆不知此往往將中國土貨復運進口雖經在事各員頻令折回似仍於義未曉此事於華商大有關礙所以然者華商完釐次數多而成本重俄商完釐次數少而成本輕故未可任其運銷恐妨華商生計耳俄官應將和約宣告該國官商於辦貨時加意斟酌遇有此等土貨幸勿錯誤再行購買販運前來則可免其阻滯折耗爲益實不少也合無仰懇

飭下總理各國事務衙門照會俄國駐京使臣移知該國官員一律照辦以符約章而保商本謹恭摺具陳伏乞

皇太后

皇上聖鑒訓示施行謹

奏

軍機大臣奉

旨該衙門知道欽此

保舉提督董福祥片

二月十六日

再頭品頂戴題奏提督雲騎尉世職阿爾杭阿巴圖魯董福祥於同治八年投效臣叔父原任廣東陸路提臣劉松山部下見其打仗奮勇飭令管帶董字步隊三營頗著勞績迨臣任事以後隨同轉戰無役不從所向皆捷現統領董字定遠馬步各軍分駐葉爾羌和闐各城紀律嚴明兵民相安深資得力該員忠勇果決質樸寡言臨敵審機膽識俱備實係邊才之選求之將領中不可多得臣緣該員籍隸甘肅所帶營勇多係關隴土人能耐勞苦駐防關外尤爲相宜故臣所部將領惟該員統兵較多蓋取其熟悉

機宜才可勝任兼爲將來局勢大定畱防塞上地步也合無仰懇

天恩俯念該員戰功卓著識略優長

量予擢用出自

逾格鴻慈

臣

爲邊地需才起見儻於軍事有裨自應遴舉

所知以備

聖明採擇斷不敢妄爲汲引稍涉徇私自取罪戾冒昧上陳不勝惶悚伏乞

聖鑒訓示謹

奏

軍機大臣奉  
旨畱中欽此



神靈顯應懇 賜匾額封號摺

三月初一日

奏爲神靈顯應據情籲懇

天恩賞賜匾額封號以答

神庥恭摺仰祈

聖鑒事竊據甘肅鎮迪道福裕詳稱據署鎮西撫民同知陳晉蕃轉據地方紳士前任巴里坤鎮標中營游擊陳升恆補用游擊李鳳鳴升用直隸州知州袁永豐並耆民人等聯名呈稱巴里坤城北門外歷有

關聖帝君廟建自唐時雍正年間建城設官改爲

武聖廟神靈最著又南關歷建有蒲類海



龍神祠暨

楊泗將軍祠並

城隍廟戶民因事祈禱輒著靈應同治三  
四  
五等年回氛甚熾斗粟萬錢烏垣奇古吐哈各城相繼不守糧盡援絕城關民人相食四鄉村堡焚掠一空逆回族黨時撲孤城當攻守喫緊時在城官紳兵民等遂向

關帝諸神廟禱求默佑旋督同飢疲之官兵圍丁登陴防守隨賊所向拚死捍禦屢瀕於危賊均敗退夜間巡邏將士時見神異或聞兵馬馳驟之聲或見衣甲舞刀挺立城上四年六月初九日賊由東北城隅架雲梯猱升而上前

隊業已登城突遇神將擋禦賊眾驚譁我軍死士遂當先  
轟擊賊卒以退鎮城亦因之而安向非

武聖各廟神靈護佑人力何能逮此伏查鎮西地方守城  
換防將卒團紳民勇生者仰蒙

皇恩獎敘死者亦荷

賞卹入祠獨

神庥未答紳民等撫衷負歉感悚交深是以合詞呈懇轉  
詳

奏請分別

賞頒匾額並

賜封號等情前來臣等維新疆自逆回變亂南北各城均已次第淪陷惟巴里坤孤城懸注糧盡援絕當時官軍尙能一意拒守力保危城爲後此規復新疆駐軍儲糧根本雖殺賊致果必賴各將士團丁忠勇之力而

神靈默佑護

國保民其功德未可泯也茲據鎮迪道福裕具詳轉懇前來臣等覆查無異合無籲懇

天恩頒發巴里坤

武聖廟蒲類海

龍神祠

楊泗將軍廟匾額各一方並懇

賞賜巴里坤

城隍神

封號用昭靈貺而順輿情謹合詞恭摺具

奏伏乞

皇太后

皇上聖鑒訓示施行再巴里坤城隍向無

封號又此摺係臣錦棠主稿合併陳明謹

奏

軍機大臣奉

旨另有旨欽此

光緒八年三月二十二日內閣奉

上諭劉錦棠等奏神靈顯應請頒匾額並加封號一摺甘肅巴里坤

武聖廟

龍神祠

楊泗將軍廟

城隍廟素著靈應同治年間回匪屢次撲城勢甚危急經官紳等虔謁祈禱均獲轉危爲安實深寅感著南書房翰林恭書匾額各一方交劉錦棠等祇領敬謹懸掛巴里坤武聖廟

龍神祠

楊泗將軍廟以答

神庥所請加

城隍廟封號之處著禮部議奏欽此

新疆六年分徵收額糧稅釐數目片

三月初七日

再戶部奏稱光緒六年七月左宗棠奏光緒四五兩年新疆共徵收各色京斗糧五十一萬五千餘石徵收房租地課稅釐等項銀二十二萬三千餘兩等語查此項糧料按新疆採買價值每石合銀四兩至八兩不等加以稅釐等項每年約可徵收銀一百數十萬兩各等因鈔稿知照到臣伏惟新疆久罹兵燹民鮮子遺耕種失業而北路爲尤甚從前大兵出關先由北路進取值各該處糧價昂貴每石需銀至七八兩不等甚且無從採辦官軍糧料概由關內甘州肅州暨包頭歸化等處轉運接濟勞費無算迨至



三年冬克復南路各城前敵各營則均就地採糧價值與關內相等小麥百斤值銀不過六七錢包穀高粱百斤值銀不過五六錢而北路向多沃壤經地方官招集難民廣爲屯種收成既豐糧價亦漸次平減刻下糧料充積頗有穀賤傷農之患惟哈密一處纏回墾地不多營中應用糧料仍須由他處轉運合之運腳較爲昂貴耳現查新疆六年分共徵各色京斗糧料三十四萬七千二百餘石較之四五兩年多收八萬餘石核計時價每京斗小麥一石值銀九錢至一兩不等包穀各項價值尙須遞減以六年徵收糧料數目計之高低牽算僅值銀二十六七萬兩其徵

收章程係照古人什一取一之法未免取盈將來清丈完竣按畝升科度必有減無增徵收數目尙難預定此外房租地課稅釐各款六年分除局費外共得銀二十二萬七千餘兩新疆每年入款只有此數實無一百數十萬兩之多至各處徵糧均照時價就近撥發防營濟食其價卽於應領餉項內劃扣清訖除咨部外理合附片陳明伏乞

聖鑒謹

奏

軍機大臣奉

旨知道了欽此



遵 旨覆陳裁撤營勇並挑選標兵改坐糧摺三月初七日

奏為遵

旨覆陳事竊 臣於光緒八年正月初六日承准軍機大臣字寄光緒七年十二月十五日奉

上諭戶部奏新疆局勢大定亟應裁減營勇一摺等因欽此仰見我

皇上軫念邊陲至意下懷欽感莫可名言 臣溯自光緒二年大軍陸續出關次第規復南北兩路因伊犁未經收還不敢弛備於是防營薪糧鹽菜軍裝轉運等款遂積久而愈多幸賴各省關於西征協餉源源撥解

刑部力人 卷三

三

朝廷復准息借洋款以濟緩急用能迅赴戎機臣受代以來懼蹈師老財殫之失故有隨時裁撤各營之請蓋頓兵絕域本難久持匪僅

國家經費有常宜圖節省也恭繹

諭旨關內外現存馬步若干營如何漸次裁減之處迅速酌核奏咨辦理臣維伊犁將軍臣金順一軍從前駐紮庫爾喀喇烏蘇尙經大學士前陝甘督臣左宗棠派卓勝軍分防精河一帶今伊犁甫經接收金順移營前進地面愈闊沿邊種落愈繁必須加意鎮撫以安反側而杜覬覦已遷俄籍者係中國頑民心志叵測儻俄人不能約束致有

內訌外犯之事邊疆亦卽戒嚴光緒四五兩年五次寇邊之案其前車也廣東陸路提督臣張曜所部豫軍馬步僅十四營駐防喀什噶爾英吉沙爾等城毗連哈薩克布魯特及浩罕安集延各部落情形喫重臣方以兵力單薄爲之慮是金順張曜兩軍目前未能遽裁乃不待再計始決者此外湘楚卓勝各軍光緒六年左宗棠遵

旨入都檄調親兵一千五百餘名旌善馬隊五旗帶赴直隸上年八月以前經臣於湘楚兩軍內又裁去馬步弁勇四千一百餘人咨由前護督臣楊昌濬會銜附

奏在案後又續裁二千一百餘人現在微臣所部共祇馬

步六十營旗約計二萬五千餘人上年冬間臣曾函商烏魯木齊提臣金運昌就所部卓勝軍酌量裁併現擬先裁步勇四營馬勇兩營並分行湘楚各軍將領視其防務稍鬆兵力略厚者先撤馬隊四營步隊兩營約計每撤一營需銀四萬兩有奇臣智慮短淺不足臨邊惟現籌辦理情形約有數端請爲

聖主陳之一餉項急需接濟也查上年所借洋款四百萬兩除劃還華商舊欠外報解到甘者實止二百八十餘萬兩臣上年先後裁去弁勇六千三百餘人計散放餉銀六十餘萬兩關內各軍亦經楊昌濬裁汰不少現又准陝甘

督臣譚鍾麟函稱擬將關內五十餘營旗酌爲遣散需餉甚鉅今臣軍續議減竈出款愈繁難資周轉且撤者應清積欠防者月需薪糧待哺嗷嗷艱窘萬狀相應請

旨飭下戶部咨行各督撫將軍監督趕於本年夏秋間迅籌大批起解以濟要需否則臣與譚鍾麟楊昌濬雖朝夕圖謀終難集事一裁營必須逐漸也新疆各軍久役於外强悍性成離家至萬數千里之遠一旦遣撤旣恐逗畱關外又慮沿途滋事臣上年所遣各營係將口糧攤勻數日由後路各臺局逐處點名給發仍飭該原管將弁申明紀律分起成行煞費經營始獲率之東下非如內地散軍剋



期可以蕲事臣現會商譚鍾麟楊昌濬稽核糧臺存餉多寡及各省關報解衰旺仍照上年撤營辦法挨次給餉庶無他虞一新疆宜定大局也謹按乾隆年間勘定新疆移滿洲蒙古東三省索倫錫伯等兵暨陝甘兩省綠營兵或攜眷駐防或按期換守其見諸載籍者數逾四萬新疆現有之防營僅足相抵此後滿洲蒙古等兵能否移防姑弗具論至陝甘綠營兵業經楊昌濬奏明新疆行省無論設與不設必須另立營制未便再由關內調撥換防致有顧彼失此之虞是則湘楚卓勝各軍一裁而南北兩路無駐防無番戍烏魯木齊提屬之兵額固屬虛懸卽伊犁金順

喀什噶爾張曜之軍亦無後勁邊防未可深恃矣臣愚以爲因革損益國之常經左宗棠改設行省之議是否可行朝廷自有權衡非臣所敢置喙惟楊昌濬所請另立營制則與改行省復舊制二者均不相妨若於關外現裁營勇中選其精壯耐勞不願回籍者倣往代屯由之法編成額兵烏魯木齊提標兵額應飭由金運昌就所裁卓勝軍認真挑選俾復步兵舊額之半並改行餉爲坐糧以省饋運一轉移間而營伍易實邊患可消假勇得所於新疆大局實有裨益可否變通辦理之處微臣不敢擅專伏望宸衷獨斷立見施行邊事幸甚大局幸甚所有遵

旨覆陳緣由是否有當除咨部外理合恭摺由驛五百里  
馳奏伏乞

皇太后

皇上聖鑒訓示施行謹

奏

軍機大臣奉

旨另有旨欽此

軍機大臣字寄光緒八年三月二十六日奉

上諭劉錦棠奏遵旨覆陳一摺據稱金順張曜兩軍目前未能遽裁現擬卓勝軍先裁步勇四營馬勇兩營並於湘楚各軍視其兵力略厚者先撤馬隊四營步隊兩營約計每撤一營需銀肆萬餘兩餉項急需接濟及裁營逐漸遣撤並請另立營制等語所籌尙屬周妥卽著將應撤各營仍照從前辦法妥爲遣散嚴飭原管將弁申明紀律毋任逗畱滋事其所稱關內各軍現擬裁遣需餉已鉅關外又議減竈已撤者應清積欠畱防者月需薪糧出款愈繁艱窘萬狀自係實在情形著戶部咨行各督撫將軍監督務

於本年夏秋間迅籌大批濟用毋得延宕致誤要需至所擬於現裁營勇中選其精壯仿屯田法編成兵額並由金運昌挑選標兵復步兵舊額之半及改行餉爲坐糧各節著劉錦棠會商譚鍾麟等悉心妥籌奏明辦理將此諭知戶部並由五百里諭令劉錦棠知之欽此

軍機大臣字寄光緒八年三月二十七日欽奉

上諭譚鍾麟奏覆陳裁減關內營勇并酌留防營一摺關外各營昨據劉錦棠奏已照所議裁撤關內各營茲據譚鍾麟奏先將輔字開字兩營遣撤其餘酌量防地改旗者十四營共計裁正勇火勇四千餘人其餘營勇擬陸續裁撤等語所籌尙屬周妥卽著該督將現裁之勇妥爲遣散毋任逗畱滋事畱防各營先行扼要布置以期漸復營制節省餉糈又奏籌度新疆南路情形一摺所請酌度七城廣狹繁簡設立丞倅牧令二員更於喀什噶爾阿克蘇兩處各設巡道各一員如鎮迪道之例著劉錦棠體察情形

會商該督妥議具奏將此由四百里各諭令知之欽此

辦結纏回阿不拉等糾眾謀亂片

四月初二日

再臣於上年五月十五日據英吉沙爾善後局委員知縣羅正湘報稱訪聞英屬忙升莊纏頭回子阿不拉有圖當帕夏糾眾謀亂情事正密拏間據署阿奇木愛沙稟報前來隨知會分防英吉沙爾之嵩武軍統領記名提督孫金彪派撥弁勇會同局員等首先拏獲阿不拉外思定二名訊據供出夥黨姓名又續獲紫牙五定一名庫萬占一名毛拉阿洪一名尼牙子一名沙一提一名賽一提阿吉一名隔別研訊欲乘英城隊伍換防之際起意謀亂屬實竝在阿不拉家搗出洋槍火藥弓刀各件逆迹顯然錄供馳



報等情竝准幫辦軍務廣東陸路提臣張曜咨據英吉沙爾營局稟同前情等因各到營臣以案關重大當經咨請張曜就近提訊仍批飭羅正湘會營嚴緝餘犯安撫人心去後嗣准張曜咨開飭派副將李福雲前往將該犯等一律提到發交喀英善後總局道員張宗翰審訊犯供均與原審相符惟纏回同謀共事以抱經盟誓爲信此案抱經立誓者共係六人已獲阿不拉外思定紫牙五定三名尙有五受兒蘇傅尼牙子買賣土的三名未獲行據羅正湘會營設法緝獲續交張宗翰隔訊無異詳解張曜行營督同局委各員覆加研審各供符合尙有知情在逃之毛拉

克等未獲行據羅正湘稟稱該犯等聞拏在逃懸賞通緝  
獲日另解是逃犯弋獲無期現犯應先擬結咨會到臣哈  
密行營臣詳加確覈緣阿不拉係英吉沙爾忙升莊人充  
當董子巴什因上年三月臣布置邊防飭將英城所紮之  
定遠軍移防葉爾羌所遺防地經張曜派嵩武軍統領孫  
金彪填紮該犯阿不拉探聞一軍將去一軍未來遂乘隙  
想當帕夏起意謀亂帕夏者卽華言大元帥也該犯先與  
素好之外思定商允並捏稱手下已約定數百人囑外思  
定往阿拉堡地方邀約賽一提阿吉充當頭目緣賽一提  
阿吉向係念經纏回人眾悅服該犯往約意在勾結多人

易於成事詎外思定一再相邀堅拒不從阿不拉只得捏稱賽一提阿吉允當頭目許帶一百五十人前來軍火器械均已齊備等語囑外思定卽以此言送信各莊邀人希圖煽惑曾遇面識之毛拉阿洪尼牙子沙一提庫萬占等四人說過約其一同起事不准聲張毛拉阿洪等以其妄言不置可否而去外思定一面邀得素好之紫牙五定蘇傅尼牙子買賣土的三人並阿不拉均到五受兒卽烏舒兒白的克家說明作亂情事阿不拉家向埋有洋槍九桿火藥三大包並弓刀各件係從前逆酋阿古柏當帕夏時埋的外思定知其軍火確實遂一共六人抱經立誓都算

頭目內蘇傅尼牙子買賣土的二人初不願意阿不拉又  
僞以賽一提阿吉入夥爲詞勉強逼令抱經約定四月二  
十二日夜間破城外思定仍連日逢人密語又向面識之  
毛拉克說知不料臨期各莊都無人來蘇傅尼牙子買賣  
土的二人亦均未至不能動手阿不拉知事已敗露並聞  
善後局有人訪拏甚嚴該犯遂以外思定等作亂先到阿  
奇木處首告冀圖卸罪賽一提阿吉距城較遠正行首告  
聞案已破因卽中止旋獲外思定到案訊悉前情並供出  
同夥人名不諱當在阿不拉家起獲洋槍火藥等件阿不  
拉亦自認起意謀亂屬實飭拏各犯毛拉克等聞拏先期

逃逸旋經營局將案內各要犯先後拏獲隔別研訊口供相符羅正湘一面懸賞嚴緝逃犯安撫人心報經發交道員張宗翰訊明詳由張曜督同局委各員覆審無異嚴詰各犯此外並無同謀知情窩隱之人咨請查照擬結等因前來自應擬結查該犯阿不拉身充王子巴什乃欲乘換防之際圖當帕夏糾眾倡亂實屬不法迨至事機敗露率以外思定等作亂爲名向阿奇木首告妄希卸罪復與真心悔過自行投首不同若遂科以謀反大逆之條究與攻城戕官釀成巨案者有別新疆案件前經臣奏請變通辦理奉

旨允准欽遵在案應將此案首犯阿不拉與抱經立誓之  
從犯外思定紫牙五定五受兒四犯不分首從卽行就地  
正法並將首犯阿不拉梟首懸竿示眾以昭炯戒而快人  
心蘇傅尼牙子買賣土的二犯當時抱經既係逼從臨期  
舉事亦均未到較之外思定等四犯情罪稍輕擬卽在於  
英吉沙爾永遠錮禁其餘毛拉阿洪尼牙子沙一提庫萬  
占四犯雖未同謀而於外思定等告語之時並不力拒其  
非亦屬首鼠兩端應一概遷徙喀喇沙爾地方到日由局  
折責安置以上各犯查明家屬一併遷徙財產入官槍藥  
弓刀驗明存局賽一提阿吉屢次拒不從亂正行首告案

犯業已破獲應免置議逃犯毛拉克獲日另結除咨覆張  
曜飭局遵照分別辦結仍將辦結緣由繕具簡明通俗告  
示繙譯回字實貼犯事地方俾共懍知並飭據羅正湘稟  
稱英吉沙爾地方人心現已一律安定臣維新疆纏回犬  
羊性成啓不畏死一切頑梗凶惡之徒所在皆有全在各  
城營局員弁等隨時畱心訪察庶奸宄不致潛生此次該  
犯阿不拉等圖當帕夏糾眾謀亂事雖未成若非該營局  
員弁等先期訪拏迅獲首要各犯難保不搖動人心釀成  
巨案所有拏獲此案首從各犯之員弁緝捕尙屬迅速應  
請

天恩俯准將頭品頂戴遇缺

簡放提督總兵博奇巴圖魯孫金彪鹽提舉銜畱甘儘先  
補用知縣羅正湘等交部分別議敘以昭激勸實於新疆  
地方營務捕務兩有裨益所有英吉沙爾纏回阿不拉等  
糾眾謀亂訊明辦結並請將緝捕出力員弁獎敘緣由謹  
附片陳明伏乞

聖鑒訓示謹

奏

軍機大臣奉

旨孫金彪羅正湘均著交部分別議敘餘依議該部知道



欽此

請給病假一月在營調理片

四月十五日

再臣自同治八九年間隨同

臣叔父已故廣東陸路提

臣

劉松山圍攻甘肅甯夏金積堡賊巢時逆回掘渠水灌營  
臣與諸將士晝夜竭力堵禦往來泥淖之中寢饋沮洳之  
場者數月自此遂得兩足疼痛之病從前雖不時舉發然  
速則二三日遲亦不過五六日卽就平復近歲以來日漸  
增劇本年三月間偶感風寒宿恙復作骹膝酸痛異常洎  
今將及一月尙未少愈每接見僚屬勉強酬答如坐鍼氈  
披閱案牘甫及數行卽筋掣心悸汗出神昏不能畢事據  
醫者云寒溼深入筋骨元氣大虧必須謝絕賓客靜心調

治方能漸就痊可合無仰懇

天恩俯准賞假一月在營調理其營中日行公事由營務處隨時請示辦理如遇緊要事務雖在病中仍當力疾躬親以昭慎重謹附片陳懇伏乞

聖鑒訓示謹

奏

軍機大臣奉

旨著賞假一月欽此

庫車回子郡王承襲摺

四月十五日

奏爲已故回子郡王之子阿美提懇

恩飭議承襲世爵恭摺具陳仰祈

聖鑒事竊臣前於光緒四年在喀什噶爾行營採訪回疆

西四城歷年殉難滿漢文武官員及各阿奇木伯克銜名事實據署喀什噶爾三品阿奇木伯克阿美提稟稱該伯克祖父向居庫車其父愛瑪特係頭等臺吉曾襲郡王世職充阿克蘇三品阿奇木伯克同治三年五月初一日庫車漢回作亂該伯克之父愛瑪特在城爲賊所執監禁三日旋被戕害等情當經臣咨明大學士前任陝甘督臣左

宗棠具

奏請卹嗣准理藩院議奏奉

旨賞給卹銀一千一百兩等因欽此欽遵在案茲准幫辦  
軍務廣東陸路提臣張曜咨據喀英善後總局取具已故  
回子郡王愛瑪特之子阿美提年貌籍貫冊結並宗圖親  
供甘結蓋印呈請轉咨可否請襲世爵等因到營臣查庫  
車回子郡王自鄂斯滿肇封三傳至愛瑪特同治三年因  
逆回變亂庫車城陷爲賊所執不屈而死洵屬大節無虧  
其子阿美提例得承襲郡王世爵臣前飭令署理喀什噶  
爾阿奇木事務爲人尙屬謹慎現又調署和闐三品阿奇

木伯克於應辦諸事頗稱認真茲准咨請核明具  
奏前來除將齎到宗圖親供冊結各件一併咨院查照外  
相應請

旨飭下理藩院議覆遵行再愛瑪特請卹案內因左宗棠  
原奏誤作愛買提經理藩院議覆行查嗣查該故回王名  
字實係愛瑪特咨院更正有案合併聲明謹繕摺具

奏伏乞

皇太后

皇上聖鑒訓示施行謹

奏

軍機大臣奉

旨該衙門議奏欽此

新疆北路留營照舊分防卓勝軍分別留遣摺

五月初一日

奏爲新疆北路大河沿地方東至奎屯臺等處請

旨飭令金順留營照舊分防以便抽調現駐精河之卓勝軍馬步二千人分別留遣恭摺馳陳仰祈

聖鑒事竊臣前承准軍機大臣字寄光緒七年十二月十五日奉

上諭戶部奏新疆局勢大定亟應裁減營勇一摺等因欽此遵

旨寄信前來臣當卽與譚鍾麟等函牘會商譚鍾麟意以關外當合金順張曜兩軍通盤合算酌定撤留光緒八年



三月十六日譚鍾麟奏遵

旨裁減關內營勇並酌留防營情形摺內即曾聲敘及此  
臣因金順張曜兩軍均在前路於本年三月初七日遵

旨覆陳摺內聲明目前未能遽裁惟請撤卓勝軍馬步六  
營湘楚各軍馬步六營嗣奉

上諭所籌尚屬周妥即著將應撤各營仍照從前辦法妥  
爲遣散等因欽此欽遵恭錄分咨金順張曜金運昌等各  
在案茲准金順來函擬將全部拔赴伊犁並稱大河沿迤  
東至安集海該軍舊日駐防各處須由臣撥營填防又准  
咨稱伊犁甫經收復回纏哈薩克雜處其間向背莫測俄

兵未撤人民未附正需兵力鎮撫伊犁地勢極形遼闊本部馬步實屬不敷分布精河大河沿一帶通連南北山口過多扼紮更關緊要揆時度勢防範萬難稍鬆應請將現駐精河卓勝軍馬步二千人從緩調回裁撤各等因到臣行營伏查現駐精河之卓勝軍馬步二千人係左宗棠督辦軍務時因俄約未成邊防喫緊撥助金順防剿之隊臣前奉

旨裁撤營勇因伊犁既已收還精河防務漸鬆當經奏定酌裁卓勝軍步隊四營馬隊二營自應欽遵辦理將卓勝軍現駐精河之馬步二千人調回以便分別遣留伏

釋前奉裁營

旨意原爲餉需難繼急求搏節之道日下餉事日形支絀  
臣與譚鍾麟極力籌畫實已計窮勢迫若不將此二千人  
迅速調回則卓勝軍裁營事宜必致延擱營勇遲裁一日  
卽糧餉多耗一日此

奏定裁撤之卓勝軍馬步六營萬難中止精河馬步二千  
人急宜調回之實在情形也又查金順所部馬步營勇官  
兵統計不下四十營自距安集海一站之奎屯臺起西至  
伊犁等處地方從寬計算縱橫不過二千里以四十營扼  
要防守初非不敷分布現在新疆南北兩路由臣處發餉

之軍除從前裁併及現經

奏定遣撤各營不計外通共所存馬步各隊亦不過四十餘營而分防地段則自哈密起南至烏什和闐喀什噶爾各城極邊等處北至綏來縣屬境縱橫一萬餘里營數與金軍略同而防境之遼闊實過金軍數倍兵力單薄自可概見臣之初意因金軍原駐之奎屯臺庫爾喀喇烏蘇迤西一帶終須責成金軍防紮回疆西四城終須責成張曜所部嵩武軍防紮故前次有兩軍未能遽裁之議不料金順擬將全部移紮伊城欲臣派撥隊伍填紮至距伊城四百餘里之大河沿此臣自顧兵力實難照辦者也至金順

慮及伊犁甫經收復種類雜處俄兵未撤人民未附擬以兵威懾之此大不然竊謂伊犁一隅有精實馬步隊十數營前往駐紮卽足以資鎮撫但能申明紀律嚴禁騷擾使各種人民懷我恩信自可帖然就範至中外交涉諸務如果處置得宜足以折服俄人之心彼族雖狡亦不至顯背成約自啟衅端若稍涉張皇臨之以大兵不但人多約束難周本地糧草難給尤恐俄人暨諸反側之徒心懷疑懼轉致別生變故前閱總理各國事務衙門王大臣致金順函件言及接收伊犁事宜內有中國帶兵但取足資彈壓不必過多等語此論切中機宜是金順所部各營儘可兼

顧後路無庸悉數拔赴伊犁揆諸時勢理有固然所有大河沿東至奎屯臺等處應請

旨飭令金順畱營照舊分防俾臣得調回現駐精河之卓勝軍馬步二千入交金運昌合卓勝全軍分別畱遣以安邊事而節餉需謹具摺由驛馳陳是否有當伏乞

皇太后

皇上聖鑒訓示施行謹

奏

欽定四庫全書

十一

232 -  
軍機大臣字寄光緒八年五月二十三日奉

上諭劉錦棠奏迭接金順函咨擬將全部拔赴伊犁該軍向來駐防大河沿迤東至安集海各處由劉錦棠撥營填防竝將現駐精河卓勝軍從緩調回裁撤該大臣自願兵力單薄防境遼闊難以照辦及奏定裁撤之卓勝軍急宜調回等語所奏自係實在情形金順駐紮伊犁所帶馬步各軍但取足資彈壓要在申明紀律嚴禁騷擾懷以恩信自可共釋嫌疑不致別生變故所部各營毋庸悉數拔往所有大河沿東至奎屯臺等處仍著金順酌量留軍防守其現駐精河之卓勝軍馬步二千人卽著劉錦棠調回恪



遵前旨分別遣留以節餉需將此由五百里各諭令知之  
欽此

軍機大臣字寄光緒八年五月二十三日奉

上諭總理各國事務衙門奏新疆開辦商務懇准暫免各城釐稅一摺新疆地方設卡徵釐藉資軍食現在俄民運貨往來暫不納稅而各部落人及內地華商仍令照章完納未免苦樂不均且恐弊竇叢生於釐金亦有名無實至沿邊人眾尤宜廣其謀生之路以示招徠所有進出卡倫貨物往來新疆各城貿易者著概行暫免釐稅俟商務興旺照約議立稅則時再復舊章著劉錦棠金順張曜升泰遵照辦理並行知各城一體遵辦將此由五百里各諭令知之欽此

欽定四庫全書  
通志  
卷二

五

銷病假片

六月初二日

再臣前因偶感風寒觸發足痛宿恙日久不愈於本年四月十五日附片陳懇

賞假一月在營調理五月二十九日准兵部火票遞回原片後開軍機大臣奉

旨著賞假一月欽此跪聆之餘銜感無地臣於四五月內連服辛溫發散之劑外感業已全祛惟足疾根株一時難以盡拔腿膝酸痛之證猶復時發時止幸尙能勉力支持五月中旬卽已強起照常視事未敢稍涉疎懈理合附片陳明伏乞

聖鑒謹

奏

遵 旨擬設南路郡縣摺

七月初三日

奏爲遵

旨擬設新疆南路郡縣恭摺覆陳仰祈

聖鑒事竊 臣等承准軍機大臣字寄光緒八年三月十七

日奉

上諭譚鍾麟又奏籌度新疆南路情形一摺所請酌度七城廣狹繁簡設立丞倅牧令一員更於喀什噶爾阿克蘇兩處各設巡道一員如鎮迪道之例著劉錦棠體察情形會商該督妥議具奏等因欽此遵

旨寄信前來仰見

朝廷眷顧西陲動規久遠之至意跪聆之餘莫名欽感伏  
念新疆當久亂積罷之後今昔情形判若霄壤所有邊疆  
一切事宜無論拘泥成法於時勢多不相宜且承平年間  
舊制亂後蕩然無存萬難再圖規復欲爲一勞永逸之計  
固舍增設郡縣別無良策種種緣由經大學士前任陝甘  
督臣左宗棠疊次奏明有案仰蒙

聖明洞鑒准其因時制宜在事諸臣先後稟承

宸謨籌辦善後諸務罔敢稍涉疎懈現在地利日闢戶口  
日增各族嚮化諸事均有成效郡縣之設時不可失茲奉  
旨命臣等會商妥議久安長治之基實肇於此自當竭愚

慮所及熟籌審度以期妥協而垂永久謹按經野建官之道必量其地之民力物產足以完納

國課又可供給官吏胥役而有餘然後視其形勢之衝僻繁簡置官以治之非從寬預爲計畫則官困而民必受其害故新疆添置郡縣設官未可過多此必然之勢也惟南路各城民人較多腴區較廣其轄境之最遼闊者縱橫至數千里少亦數百里若設官太少又慮鞭長莫及難資治理不足爲經久定制臣鍾麟原奏內有一城不過數十莊不及東南一小縣七城各設一官足矣等語經臣錦棠就近體察情形此說蓋亦不盡然又臣鍾麟原奏將吐魯番



作爲南路城池有七城設官之議臣錦棠查吐魯番現不在八城數內自吐城以西喀喇沙爾庫車阿克蘇烏什是爲南路東四城葉爾羌喀什噶爾英吉沙爾和闐是爲南路西四城應統八城通盤籌畫一律改設郡縣以上各節均經臣錦棠與臣鍾麟往復緘商意見相合謹公同酌議除自哈密南至吐魯番北至精河應暫照臣鍾麟原奏無須另設多員外回疆東四城擬設巡道一員駐紮阿克蘇該道以守兼巡爲兵備道督飭所屬水利屯墾錢糧刑名事件撫馭蒙部彈壓布魯特稽查卡倫作爲衝繁疲三項要缺喀喇沙爾與吐爾扈特和碩特游牧地方犬牙相錯

每有交涉事件擬設直隸廳撫民同知一員治喀喇沙爾  
城庫車擬設直隸廳撫民同知一員治庫車城阿克蘇爲  
古溫宿國擬設溫宿直隸州知州一員治阿克蘇城拜城  
縣知縣一員治拜城歸溫宿直隸州管轄烏什緊鄰布魯  
特部落爲極邊衝要擬設直隸廳撫彝同知一員治烏什  
城以上各廳州縣應統歸東四城巡道管轄回疆西四城  
擬設巡道一員駐劄喀什噶爾回城該道以守兼巡爲兵  
備道管理通商事宜督飭所屬水利屯墾錢糧刑名諸務  
彈壓布魯特控馭外夷稽查卡倫作爲衝繁疲難請

旨最要缺喀什噶爾爲古疏勒國擬設疏勒直隸州知州

一員治漢城疏附縣知縣一員治回城歸疏勒直隸州管轄英吉沙爾緊鄰布魯特爲極邊衝要情形與烏什略同擬設直隸廳撫彝同知一員治英吉沙爾城葉爾羌爲古莎車國擬設莎車直隸州知州一員治漢城葉城縣知縣一員治回城歸莎車直隸州管轄葉爾羌所屬瑪喇巴什一城爲回疆東西咽喉要地積年河水爲患必須置員撫治擬設直隸廳水利撫民通判一員治瑪喇巴什城和闐爲古于闐國擬設和闐直隸州知州一員治和闐城于闐縣知縣一員治哈拉哈什地方歸和闐直隸州管轄以上各廳州縣應統歸西四城巡道管轄凡茲建置大略較之

光緒六年四月十八日左宗棠奏擬設立各員稍爲簡省較之臣鍾麟原奏七城各設一官之議略有加增斟酌損益務適於中冀得免流弊而成永圖至於佐雜人員應俟郡縣設定由道員暨各丞倅牧令就近察酌地方情形將其必不可少者詳請

奏設其各廳州縣疆界應俟立官畫分後再行

奏咨各處地方暫時責成諸軍統領營官督率營勇駐防俟兵制議定再行

奏請設立總兵副將參游都守千把等官其餘未盡事宜統俟陸續籌議隨時

奏請

睿裁所有擬設新疆南路郡縣大概情形謹會同幫辦軍務臣張曜幫辦新疆善後事宜臣楊昌濬恭摺覆陳是否有當伏乞

皇太后

皇上聖鑒訓示施行再此摺係臣錦棠主稿合併聲明謹奏

軍機大臣奉

旨另有旨欽此

裁撤阿奇木伯克等缺另設頭目竝考試回童分別給予

生監頂戴片

七月初三日

再新疆各城向設阿奇木伯克等員其職銜有三四品者見議建置郡縣擬設丞倅牧令各員官階既非甚崇若回官仍循舊章殊有枝大於本之嫌似宜量爲變通以歸妥善郡縣設定後擬將回官各缺暨阿奇木伯克等名目概行裁去各廳州縣另行酌設頭目額數略如各省辦公紳士不可以官目之遇有缺額卽行就地選舉出具切實考語詳由該管道轉請邊疆大員發給委牌惟須照回官向例撥給地畝作爲辦公薪資免滋需索侵吞諸弊又南路

纏回愚懦者居其大半彼教中所謂條勒阿渾往往捏造邪說肆其誘脅之術人心易爲搖惑禍亂每由此起纏回語言文字本與滿漢不同遇有訟獄徵收各事件官民隔閡不通阿奇木伯克通事人等得以從中舞弊是非被以文教無由除彼錮習自全疆戡定以來各城分設義塾令回童讀書識字學習華語其中儘多聰穎可造之資授之以經輒能背誦學寫楷書居然端好爲之講解義理亦頗能領會足見秉彝之良無分中外雖不必侈言化民成俗而其效已有可觀此時建置南路郡縣教職等官暫可不設惟宜設法鼓勵使回族爭奮於學庶教化可期漸興所

有原設各塾應由各廳州縣延師訓課以小學孝經論語孟子大學中庸詩書易禮春秋教各回童擬每歲令各廳州縣考試一次有能誦習一經熟諳華語者不拘人數多寡卽送該管道衙門覆試詳由邊疆大員援照保舉武弁之例咨部給予生監頂戴待其年已長大卽准充當頭目如有勤學不倦能多習一經或數經者無論已未充當頭目均准各廳州縣考送由道覆試請獎再行遞換五品以下各項頂戴仍不得逾六品以示限制惟曾任三四五品阿奇木伯克者裁缺後仍應准其照舊戴用翎頂充當頭目其各項頂戴頭目人等如果承辦差使異常出力仍隨



時酌量保

奏懇

恩賞給三四五品頂戴用昭激勸理合會同幫辦軍務

臣

張曜幫辦新疆善後事宜

臣

楊昌濬附片具陳是否有當

伏乞

聖鑒訓示施行再此片係

臣

錦棠主稿合併聲明謹

奏

軍機大臣奉

旨另有旨欽此

新疆各道廳州縣請歸甘肅爲一省摺

七月初三日

奏爲哈密鎮迪道等處地方暨議設南路各道廳州縣擬請併歸甘肅合爲一省以規久遠恭摺具陳仰祈

聖鑒事竊查光緒六年大學士前陝甘督臣左宗棠奏稱

將來議設行省必以哈密劃隸新疆形勢始合哈密及鎮迪一道所屬文武地方官均應歸劉錦棠統轄所有升調補署考核及一切興革事宜均可就近辦理分別奏咨陝甘總督無庸兼管等因於光緒六年十一月初四日奉

上諭左宗棠奏請將哈密鎮迪道歸劉錦棠統轄等語哈密及鎮迪道所屬文武地方官均著暫歸劉錦棠統轄欽

此欽遵在案伏念新疆改設行省之議左宗棠實始發之查本年三月十六日陝甘督臣譚鍾麟奏籌度新疆南路情形摺內亦有設立行省當從州縣辦起然後遞設督撫以統轄之等語蓋新疆本秦隴之屏障燕晉之藩籬此時回亂雖平而外患方殷亟宜經營盡善以固吾圉然舊制既不可復自不得不另籌善策左宗棠譚鍾麟所議改設行省固無非維持永久之謀至臣愚慮所及則與左宗棠等不能盡同有不庸不及時陳明者臣自曩歲出關辦賊洎於今已歷七載熟度關外情形求所以長治久安之道固舍設郡縣易舊制別鮮良圖此臣之所見與左宗棠等

相同者也惟將新疆另爲一省則臣頗以爲不然現在臣等擬設之南路各廳州縣合之哈密及鎮迪道等處原有各廳州縣總共不過二十餘處卽將來地方日益富庶所增亦必無多卷查光緒六年四月十八日左宗棠覆陳新疆宜建省開設郡縣摺內所載擬設及原有各廳州縣亦不過二三十處嘗考各省中郡縣之最少者莫如貴州廣西等省新疆則尙不能及其半其難自成一省也亦已明矣且新疆之與甘肅形同唇齒從前左宗棠以陝甘總督督辦新疆軍務凡籌兵籌餉以及製辦轉運諸務皆以關內爲根本其勢順故其事易舉臣之才力資望萬不逮左

宗棠而受代以來兩年之間雖無寸功足錄然尙未至債事者皆賴譚鍾麟楊昌濬誼篤公忠力顧全局故能勉強支持向使甘肅大吏稍存畛域之見則邊事已不堪問若將關內外劃爲兩省以二十餘州縣孤懸絕域其勢難以自存且後路轉餉製械諸務必將與甘肅分門別戶以清眉目所需經費較目前必更浩繁其將何以爲繼故新疆甘肅勢難分爲兩省臣所見有與左宗棠等不同者此也又臣閱譚鍾麟奏籌度新疆南路情形摺稿議將北路鎮迪等處暨擬設南路郡縣皆歸

欽差大臣統轄謹按

欽差大臣本非

國家常設之官且哈密及鎮迪一道原係奉

旨暫歸

微臣

統轄現既議設南路郡縣必須熟籌可久之

道不得仍作權宜之計況郡縣設定後諸事須照各省辦

法而言例章則

臣

營無舊案可稽言用人則軍中無合例

堪以補署之員至於錢糧刑名升遷調補諸事又無藩臬

兩司可專責成似茲窒礙難行之處未可枚舉

微臣

之愚

擬請將哈密鎮迪道等處暨議設南路各廳州縣併歸甘肅爲一省惟歸甘督遙制竊恐鞭長莫及擬仿照江蘇建置大略添設甘肅巡撫一員駐劄烏魯木齊管轄哈密以

西南北兩路各道廳州縣並請

賞加兵部尙書銜俾得統轄全疆官兵督辦邊防並設甘肅關外等處地方布政使一員隨巡撫駐劄舊有鎮迪道員擬請援福建臺灣之例

賞加按察使銜令其兼管全疆刑名驛傳事務改迪化直隸州爲迪化縣添設迪化府知府一員治迪化城管轄迪化昌吉綏來阜康奇臺五縣似此辦理實較另爲一省稍免煩費而於新疆時勢亦甚相宜如蒙

聖明准行仰懇

迅簡巡撫藩司暨擬設之南路兩道員以便及早措置壹

是現在伊犁既經收還分界亦不久可以蒧事沿邊無警防務解嚴如設巡撫則

欽差大臣儘可裁撤

臣

擬俟巡撫西來當舉關外一切情

形詳細告知並將經手事件交其接辦再行呈繳關防仍俟

臣

足疾醫治全愈後卽當佩裝北上以伸累載戀

關之忱蓋新疆蕩平已六年之久此時軍務日鬆急宜定大局以修政理

臣

於吏治嚮少閱歷關外郡縣諸事宜多係創始斷非軍旅粗材所能了局區區愚悃實恐貽誤將來並非意存規避此不能不預先瀝陳者也所有哈密鎮迪道等處地方暨議設南路各道廳州縣擬請併歸甘肅



合爲一省各緣由臣係爲規畫久遠起見理合恭摺具陳  
是否有當伏乞

皇太后

皇上聖鑒訓示施行謹

奏

軍機大臣奉

旨另有旨欽此

各城旗丁併歸伊犁滿營添設撫標增置總兵等官額兵

片七月初三日

再哈密以西各滿營旗丁亂後予遺僅存舊制萬難規復  
卽以古城烏魯木齊兩處言之前此古城領隊大臣勝安  
由京西來道出哈密與臣談及古城滿營房屋久已鞠爲  
茂草該處旗丁總共不過十數人勝安自以補授斯缺原  
應卽行赴任究竟古城無隊可領無營署可居進退維谷  
殊形狼狽臣比屬其與金順恭鏗熟商自處之道悵然踰  
天山北去臣於光緒二年夏秋之交率師克復烏魯木齊  
其時瀾城傾圮瓦礫荒涼未見旗丁一人嗣臣進克南路

各城始將旗丁之被賊裹脅者陸續拔出咨送烏魯木齊安插然爲數亦復無多故以恭鏜之精明強幹世受

國恩銳欲有所爲以圖報稱然所管旗丁只有此數雖都統有兼轄鎮迪道之責而政務亦甚簡少不足以發舒其才氣他如哈密辦事大臣所部健銳威儀各營現已奏明全行裁撤其所轄回務亦經左宗棠奏

准歸哈密通判管理欽遵在案竊維

國家建官分職原各有分內應辦之事現在新疆時勢變遷都統暨辦事領隊大臣兵少事簡幾無異投閒置散此不但非

朝廷設官之初意亦諸臣心所不安也如蒙

聖明俯察臣言

准照擬設甘肅巡撫之議則烏魯木齊自須設立撫標官兵南北兩路均宜另設額兵添置總兵副將參游都守千把等官以爲永遠防邊之計烏魯木齊提督應移駐喀什噶爾以扼要害吐魯番暨南路舊有參贊辦事領隊各大臣員缺固可一律裁去卽自哈密北至伊犁所有都統暨辦事領隊各大臣員缺亦宜酌量裁撤巴里坤古城烏魯木齊庫爾喀喇烏蘇等處所餘旗丁如目前之零星分布終恐無濟實用不如併歸伊犁滿營生聚教訓以期漸成

勁旅查承平時新疆南北兩路係歸伊犁將軍總統烏魯木齊都統亦兼轄鎮迪一道如設巡撫則不但鎮迪道無須都統兼轄卽將軍亦無庸總統全疆免致政出多門巡撫事權不一其伊犁滿營似應改照各省駐防將軍營制從新整頓務求精實可用庶於邊防有所裨益總之新疆不復舊制便當概照行省辦法若二者並行則一切夾雜牽混之弊難以枚舉屬茲伊犁已還界務將竣大局宜急定奪

臣 忝綰

欽符既有見不能不據實直陳是否可行祇候睿斷理合附片陳明伏乞

聖鑒訓示施行謹

奏

軍機大臣奉

旨另有旨欽此



光緒八年七月二十三日內閣奉

上諭劉錦棠譚鍾麟張曜奏請變通新疆官制營制各摺  
片著各該衙門速議具奏欽此



卷之三十一

三十一

軍機大臣字寄光緒八年七月二十日奉

上諭金順奏伊犁參贊大臣升泰患病懇請開缺並起程回京日期暨請派會辦分界事宜一面行知額爾慶額前往各一摺覽奏深堪詫異伊犁甫經收還辦理分界及善後各事宜關係何等重大疊經諭令妥慎籌辦金順升泰宜如何勉力和衷期無貽誤如果金順與升泰有意見不合之處升泰儘可據實直陳聽候察奪即使患病屬實籲請開缺亦應自行陳奏候旨遵行乃竟咨請金順代奏擅自起程回京金順明知分界諸事正當喫緊並不力爲阻止竟敢率行代奏任令起程卽派額爾慶額前往會辦似

此玩視邊務輕量朝廷種種謬妄殊出情理之外卽將金順升秦置之重典亦屬罪有應得姑念邊疆緊要金順升秦從寬均著革職畱任升秦無論行抵何處卽著迅速折回將分界善後一切事宜與金順悉心商辦彼此不准以意氣用事致誤機宜儻敢各存成見置國事於不顧定將金順升秦從重治罪勿謂寬典可以倖邀也現在分界期迫卽著長順額爾慶額等會同慎重辦理毋稍草率並著劉錦棠譚鍾麟杜嘎爾等查明升秦現在行抵何處飭令迅回伊犁不准逗畱將此由五百里各諭令知之欽此

劉襄勤公奏稿卷四

起光緒八年九月  
訖光緒九年三月

目錄

請撥部款彌補新疆所免釐金並接濟軍餉摺

請 飭部預籌解濟西征欠餉摺

請 飭山西彌補卓勝軍墊款片

請 飭籌解金順張曜軍協餉片

審訊甘秦澍捏造逆書奏請 定奪摺

請 卹道員張宗翰並事蹟 宣付史館摺

遵 旨覆陳哈密大營未便移紮烏魯木齊及南北

兩路布置情形摺

俄國駐喀領事權飭局員兼顧片

請假兩月在營調理片

請按約索還烏什之貢古魯克地方摺

請開缺回籍治病並懇簡員接辦邊事摺

請止安集延商人領俄路票赴新疆貿易並附俄漢

纏各回及哈薩克人眾越界滋事摺

借撥吐爾扈特福晉銀兩片

請將遣犯釋回片

覆陳裁勇補兵暨未裁之營仍舊支給行餉摺

覆陳前墊卓勝軍餉銀應由晉補解現裁該營須銀

散給摺

爲湘楚嵩武卓勝各軍病故文武員弁請卹摺  
刊送新疆南路分界大臣關防片



請撥部款彌補新疆所免釐金並接濟軍餉摺

九月二十二日

奏爲請撥部款彌補新疆所免釐金並軍餉將罄擬懇

飭部暫借鉅款俾資接濟恭摺具陳仰祈

聖鑒事竊 臣承准軍機大臣字寄光緒八年五月二十三

日奉

上諭總理各國事務衙門奏新疆開辦商務懇准暫免各  
城釐稅一摺新疆地方設卡徵釐藉資軍食現在俄民運  
貨往來暫不納稅而各部落人及內地華商仍令照章完  
納未免苦樂不均且恐弊竇叢生於釐金亦有名無實至  
沿邊人眾尤宜廣其謀生之路以示招徠所有進出卡倫



貨物往來新疆各城貿易者著概行暫免釐稅俟商務興旺照約議立稅則時再復舊章著劉錦棠金順張曜升泰遵照辦理並行知各城一體遵辦欽此仰見聖恩寬大惠愛邊氓之至意跪聆之下欽感莫名伏念新疆僻在極邊土地磽瘠自

祖宗朝平定準回兩部以來關外用款向賴內地協濟咸豐同治年間粵捻苗回各匪相繼叛亂各省自救不暇朝廷亦不能不急顧腹地於是新疆變起餉斷援絕戍邊諸臣束手無策坐以待斃甚或臨難苟免不復知有忠義廉恥臣自出關辦賊師行所至每呼遺民老兵諮詢往事

知從前新疆之亂固由在事諸臣類多奉職無狀馴致諸事廢弛人心離異釀成全疆失陷之禍然關外軍需動輒仰給於人亦實難以自存也大學士前任陝甘督臣左宗棠深鑒前車於各城戡定後議行田賦水利釐稅諸政意以利源一開卽各省或有他故協餉不以時至尙可就地羅掘勉強支持其用心亦良苦矣臣曩在喀什噶爾行營見崇厚所議條約內有俄商不納稅之說卽曾慮及釐務弊竇叢生中外苦樂不均擬請併免華商及各部落稅釐而其時左宗棠方銳意辦理釐務臣竊以爲不然後接幫辦軍務臣張曜暨統領老湘右軍總理臣軍營務道員羅

長祐來函亦以請免華商釐稅爲言蓋臣幫辦軍務時暨羅長祐等雖聞籌餉之難究無籌餉之責知督辦大員必不任饑軍譁潰卽遇空乏不過馳書告急一舉筆之勞而已大凡天下事不躬親閱歷則其中之艱苦憂患不切於己臣自接綰

欽符始不敢仍主免釐之議率行陳請者誠以釐稅一項雖歲入銀不過二十餘萬兩而在新疆視之則如渴極思飲滴水皆珍也現在既經總理各國事務衙門奏

准暫免徵收自應欽遵辦理臣於奉

旨後謹卽恭錄行知各城一體遵辦將原設各局卡概行

裁撤並遍張告示通諭商民暨沿邊諸部落俾各周知細  
釋

諭旨所有進出卡倫貨物往來新疆各城貿易者著概行  
暫免釐稅等因自是專指中外往來行商而言至本地土  
產如金銅牲畜等項額征課銀本

國家維正之供不得概予豁免仍飭戶民赴各廳州縣衙  
門及各善後局照常交納惟此項課銀所入無幾從前新  
疆釐稅收數較多且係可靠之的款軍食局費藉資彌補  
今驟少此一款自不能以未可深恃之協餉抵償歲入有  
著之釐金再四思維惟有仰懇

天恩飭令戶部從光緒八年五月二十三日奉

旨免釐之日起歲撥銀二十餘萬兩專濟關外釐金之缺俾得稍免拮据仍俟照約議立俄商稅則興復釐務時再行停撥抑臣更有請者本年各省關協餉起解寥寥關內外遵

旨裁撤各營旗應發欠餉無從籌給防營月需之現餉亦屬異常支絀轉瞬餉項告罄即使各省關趕緊續解已有緩不濟急之勢現在洋款既未便再借不得不於戶部暫借鉅款以資接濟仍於各省關應解西征協餉項下酌量攤劃定限歸還昨陝甘督臣譚鍾麟與臣函商及此意見

相同擬卽由譚鍾麟主稿酌核數目另摺詳細會奏臣等明知部款關繫

國計根本原不應妄請撥借惟臣等忝膺重寄諸軍饑乏堪虞若不預爲籌畫大局將難設想事勢所迫計無所出不得不作此冒昧之請如蒙

聖慈鑒允實西事之大幸也所有請撥部款彌補新疆所免釐金並軍餉將罄擬懇

飭部暫借鉅款俾資接濟各緣由謹會同陝甘督臣譚鍾麟恭摺具陳伏乞

皇太后

聖鑒訓示施行謹

奏

軍機大臣奉

旨戶部議奏欽此

請 飭部預籌解濟西征欠餉摺

九月二十九日

奏爲各省關歷年應協西征軍餉解不足數並於光緒九年分新疆所需餉項亟宜預籌解濟請

旨飭部核議指撥恭摺具陳仰祈

聖鑒事竊 臣前奉光緒七年十二月十五日

上諭光緒八年西征月餉飭各省關照舊撥解十成等因欽此並經部議各省無論如何爲難亟應籌足十成以資開放各等因 臣維西征協餉現以關外爲大宗大約解款十成關內用銷其四關外用銷其六各省關自奉撥以來並未年清年款查光緒五六兩年各省關欠解銀三百餘



各省軍餉之虧損  
萬兩七年分欠解銀二百三十餘萬兩八年截至六月底  
止欠解銀一百五十九萬四千餘兩又山西省應解卓勝  
軍半餉每月一萬八千兩自光緒三年二月起至八年六  
月止欠解銀一百二十餘萬兩年來關內外遣撤營勇清  
發欠款及防營月餉之需祇此新借洋款藉以支持現在  
洋款蚤罄而各省關應解之餉尙不能趕緊籌解以致已  
撤之假勇欠餉不能清釐卽月需之現餉亦屬無從籌發  
萬竈望哺百事待舉而餉源日見其縮辦理諸形容窘手寸  
衷焦灼莫可名言 臣自光緒六年冬奉

命督辦新疆軍務准大學士前任陝甘督 臣左宗棠移交

關外各營局年需軍餉暨善後採運各項經費銀三百七十餘萬兩各營欠發餉銀二百五十餘萬兩經臣會商陝甘督臣譚鍾麟幫辦新疆善後事宜臣楊昌濬陸續裁減營勇並將善後採運諸費力加撙節臣部現存馬步四十八營總計勇餉局費並哈密以西文武官廉俸及兵役書吏軍臺驛站各項應發經費年需銀二百七十餘萬兩各營欠餉截至七年底止總計銀二百二十餘萬兩臣部四十餘營自哈密起北至昌吉綏來一帶南至喀什噶爾和闐等處分防一萬餘里幅員遼闊隊伍單薄此時兵制未定營勇遽難再裁卽餉需遽難再減恭繹

諭旨八年協餉照舊撥解十成是九年分餉項部臣尙未  
籌及卽譚鍾麟本年四月奏請

節部酌定各省起解的數亦係爲本年遣勇需費起見臣  
忝膺邊務爲目前計則望解大批以清舊欠爲將來計則  
求撥的餉以資支放合無仰懇

天恩飭下各省關將歷年欠解西征協餉迅速籌解大批  
西來俾濟急需至光緒九年分經臣節次簡省年需銀止  
二百七十餘萬兩除老湘一軍原有專餉應由江蘇照舊  
解濟不計外各省關應協之餉果有銀三百八十萬兩解  
到甘肅省城糧臺按照四六成核計關外可得六成銀二

百三十萬兩雖不能將新舊應發各款悉數發清尙可視其緩急勉爲挹注應併懇

恩飭部核議預籌的餉以免臨渴掘井之虞邊事幸甚大局幸甚所有各省關歷年協餉解不足數並九年餉項急需預籌各緣由理合會同陝甘督臣譚鍾麟恭摺具陳伏乞

皇太后

皇上聖鑒訓示施行謹

奏

軍機大臣奉

庚午年五月二十日

旨戶部速議具奏欽此

十一

220

請 飭山西彌補卓勝軍墊款片

九月二十二日

再烏魯木齊提督金運昌所部卓勝軍餉章原係山西安徽兩省分解接濟光緒二年經大學士前督辦新疆軍務臣左宗棠奏調移陝西來以該軍去皖愈遠餉項難再由皖省解濟請由山西暨西征餉內分任其半蒙

恩允准嗣因晉省亢旱成災經前山西撫臣曾國荃於光緒三年奏請緩解當經部議俟來年該省上忙錢糧征收有款各路軍餉卽當趕緊陸續補解毋再久懸等因查山西應解卓勝軍半餉每月一萬八千兩除光緒二年十二月及三年正月分餉銀三萬六千兩由金運昌收到外其

自光緒三年二月起截至八年六月底止共欠解銀一百二十餘萬兩該軍歷年月餉均係於西征餉內勉爲挹注以固軍心近聞山西年歲尙好民困日蘇前奉

上諭光緒八年西征月餉飭各省關照舊解足十成等因欽此是山西應協卓勝軍半餉自應欽遵一律解足乃本年卓勝軍餉項晉省迄未起解一批臣此次裁撤該軍馬步六營應發欠餉三十四萬餘兩現由西征餉內勉強騰挪尙難悉數發清以後該軍止存馬步五營綜核每月餉銀共需一萬六千餘兩比歲關內外遣撤營勇清發欠餉並防營月需之現餉需銀甚鉅拮据情形久邀

聖明洞鑒數年來籌墊卓勝軍各款時虞顧此失彼實屬萬分窘迫合無仰懇

天恩飭下山西撫

臣

以後按足卓勝軍餉銀一萬六千兩

無庸由西征餉內分任其半庶可稍免支絀之憂其晉省積欠該軍餉項仍應陸續歸還按月籌解銀二萬兩俾得彌補從前墊款山西撫

臣

張之洞深諳邊事素顧大局當

能勉籌接濟不至推諉謹附片具陳是否有當伏乞

聖鑒訓示施行謹

奏

軍機大臣奉



旨另有旨欽此同日承准知會已奉有寄信  
諭旨令山西巡撫按月籌解矣

請 飭籌解金順張曜軍協餉片

九月二十二日

再金順張曜兩軍每遇餉需缺乏輒馳書

臣

營告貸從前

尙有新借洋款可以勉爲挹注除由前護陝甘督

臣楊昌

濬在甘肅新疆總糧臺借撥不計外

臣

自接綰

欽符以來先後由哈密行營糧臺墊發過金順軍餉湘平

銀一十八萬四千兩墊發過張曜軍餉湘平銀三十六萬

餘兩現在洋款蚤罄各省協解日少

臣

與譚鍾麟均屬異

常拮据實在無力兼顧應懇

天恩飭下各省將應協金順張曜軍餉趕緊籌解俾資接

濟出自

鴻慈謹附片具陳伏乞

聖鑒謹

奏

軍機大臣奉

旨著戶部查明應協金順張曜軍餉省分催令趕緊籌解  
毋稍延誤欽此

審訊甘泰澍捏造逆書奏請 定奪摺

九月二十四日

奏爲審訊已革知縣捏造逆書堅不承招臚具眾證情狀  
遵例奏請

定奪事竊 臣於光緒七年二月奏參查辦重案不實署綏  
來縣知縣甘泰澍等一併革職歸案審辦一摺三月十六  
日奉

上諭此案情節支離亟應澈底根究等因欽此查此案前  
准烏魯木齊都統 臣恭鏗咨據署瑪納斯協副將余蘭桂  
署綏來縣知縣甘泰澍申報拏獲私招營勇之李福貴等  
復又搜獲通逆信件等情當因傳聞歧異恐有別情卽經

委員赴綏來會訊一切供情與原報大不相符其中疑竇尤多既有所聞據實咨會辦理等因臣比調余蘭桂甘秦澍來營查訊甘秦澍因任內交代未清并有折收科斂一案經恭鏜調往烏魯木齊審辦嗣准恭鏜咨據鎮迪道福裕詳據迪化州知州陶模訊明甘秦澍科斂銀六十六兩折征長餘銀四十七兩供認不諱自應計贓科罪惟該革員另有通詳李福貴等通逆一案鈔錄原供咨臣併案審辦十月二十日准臣恭鏜委員將甘秦澍解回臣營一面咨查塔爾巴哈臺參贊大臣臣錫綸所部提督劉文和有無札飭李福貴等招勇情事及札內因何銜名不符旋准

錫綸咨覆據劉文和呈稱該營正在刪汰募補適衛隊哨長都司梁炳炎稱有舊識參將李福貴兄弟願自募馬勇數十名投效比經應允下札時梁炳炎請署其弟守備李福德銜名以致與參將李福貴銜名不符嗣因日久未到復經札飭停招並函屬李福貴儘所招人數帶赴塔城聽候挑選鈔粘開招招札稿咨覆前來臣查此案原問官畱甘補用知府楊杰於上年閏七月內在營病故臣督同營務處浙江題奏道袁奎齡分省補用知縣鄭錫溍許茂光提集人證隔別研訊緣甘泰澍係湖南長沙縣人由文童投效歷保同知銜畱甘補用知縣六年委署綏來縣事

李福貴李福德同胞兄弟安徽亳州人李福貴係副將銜河南卽補參將李福德係守備銜拔補千總光緒四年由嵩武軍請假離營流寓昌吉縣務農爲業及李福德奉劉文和札委招募遂由昌吉招得曾國勝鄒祖玉董永和等十二名交李福貴照管自攜札赴吐魯番添募及奉文停招李福貴時在昌吉比卽函知李福德停招自帶馬勇曾國勝等赴綏來擬俟李福德續招隊到同往塔城十月初一日行抵綏來李福貴失去洋礮一桿疑爲鄒祖玉所竊遂將鄒祖玉訓責追問曾國勝亦因告假不准反被詈罵二人挾忿同於初三日赴縣喊控李福貴私刑弔拷假冒

招勇各情先是劉文和令李福德停招之後恐有不肖閒員假招募名色別生枝節因將前情移請迪化州飭屬查拏甘泰澍正奉查拏冒招之文適有曾國勝等喊控假冒招勇之事遂疑劉文和來文必陰指李福貴而言隨會同署瑪納斯協副將余蘭桂將李福貴並所招馬勇全行拏案追問文憑其時開招札文經李福德帶去而停招札文倉卒未能尋獲甘泰澍更疑假冒屬實遂將李福貴等悉數收押通詳請示迨初六日搜出停招札文而李福貴原稱參將札內填寫守備銜名均不相符益滋疑議至初八日甘泰澍因公赴州適李福德由吐魯番率隊抵綏來詢



知李福貴被押當遣馬勇六名追甘秦澍勢甚兇悍甘秦澍只得半途折回綏來居民曾受叛回之害見在押隊勇多係回民李福德又帶馬勇多名入城追逼官長遂起驚疑譎傳吐魯番尙有馬隊數百人心惶惑初九日早據甘秦澍稱在李福貴得勝袋內搜出通逆回白彥虎信二封比會同余蘭桂派所部營勇並拏獲李福德及馬夫王清近餘皆逃逸詎去勇往取李福德等行裝馬匹因而濶取同店客物致米賢炤赴臣恭鏗衙門呈控余蘭桂縱勇搶奪咨臣併案究追甘秦澍初稱該營勇往取李福德行裝時誤取客民米賢炤各物旋經清查給領等語臣恐不實

不盡委員行查並飭鎮迪道福裕查覆給領屬實並取具  
米賢炤銷案領狀甘結到營臣覆覈無異此查訊此案實  
在原委也臣維此案甘泰澍等草率詳報李福貴兄弟舉  
動離奇經臣併案

奏請革職在案卽甘泰澍科收折征另案亦已根查確實  
無難援案據實奏結無如案情支離尤在逆信虛實亟應  
澈底根究俾成信讞據李福貴供得勝袋是勇丁董永和  
之物其中有無信件不得而知迨至鎮迪道委員會審始  
問到通白彥虎信件來歷革員實在不知頭緒信上馬如  
虎三人名字都不知道等語據董永和供得勝袋是自己

在旌善營做的內裝洋火礮子各數十顆並未放過書信  
李福德先在吐魯番未回據供不知此信原委尤屬可信  
又據病故原告之已革守備曾國勝供當初喊控李福貴  
假冒招勇實因抱病告假不准心中疑憾因此說出李福  
貴改從回教並娶回婦的話今蒙審問李福貴並未改教  
亦無娶回婦的事不敢誣執得勝袋是董永和的書信事  
實不知道又據鄒祖玉供小的喊控李福貴實因他失去  
六響洋礮大眾都賴小的責打追問小的害怕因此告他  
私刑弔拷至假冒招勇是曾國勝喊控的餘與曾國勝供  
詞略同臣謹案案情虛實全在聽斷詳審此案原告革弁

曾國勝雖已在監病故經臣委驗填格取結存卷而其生前口供確鑿可據鄒祖玉亦係首告李福貴之人均稱不知逆書來歷李福貴始終堅供不知察其情節似屬虛誣自非反復推求難期水落石出細覈附卷逆書兩函筆迹係出一手後註三字回文不成字體顯係偽造信尾署八月十六日內有劉大人來文又不要一語意指劉文和而言及調查劉文和停招札文係九月初六日籤發寄信在二十日以前何以逆知停招之事顯係臨時意造其詐書之馬如虎趙成龍信內馬金子經臣通飭查覆均無其人據臣秦澍等續詳搜獲李福貴得勝袋檢出通逆回白彥

虎信二件初未敘明何人何時在於何地搜獲有無見證  
曾否質訊取供率爾通詳本涉荒謬卷查曾國勝鄒祖玉  
喊控李福貴假冒招勇事在六年十月初三日取出得勝  
袋事在初六日而甘泰澍乃稱初九日早晨因取袋中洋  
火試槍見有白線痕迹檢出逆信其時有道署幕友劉良  
星阜康縣幕友劉春園因公到署眼同拆視等語嗣臣飭  
迪化州知州陶模委員知縣張熙載先後查覆詢據劉良  
星面稱十月初八日路遇甘泰澍邀宿署中次早與劉春  
園同至甘泰澍臥室瞥見案上有封完書信二件旁攔得  
勝袋適余蘭桂至甘泰澍遂與余蘭桂一同拆看伊等比

卽迴避外出並未從旁與聞復詢劉春園所稱無異質諸  
余蘭桂稱十月初九日早飯後甘泰澍邀去商量公事案  
上先攔有信兩封當面拆開說是投白彥虎的話革員甚  
是詫異因是甘泰澍親自搜出來的故未想到假的一邊  
去等語查甘泰澍原申亦稱親手搜出比與余蘭桂公同  
拆看迨七年十月提集臣營覆訊詰以兩信初未拆閱何  
以預知其有通逆情事而甘泰澍則又忽稱兩信初只私  
拆其一後又同眾拆看一封先後情詞自相矛盾此信虛  
誣情狀已不啻自發其伏又據該家丁徐喜卽小喜子供  
六年十月初六日家長叫魏升到李福貴住處取回馬刀

一把得勝袋一箇交小的點收只見洋火洋礮子各一匣袋上白線縫的比時並未看著提訊魏升及其門丁余升均供得勝袋上初時並無白線痕迹餘供相同而徐喜且有十月初八夜四更後瞥見甘泰澍獨自披衣然燈在於臥房案上鋪紙執筆作信魏升並有七年二月二十一日早晨甘泰澍兩次說到逆信是曾國勝害我令將這宗事推到曾國勝身上該丁不允各等供此案提營以後凡案內有名人證業經<sub>臣</sub>督飭先後承審各員隔別研訊數十次覈對大眾供單均各符合無異惟甘泰澍申詳情節與後此親供反覆不定如果通逆信件屬實則當取獲得勝

袋時上有白線綻痕自應當堂憑眾取驗以昭明信何至  
案內物件攜入私室且延擱三日之久經手家丁人等均  
不知覺忽稱查出逆信當時並不窮究後復設套串供均  
出情理之外及至理屈辭窮又稱信尾日期與劉文和停  
招札文日期先後相懸此信明是假造但不知出在誰手  
是其因案負氣捏故求勝既知情不可掩遁辭致飾已可  
概見又該縣幕友廖小峯供稱十月初九日甘泰澍向稱  
搜出李福貴等通白逆信函屬辦詳稿伊比勸令取供出  
詳甘泰澍堅執不從後聞外間物議追憶信上字畫彷彿  
甘泰澍筆迹當堂給看益覺逼真比令甘泰澍作書比對



雖臨時故變其體而細覈筆法實出一手臣復親提逐細  
鞫訊並令其家丁魏升等三面環質甘泰澍口塞氣屏不  
能登對一語反復推究眾供確鑿遂令隨營刑書彙錄成  
招披單按名當堂朗誦一過各令靜聽明晰自稱無屈始  
令親手畫押臣復再四研訊各許自行陳辯眾情咸服矢  
口不移獨甘泰澍異常刁健狡展如故臣旋據其續呈逐  
層駁詰甘泰澍似知悔悟俯首流涕然捏造逆信始終不  
肯招認臣維此案肇衅由於李福貴兄弟之招勇投效恃  
符驕肆蔑視印官適鄒祖玉等銜憾喊控街市謠風肆起  
環相湊合遂成疑團甘泰澍以地方印官因案查拏申報

本無不合惟虛實未明草率詳報雖屬事出有因究非尋常顛預可比今既眾供確鑿逆書筆迹與甘泰澍相符其爲甘泰澍所造已無疑義自未便因一人堅不承招懸案莫結致滋拖累查例載問刑衙門審辦案件遇有實在刁健堅不承招者卽具眾證情狀奏請

定奪誣告叛逆被誣之人已決者斬立決未決者擬斬監候又斷罪無正條引律比附應加應減定擬罪名又二罪俱發以重論錢糧不收本色折收財物亦以監守自盜論四十兩斬雜犯徒五年又因公科斂坐贓論六十兩杖八十又同僚犯公罪其餘不知私情者只依失出入人罪問

擬其申訴不實者杖一百又不應重律杖八十各等語此案甘泰澍因公科斂改收折色又復捏造書信誣李福貴等投逆罪名按二罪俱發以重論除科斂銀兩改收折色均在輕罪不擬外自應照依誣告叛逆未決擬斬監候例甘泰澍應斬監候惟原情定擬究屬事出有因與平空誣告人從逆者有間應於誣告叛逆未決擬斬監候上量減一等擬以滿流係職官從重改發黑龍江充當苦差犯事雖在光緒七年五月十四日  
恩詔以前係誣逆減流改發應不准援免係職官仍恭候  
欽定甘泰澍堅不承招謹遵例臚列眾證情狀奏請

定奪已革署瑪納斯副將記名簡放提督納清額巴圖魯  
余蘭桂查明尙無縱勇搶奪情事該勇丁等混取客物業  
經如數給領完結既非有心亦未入已例得免議卽以不  
知逆信虛實附和會詳而論祇應按同僚犯公罪其餘不  
知私情應依出入人罪問擬僅止降級特事關通逆情  
節較重余蘭桂冒昧會詳已由另案革職應毋庸議已革  
副將銜河南卽補參將李福貴已革守備銜拔補千總李  
福德雖訊無通逆情弊然劉文和開招札文係署李福德  
銜名李福貴卽不應事外干預李福德擅派馬勇威逼印  
官舉動均屬乖謬既經革職均請無庸開復鄒祖玉因李

福貴失去洋礮將其訓責妄以私刑弔拷喊控應照申訴  
不實杖一百律鄒祖玉擬杖一百恭逢

恩詔以前請予援免曾國勝挾告假不准微嫌率以私招  
喊控實肇衅端罪有應得業已身死應與訊無凌虐之看  
役並不知信係偽造代擬詳稿之廖小峯均免置議兩次  
所取李福貴等行李軍器馬匹除行李等項已經甘泰澍  
點交外其餘軍器收存綏來縣庫馬匹給領無干省釋前  
此遞回原籍取保之蔣吉昌等行文一併開釋除全案供  
招咨部外是否有當謹會同陝甘總督

臣譚鍾麟烏魯木

齊都統

臣恭鏗烏魯木齊提督

臣金運昌合詞恭摺具奏

伏乞

皇太后

皇上聖鑒飭部核議施行謹

奏

軍機大臣奉

旨刑部議奏欽此



請 卹道員張宗翰並事蹟 宣付史館摺十七月二

奏爲道員立功後積勞病故志節可傳籲懇

天恩俯准賜卹附祀並將事蹟

宣付史館恭摺仰祈

聖鑒事竊二品頂戴按察使銜前署西甯兵備道甘肅題

奏道張宗翰經臣於光緒六年咨商前陝甘督臣左宗棠

調辦喀什噶爾英吉沙爾等處善後總局本年春間因臣

營總理營務道員袁垚齡請假回籍接替需人將該員調

回哈密派委總理營務曾經附片陳明在案該員上年出

關膂力方剛本無宿恙自委辦善後總局身當繁劇之任



拮据卒瘖經營締構往往寢饋不遑慮竭精殫漸致眩瞶  
怔忡之疾本年奉調前來哈密跋涉長途醫藥並缺疾復  
疊作間臣左右乏人贊襄冒寒暑忍飢渴輿疾趲程而至  
抵營後臣與晤接見其面目清癯詢悉疾雖小愈精神猶  
未復元比屬令從容調攝勿以孱體過勞乃仍鉅細必親  
不肯晷刻自逸九月十六日晨起披覽軍書數寸許忽痰  
湧氣結眩瞶仆地據醫者云心血過虧勢極危險連進溫  
補之劑神氣稍清迄無大效延至二十一日午刻身故臨  
歿前數日與臣論及時事多艱

皇太后

皇上宵旰憂勤爲歔歔涕下者久之握臣手殷殷舉往哲  
嘉言善行相勗軍中僚佐省視者各以大義訓勵之彌留  
之際喃喃語不成聲臣與僚佐側耳細聆猶莫非練  
兵籌餉畫界通商之事繫可哀已該員籍隸湖南湘陰縣  
距臣原籍湘鄉不過三百餘里臣自弱冠從軍蚤於梓桑  
袍澤閒飫聞其居心行事之梗概嗣臣帶兵關隴該員經  
左宗棠檄赴平涼行營委辦文案支應諸事旋派總司營  
務與臣共事一方者十年當是時雖彼此未嘗朝夕相依  
或緘牘往還或於謁見左宗棠之便把晤旬日相與籌商  
兵事餉事運事獲其贊畫之力居多默窺左宗棠幕僚賢

才薈萃其忠清勤慎始終如一者實推該員爲尤左宗棠倚重之隆亦推該員爲最臣既佩左宗棠知人善任益信該員夙望匪虛焉迨經臣咨調出關委辦哈英兩城善後事宜維時荆榛甫闢凡夫清查田賦勸課蠶桑創設義塾修理城池解宇倉廩臺站渠堰橋梁道路巡閱邊卡捕拏游匪聽斷回漢詞訟抽收稅釐萬緒千端應接不暇該員前後兩載辦理悉臻妥善成效較然可觀方擬薦達朝廷共肩艱鉅乃以積勞致疾年甫五十而沒實堪惋惜微臣才庸識陋全賴二三賢傑輔立翼行一旦人鑑云亡慟悼原所應爾而全疆僚屬下至部曲走卒見者聞者

無不酸心隕涕感歎悲思則其平昔德澤感孚端可知已  
查該員自少讀書卽勵志聖賢之學咸豐十年前湖北撫  
臣胡林翼聞而器之手書敦促爰始出山是書刊載胡林  
翼遺稿中班班可考該員到鄂後適值皖吳戰攻孔棘髮  
逆屢竄上游羣捻眈眈環伺胡林翼扶病理事該員依依  
左右多所裨益胡林翼沒後前任陝甘督臣楊岳斌羅而  
致之相隨度隴正值回氛猖獗標兵叛變餉竭運艱戰事  
失利該員相從患難臥薪嘗膽矢死不離其苦心調護於  
其閒者多矣屢在華亭縣張家川暨洮州廳等處勦辦賊  
匪戰功卓著歷經楊岳斌

奏明有案楊岳斌卸篆回籍該員相從歸養者年餘旋經左宗棠檄調再出復值甯靈戰事臣叔父劉松山陣亡逆回擾近平慶涇固之間勢且岌岌幸左宗棠屹立不搖從容布置機局漸轉卒克削平厥後勘定西甯河州肅州復經三載該員無役不從雖由左宗棠總攬綱維發縱指示而該員獻可替否與夫汲引人才調和將士宣上意而達下情所以佐成左宗棠事業尤非淺鮮迹其長才卓識實堪任重致遠遺大投艱徒以久羈幕僚未獲獨當一面中間雖權西甯道篆一次又以爲時未久不及盡展所長而要其先後馳驅二十二年備嘗險阻艱難堅忍卓絕丹衷

耿耿至死不忍忘

君幾於昔賢馬革裹屍三呼渡河風烈其忠義之氣實有  
可廉頑而立懦者歷佐胡林翼楊岳斌左宗棠皆一時人  
望始終勤慎上下遠邇胥無閒言至其清操自矢一塵不  
染家無百畝之田敝廬不蔽風雨妻子固不免飢寒卽老  
母高堂菽水且虞不足而臣閒一詢及該員從不言貧沒  
後檢其遺囊則圖書衣履而外絕無私蓄是尤難能而可  
貴者使天假以年其成就固未可限量旣不幸數奇不偶  
齋志早終惟有顛懇

天恩優給卹典俾凡爲臣子者聞風興起相勉於忠清勤

慎以報

國家養士之恩於世教不無小補除派員接辦營務並委員護送該員遺櫬回籍外合無仰懇

天恩俯准飭部將二品頂戴按察使銜前署甘肅西甯道甘肅題奏道張宗翰照軍營立功後積勞病故例從優議卹附祀前通政使司通政使臣劉典甘肅省城專祠並擬援照光緒五年閏三月二十三日

諭准左宗棠奏請將夏忻王柏心等四員事蹟

宣付史館成案懇

恩准將張宗翰事蹟

宣付史館以彰忠藎而資觀感出自  
逾格鴻慈謹繕摺具奏伏乞

皇太后

皇上聖鑒訓示施行謹

奏

軍機大臣奉

旨著照所請該部知道欽此



卷之三十一 雜記

三十一

遵 旨覆陳哈密大營未便移紮烏魯木齊及南北兩路  
布置情形摺十一月二日  
奏爲遵

旨覆陳仰祈

聖鑒事竊 臣於光緒八年九月初九日承准軍機大臣字  
寄八月十九日奉

上諭恭鏜奏請飭移哈密大營進紮烏魯木齊一摺據稱  
烏魯木齊爲新疆扼要之地近因金順一軍開拔伊犁其  
駐烏之卓勝軍及該都統前募馬步各營均已分別裁撤  
所留營勇不敷分布劉錦棠大營駐守哈密節制南北微

嫌隔閡若移紮烏魯木齊易資鎮攝且於辦理通商事務  
尤爲便宜等語著劉錦棠體察情形妥籌具奏原摺著鈔  
給閱看將此由四百里諭令知之欽此等因跪聆之下伏  
見

皇上繫念邊陲

宸謨周運欽感莫名竊維軍府之於行省雖均取地方扼  
要據其形勝便於策應然比諸營室行省如堂奧故多在  
腹地軍府如門戶故多在口隘新疆大勢南北分歧總以  
烏魯木齊爲堂奧北以伊犁爲邊要綏來爲門閤南以喀  
什噶爾爲邊要吐魯番爲門閤而哈密則關內外咽喉筦

轂南北要津也如將來行省議定扼要建置當以烏魯木齊爲最臣與左宗棠固已先爲籌及

奏明在案此時使臣駐軍哈密兼管地方善後諸務係屬一時權宜原非建置之比南疆入城遼遠數倍於鎮迪轄境故臣與張曜所部軍營多駐南路關內軍裝餉鞘解抵哈密約計分撥成數解南路者需十之七解北路者不過十之三而已南北分途按程計算由哈密西南行經吐魯番逕達八城道平而又直捷由哈密北行繞烏魯木齊迂折而南路遠九站又須重越南山口天山盤道與齊克達巴罕之險臣忝握

欽符脫令大營進紮烏魯木齊則行營糧臺軍裝轉運等局勢必隨同移駐勞費已屬不貲將來後路餉饋均須解烏匯總轉解而南路旣迂折暗中消耗腳價積累滋多際茲餉需艱窘萬狀雖實在應用正款猶須於無可省之中求省斷無舍近求遠避易就難可省而不省之理也以局勢論臣軍自遵

旨裁撤雖存馬步四十餘營分防地段萬里而遙兵力本無一處厚積而由喀喇沙爾東至哈密二十餘站中間僅吐魯番托克遜兩城駐馬步兩營尤屬空虛哈密辦事大臣明春所部業經全撤後路直抵嘉峪關僅安西州有譚

鍾麟派紮步隊一營若臣大營進紮烏垣則哈密津要之區關鍵盡撤前突而後竭矣恭鏗所請其義果何取哉臣愚不得而知之矣至北路防務臣原議裁撤卓勝軍馬步六營由金運昌挑選不願回籍勇丁及土著精壯先復標兵舊額之半奉

旨飭臣會商譚鍾麟等悉心妥籌奏明辦理等因比經臣欽遵咨行嗣准譚鍾麟函會改勇爲兵仍當束以防營之制團紮一處以便徵調訓練金運昌亦以關內現行制兵額餉太薄召募維艱請照土勇口糧辦理遂商由金運昌改併土勇一旗召募土勇六旗權作標兵責成提屬各將

領管帶合現畱卓勝軍步隊三營馬隊兩營分防奎屯臺  
至古牧地一帶以馬步四千餘人分防數百里地段而南  
山各隘口又有恭鏜馬隊扼禁古牧地東行嚮係臣軍由  
奎屯而西又屬伊犁將軍金順所部接防烏垣兵力已不  
單薄前因綏來逸西劫掠之案層見疊出行旅戒嚴經臣  
咨詢金運昌旋以裁畱添募尙未集事咨覆到營臣懼有  
疏漏比檄委陝西漢中鎮總兵譚上連率臣部親軍步隊  
三營馬隊一旗開赴綏來扼要駐紮西接金順防地東接  
金運昌防地換出原駐綏來之卓勝軍隊伍回紮阜康濟  
木薩等處以專責成其南路西四城防務臣原

奏擬責成張曜嵩武一軍由駐防葉爾羌和闐之提督董  
福祥所統馬步八營內抽調步隊六營移防阿克蘇烏什  
各城仍歸張曜節制調遣換出總理行營營務道員羅長  
祐所統駐阿克蘇之湘軍馬步各營移防吐魯番托克遜  
一帶以便居中策應南北酌留楚軍馬隊四營布魯特馬  
隊一旗土勇步隊一旗交張曜合嵩武一軍分防西四城  
擇要扼紮以厚兵力似此酌盈補虛南北局勢較前更爲  
搏緊周轉一氣此<sub>臣</sub>布置北路兼籌南路邊防之實在情  
形也嗣因張曜有乞假裁營之請事機稍異議遂中輟幸  
賴



聖恩高厚

溫旨慰留經臣復申前議張曜均允照辦無異擬俟沿邊  
劃界事竣卽行分別移調以符前議而昭周密卽以通商  
論此時安設領事偏在南路喀什噶爾吐魯番等處臣駐  
軍哈密通籌全局呼應靈通隔閡似非所慮爰蒙

聖慈垂詢用敢據實覆陳藉紓

宸廑所有臣大營駐守哈密未便移紮烏魯木齊遵

旨體察情形籌辦各緣由謹據實縷陳愚昧之見是否有

當伏祈

皇太后

皇上聖鑒訓示施行謹

奏

軍機大臣奉

旨據奏哈密大營未便移紮及南北兩路布置各情均屬  
周妥仍著該大臣隨時體察情形將邊防事宜妥爲調度  
以安疆圉欽此



俄國駐喀領事權飭局員兼顧片

十一月二日

再臣接准幫辦軍務廣東陸路提臣張曜咨開俄國新設喀什噶爾領事官已於本年十月十九日抵喀所有中俄交涉公事應飭喀英善後局員兼辦遇有重大事件仍由局員稟商辦理等因咨會前來臣查新約條載俄國領事官駐中國遇有公事與本城地方官往來均用公文兩國人民在中國貿易等事致生事端應由該領事官與地方官公同查辦等語惟南疆各城尙未設官中外互市交涉伊始經理需人該善後局員原管地方事務所有與俄國駐喀領事官一切交涉公事應權飭喀英善後局員就近

兼顧以專責成遇有重大事件仍報由 臣 張曜督同辦理  
以昭妥慎俟將來官職設定另案

奏明辦理除咨覆外謹會同陝甘督 臣 譚鍾麟幫辦軍務  
臣 張曜合詞附片具陳伏乞

聖鑒訓示謹

奏

軍機大臣奉

旨該衙門知道欽此

請假兩月在營調理片十一月二日

再臣於本年四月間因舉發兩足疼痛之病日漸增劇

奏蒙

聖恩賞假一月調理連服辛溫發散之劑略就痊可卽行強起照常視事均經附片陳明在案數月以來宿恙時發時止尙能勉強支持不甚措意迨及十月下旬天氣寒冽偶爾感冒而骭膝酸痛之證遂一發而不可遏冬至前後數日更形困憊現在筋掣心悸飲食銳減起坐爲之不安非但不能接見賓僚卽披閱文牘甫及數行動覺目眩神昏不能終事據醫者云積寒未祛元氣虧損每遇嚴寒酷

熱陰陽剝復之際尤易觸發必須屏除酬應安心調理方能漸次就痊伏念臣以樛昧庸材膺茲重寄夜寐夙興尤虞曠職尋常痛癢之疾何敢輒爾上陳致煩

慙塵無如臣自同治八九年間圍攻甘肅金積堡賊巢寢饋沮洳之場兩足受病深而且久近年轉戰新疆天山南北兩路軍事倥偬不暇講求醫藥而冰天雪嶺陰寒中人羸病之軀更難禁受若不及時調治恐遂痿痺不仁無以久供驅策合無仰懇

天恩俯准賞假兩月在營安心調理俾沈疴蚤愈仍得奮勉從公實感

高厚生成之德其營中日行公事飭由營務處道員周漢等隨時請示辦理如遇緊要事件自當力疾躬親以昭慎重謹附片陳懇伏乞

聖鑒訓示謹

奏

軍機大臣奉

旨著賞假兩月欽此



卷之三十一 雜記

三十一

請按約索還烏什之貢古魯克地方摺

十二月十八日

奏爲新疆南界烏什之貢古魯克地方關繫緊要擬趁晝分未定據理按約索還津要以通南北而利邊防恭摺馳陳仰祈

聖鑒事竊新疆局勢自準部戡定回疆全入版圖關山通道擇要安設卡倫臺站南北一氣貫注無事則換防徵調遵率自由有事則振旅饗軍進退如志

廟謨宏遠

睿慮精詳百世莫之或易也

臣

查伊犁通南捷徑有四一

自那喇特卡倫經朱勒都斯察罕通格兩山以達喀喇沙

爾一由穆素爾達巴罕渡特克斯河踰冰嶺以達阿克蘇之札木臺一出伊克哈布哈克卡越貢古魯克達巴罕以達烏什一出鄂爾果珠勒卡倫踰善塔斯巴爾琿兩山渡納林河以達喀什噶爾然阿克蘇冰嶺臺路艱阻萬狀夏月冰渙四山坼裂溢流峭壁森立莫能飛渡亂後臺站盡替現僅阿屬七臺經臣照舊安設餘已咨商伊犁將軍臣金順辦理尙未接准覆文其喀喇沙爾一路曠廢已屆百年其中陵谷變遷道路通塞水草有無均難懸揣屢經行查鮮據昨已函致金順請將山北情形確實查覆再議疏通其納林達道蚤非我有自可毋庸議及獨烏什之貢古

魯克一路地界入城之中爲南北相通第一津要遠在界綫東南新舊條約

皇朝地輿圖志班班可考也臣查中俄界約大率按山水分宗誠以山峙水流古今莫易故界綫所至輒指定某山之頂或水流去向以定經界山陰屬俄山陽屬中水西流之處屬俄東流之處屬中天然界限朗若列眉而經緯方隅判然兩截雖地名沿革語言文字稱謂各殊百變不能離其宗矣謹按塔城舊約所載伊犁南界過那林哈勒噶由特穆爾圖淖爾南邊之罕騰格爾薩瓦巴齊貢古魯克喀克善等山統曰天山之頂行至蔥嶺靠浩罕爲界是那

林迤南約載之貢古魯克明明與罕騰格爾諸山連類而  
及且申言天山之頂其確指貢古魯克山頂而言非指烏  
什之貢古魯克山麓爲言義至明也臣前慮南路沿邊地  
界情形在事諸臣或者難於洞悉特飭駐軍阿克蘇道員  
羅長祜將圖約所載地名歧異闕略之處遵照指示詳查  
細繹齎由臣覆加考覈函達金順與伊犁參贊臣升泰所  
有查勘烏什西北之格根特克斯喀喇庫勒等處由俄境  
通伊大小路徑遠近險易條分縷晰悉以相告本年夏間  
巴里坤領隊臣沙克都林札布奉  
旨勘分南界臣復飭羅長祜將原查情形就近詳告沙克

都林札布用備採撫嗣據烏什善後局員知縣周應棻申  
報本年八月十三日沙克都林札布帶同俄使自阿克蘇  
行抵烏什由貢古魯克雅滿素各卡倫繞貢古魯克山麓  
至別疊里達坂共立界牌二處俄使各埋銅牌一面所過  
山峽卡隘城堡逐一繪圖並將烏什城垣丈量規計繞出  
布魯特牧場周迴游歷延展四十餘日至九月二十六日  
始出烏境時幫辦軍務臣張曜已先期出卡守候日久咨  
報前因請由臣理論行催比經咨行查照旋准張曜咨初  
接沙克都林札布函會從那林哈勒噶起程度冰嶺由阿  
克蘇烏什先勘北界十月初六日沙克都林札布同俄使

密登斯開行抵喀什噶爾詢知阿烏邊界從罕騰格里至別疊里山已立界牌其奇恰爾達坂迤西現已積雪難行擬俟來年五月再行勘辦並准鈔錄喀什噶爾互換界約函寄到臣逐細覈閱如第一條由那林哈勒噶河起過穆匝爾特達坂向西天山中梁罕騰格爾頂上接薩瓦巴齊又從薩瓦巴齊山口卡子以至貢古魯克山口繞至天山均因達坂高險人難越過通指天山中梁爲界天山東南屬中西北屬俄凡天山斷處向西北流河水不許改截源流等語尙與塔城舊約相符該俄使似亦知約不可背者何以貢古魯克山口至別疊里之達坂路兩邊相離二十

二丈半又復埋立中俄兩國界牌鄂博耶所稱別疊里卽畢底爾向西北流河水當卽阿克蘇上流之畢底爾河山口達坂路當卽烏什出貢古魯克卡以達伊犁之路也臣維天山南北分支千條萬派隆崇綿亘每由中峯以至山麓蟠屈引伸百里一小曲千里一曲一直矣故按北山言之由東而西起巴里坤之松山以至那林河源凡數千里統以騰格里指名中峯由南而北自阿克蘇以至伊犁千二百餘里總以冰嶺達坂爲中峯中峯既定然後分疆畫界可得而言也以故塔城舊約雖詳於北而略於南然其第三條結束特指明罕騰格里薩瓦巴齊貢古魯克喀克



善等山統曰天山之頂一語由辭譯義匪特罕騰格里確指天山中幹之頂爲界卽貢古魯克喀克善各支山罔非各指天山頂爲界也騎嶺分界則烏什邊外俄界應在貢古魯克諸山之陰不得侵入山陽中國境地也今其所換界約凡貢古魯克以上各山通指天山中梁爲界乃復於貢古魯克山口及別疊里之達坂路兩邊相離二十二丈半埋立中俄兩國界牌鄂博侵佔至畢底爾河源且將烏什城垣丈量就其約章按其舉動實屬支離刺謬自相矛盾居心叵測已可概見失今不言後將指此次會勘新界爲定界甚且於俄界之外中界以內駐兵設卡任意作難

忍之則有積薪厝火之憂發之又有投鼠忌器之慮如北路哈巴河故事有明徵也迄今科界黃綫迤西蒙民暨哈薩克三萬餘眾撫綏安插重煩

宸廛將來作何了局尙難懸擬若貢古魯克至別疊里山南達坂路所立俄界兩處不趁晝分未定按約索還則現隸烏什之奇里克胡什齊兩布魯特部落勢必自撤藩籬終歸俄有而貢古魯克通伊犁捷徑非我所能問津南北隔絕卽八城東西中間亦多梗阻伊犁勢成孤注特克斯川雖得亦猶之未得矣微論有事徵兵饋饟窒礙不行卽平時之文報往來必須繞越隔閼孰甚焉夫以中國固有

之地照約載地界畫畀俄人我爲主而彼爲客如其違約越佔曲在彼而直在我我自得以有辭如哈密幫辦臣長順深明此義以故勘分中界有得無失且將紅綫迤西之格登別珍島諸山爭爲我有抑其詭謀驕氣彼終讐服無詞辦理洵爲得手嚮使勘分伊犁南界守轍循途亦卽免此周折矣臣伏讀本年八月初三日諭旨西北邊界條約所指地名必須查考確實方免混淆稍有遷就出入甚大務當詳慎妥辦不得稍涉大意又讀

九月二十四日

上諭新約卽定惟有就原圖應行勘分之處力與指辯酌

定新界勿稍遷就各等諭

聖訓煌煌無微弗燭南路事同一律自應恪遵辦理擬請  
飭下總理各國事務衙門向俄國駐京公使據理按約與  
之辯論所有伊犁南界應照此次中界所定格登山紅綾  
循格根河順喀什噶爾西邊行至蔥嶺靠浩罕界爲界中  
閒應行勘分之處支節繁多務須責成分界大臣恪遵  
諭旨力與指辯酌定新界勿稍遷就然後由烏什貢古魯  
克出卡以達伊犁之路足可索還事後不至別生梗阻所  
立貢古魯克及別疊里達坂路兩處界牌應一律拔除凡  
新約越佔之處悉予更正庶足清淆混而杜覬覦並懇

天恩諭令曾紀澤與俄國原派全權大臣原始要終以重  
邦交而清邊界必期兩昭明信而後已臣明知新疆界務  
各有專責何敢故越尊俎然烏什貢古魯克地方被俄人  
影射越佔奪我南北要津關係重大臣忝膺重寄未報涓  
埃儻事關全疆利害知而不言縱邀

寬大殊施而捫心何以自問區區之愚實匪有他所有烏  
什之貢古魯克地方關係緊要擬趁畫分未定請

旨索還以通南北而利邊防各緣由謹會同幫辦軍務臣

張曜據實具

奏愚昧之見是否有當伏乞

皇太后

皇上聖鑒訓示施行謹

奏

軍機大臣奉

旨另有旨欽此



請開缺回籍治病並懇

簡員接辦邊事摺

光緒九年正月二十八日

奏爲

微臣病難速痊籲懇

天恩俯准開缺交卸差使回籍調治並懇

另簡賢能大員接辦邊事以免貽誤恭摺瀝陳仰祈

聖鑒事竊

臣於同治八九年間隨同

臣叔父巴故廣東陸

路提

臣

劉松山圍攻甘肅甯夏金積堡賊巢時逆回決渠

水灌營

臣

與諸將士晝夜竭力堵禦往來泥淖之中寢饋

沮洳之場者數月自此遂得兩足疼痛之病從前雖不時

舉發然速則二三日遲亦不過五六月即就平復比歲于

役天山南北兩路轉戰冰天雪積中陰寒襲人病勢遂日



甚一日上年三四月間爲風寒觸發日久不愈奏奉

諭旨賞假一月在營調理後外感全祛雖舊恙時止時發  
尚可勉力支持於五月中旬強起照常視事曾經附片陳  
明在案迨至冬初感冒嚴寒疾復大作於光緒八年十一  
月二十一日奏乞

賞假在營調理茲於光緒九年正月初十日准兵部火票  
遞回原片後開軍機大臣奉

旨著賞假兩月欽此跪聆之下銜感莫名臣自去冬以來  
延訪良醫多方調治現在假期已滿外感實已盡除而宿  
疾漸覺增劇前此所患骭膝酸痛飲食減少心悸神昏及

目眩筋掣汗出諸證迄未少愈近更添出腹泄頭暈等證  
臣肢體素肥邇來兩足膚肉忽形消瘦終日閉門偃臥呻  
吟之聲不絕於口遇有重要事件不能不親自裁決忍痛  
起步必須人扶掖乃能舉足坐閱文牘稍久輒暈倒於地  
困憊情形難以言狀據醫者云積寒中於下焦歷年太久  
根株太深已成沈痼之疾又曩服發表去溼等藥過多以  
致元氣大虧諸證叢生現舍溫寒補虛別無治法惟身處  
極邊奇冷之區日飲積雪融成之水藥餌之溫補不敵水  
土之寒涼故服附子至三十餘觔卒無效驗是非速回南  
方從容醫治難期痊可如再久羈塞上寒邪日盛兩足日

益瘦削恐遂成癱瘓等語伏念臣猥以凡庸受

恩深重捐軀糜頂未足云酬苟係尋常痛癢之疾何敢自  
耽安逸圖釋仔肩無如福薄災生沈疴日劇著復貪榮戀  
棧勢將貽誤邊疆關外軍務善後暨中外交涉各事宜本  
屬異常艱鉅現復奉

旨飭設南路郡縣事體最爲繁重不才如臣即使夙興夜  
寐奮勉從公猶虞疏失今委頓至於此極事無大小均難  
躬親雖欲不曠職債事何可得也況臣本軍旅粗材惟戰  
陣勞苦之役尙可藉答涓埃倘以孱軀仍畱西域馴致痿  
痺不仁竟成廢器異時

國家苟有緩急不能復効馳驅上負

鴻恩永無報稱之日此尤臣所大懼也再四思維惟有籲

懇

矜全俯准開去通政使司通政使員缺並交卸

欽差大臣篆務俾得回籍養疴湖南地氣和暖於病體較

爲相宜臣年甫四十但得南歸調理宿恙全瘳卽當儼裝

北上泥首

宮門求

賞差使致身報

國爲日方長至新疆邊務實非勲名夙偉文武兼資之選

不足以孚眾望而策久安並懇

迅簡重臣前來交代庶西事可免疏虞而臣得善葆此身

以爲將來圖報地步如蒙

聖慈俞允大局幸甚微臣幸甚所有病難速痊懇

恩俯准開缺交卸差使回籍調治並懇

簡員接辦邊事各緣由謹繕摺具奏不勝迫切待

命之至伏乞

皇太后

皇上聖鑒訓示施行謹

奏

軍機大臣字寄光緒九年三月初三日奉

上諭劉錦棠奏病難速痊懇請開缺一摺覽奏情詞懇切實深廬系第念劉錦棠自督辦新疆軍務以來經理一切事宜諸臻妥協威望允孚深資倚任現在伊犁交涉之事尚多枝節俄境匪類時出滋擾外患未靖大兵勢難遽撤邊疆緊要正賴重臣鎮攝未便遽易生手劉錦棠著再賞假三月在營安心調理毋庸開缺並發去人漢六兩以資調攝該大臣受恩深重務當體念時艱勉圖報稱以紓朝廷西顧之憂有厚望焉前經諭令各直省將軍督撫暨統兵大臣等訪求才略過人足任將帥者秉公保薦際此需

才孔亟該大臣平時見聞所及必有所知卽著切實保奏  
以備任使將此由五百里諭令知之欽此

軍機大臣字寄光緒九年正月二十八日奉

上諭金順奏勘分南段界務繪圖貼說呈覽一摺據稱沙克都林札布勘分南段界務會同俄官在於別疊里達坂埋立界牌其餘應勘地方議定於本年五月再行舉辦等語勘分南段界務事體重大前據劉錦棠奏貢古魯克地方關繫緊要現繞由貢古魯克山麓至別疊里達坂設立界牌侵佔至畢底爾河源若不趁晝分未定按約索還南北隔絕路多梗阻當經添派長順會同沙克都林札布查照劉錦棠所奏妥慎辦理現在界牌雖已勘立晝分尙未定局著金順等懍遵本年正月十四日諭旨飭令沙克都



林札布與長順和衷商摧將貢古魯克山麓至別疊里達坂所立界牌向俄官力與指辯設法挽回並著劉錦棠張曜隨時會商金順等熟籌妥辦以期有裨大局將此由六百里各諭令知之欽此

請止安集延商人領俄路票赴新疆貿易並附俄漢纏各

回及哈薩克人眾越界滋事摺

二月初十日

奏爲安集延商人持領俄官路票赴新疆各城貿易恐開  
釁端並附俄之漢纏各回及哈薩克人眾越界滋事亟應  
論辯阻止以杜後患而重邦交恭摺仰祈

聖鑒事竊

臣

准幫辦軍務廣東陸路提督

臣

張曜咨開安

集延部落與喀什噶爾境地相連風氣最爲狡悍從前擾  
亂南疆大爲民害南八城埽蕩後流寓之安集延悉數驅  
逐出境本不准其再來惟該夷現歸俄屬許俄通商該夷  
卽在其內如查其向時驅逐之人應准放卡與商民一律

看待其安集延貨物天山之南祇准在喀什噶爾一處銷售不得分赴各城漫無禁止等因比經分別咨行照辦嗣准張曜咨稱據安集延商人稟稱俄國駐喀什領事官發俄票十二張凡安集延商人無論何城都能去得具稟請示等因上年秋間疊接喀喇沙爾游牧之士爾扈特南部福晉文報伊犁西北哈薩克部落越境搶掠牲畜並將牧夫縛去比經追捕則翻珠勒都斯逸逃該福晉由伊犁招回逃亡三百餘丁行至控吉斯河腦被哈薩克搶去羣馬一百八十五匹報由善後局轉稟到營經臣行文咨查究辦旋准伊犁將軍臣金順覆稱俄屬之哈薩克及漢纏各回

時出搶劫駐卡官兵種種受害咨會俄官嚴禁置若罔聞  
拏獲到案俄官必索回不辦等語先後咨會到臣行營准  
此臣維交鄰之道莫如通德類情馭邊之謀尤貴防微杜  
漸非熟審交涉利害情形預爲申約一旦因事齟齬重煩  
口舌小者尙可遷就了結大者甚至支節環生牽掣大局  
履霜之漸馴至堅冰不可以不慎也中俄改定新約第十  
二條內載准俄國人民在伊犁塔爾巴哈臺喀什噶爾烏  
魯木齊暨關外之天山南北兩路各城貿易標出俄國人  
民四字本非他部落所可影射安集延雖歸俄屬究非眞  
正俄人如果該夷素號馴良與中國邊民夙無嫌怨則聽

赴各城貿易與俄國人民一視同仁有何不可無如安集延羊很狼貪累世稔惡道光五年之張格爾十一年之玉素普同治三年之布籽罕牙和普擾亂新疆頻煩申討此次帕夏阿古柏乘中國關隴有事不暇及遠遂盜踞南疆各城犯順以來殺人不以梃刃有所讐惡輒餌以毒藥登時斃命纏回幼女自八歲以上悉被姦淫死者十常七八又誅求無厭終歲取盈其最慘者纏回亡一家長安夷酋長恫喝之曰爾家財產係爾家長所積家長既亡應將財產悉數充公有不繳者則非刑吊拷一旦夕間而纏回人亡家破流離失所矣似此殘忍暴虐迥出情理之外纏回

人眾莫不痛心疾首飲憾至今光緒三年臣率師規復南疆查明安集延人流寓各城者尙二千有餘察其樹怨於纏回甚深必至耦俱相猜終啟邊釁疊經咨商前陝甘督臣左宗棠札飭各營局稽查明確設法放歸安置免貽養癰之患乃四年冬間卽有安集延逆目阿里達什潛入布魯特糾眾犯邊之舉五年春安集延又與布魯特合謀入寇漏逸逆酋阿布都勒哈瑪與愛克木汗條勒兩次糾眾大舉犯邊經臣疊次親督各營出卡兜剿痛加斬馘逆燄始熄搽出賊目金山身藏俄官路票兩紙咨呈總理各國事務衙門存案備查並先後訊據賊供逆目阿里達什初

出犯邊係由俄官處告假潛出其阿布都勒哈瑪與愛克木汗條勒由俄糾眾內犯時俄官姜達郎屬以此行務取喀什噶爾城池否則不准再入俄境故該賊酋在烏魯克恰提卡外聲言奉俄國號令攻取喀英各城以上情節均經左宗棠專案奏報其賊中摺獲俄票數見不鮮尙有未及陳奏者綜觀往事安集延狡猾凶頑甘爲俄國鷹犬纏回遭其荼毒幾於不共戴天近年張曜駐軍喀什噶爾各城頭目紛紛具稟請嚴禁安集延人往來回疆免滋擾害等情言之痛切易大傳曰凡物之情近而不相得則凶際此互市初開若安夷與俄商漫無分別彼將恃俄爲護符

遇事猖獗生風勢所必至纏回積怨生忿兩不相下尋警報衅將由此起中國官吏約束固慮其難周卽俄國領事徇庇恐亦有所不及也臣又查關內外積年逆匪竄入俄境者甚多俄人堅不交還北路自綏來縣以西時有游匪肆行搶掠一遇巡防嚴密之處則僞爲商民販貨貿易稱係已歸俄籍之人莫可究詰金順來咨有叵測情形難以枚舉之語難保無白彥虎餘黨乘間攔入以作不靖今安集延之可慮如此而若輩之滋事又如此若准其持執俄票運貨赴各城貿易姑無論燼餘逋寇死灰尙慮其復然萬一各城纏回追念夙憾出其不意攘其貨而戕其軀甚



至鬪毆拒殺緣引無窮曲在彼則故爲延宕曲在我則徒貽口實彼時辦理棘手更不待言故中國於安集延欲求始終弭釁自以不准通商爲上策然彼既附俄俄終得以有詞再四思維惟有指定銷貨地方俾有所限制而不至於蔓延則兩得之道也臣謹按歐洲各種公法有通商不可強逼之條就中俄盟好而論陸路通商不便原許酌商辦理有咸豐十年之續約第十四條在卽新約改定通商章程亦並無安集延民人字樣現在新疆稅釐旣免一切包庇營私之術無所用之遇有真正俄商出入往來尙當隨時保護以敦和好卽布噶爾愛烏罕克什米耳巴達克

山各部落在我有羈縻弗絕之誼亦應廣示懷柔獨安集  
延爲南疆百姓所深憾通商實多不便而積年竄俄逆匪  
及附俄之哈薩克人眾假稱俄商越界生事俄國旣不申  
禁而發覺又不宥懲辦踵事效尤後患伊於胡底邊疆遼  
闊防不勝防小有疏虞動搖全局臣 鯁鯁過慮實不能已  
於言相應請

旨飭下總理各國事務衙門照會駐京俄使熟權利害轉  
行俄國駐劄新疆各領事官遵照此後安集延商人貨物  
南路准在喀什噶爾一處銷售北路准在伊犁一處銷售  
毋須發給路票分赴各城以保商務而消隱患彼如謂安

集延卽係俄人應准援例貿易要必與俄使約法凡安集延前此從逆之眾如被纏回讐殺不得向中國官吏求爲申理其附俄之哈薩克與伊犁新歸俄籍之人亦祇准在伊犁兩城貿易以便中俄官吏會同譏察俄國領事尤當隨時嚴加管束毋任滋事至中國竄俄之漢纏各回均係百戰死黨啓不畏法應行文俄國與白逆一同禁錮不得縱令爲害致傷和誼言前定則不貽或亦籌邊之一道也

臣爲杜後患而重邦交起見是否有當謹會同幫辦軍務

伊犁將軍

臣

金順幫辦軍務廣東陸路提督

臣

張曜專摺

具

奏伏乞

皇太后

皇上聖鑒訓示施行謹

奏

軍機大臣奉

旨該衙門知道欽此



借撥吐爾扈特福晉銀兩片二月初十日

再吐爾扈特南部落人民自遭兵燹喪亡大半光緒四五  
兩年由伊犁西湖仍歸喀喇沙爾珠爾都斯地方游牧仰  
荷

天恩賞給銀四萬兩經臣奏銷在案數年以來該部落共  
戴

皇仁以生以殖閒有缺乏均經臣隨時查明酌量補助漸  
就還定惟流亡甫集如大病之軀刻難復元去年秋閒由  
伊犁續歸難民三百三十三丁口行至控吉斯河腦被俄  
屬哈薩克搶去馱馬一百八十五匹經臣行查無著冬閒

又遭牛疫倒斃過多其汗舊有府第兵燹之後尙未修復大小水渠年久失修需費甚鉅疊據該福晉恩克巴圖呈懇奏請

賑恤並請籌借銀二萬兩分作五年歸還各等情由喀喇沙爾善後局委員黃丙焜轉稟前來臣逐細查核委屬實在情形惟臣軍餉項支絀異常一時騰挪費手且分年歸還期限迂緩殊礙報銷臣謹仰體

聖慈權爲籌撥銀一萬兩分批解交該福晉祇領作爲渠工宅第經費令其撙節支銷其新歸待賑丁口自去年十月中旬起至本年見新止飭由該局員照章給賑開報所

需牛種並飭通融接濟俾資耕作毋令坐失農時所有借撥前項銀一萬兩可否仰懇

天恩俯准由臣援照前案取具該福晉印領咨送理藩院核銷續發牛種賑糧並准由臣作正開銷之處出自逾格鴻施謹附片具陳是否有當伏乞

聖鑒訓示施行謹

奏

軍機大臣奉

旨著照所請該衙門知道欽此





請將遣犯釋回片二月初十日

再據遣犯蘇阿樣呈稱遣犯現年七十五歲廣東潮州府海陽縣人道光十五年三月十六日因行劫謝加修財物一案擬遣十九年六月充發新疆濟木薩在配守法同治三年新疆回亂各城失守曾隨民團拒賊不支乘閒逃命肅州後投入官軍開花廠隊提督鄧增營內充當火勇隨同打仗數年之久冀可自贖前罪且家有老母年屆百歲呈請開釋回籍等情據此臣維該遣犯蘇阿樣犯事案冊及到配年月臣營無案可稽比經行查烏魯木齊都統提督及濟木薩參將縣丞各衙門兵燹之後均無檔案發局

讞供核與該犯呈詞大略相同查例載遣軍流犯如有因變逸出自行投歸者俱照原犯罪名各減一等發落又歷次不准援減之犯在配因賊劫獄戕官該犯等不甘從賊乘閒逸出各自行投首尙知畏法量子末減歷經遵辦在案新疆自逆回肇亂各城淪陷比時在配遣犯乘閒逃逸者不下千百名事後悉邀

寬典免于窮治究追

高厚恩施覆冒無際茲該遣犯蘇阿樣在配四十餘年且知大義不甘從賊投効官軍隨同打仗出力經臣查明屬實現在年逾七十精力衰朽言及家有百歲老母不知存

亾極爲哀痛較之因變逸出自行投首情節尤爲可矜可  
否將該遣犯蘇阿樣釋回交保管束之處出自

皇恩是否有當謹會同烏魯木齊都統臣恭鏜提臣金運  
昌合詞附片陳明伏乞

聖鑒訓示施行謹

奏

軍機大臣奉

旨著照所請該部知道欽此

聖賢書卷之六

五

軍機大臣字寄光緒九年三月初七日奉

上諭長順奏勘分南段界務請派張曜就近會勘等情一摺覽奏均悉分界一事自應隨時隨地相機因應長順前勘中段界務頗合機宜現在南段界牌雖立尙未定局張曜於該處地勢較爲熟悉惟帶兵駐紮防所未便遠離毋庸添派會勘仍著將一切情形與長順沙克都林札布詳細籌商妥爲辦理至曾紀澤所定界綫本自分明全在分界大臣於履勘時據約力爭以期設法挽回毋得意存諉卸烏什局員周應棻准其調往差委劉錦棠金順如有所見亦著隨時知照長順等斟酌妥辦總期於南北要路不

至梗阻方爲毋負委任將此由五百里各諭令知之欽此

覆陳裁勇補兵暨未裁之營仍舊支給行餉摺

三月十六日

奏爲覆陳關外現就已裁願畱之勇並募鎮迪各屬漢民按照土勇口糧編成旗哨權抵制兵之額遵照部議作爲練軍其未裁之營仍請照舊支給行餉以重防務合詞恭摺仰祈

聖鑒事竊臣錦棠於上年三月閒具陳裁減營勇摺內聲明新疆各軍久役於外強悍性成一旦遣撤恐其逗畱滋事請就現裁營勇中選其精壯耐勞不願回籍者編成額兵烏魯木齊提標兵額應由金運昌就所裁卓勝軍認真挑選俾復步兵舊額之半並改行餉爲坐糧以省饋運奉



旨飭令會商臣鍾麟等悉心妥籌奏明辦理等因欽此在臣錦棠之初意實見關外制兵久缺嗣後防營逐漸裁散深虞戍守無兵而各遣勇如或願畱乘此揀挑入伍既可樽節餉需復藉歸還兵制其於新疆全局不無裨補臣鍾麟自奉會商之

旨卽函商臣錦棠改勇爲兵仍當束以防營之制令其團紮一處以便訓練徵調適臣錦棠近准兵部咨會請

旨飭裁各省防勇擇精壯者挑補兵額仿照直隸章程作爲練軍與臣鍾麟改勇爲兵團紮訓練之意昭合金運昌前以關內現行制兵額餉太薄召募爲艱請照土勇口糧

章程辦理緣土勇之餉章雖較優於制兵之額餉而稍省於勇營之坐糧遂由臣錦棠咨商金運昌於裁撤卓勝軍馬步各營後就地召募鎮迪各屬漢民與遣勇之不願回籍者編成旗哨權抵標兵責成提屬各將弁管帶臣錦棠查烏魯木齊提標步兵原額四千三百九十五名而金運昌已報成軍之士勇六旗改併土勇一旗共計二千五百九十餘名已符步兵半額之數令其團紮訓練尤較標營得力其已遣之勇不願回籍者雖屬無多亦卽歸伍就範免致逗畱臣錦棠前就裁撤湘楚各營內之不願回籍者曾照坐糧章程編成馬隊一旗步隊兩旗將來亦可改作

額兵是提標之舊額尙可徐圖規復惟新疆幅員遼闊臣  
錦棠謹案乾隆年間勘定全疆移滿洲蒙古東三省索倫  
錫伯等兵暨陝甘兩省綠營兵或攜眷移駐或按期換防  
其見諸載籍者數逾四萬總計關外現存防營數僅相抵  
而應防之邊界較昔尤須嚴密滿蒙等兵在今日未便輕  
議西來陝甘之兵楊昌濬曾請毋庸撥換欲爲另立營制  
則必就募土著方可節餉而全疆之漢民嚮隸北路久經  
兵燹生齒未繁就使營制議更驟苦無人可募凡扼守之  
地段均賴營勇彈壓微論現值餉項支絀猝無巨款可以  
裁遣多營縱或勉籌酌遣亦止就願畱者復爲改作土勇

減章支放其未裁者苦征絕塞相距原籍遠或萬餘里近亦數千里各有室家不獨事畜取給於此卽盤川之所費亦復不貲行餉雖較從豐而計每勇一名月餉僅四兩餘塞外百物騰昂一身衣食而外所餘無幾已覺異常苦累不免久役思歸非若關內各直省之應募往返川資旣省食用之價亦廉雖照坐糧給發尙比關外行餉爲優臣錦棠原請就已遣之勇不願回籍者編成額兵並由金運昌於前裁卓勝軍各營內認真挑選漸復步兵之數改行餉爲坐糧業經次第舉辦特只能就遣勇之不願回籍與籍隸關外者爲之編伍減餉其裁而不願畱及現尙未裁者

情形既殊內地斷難強畱勒改坐糧蓋以巡守未可稍鬆  
戍兵不能速復必藉防營分駐則其從征過遠僅恃餉章  
少裕始足鼓勵軍心 臣錦棠權轄邊疆極思節省冗費無  
如迫於此時限於此地防營之設既未能同內地驟議多  
裁行餉之章又未能與內地一律核減計已久在

聖明洞鑒之中但使此後餉源稍旺先儘積欠較多之營  
裁遣如有不願回籍者卽照坐糧挑編旗哨用備將來另  
立營制之選至未裁之營應懇

天恩仍舊支給行餉以重防務庶於新疆時局有益而於  
部 臣裁勇補兵之議日後亦適相符除裁募人數隨時由

臣錦棠

奏報分咨外謹會同烏魯木齊提督臣金運昌恭摺具陳  
伏乞

皇太后

皇上聖鑒訓示施行再此摺係臣錦棠主稿合併陳明謹  
奏

軍機大臣奉

旨著照所請該部知道欽此

史記卷之八十五 留侯世家

一

覆陳前墊卓勝軍餉銀應由晉補解現裁該營須銀散給

摺

三月十六日

奏爲覆陳前墊卓勝軍餉銀仍應由晉按月補解並擬遵照部議續裁該軍現存馬步五營亟須由晉先行湊解大批銀兩以資散給恭摺仰祈

聖鑒事竊

臣

接准戶部咨會遵

旨議奏山西巡撫張之洞覆奏晉省財賦支絀萬無餘力顧及該軍請

旨飭下劉錦棠將卓勝軍月餉銀一萬六千兩仍由西征餉內按月撥給俾免貽誤並令斟酌緩急情形如關外現



在或無需此軍可否卽將現存馬步五營隨時裁撤以節糜費奉

旨依議欽此等因並准山西撫臣張之洞鈔錄摺稿咨送

前來臣奉准之下極思搏節騰撥聊寬晉力無如再四思

維臣營實難懸墊必須由晉籌解方足以資挹注而濟眉

急蓋臣自接綰

欽符刻以裁軍節餉引爲當務之先一祈紓

朝廷經畫之勞一免各省關悉索之苦業經先後裁減多營祇以積欠過鉅湊發維艱上年裁撤卓勝軍馬步六營應發欠餉三十四萬餘兩係由西征餉內勉挪酌發當時

原以該軍本係晉省協半之餉現值該省民困漸蘇請  
旨由晉每月按解該軍存營月餉銀一萬六千兩並每月  
補解舊墊銀二萬兩仰荷

聖慈飭令照解茲撫臣請

飭由臣照舊撥濟抑或

飭部改撥部臣以各省關均有應協要款亦難別議改撥  
各等語皆以該軍現既裁撤大半所須月餉較少臣營或  
可勉支初非有所推諉厚薄於其間也然於刻下西征餉  
絀情形則猶有未盡悉者查關外各營弁勇積存薪糧銀  
兩多至數百少亦百餘八九十兩不等久役辛勤待此以

爲川資養命之源一經點名截算月餉卽須如數找發欠項而發一營之欠足敷數營月餉之資雖統籌原屬節省而併發轉似驟增各省協餉多未解足除劃還洋款大宗外又與關內分成提用而善後經費各軍月餉均須按月有著是以每裁一營預爲多方牽算或度可集已裁之月餉勻發下存之營或賴別有指撥之的銀彌補現挪之數欲爲清源節流之遠計致蹈剗肉醫瘡之拙謀似此苦窘羅掘不獨撫臣未能深悉卽部臣亦或未及周知也前裁卓勝各營一舉而需銀三十餘萬臣始以爲山西欠解自光緒三年二月起截至八年六月底止以每月一萬八千

兩計之欠至一百二十餘萬兩彼時該省請緩部議仍令  
來年上忙錢糧征收有款卽當趕緊陸續補解毋再久懸  
比聞三晉歲豐張之洞履任後凡於理財用人力加整頓  
其見諸邸鈔者已深服其精核無遺而每自東來者僉言  
山西得賢大吏救敝起衰元氣可以頓復旣慶災後小民  
之得所兼幸臣營墊款之不虛又以該省曾遘奇祲鉅款  
猝難籌措僅擬每月補解欠餉銀二萬兩現存馬步五營  
月餉銀一萬六千兩計舊欠則分作五年攤補月餉則每  
月減去二千於奉

旨後滿擬必係可靠而張之洞力陳晉中之艱難深慮臣

處之窘迫故有

飭部改撥之請部

臣

稔知各處協餉欠解尙多與其另行

改撥徒付空談不若令

臣

通融較省煩瀆復恐此後月餉

難繼議裁該軍現存之馬步五營籌畫本極周妥特

臣邊

寄忝膺轄疆遼闊出款有常而不能稍緩入款有限而未

可剋期左宗棠前因晉饑暫請緩解其時餉裕於今挪濟

尙易且爲不久遂可補歸而

臣

前裁該軍各營直恃晉省

休養有年索欠必能立償始敢爲之清欠以減月餉之需

若此軍之墊餉竟虛懸而無著則是竭蹶立形諸凡難於

措手萬不獲已擬請嗣後由晉每月補解前欠卓勝軍半

餉銀一萬兩其現存之馬步五營論邊庭之緊要本宜畱以戍防論饋餉之遞加自宜及時清理如不趁此裁撤勢須按月解濟舊欠依然新餉不減應卽遵照部議裁撤清算惟綜計須得現銀二十七萬兩乃能令其算遣擬請從八年七月起至本年六月底止計十二箇月應由晉省每月協解之一萬六千兩合計十九萬二千兩先由該省趕緊措解西來以便扣放下餘不敷之項再由臣營設法挪找從此月餉可停每月僅籌欠餉一萬是於減解積欠之中藉收裁營節餉之效在晉省稍予騰挪庶將來不至續累而臣營得此周轉於全局實大有裨張之洞向來畱

心西事必能畛域不分合無仰懇

天恩飭令山西照臣此次所定減解數目無論如何爲難  
提前籌解以顧目前則邊陲幸甚除分咨外理合恭摺具  
奏伏乞

皇太后

皇上聖鑒訓示施行謹

奏

軍機大臣奉

旨另有旨欽此同日承准知會奉有寄信  
諭旨令張之洞竭力籌措提前撥解矣

爲湘楚嵩武卓勝各軍病故文武員弁請卹摺

三月十六日

奏爲續查湘楚嵩武卓勝各軍營立功後積勞病故文武員弁請

旨飭部議卹謹繕清單恭摺仰祈

聖鑒事竊臣於光緒七年七月二十七日由行營具

奏請將新疆軍營立功後積勞病故員弁胡焜等從優議卹一摺奉

旨胡焜等著照所請交部議卹單併發欽此仰見

皇仁廣被槁壤幽泉靡不沾洽茲復據湘楚嵩武卓勝各軍陸續查報積勞病故文武員弁藍翎畱陝卽補同知直



隸州知州蕭傳薪等四十四員名呈懇  
奏請

卹典前來臣查該故員等半生勵志萬里隨征或傷殘而  
沒於事後或戍役而卒於窮邊或轉餉長途冒苦暑嚴寒  
而病不起或參謀戎幕歷冰天雪積而殞厥生凡此奮不  
顧身罔非情殷報

國茲際

皇威遐暢全疆救平白應一律籲懇

恩施矜卹庶足以彰蓋績而慰幽魂所有藍翎畱陝卽補  
同知直隸州知州蕭傳薪等四十四員弁均係立功後積

勞病故謹將該各故員銜名籍貫另繕清單恭呈  
御覽合無仰懇

天恩俯准飭部一併照軍營立功後積勞病故例議卹內  
已革四品銜陝西補用知縣田奎一員前隨卓勝軍防晉  
時因赴皖省領餉有失察家丁騷擾驛站情事被參革職  
後隨隊出關効力前敵積勞病故該故員田奎擬懇

恩施逾格開復原官原銜

飭部一律議卹此外如尚有遺漏未報員弁容俟各軍陸  
續查報到臣另案辦理除咨部外理合恭摺具

奏伏乞

皇太后

皇上聖鑒訓示施行謹

奏

軍機大臣奉

旨著照所請該部知道單併發欽此

刊送新疆南路分界大臣關防片

三月十六日

再臣准署理哈密幫辦大臣長順咨稱光緒八年四月遵旨勘分伊犁中段界務曾經伊犁將軍臣金順刊就木質關防咨送啟用奏咨在案現復奉

命添派會辦南路界務擬即遵

旨趕於三月內由哈密起程前赴烏什一帶與沙克都林札布張曜等會同勘辦南界請援照舊章由臣就近刊送關防等因前來臣覆查該大臣會勘南路邊界遇有換約行文事件均須鈐用印信以昭信守業由臣刊就滿漢文字木質關防一顆文曰新疆南路分界大臣關防除咨送

欽定大清會典事例

卷四

該大臣長順查照啟用外理合附片陳明伏乞

皇太后

皇上聖鑒訓示謹

奏

軍機大臣奉

旨知道了欽此

劉襄勤公奏稿卷五

起光緒九年四月訖八月

目錄

請 旌楊溢中祖母陳氏五世同堂摺

特參庸劣不職知縣分別降革摺

委員試署准設新疆南路道廳州縣各官並籌現辦情形摺

請換鑄巴里坤總兵官印信並補發哈密協副將

敕書片

請彙獎防戍人員摺

核辦蒙部案件請照變通章程摺

力疾銷假仍懇開缺 簡員接替摺

遵 旨保薦人才摺

關外馬步營旗弁勇數目駐防處所繕請立案摺

關外各軍行糧坐糧章程善後臺局一切應發款目

繕請立案摺

委署南路道廳州縣員缺片

1871/13/11

請 旌楊溢中祖母陳氏五世同堂摺

四月初九日

奏爲壽婦年逾八袞五世同堂慈孝相承足式閭里謹援  
照成例據情籲懇

旌表以彰世瑞而勵家修恭摺仰祈

聖鑒事竊 臣據二品頂戴鹽運使銜陝西題奏道王久銘  
陝西補用道兼襲雲騎尉周漢三品銜升用道甘肅候補  
知府王鎮墉甘肅題奏知府蔣本艾題奏知府甘肅固原  
直隸州知州羅鎮嵩前署甘肅鎮西撫民直隸廳同知升  
用知府陳晉蕃署哈密通判分省補用知縣左兆鳳等聯  
銜呈稱壽婦楊陳氏籍隸湖南湘鄉縣係五品



封典例貢生楊榮燭之母分省補用知府楊溢中之祖母也秉性淑良事夫勤儉甫及卅三之歲寡鵠長嗟藐然十二之孤遺雛是撫該氏孝事慈姑責兼嚴父心盟古井手畫寒灰能使繼業青箱有聲鬢序固已婦道同稱義方有訓矣迨咸豐之間東南未靖楊陳氏慨令楊溢中從事戎行勉圖報稱其深明大義克振家聲尤非尋常巾幗所能及者職等居同梓里夙稔蘭猷觀其媲美郝鍾宜足高標楔綽而況年逾中壽仍寒素之如恆慶洽一堂願曾元而益豫洵屬

熙朝之人瑞宜膺

懋典於

天章楊陳氏生於嘉慶四年屆今光緒九年八十五歲有子一人孫二人曾孫六人元孫四人五代同堂孝慈素著職等所聞既確所見最真楊溢中現在甘肅新疆軍營效力造具系圖事實冊結由職等聯銜呈請核

奏等情前來臣查例載壽民壽婦年屆百歲及未屆百歲五世同堂由各省具題及各部院據呈

奏請

旌表者均准造具事實冊結送部由部覈覆彙題歷經遵辦在案茲該壽婦楊陳氏福自德基祥由和召甲週又半

符八十曰耄九十曰耄之文丁慶重添萃子又生子孫又  
生孫之盛是皆

聖世重熙累洽蘊爲休徵

皇朝雅化作人蒸成瑞應凡此坤元之貞吉實符

泰運之光亨道員王久銘等誼關桑梓公請咨

奏臣未敢壅於

上聞合無仰懇

天恩俯順輿情將壽婦楊陳氏

恩予旌表出自

逾格鴻施除系圖事實冊結咨部查照外謹循例恭摺具

陳是否有當伏乞

皇太后

皇上聖鑒訓示施行謹

奏

軍機大臣奉

旨著准其旌表禮部知道欽此



特參庸劣不職知縣分別降革摺

四月初十日

奏爲特參庸劣不職之前署知縣分別降革以肅官方而示懲儆恭摺仰祈

聖鑒事竊維州縣爲親民之官凡地方利病民生休戚罔非視牧令之賢否爲轉移新疆殘破之區鎮迪一道轄境歷經散給牛種招徠興屯蠲繇薄賦與民休息數年以來流亡始漸復業斗價以次平減旋定安集雖已略著成效而元氣究猶未復也臣自奉

命權轄全疆用人行政責無旁貸故於屬吏之賢否隨時隨事畱心察看仍慮耳目不及聞見難周特飭該管道州

認眞舉劾詳辦庶賢能者益加勸勵而庸劣者不致淆廁以期仰副

皇上整飭官常之至意臣前訪聞署奇臺縣知縣朱開懋浮徵苛派署綏來縣知縣歐陽振先縱丁匿命正查辦間據該管道州稟揭並准烏魯木齊都統臣恭鏗咨會前因

臣比將朱開懋歐陽振先一併撤任查辦去後茲據委員升用同知分省補用知縣鄭錫淶署迪化直隸州知州劉兆梅稟覆前來臣查卸署奇臺縣知縣朱開懋任內徵收額糧雖據查明尙無浮勒情事惟未能恪遵倉斗殊屬不合其因公借用商民器具折價賠償未及如數僱用民車

發腳短於民價並查有擅罰民戶銀六百兩買補社穀之事雖其事均屬因公罰款亦未入己究竟辦理乖方顯干朝廷例禁卸署綏來縣知縣歐陽振先縱容家丁查明尙無實據其未報命案雖非有心諱匿究因性情迂緩稟報遲延才具平庸已可概見似此庸劣不職未便稍事姑容相應請

旨將畱甘補用知州卸署奇臺縣知縣朱開懋卽行革職補用知府卸署綏來縣知縣歐陽振先以通判降補以示懲儆而肅官方實於地方吏治大有裨益所有特參庸劣不職之前署知縣分別降革各緣由謹會同陝甘總督

臣



譚鍾麟烏魯木齊都統臣恭鏗合詞恭摺具  
奏伏乞

皇太后

皇上聖鑒訓示施行謹

奏

軍機大臣奉

旨著照所請吏部知道欽此

委員試署准設新疆南路道廳州縣各官並籌現辦情形

摺

四月二十日

奏爲承准部覆准設新疆南路道廳州縣各官現擬委員前往試署以便詳察地勢民情續陳未盡事宜並籌現辦情形恭摺仰祈

聖鑒事竊臣錦棠承准吏部咨會遵

旨會議臣等前請變通新疆官制營制具陳一摺奉

旨依議欽此黏連原奏知照到營當卽欽遵分咨關外在事諸臣並飭現辦善後局員各將所管地段界址暨一切情形詳悉察奪具報去後伏維體國經野通籌局勢須原

始以要終庶可大而可久特當創辦之初有因一處之妨而致疑全局之多礙有因一端之阻而動謂眾務之未宜風氣之所浸漬成例之所拘迫欲變之於一旦微論法制尙未詳訂急切靡所適從卽使綱舉目張自謂燦然大備且有箕風畢雨之好足以消我視聽擾我神明種落之殊教令之別非獨其地有以限之抑由其俗積漸使然也關隴爲天下之屏蔽而塞外又踞關隴之上游山水之所從出其地則高寒而多沙鹼其人雖渾樸而不聯屬不問向之居國行國究其居處服食文字語言迥異中土漢唐以來殷憂西事罔不經營捍禦聊固吾圉蓋旣爲形勢所必

爭則卽爲聲教所必及乃以一其習尙無復他虞夫因創之所乘實由天時人事之所湊拍曩者漢置河西四郡當時雖不免耗中事西之苦而至今賴之西域自古羈縻之地往往一隅蠢動腹地爲震自

祖宗朝櫛風沐雨先後勘定南北兩路或分置屯防或間設郡縣星羅碁布遠近相維南疆地雖饒沃而因俗類榛狉難驟繩以禮法於是分

命大臣督率文武員弁兵丁鎮駐扼要之區彈壓巡緝差徭賦稅量爲征收舉凡疏節闕目用壯厥聲靈堅其趨向以待我

皇太后

皇上今日因時制宜變通盡利臣錦棠適躬逢其盛前陳  
應設應裁應改應移諸端仰荷

睿衡飭部會議茲各部院議覆摺內於議設者如置巡撫  
布政使及鎮迪道加按察使銜管理刑名改迪化州爲縣  
設迪化府各節暫從緩議而議裁議改議移者如裁各城  
都統參贊辦事領隊各大臣應俟南八城建置事宜辦有  
成效奉

旨准設巡撫再行會奏請

旨又裁去回官阿奇木伯克等另行酌設頭目則以均有

職掌責任應更體察妥議章程核辦改設額兵將烏魯木齊提督移駐喀什噶爾亦令俟後請

旨回童現入義塾讀書有能誦習一經熟悉華語者咨部給予生監頂戴議以向無成案擬請俟回童粗通文藝時酌設學額憑文取進加以該回童等但須讀書認字不必責其文理應另酌給獎勵請

旨遵行至請南路改設道廳州縣各官均經先行議准令將應辦事宜會商妥協次第奏明辦理各等因詳繹部院諸臣議覆各條其餘應准應緩之事體無不堪酌至當上慰

宸衷誠以損益之舉動關久遠之規縱使疑無可疑猶當慎之又慎然創制早開乎其先則變通宜善乎其後從前滇黔之改流官近如臺灣奉天吉林之添郡縣皆時會之所趨

聖化翔洽幾若行乎其所不得不行回童如能熟誦儒書諳習華語日久漸摩帖然就範既已革其舊習自當被以政教故應裁應改應移者刻下既須籌擬一則一氣相承因勢利導可收及時整飭之功一則經費宜定合計從長可免異日虛糜之弊部臣深知其然而現未卽請

旨飭辦者應俟准設之官具有規模然後分別舉行蓋卽

臣鍾麟所擬設立行省當從州縣辦起之意自准部覆卽經往返函商熟籌辦法擬卽由臣錦棠就近先行委員往署詳察東西兩道應分之界限並各直隸州與其轄縣應分之村境各處城垣多未完固尙有應行改建增修之城各官衙署能否各就善後辦公局屋改作或應別籌營造壇廟倉廩監獄亦應擇要修建驛傳塘站視其衝僻安設文員雜職置輔分司現除教職緩議外其各廳州縣之照磨吏目典史應與印官同城佐理此外各屬轄境遼闊應添州同州判縣丞巡檢分防各按所屬繁簡酌添以便控制凡此要圖務爲先正其名而後能責其事否則委員以



空名理實政既無職守亦無考成難期與斯民相維繫誠有如臣鍾麟所云者臣錦棠擬遵部議就差遣各員內分委道員同知直隸州知州通判知縣各官前往署理暫刊木質關防鈐記給令啟用俾昭信守惟是設官之後文移征收詞訟宜照官署之式南路向無漢民鎮迪所屬自經兵燹書吏更少於前無可調派前經分飭甘肅各府州於所屬書吏中揀公事諳練者各派數名優給川貲令其攜眷西來備日後之分撥回官三四品阿奇木伊什罕伯克階職較崇臣前慮其權重擾累曾請裁去銜額實欲杜漸防微而相沿已久未可驟加屈抑擬請仍畱頂戴略如各

省州縣之待所轄紳士假以禮貌使有別於齊民昔之眾伯克等分理糧役訟獄諸務將來擬分撥爲吏戶禮兵刑工各書與漢書胥雜處互授漢回文言期於相觀而善旣可收其把持之權又可藉爲公家之用似屬兩有裨益俟印官履任後徐爲圖之如能行之有濟屆時另行

奏報各官每年應支廉俸公費銀兩已經部議照鎮迪道所屬數目支領所有應設書辦及各項人役名數月支工食銀兩麪筋數目亦應請照鎮迪道所屬定章招設支發以歸一律兩道綜司各屬政務須有通曉各項文字之人以備繙譯應請各添清字回文書辦各數名各屬傳訊訟

案勘劃經界必先通其語言乃能從而剖斷應請各添回書通事數名以上月支工食銀兩麪筋數目均請照鎮迪道所屬書吏章程開支道員以下各官印信應懇

飭部按照擬就各項缺銜鑄造頒行查吐魯番同知之印文係兼用清漢回字此項印信似應一體兼鑄回文併懇飭下妥議定鑄南疆此次設官事屬創始當就練習邊情之員先將應辦壹是趕緊興辦方足以資治理現准先設各官顛懇

天恩准照吉林新設民官各缺成案統歸因地擇人由外揀補一次則相從邊塞者知所奮勉吏治可期起色至於

城垣衙署倉廩監禁應修各工舉不容緩南路土性鬆浮多齷卽燒成之甃塊曾不數年多被潮齷剝蝕牆垣基身務較寬厚始可耐久已飭湘楚各軍選派勇丁趕將城工挑築並商幫辦軍務臣張曜飭令嵩武軍營勇擇要興修許以事竣懇

恩擇尤獎勵均極踴躍用命第計工程浩大仍須兼僱纏回乃能期其成功其須用之鐵木器及各項工匠器物防營之不能辦者令各委員核實動用再懇

飭撥的款以濟要工值此經費支絀之際臣等受

恩深重尤當格外撙節無如地處邊荒工係創建但期力

杜浮冒未能牽合成規合無仰懇

聖慈俯准俟後歲役除繪圖貼說咨部外卽照實用實銷  
開單具報藉省一再造冊之煩徭賦上關

國計下係民生綜計南路征糧每年二十餘萬石將來兵  
制酌改需糧較少日久積儲勢難多備倉廩變價又苦無  
從銷售潮腐堪虞臣錦棠擬飭各屬於此後科定賦役時  
權其輕重或有前章稍重者仰體

皇仁卽予酌減征糧較多之處核計兵食之外所餘猶多  
卽行折征銀兩湊充度支以爲涓滴之助庶倉糧不至霉  
朽而邊儲得以常充矣除屯田兵制及未盡事宜容俟會

商妥籌隨時具

奏外所有承准部覆准設新疆南路道廳州縣各官現擬  
委員前往試署以便詳察地勢民情續陳未盡事宜並籌  
現辦情形各緣由是否有當謹會同幫辦軍務廣東陸路  
提督臣張曜恭摺具陳伏乞

皇太后

皇上聖鑒訓示施行再此摺係臣錦棠主稿合併陳明謹  
奏

軍機大臣奉

旨該部議奏欽此

卷之三十一

三

請換鑄巴里坤總兵官印信並補發哈密協副將 敕書

片四月二十日

再臣錦棠接據甘肅巴里坤鎮總兵徐占彪呈稱該鎮現用印信前於乾隆年間頒發迄今年久清漢文篆模模糊糊遵照向例造具印模清冊並印花各三分又鎮屬哈密協副將哈密協標中軍都司塔爾納沁營屯田都司古城營游擊木壘營守備鎮標左營游擊右營屯田游擊巴里坤城守營都司中營守備左營守備右營守備等十一員各原頒敕書或因兵燹遺失或因年久破爛懇請一併附

刑部力人等請

三



奏換鑄補頒前來臣錦棠覆核無異除將齎到印模清冊並印花咨送禮部工部查核外相應請

旨飭部分別換鑄補頒以昭信守而重官方謹會同烏魯木齊都統臣恭鏜烏魯木齊提督臣金運昌合詞附片具陳伏乞

聖鑒訓示施行再此片係臣錦棠主稿合併聲明謹奏

軍機大臣奉

旨該部知道欽此

請彙獎防戍人員摺

五月初七日

奏爲新疆大定伊犁收還綜計諸軍防戍六年歷著勞績無異戰功擬懇

天恩俯准從優擇尤彙獎其辦理各項差使出力人員久役邊塞備歷艱辛並請彙案列保以示鼓勵恭摺仰祈聖鑒事竊新疆地方雖遠西極而爲形勢所必爭前因秦隴逆回揭竿犯順關外回酋安德璘金相印等乘時作亂遂致淪爲異域伊犁一隅則俄羅斯竊佔名曰代守厥後大學士前陝甘總督臣左宗棠肅清關內奉

命督辦新疆軍務臣於光緒二年率師出塞迨至三年

幸賴

皇威遐暢南北各城次第克復由左宗棠報捷臣愧無功  
渥叨

錫爵諸軍將士隨亦同膺

懋賞其時外部尙懷觀望先後五次寇邊均由所在分防  
之營抽隊捕剿經左宗棠據實奏陳奉

旨准給獎勵臣受代後承准移交擇其在事尤爲出力接  
戰之員弁保

奏在案至於諸軍分守全疆正值大難初平人心未一游  
匪零星出沒無常各營聞警馳往搜捕不論昕宵無分遠

邇奔走於沙漠之中風雪有時驟至寒燠瞬息不同戈壁  
荒涼每須株守幕竈遙隔枵腹以從既常著有擒斬之勳  
實有苦於當場之戰艱險罔避得以淨埽殘氛適俄羅斯  
未將伊犁交出挾其所欲重煩

朝廷西顧之憂左宗棠因之移駐哈密咨會臣等枕戈以  
待在

皇上懷柔爲重特不弛兵在臣等軍旅專司祇知有戰於  
是諸軍文武員弁兵丁勇氣倍增各於巡緝之餘講求殲  
夷之技操練之勤夜以繼日敵愾之念矢志不渝推其踴  
躍用命直視取之如拾芥擊之如摧枯

睿謀深遠俯念鄰藩慎勞天下臣民不惜曲從款議上年春間俄人卽經交還伊犁本年二月俄兵懾於

天威如期悉數撤退現在幫辦軍務伊犁將軍臣金順與臣往返函商趕緊籌辦善後事宜計自軍興以來髮捻苗回各逆以次削平泊伊犁收還而後中外又安與民休息六合之內罔弗臣僕此固由我

皇太后

皇上宸謨廣運樞署王大臣同心翊贊用能銷邊患而竟全功而成防諸軍會逢其盛戒備整嚴忠義憤發尤仰見朝廷信賞之恩入人之深且固也伏惟

皇上歲糜帑項以養邊軍舉凡固圍靖鄰力之所能爲者皆應盡之職司臣久歷行間雖深知塞外從征之苦寒倍蓰內地而仰體

聖主慎重名器之意從未敢以尋常勞勩爲諸將士瀆懇恩施茲值全疆底定諸軍遠征絕徼就鎮鄰邦歷時已久于役極勞前准統領卓勝軍烏魯木齊提督臣金運昌咨稱從前山西防軍三年期滿例准請獎一次此次諸軍自勦辦逆回戡役辛勤戍守復奮全力以讐強鄰時歷六年到底不懈較之臨時接仗勝負立分者其堅忍艱難殆尤過之若照晉防三年請獎成案已在兩次保敘之列合無

籲懇

天恩准將在事出力文武員弁兵勇從優照依戰功由  
擇尤彙案請

獎以勵前勞而策後效此外辦理軍糧軍械柴草轉輸善  
後各項差使出力人員前當各城初克寇氛尙未悉除該  
員弁等不憚險遠於防範難疏之際任經營庶務之艱湊  
赴事機鉅細無遺迄今成效已著迹其久役邊庭未便沒  
其勞苦理合併懇

鴻慈俯准由 臣擇尤彙保以昭激勸如蒙

俞允俟奉到

諭旨卽將諸軍出力文武員弁兵勇及各項差使出力人員分別擬保併案具

奏其伊犁塔爾巴哈臺現駐各軍應獎人員應由金順錫綸自行彙奏合併聲明所有新疆大定伊犁收還綜計諸軍戍邊六年異常出力擬懇

恩准從優比照戰功獎敘緣由是否有當謹會同幫辦軍務伊犁將軍臣金順幫辦軍務廣東陸路提督臣張曜恭摺具陳伏乞

皇太后

皇上聖鑒訓示施行謹



奏

軍機大臣奉

旨准其擇尤酌保毋許冒濫欽此

核辦蒙部案件請照變通章程摺

五月初十日

奏爲新疆邊境毗連蒙部遇有蒙古糾夥劫奪傷人案件例無專條擬請仍照變通章程隨時核實辦結按季彙報以歸簡易而靖邊隅請

旨定奪恭摺仰祈

聖鑒事竊新疆邊遠與內地情形迥異經臣奏請將命盜案件暫行變通辦理由臣按季彙報奉

旨允准欽遵在案前因綏來以西劫殺之案層見疊出檄派記名提督陝西漢中鎮總兵譚上連統帶馬隊四營旗前往填紮令其認真操防緝捕以靖地方茲據譚上連稟

報所部營官提督戴宏勝幫辦軍務伊犁將軍臣金順所部黑龍江馬隊統領烏克都喜等派隊擒獲塔爾巴哈臺所轄霍柯柏賽里蒙古巴依爾等四名搶奪民人針致和等並用洋礮轟傷吳得樓頭顱棒傷李老九脣鼻同時取獲贓物帶同該事主查明夤夜糾夥騎馬持械行劫得贓傷人屬實擒獲盜犯四名一併交縣管押其在逃之們都伯勒克一犯懇請通緝等情到臣行營比經批飭綏來縣研訊確供詳奪一面移行通緝去後嗣據該縣訊詳聲明新疆蒙古搶奪例無治罪專條請示前來臣查例載民人蒙古番子偷竊四項牲畜以蒙古內地界址爲斷如在內

地犯竊卽照刑律科斷又熱河承德府所屬地方遇有劫奪之案如事主係民人無論賊犯是蒙古是民人專用刑律等語惟新疆境內蒙古搶奪例無專條亦無辦過成案際此

皇威遐暢邊徼敕平綏來爲北道門戶接連西湖精河倚山濱湖中間伏莽堪虞行李時憂戒備昔鄭卿公孫僑治鄭先之以猛漢臣諸葛亮治蜀行之以嚴方隅事勢所限不能不從權補救力挽時局之窮古今不甚相遠臣愚擬新疆沿邊蒙古內地交界地方舉凡界屬內地之處遇有拏獲騎馬持械糾夥行劫賊犯或蒙古或民人無論白晝

寅夜曾否傷人但令賊證明確訊供屬實擬請做照奏  
准新疆命盜重案變通新章由臣等隨時分別核辦完結  
歸入季報彙

奏似於成例不背而於地方善後裨益實非淺鮮抑或  
飭部妥議酌定專條以重刑律而昭法守之處臣等未敢  
擅便現獲賊犯擬俟奉到

批旨欽遵分別辦理們都伯勒克一犯獲案另結所有新  
疆邊境毗連蒙部遇有蒙古糾夥劫奪傷人案件例無專  
條擬請仍照變通章程隨時核實辦結按季彙報以歸簡  
易而靖邊隅請

旨定奪各緣由是否有當謹會同幫辦軍務伊犁將軍

臣

金順烏魯木齊都統

臣

恭鏜恭摺由驛具陳伏乞

皇太后

皇上聖鑒訓示施行謹

奏

軍機大臣奉

旨刑部議奏欽此

古今圖書集成  
彙編  
考索典  
卷之三

三

力疾銷假仍懇開缺

簡員接替摺

六月十七日

奏爲

微臣

假期屆滿病勢較前稍減謹體

聖慈權爲銷假力疾趨公藉以維繫事局勉支時月仍懇天恩俯允如臣原奏開缺交卸差使

迅簡賢員接替以重邊務臣得趕爲調治圖報將來恭摺瀝陳仰祈

聖鑒事竊

臣

前因病難速痊於本年正月二十八日

奏請開缺交卸回籍調治旋於三月十一日承准軍機大臣字寄光緒九年三月初三日奉

上諭劉錦棠奏病難速痊懇請開缺一摺覽奏情詞懇切



實深廬系第念劉錦棠自督辦新疆軍務以來經理一切事宜諸臻妥協威望允孚深資倚任現在伊犁交涉之事尚多枝節俄境匪類時出滋擾外患未靖大兵勢難遽撤邊疆緊要正賴重臣鎮攝未便遽易生手劉錦棠著再賞假三月在營安心調理毋庸開缺並發去人澆六兩以資調攝該大臣受恩深重務當體念時艱勉圖報稱以紓朝廷西顧之憂有厚望焉等因欽此跪聆之下感激涕零當卽恭設香案望

闕叩頭祇領恭摺叩謝

天恩感切再生懼圖報之無地

寵邀非分夫盡瘁以何辭數月以來專壹服調倍加珍攝  
日期速奏神效立起沈疴督臣譚鍾麟憐臣困憊函寄外  
治驗方臣比依方合藥煮布縫製襦袴薄肉熨貼寢息與  
俱更番製換總期內外夾攻藥力充足無息或能積瘵漸  
除前者自汗驚悸暈眩諸證與骹痛同時交作而汗出尤  
甚時自危懼說者以爲臣素體肥氣壯不能鞍馬近因腳  
氣連服附桂峻劑過多以至陽浮於上自汗不止勸令停  
藥靜攝言之懇切臣察其所言近理停止湯藥已歷數月  
而病勢如故特自汗少戢而已入夏以後恪遵  
聖訓安心調理加以外治適值純陽陰伏之時寒退暑生

荷蒙

再造鴻施脚氣較前輕減漸能緩步幕庭然陰寒溼漬沈  
痼已深元氣大索當茲盛暑炎烈襲人上體汗出如注而  
由骹膝以達足拇膚冷如冰雖內著重棉外附絨皮當午  
並不發熱汗澤枯竭左足消瘦更甚於前每值天氣陰涼  
或早夜偶爾失檢脚氣輒作痛楚仍前流注反覆無定時  
或麻木不支坐治官書披閱過多思慮過度輒發暈眩夜  
不成寐驚悸不甯似此未秋先零勢必重辜

高厚伏讀

諭旨殷憂西事

厚望

微臣

感激五中惶悚彌至際茲邊事未集邊防難弛

所有操防善後撫輯諸務稍有疏虞動關大局如臣駑鈍  
縱令夙夜經營殫精竭慮奮迅以圖猶懼疏脫貽誤事機  
矧自去冬病劇乞假至今歷時已逾七月之久舉步維艱  
迄未能冠帶接見僚屬或遇稟白機要事情重大必需躬  
親均就臥內裁決委頓至此泄沓之慮可勝言哉茲幸渥  
荷

生成骸痛稍減謹恪遵

慈訓敬於假滿之日力疾強起視事藉以上紓

朝廷西顧之憂下繫軍民耳目之屬約計秋盡冬來中俄

畫分界務諒能次第就緒南疆建置郡縣諸事委員試署  
亦可粗具規模各路防軍經臣隨時督飭工役之暇照常  
操演加意巡防罔敢疏忽伊犁自俄兵撤退後規復旗營  
修治城垣清查善後金順業經次第舉辦原設卡倫亦均  
照舊安設分隸各旗綏來迤西道途近尙安謐其南路沿  
邊內外卡倫臣前駐軍疏勒時宣布

天威並飭內附之布魯特各部落頭目按段駐紮分守卡  
隘譏禁出入臣每因事察情該布夷人眾均各感戴

皇仁懷德畏威甘心臣僕張曜接管西疆恩信交孚夷情  
帖服部署經營諸臻妥協足紓

宸廑伏念臣起自田里待罪行間今二十年體素強壯曩時効力前驅冰天雪夜中嘗與諸將領卒乘出入鋒鏑枕戈露宿習以爲常每逢大敵指揮鏖戰疾進逐北梟水登壁馳騁淤淖不離鞍馬未嘗有病而性偏忌藥金積受病之源半由自恃血氣昧於調攝以致漬漸成痼數年以前每逢節序作痛不過數日旋即平復如常或當甚痛時遇有戰事據鞍上馬病遂若失初不料日甚月益而歲不同有如今日之困窘者也近今兩年感時輒復發痛入冬增劇轉屆隆冬又將如舊爲災計將安出據醫者云致病之由初因寒溼中於下焦由表侵裏積年太久寢成沈疴趁

此年力尙強患處疼痛麻木尙能自覺猶可施劑療治若  
再遷延歲月根株日深將馴至不可救藥聞之心忤夫邊  
防如此其緊要

寵任如此其專

恩眷如此其隆崇而

微軀

獨如此其偃蹇臣受

恩深重淪浹肌髓倘令貪榮戀棧不直陳於

君父之前萬一因病廢事縱蒙

聖慈寬宥而臣心何以自安再四圖維擬懇

天恩如臣前奏所請藉得回籍專心調治勉圖報稱不勝

惶悚激切待

命之至所有假期屆滿病勢較前稍減謹體

聖慈權爲銷假力疾趨公藉以維繫事局勉支時月仍懇  
天恩俯允如臣原奏開缺交卸差使

迅簡賢員接替以重邊務臣得趕爲調治圖報將來各緣  
由是否有當謹恭摺具陳伏乞

皇太后

皇上聖鑒訓示謹

奏

軍機大臣奉

旨覽奏已悉該大臣年力正強際此時艱孔棘惟當勉圖



卷之三

報稱以副委任欽此

三

遵 旨保薦人才摺六月十七日

奏爲遵

旨切實覆陳仰祈

聖鑒事竊

臣

欽奉本年三月初三日

上諭前經諭令各直省將軍督撫暨統兵大臣等訪求才  
略過人足任將帥者秉公保薦際此需才孔亟該大臣平  
時見聞所及必有所知卽著切實保奏以備任使將此由  
五百里諭令知之欽此等因伏見

皇太后

皇上明日達聰博探旁諮儲才待用之至意跪聆之下欽

感莫名臣竊維發慮治事本乎才燭幾決策視乎略天姿  
學力之攸殊事權時勢之不一歷觀往古證之當今大率  
將帥之選其凡有四文武備足智勇兼優遺大投艱而能  
不動聲色措理裕如者上也大略雄材不拘末節獨當一  
面輒能所嚮有功者次也沈毅有謀善察地勢敵情戰勝  
攻取者又其次也至於忠勇樸練戰守兩資雖才智不過  
中人而臨危陷陣獨能奮不顧身克成厥志者則一將之  
良而已盱衡時局求其才略邁眾而志節堅貞不可搖奪  
允叶師中之吉真堪推轂之選者蓋亦難其人矣夫人臣  
之義莫大乎以人事君而人不易知尤貴有知人之哲近

如前大學士臣曾國藩前湖北撫臣胡林翼遭際  
聖明因時刻薦其所甄拔或由諸生致位封圻或由隸卒  
游至專閫文經武緯垂光史冊

中興人才之盛於斯爲極蓋千載而一時矣然曾國藩等  
類皆學有根柢望重當時方其抱膝長吟已具攬轡澄清  
之概知人論世寸心自足千古其所蘊蓄者閱故其所表  
見者大而遠其所賞鑑者眞故其所裁成者曲而當也

微

臣效力行間才識庸闇山林奇偉之士旣少結納於平時  
而老成先達之流又未敢謬登諸薦剡伏讀

諭旨該大臣平時見聞所及必有所知著卽切實保奏以

聖訓 卷五  
備任使等諭

聖訓煌煌顯示以舉爾所知之意用敢恪遵

諭旨就臣平時同役最久相知最真之文武大員足備將帥之選者爲

皇太后

皇上切實陳之太常寺卿吳大澂學識閎遠文武兼資曩時視學隴中與臣縱談邊事兵事援古證今不泥不悖油然而經術之腴心爲傾折者久之洎觀其欽奉

簡命督辦甯古塔事宜治軍察吏具覩成效固已早契乎宸衷毋俟臣言瑣瑣矣廣東陸路提督張曜忠勳卓著智

略過人近尤敦尚儒術深達政體西四城善後諸事經臣奏歸綜覈悉臻妥洽其餘南疆地勢邊情瞭如指掌尤善得外部夷商之心其才略過人遠矣記名提督甘肅甯夏鎮總兵譚拔萃勇略冠羣才堪應變經歷行陣二十餘年先後勦辦髮捻回土各逆肅清全疆由勇日累功歷保今職實授總兵分領偏師無役不從所嚮克捷實一時將臣中出色當行堪勝專閫之任者題奏提督董福祥樸訥勇敢堅忍善戰自金積堡立功後隨臣轉戰隴邊蕩平新疆南北兩路陷陣衝鋒赴機迅速凡遇大股巨寇攻拔險要罔不身先士卒親冒矢石故能戰勝攻取衝突無前該提

督生長西陲於邊徼地勢賊情灼見真知所部將卒大都  
關隴土著習水土而知其心置諸邊要實堪一面之寄前

經臣籲懇

天恩擢用在案察其忠勇綽有原任陝西提督臣潘育龍  
原任太原鎮總兵臣王進寶之風至足尙矣其部將現統  
定遠軍題奏提督張俊勇敢善戰不避艱險且有機略與  
董福祥同里相友善自從征戰戮力一心歷久不渝蓋亦  
一時隴產中將才之傑也如蒙

聖慈量子簡用必能忠義奮發足備緩急浙江題奏道袁  
珪齡曉暢戎機深達治體嚮在臣軍辦理營務身臨前敵

忠信明決宣力邊疆十有二年始終如一每有獻替悉合  
機宜允孚眾望現回安徽原籍擬懇

天恩破格錄用必能有裨時局不負任使陝西題奏道羅  
長祜識略過人練習邊務隨臣督師出塞已逾十年運籌  
決策所嚮有功兩經奏懇

鴻施破格錄用該員現總理臣軍營務統領湘軍駐防阿  
克蘇和輯將卒撫馭邊民悉能得其懽心辦理從無貽誤  
誠一時邊才特出之選統領禮字軍記名提督伊犁鎮總  
兵劉宏發膽識俱優勇略出眾分統嵩武親軍補用總兵  
劉世俊英毅勇敢卓犖不羣茲二員者隨同金順張曜轉



戰數省効命邊疆勞績懋著要皆邊將之卓卓者記名副  
都統恩澤廉公不阿學識淹貫前在金順軍營襄贊戎幄  
素以正派著名臣所稔知歷署巴里坤烏魯木齊領隊整  
頓營伍興屯勸學具有成效蓋一時儒將之傑也臣維將  
帥之選資稟固不繫於人爲而才智之生韜鈴實半成於  
歷練軍興之始夙將儒臣持節討逆而或不稱厥職者非  
其才略之必不如人蓋時異事殊知經而不達權安常而  
未能應變故也幸賴

神聖相承

虛衷延攬破格用人於是奇傑之士樸勇之夫各得展其

所學而獻其所長報

累朝養士之恩抒臣子効忠之義一倡百和崛起不窮雖  
方隅攸分時勢判隔而臨機應變矩方規圓或師其所長  
則以敵資我或攻其所短則以我制人備極艱險而才智  
生出入生死而膽略生勇敢則進之於智謀深沈則益之  
以果毅束以步伐之律發其忠義之良曉然兵屯相發之  
宜則軍無乏食明於軍民相保之義則兵不擾民可戰可  
守能發能收知經達權應變莫測具體偏長均歸有濟卅  
年以來廓清寰宇

重熙累洽得人之效比隆前古夫豈偶然臣以凡庸遭逢

殊遇忝邊疆之重寄更喉舌之攸司

恩眷特隆獲與保薦敢不據實敷陳對揚

休命也哉至於金順之老成重望謀勇俱優歷著忠勳久已

聖心簡在臣何庸贅贊一辭抑臣更有說者全疆遼遠接

壤強鄰西疆極邊去京師萬里而遙距蘭垣亦七八千里遇有警報鞭長莫及

祖宗朝戡定回疆歷次進兵均由伊犁北路取徑而南其時將軍大臣類皆勳舊老宿生長北方挑練索倫各旗營官兵暨陝甘綠營大率一時精銳將帥卒伍指臂相使水

土相習故能一氣旋轉呼應靈通埽穴犁庭易於反掌將  
臣南產惟楊遇春而已今邊防緊要迥非昔比郡縣設定  
後局勢一變各路防軍如臣所部大率東南爲多久役邊  
城終非長策將來提臣是否南移屆時應聽

聖裁其應設武職營兵臣愚以爲宜慎選關隴土著久經  
戰陣之將領充選從長計議實於邊戍屯防糧餉諸事深  
爲合宜較之多畱客軍徵調換防其利病相去遠矣芻蕘  
之見是否有當伏候

聖明採摭除仍隨時訪求邊才另案保

奏外所有遵

旨切實覆陳各緣由謹恭摺具陳伏乞

皇太后

皇上聖鑒訓示謹

奏

軍機大臣奉

旨畱中欽此

關外馬步營旗弁勇數目駐防處所繕請立案摺七月初一日  
奏爲甘肅關外湘楚皖蜀諸軍馬步各營旗弁勇數目駐  
防處所謹分晰繕具清單

奏明立案恭摺仰祈

聖鑒事竊臣接准戶兵兩部咨開凡兵勇數目設防某處  
從前未經奏明者限卽

奏明報部等因查前督臣左宗棠原部關外諸軍自臣受  
代以來陸續裁遣多營藉省餉需現並權抵烏魯木齊提  
標額兵之士勇僅存五十餘營旗計自哈密南至和闐北  
至精河縱橫萬里均須節節布置伏讀

諭旨大兵未可遽裁仰見

聖謨廣運塵念西陲之至意就全疆之形勢哈密爲關內  
外之咽喉南北路之總匯臣營駐此策應各路期於呼吸  
相通隨駐親軍朝夕訓練以備不虞之徵調兼顧轉輸之  
根本其南路之吐魯番托克遜喀喇沙爾庫爾勒布告爾  
庫車拜城阿克蘇烏什瑪拉巴什喀什噶爾葉爾羌和闐  
等處北路之巴里坤古城阜康古牧地烏魯木齊瑪納斯  
奎屯安集海精河等處兩路各城所屬南則纏回新撫所  
在毗連外部以喀什噶爾爲邊要之區張曜之行營駐之  
北則山嶺紛歧多接蒙壤以伊犁爲邊要之區金順之軍

府在焉臣部統籌設防視其衝僻度其險夷以定營數之多寡遠近相維脈絡貫注須中堅而後勁免百密之一疏俄人新就款約通商伊始務在勤修邊政乃可固圉靖鄰臣前請改兵制部議須俟緩圖則現存之營旗論地方之遼遠兵力尙形其單論協餉之艱難供支恆虞不繼頃已咨商金運昌將所存卓勝軍之馬步五營分作七八九三箇月概行裁撤頭起由臣設法騰挪墊餉清欠其二三起專恃山西迅籌大批西來始爲有著而奉旨飭催該省提前趕解之款尙未接准撫臣來咨指撥實苦難於羅掘除再咨催外該五營旣已盡遣當另抽營填



禁舊防此外更難裁併蓋邊疆要地必得重兵鎮駐方足以資防範而壯聲威也所有關外湘楚皖蜀諸軍馬步各營旗弁勇數目及駐紮處所謹分晰繕具清單恭呈御覽伏乞

皇太后

皇上聖鑒敕部立案施行謹

奏

謹將甘肅關外湘楚皖蜀諸軍馬步各營旗自光緒七年正月起陸續裁併酌留遣勇改支坐糧並新募土勇權抵烏魯木齊提標額兵截至光緒九年三月止實存官弁勇

丁長夫馬夫馬匹數目開具四柱清單恭呈

御覽

計開

舊管

光緒六年十二月底止關外實存駐防步隊四十七營一  
旗馬隊二十三營六旗開花礮隊三哨小馬隊五哨共計  
實存舊額弁勇三萬九百三十七員名額外營哨官二百  
三十五員額外火夫七百五十五名額外長夫馬夫一萬七千  
六百一十五名額馬六千五百五十八匹礮車十八輛車  
騾四十八頭

新收

光緒八年七月起挑募土勇步隊七旗權抵烏魯木齊提標額兵並酌挑遺勇步隊二旗馬隊一旗其計照額新添弁勇三千四百五十五員名額外火夫十四名額外長夫馬夫三百五十六名額馬一百二十七匹

開除

光緒七年八月底止裁併步隊七營馬隊一營三旗又馬隊一旗內裁汰弁勇六十九員名其餘併作一哨其計裁撤舊額步馬弁勇四千一百九十四員名撤去額外營哨官三十五員裁去額外火夫七十七名裁去額外農夫馬

夫二千二百八名裁減額馬七百四匹

光緒七年十月底止裁撤步隊四營馬隊一旗一哨共計  
裁撤舊額步馬弁勇二千一百八十一員名撤去額外營  
哨官二十員裁去額外火夫二十名裁去額外長夫馬夫  
九百八十名裁減額馬一百八十三匹

光緒八年五月底止裁撤步隊四營馬隊二營共計裁撤  
舊額弁勇二千五百員名撤去額外營哨官二十員裁去  
額外火夫五十四名裁去額外長夫馬夫一千三百九十  
名裁減額馬五百四匹

光緒八年九月底止裁撤步隊二營馬隊四營共計裁撤

舊額弁勇二千員名撤去額外營哨官十員裁去額外火夫一百八名裁去額外長夫馬夫一千六百二十八名裁減額馬一千八匹

實在

光緒九年四月起實存行糧步隊三十營一旗坐糧步隊二旗土勇步隊七旗行糧馬隊十六營一旗坐糧馬隊一旗總計五十八營旗開花礮隊三哨小馬隊五哨共計實存額設弁勇二萬三千五百一十七員名實存額外營哨官一百五十員額外火夫四百六十名額外長夫馬夫一萬一千七百六十五名額馬四千二百八十六匹礮車十

八輛車騾四十八頭

謹將甘肅關外湘楚皖蜀諸軍馬步各營旗駐紮處所並統領營官銜名自光緒九年四月起實存數目開具清單  
恭呈

御覽

計開

一大營親軍步隊四營官馬隊二營開花礮隊一哨內副將譚用賓管帶親軍前營步隊一營提督張仕林管帶親軍左營步隊一營提督鄧政升管帶親軍右營步隊一營提督張復良管帶親軍後營步隊一營提督蘇貴興管帶

官馬隊左營一營副將焦大聚管帶官馬隊右營一營游擊廖克明管帶開花礮隊一哨

以上親軍步隊四營官馬隊二營開花礮隊一哨駐紮哈密附城

一哈密東西兩路步隊二營一旗馬隊二營內營務處記名提督蕭章開管帶綏定營步隊一營駐南山口提督喻先達管帶靖遠營步隊一營駐瞭墩提督丁連科管帶安邊步隊一旗駐黃蘆岡副將齊彩輝管帶綏定營馬隊一營駐闢展提督陳美仙管帶定邊營馬隊一營駐七克騰木

以上步隊二營一旗馬隊二營歸提督蕭章開統領

一南路吐魯番駐防步隊一營馬隊一營內總兵徐萬福  
管帶建威營步隊一營駐防吐魯番城提督黃萬鵬管帶  
揚威馬隊一營駐托克遜

以上馬隊一營步隊一營均歸提督蕭章開統領

一喀喇沙爾庫車兩城駐防步隊三營一旗馬隊一營內  
記名提督甘肅甯夏鎮總兵譚拔萃率小馬隊一哨安遠  
軍中營步隊一營駐防庫車城總兵王文安管帶安遠軍  
左營步隊一營駐防布告爾補用知縣劉兆松管帶安遠  
軍右營步隊一營駐防庫爾勒總兵王玉林管帶精騎後



營馬隊一營駐防喀喇沙爾城提督萬勝常管帶安邊步  
隊一旗駐紮喀喇沙爾

以上步隊三營一旗馬隊一營均歸提督譚拔萃統領

一阿克蘇烏什兩城駐防步隊六營馬隊二營開花礮隊  
一哨內總理營務處道員羅長祐率小馬隊一哨老湘右  
軍中營步隊一營駐防阿克蘇城副將莊偉管帶開花礮  
隊一哨駐阿克蘇城提督湯彥和管帶老湘右軍前營步  
隊一營駐防拜城提督曾楚勝管帶老湘右軍右營步隊  
一營駐防札木臺提督胡義和管帶老湘右軍左營步隊  
一營駐紮阿克蘇附城總兵劉必勝管帶老湘軍壽字馬

隊一營駐紮渾巴什提督潘長清管帶老湘左軍左營步  
隊一營駐紮烏什附城提督蕭拱照管帶老湘左軍右營  
步隊一營駐紮烏什附城提督楊得俊管帶恪靖中營馬  
隊一營駐防駱駝巴什

以上步隊六營馬隊二營開花礮隊一哨歸道員羅長祐  
統領

一葉爾羌和闐兩城及葉爾羌屬之瑪納巴什城駐防步  
隊三營馬隊二營內提督董福祥率小馬隊一哨董字中  
營步隊一營駐紮葉爾羌漢城提督杜錫斌管帶董字左  
營步隊一營駐防瑪納巴什提督田九福管帶董字右營

步隊一營駐紮葉爾羌附城提督夏辛酉管帶恪靖右營  
馬隊一營駐紮葉爾羌附城提督張宗本管帶恪靖後營  
馬隊一營駐紮葉爾羌附城

以上步隊三營馬隊二營歸提督董福祥統領

提督張俊率小馬隊一哨定遠中營步隊一營駐紮和闐  
城提督胡登花管帶定遠左營步隊一營駐紮和闐附城  
總兵周天才管帶定遠右營步隊一營駐紮雜瓦臺

以上步隊三營歸提督張俊統領

一喀什噶爾駐防馬隊二營一旗步隊一旗開花礮隊一  
哨內提督武朝聘管帶西征左營馬隊一營駐紮喀什噶

爾城南游擊陳文英管帶開花礮隊一哨駐紮喀什噶爾  
漢城副將谷振杰管帶西征右營馬隊一營駐紮牌素巴  
特都司張洪疇管帶布魯特馬隊一旗駐紮喀什噶爾回  
城提督董天海管帶喀什防營步隊一旗駐紮喀什噶爾  
回城

以上馬隊二營一旗步隊一旗開花礮隊一哨歸提督武  
朝聘統領

一北路巴里坤古城駐防步隊二營馬隊二營內提督李  
洪超管帶呼敦左營馬隊一營駐紮巴里坤提督李玉春  
管帶呼敦右營馬隊一營駐防木壘河總兵羅平安管帶

蜀軍正營步隊一營駐紮巴里坤附城提督宋賢聲管帶  
蜀軍副營步隊一營駐紮古城

以上馬隊二營步隊二營歸巴里坤鎮總兵徐占彪統領  
一烏魯木齊駐防步隊三營馬隊二營內卓勝軍營務處  
記名提督王鳳鳴率帶卓勝軍親兵步隊一營駐紮烏魯  
木齊游擊王法貞管帶卓勝軍左營步隊一營駐紮阜康  
縣參將殷樹洪管帶卓勝軍右營步隊一營駐紮古牧地  
提督周雲田管帶卓勝軍前營馬隊一營駐紮柴窩鋪總  
兵牛允誠管帶卓勝軍後營馬隊一營駐紮滋泥泉  
以上步隊三營歸提督王鳳鳴統領馬隊二營歸提督周

雲田統領均歸烏魯木齊提督金運昌節制

一綏來奎屯駐防步隊三營馬隊一旗內記名提督調補  
甘肅西甯鎮總兵譚上連率小馬隊一哨老湘親軍中營  
步隊一營駐紮綏來城提督新授陝西漢中鎮總兵戴宏  
勝管帶老湘親軍左營步隊一營駐紮奎屯臺總兵張清  
和管帶老湘親軍右營步隊一營駐紮安集海提督李其  
森管帶定邊馬隊一旗駐紮綏來附近

以上步隊三營馬隊一旗歸記名提督譚上連統領

一烏魯木齊提標新募土勇權抵制兵步隊七旗內烏魯  
木齊提標中軍參將武魁管帶中軍土勇步隊一旗烏魯

木齊城守營都司張積功管帶城守營土勇步隊一旗濟  
木薩參將郝忠裔管帶濟木薩營土勇步隊一旗烏魯木  
齊提標左營游擊鄧得貴管帶左營土勇步隊一旗烏魯  
木齊提標右營都司趙文斌管帶右營土勇步隊一旗瑪  
納斯協副將張懷玉管帶瑪納斯營土勇步隊一旗庫爾  
喀喇烏蘇營游擊劉春元管帶烏蘇營土勇步隊一旗  
以上土勇步隊七旗各按汛地駐紮均歸烏魯木齊提督  
金運昌統轄

以上駐防甘肅新疆南北兩路共計步隊三十營十旗馬  
隊十六營二旗開花礮隊三哨小馬隊五哨係光緒九年

四月起實數與七八兩年之數不同其管帶營官時有更  
易駐紮處所間或抽調現開營官銜名駐防地方核與七  
八兩年冊內互異理合聲明

軍機大臣奉

旨該部知道單二件併發欽此



各異其公身和

卷五

四

關外各軍行糧坐糧章程善後臺局一切應發款目繕請

立案摺

七月初一日

奏爲甘肅關外各軍按照楚軍行糧章程供支月餉及新募土勇權抵烏魯木齊提標額兵酌畱遣勇支給坐糧並善後臺局文武員弁勇夫工匠書役人等薪糧工食運腳製辦採買一切雜用應發款目謹照部議繕呈清單

奏明立案恭摺仰祈

聖鑒事竊 臣准戶部咨內開凡兵勇數目營制員弁薪水口糧及軍火雜用等項限卽

奏咨立案等因當經鈔錄飭知行營糧臺遵照確查具報

去後臣查新疆軍務自光緒元年陝甘督臣左宗棠奉命督辦檄調諸軍料量出塞其時道路梗阻往往數百里內寂無人煙員弁軍士以及各色人等無不視爲畏途動色相戒地處極邊物產彫敝凡百多仰給於關內而長途轉輸必得食息之所於是分設糧料柴草各局站以資供應至需用軍裝等項按程站之遠近設局儲辦並設軍塘夫馬馳遞文報招致文武各員分別差委寒苦之區從征諸人相距原籍遠或萬里百物騰昂薪糧較之關內必須格外優給方敷食用左宗棠正慮餉艱費鉅而各軍猶以爲地方遼遠戈壁荒涼恆苦供億之未周也迨光緒三年

南北兩路肅清善後諸務刻不容緩乃於各路額設總分  
各局清丈田畝稽查保甲征收糧稅又以南疆土沃宜桑  
招匠教習纏回飼蠶繅絲之法以盡地利全疆久淪異域  
禮義不興務在正經善誘廣設義塾急選儒生教授漢回  
各童俾沾

聖化漸使風俗文字軌於大同以牖其秉彝之良而格其  
囂陵之氣因軍興而籌善後因善後而廣教澤連類而及  
義不獲已以上應行支用各款截至光緒六年底止業由  
左宗棠開單會銜

奏銷在案 臣於六年冬間接綰

欽符亟思裁省餉需體察各項用款於率由舊章之中權其緩急設法樽節並將防軍遣撤多營裁減月餉之資以補協解之不足其各省關協餉左宗棠交卸之際卽經奏明關內分用四成關外分用六成甘肅省城設總糧臺統司收發哈密設行營糧臺總司關外之供支自七年起各專責成茲據行營糧臺將七八兩年實支款目開列二十四條詳請具

奏立案前來 臣覆核無異其自九年起如有應行減併之項卽當隨時報部以節糜費除七八兩年實在收支已飭行營糧臺造咨甘肅總臺彙齊呈由督 臣譚鍾麟核明會

奏開單報銷外所有關外支發各項章程謹繕清單恭呈御覽伏乞

皇太后

皇上聖鑒飭部立案施行謹

奏

謹照部議條款將甘肅關外馬步各營旗應支月餉隨營文武暨各臺局塘站員弁護勇薪糧書役工匠人等口食轉運採買製造價值及一切雜支等項均照前督辦軍務陝甘總督臣左宗棠原定章程支發茲將款目繕具清單恭呈

御覽

計開

一甘肅關外楚湘皖蜀馬步各營旗及新挑各旗員弁勇夫薪糧均照楚軍營制行糧坐糧章程分別支給款

查楚軍行糧章程步隊每營以五百人爲定額營官副哨官長夫在外每營營官一員月支薪水銀五十兩公費銀一百五十兩幫辦書記公用公費在內均不扣建正哨官四員每員日支薪糧銀三錢什長三十八名每名日支口糧銀一錢六分親兵六十名每名日支口糧銀一錢五分正勇三百三十六名每名日支口糧銀一錢

四分火勇四十二名每名日支口糧銀一錢一分外設副  
哨官四員每員日支薪糧銀二錢六分六釐六毫六絲六  
忽每員給夫一名日支口糧銀一錢外加長夫一百八十  
八名每名日支口糧銀一錢以上共計步隊一營每大建  
月支銀二千九百三十六兩二錢每小建月支銀二千八  
百四十五兩又步隊每旗以三百七十人爲定額副哨官  
長夫在外內旗官一員月支薪水銀三十六兩公費銀一  
百一十兩幫辦書記公用公費在內均不扣建正哨官三  
員每員日支薪糧銀三錢什長二十八名每名日支口糧  
銀一錢六分親兵四十名護勇十五名每名日支口糧銀



一錢五分正勇二百五十二名每名日支口糧銀一錢四分火勇三十一名每名日支口糧銀一錢一分外設副哨官三員每員日支薪糧銀二錢六分六釐六毫六絲六忽每員給夫一名日支口糧銀一錢外加長夫一百二十三名每名日支口糧銀一錢以上共計步隊一旗每大建月支銀二千一百四十七兩六錢每小建月支銀二千八十八兩八錢八分又馬隊每營以二百五十人爲定額火夫長夫馬夫在外內營官一員月支薪水銀五十兩公費銀八十兩幫辦書記公用公費馬藥在內均不扣建正哨官四員每員日支薪糧銀三錢二分月支雜費銀一兩二錢每

員給夫三名每名日支口糧銀一錢副哨官四員每員日支薪糧銀二錢六分六釐六毫六絲六忽月支雜費銀一兩二錢每員給夫二名每名日支口糧銀一錢先鋒五名每名日支口糧銀二錢月支雜費銀六錢每名給馬夫一名每名日支口糧銀一錢領旗二十名每名日支口糧銀一錢六分月支雜費銀六錢每名給馬夫一名每名日支口糧銀一錢親兵二十名護勇十六名每名日支口糧銀一錢五分月支雜費銀六錢每名給馬夫一名每名日支口糧銀一錢馬勇一百八十名每名日支口糧銀一錢四分月支雜費銀六錢每名給馬夫一名每名日支口糧銀

一錢以上雜費均不扣建火夫二十七名每名日支口糧銀一錢一分公長夫五十名每名日支口糧銀一錢額馬二百五十二匹內營官三匹其餘均各一匹每匹日支草乾銀一錢以上共計馬隊一營每大建月支銀三千一百七十六兩七錢每小建月支銀三千八十八兩二錢八分又馬隊每旗以一百二十五人爲定額火夫長夫馬夫在外內旗總一員月支薪水銀四十兩公費銀五十兩幫辦書記公用公費馬藥在內均不扣建哨官二員先鋒四名領旗十一名親兵二十七名護勇八名馬勇七十二名火夫十四名公長夫二十五名額馬一百二十七匹馬夫雜費

口糧草乾各項均同前章共計馬隊一旗每大建月支銀一千六百七兩七錢每小建月支銀一千五百五十九兩六錢三分又楚軍坐糧章程步隊每營以五百人爲定額營官長夫在外每營營官一員月支薪水銀五十兩公費銀四十兩幫辦書記公用公費在內均不扣建哨官四員每員日支薪糧銀二錢四分什長三十八名每名日支口糧銀一錢三分親兵六十名護勇二十名每名日支口糧銀一錢二分正勇三百三十六名每名日支口糧銀一錢一分火勇四十二名每名日支口糧銀九分外加長夫一百八十八名每名日支口糧銀八分以上共計步隊一營

每大建月支銀二千二百二十八兩四錢每小建月支銀二千一百五十七兩一錢二分又步隊每旗以三百七十人爲定額長夫在外內旗官一員月支薪水銀三十六兩公費銀三十兩幫辦書記公用公費在內均不扣建哨官三員什長二十八名親兵四十名護勇十五名正勇二百五十二名火勇三十一名口糧均同前章共計步隊一旗每大建月支銀一千六百二十九兩三錢每小建月支銀一千五百七十七兩一錢九分又馬隊每營以二百五十人爲定額火夫長夫馬夫在外內營官一員月支薪水銀五十兩公費銀八十兩幫辦書記公用公費馬藥在內均

不扣建正哨官四員每員日支薪糧銀二錢四分每員給夫二名每名日支口糧銀八分副哨官四員每員日支薪糧銀一錢六分每員給夫二名每名日支口糧銀八分先鋒五名每名日支口糧銀一錢四分雜費銀一分每名給馬夫半名日支口糧銀四分領旗二十名每名日支口糧銀一錢三分雜費銀一分每名給馬夫半名日支口糧銀四分親兵二十名護勇十六名每名日支口糧銀一錢二分雜費銀一分每名給馬夫半名日支口糧銀四分馬勇一百八十名每名日支口糧銀一錢一分雜費銀一分每名給馬夫半名日支口糧銀四分外火夫二十七名每名

日支口糧銀九分公長夫五十名每名日支口糧銀八分  
額馬二百五十二匹內營官三匹其餘均各一匹每匹日  
支草乾銀八分以上共計馬隊一營每大建月支銀二千  
一百九十八兩二錢每小建月支銀二千一百二十九兩  
二錢六分又馬隊每旗以一百二十五人爲定額火夫長  
夫馬夫在外內旗官一員月支薪水銀四十兩公費銀五  
十兩幫辦書記公用公費馬藥在內均不扣建哨官二員  
先鋒四名領旗十一名親兵二十七名護勇八名馬勇七  
十二名火夫十四名公長夫二十五名額馬一百二十七  
匹馬夫雜費口糧草乾各項均同前章共計馬隊一旗每

大建月支銀一千一百二十二兩九錢每小建月支銀一千八十八兩四錢七分均按湘平支給茲關外自光緒七年起均照定章支發據實開報弁勇數目駐紮地方另單開載

一甘肅關外喀什噶爾阿克蘇哈密分設開花礮隊員弁勇夫照章支給薪糧款

查楚軍兼用開花礮以利攻剿定章每十七磅十六磅平字號各樣後膛開花大礮一座需什長一名礮勇十四名火夫一名車夫二名車騾四頭每車輪後膛開花小礮兩截田雞銅礮月字號後膛車礮各一座需什長一名礮勇



十一名火夫一名車夫一名車騾二頭喀什噶爾阿克蘇  
哈密三處因係邊防要地各設大小開花礮後膛車礮以  
重防守計喀什噶爾安設十六磅後膛開花大礮二座車  
輪後膛開花小礮四座阿克蘇安設平字號後膛開花大  
礮二座月字號後膛車礮四座哈密安設十七磅後膛開  
花大礮一座十六磅後膛開花大礮一座兩截田雞銅礮  
二座車輪後膛小礮二座每處打礮弁勇均以九十九人  
爲定額內礮長一員月支薪水銀三十兩公費銀二十兩  
均不扣建什長六名每名日支口糧銀五錢護勇五名礮  
勇七十二名每名日支口糧銀二錢六分六釐六毫六絲

六忽車夫八名火夫七名每名日支口糧銀一錢一分以  
上每處礮隊大建月支銀八百五兩五錢小建月支銀七  
百八十兩三錢一分七釐茲自光緒七年起均照前章按  
湘平支發據實開報弁勇數目另單開載

一甘肅關外楚皖蜀馬步各營旗統領照章支給公費款  
查楚軍營制章程除每營設立營官管帶外仍按營旗多  
寡另設統領一員俾資統率酌給統領公費凡統領一二  
營者每月支給統領公費銀一百兩加給公長夫十名每  
名日支口糧銀一錢統領三營以上者每月支給統領公  
費銀一百五十兩加給公長夫十五名每名日支口糧銀

一錢統領五營以上者每月支給統領公費銀二百兩加給公長夫二十名每名日支口糧銀一錢統領八營至十營者每月支給統領公費銀三百兩加給公長夫三十名每名日支口糧銀一錢茲從光緒七年起均照舊章支發據實開報

一甘肅關外湘楚軍馬步各營旗統領營務處照章支給公費並各員弁勇夫加給米折銀兩款

查湘軍於光緒元年經左宗棠調派料理出關所有原部湘軍及撥歸統率之楚軍馬步各營旗擬定新章另設總統一員營務處二員分統五員除總統並營務處幫辦哨

官公費薪糧截至六年底酌裁由左宗棠具報外現畱總理營務處一員月支薪公銀二百兩分統五員每分統一員月支薪公銀二百兩文案支應書識薪水辦公銀一百二十兩均不扣建各率小馬隊一哨內哨官一員日支薪糧銀六錢給夫二名每名日支口糧銀一錢護勇四名什長四名每名日支口糧銀四錢每名給馬夫一名日支口糧銀一錢馬勇四十名每名日支口糧銀三錢每名給馬夫一名日支口糧銀一錢火夫五名每名日支口糧銀一錢一分公長夫四十名每名日支口糧銀一錢以上弁勇騎馬均係自行購買雜費馬乾倒馬概不另給又湘軍營

制自同治年間勦捻後凡馬步各營員弁勇夫月支薪糧外按名加給米折柴草津貼銀兩歷經照支所有新歸湘軍統率出關之楚軍馬步各營旗弁其苦征絕徼僅支行糧不敷食用准照湘軍舊章一律加給米折柴草津貼銀兩無論員弁勇夫每員每月另給津貼米折銀四錢五分每步隊一營每月給津貼柴草價銀一百六十兩每馬隊一營給津貼柴草價銀八十兩均不扣建以示體恤現在各營駐防事務較簡所有前項津貼柴草價銀自光緒七年正月月起飭令一律裁止以節糜費其津貼米折銀兩一項因關外食物昂貴未便遽裁仍令照支茲從光緒七

年起均各按照前章支發據實開報

一甘肅關外馬隊照章支給倒馬價值款

查楚軍營制馬隊章程各營額馬按每百匹扣足一年准報倒斃三十四匹每匹准給價銀十六兩買補茲從光緒七年起接供關外馬隊各營旗騎馬均照十分倒三章程按年核算支發價銀據實開報

款  
一甘肅關外軍營臺局派委辦差文武各員弁支給薪糧

查甘肅關外軍餉軍裝軍火糧料多由關內轉運出關設立臺局存儲分解前敵應用並由關外地方察看情形酌

量採買糧料製辦軍裝硝藥沿途按站採備柴草供應軍營差使過境分別派委員弁駐辦計哈密設立行營糧臺行營軍裝製辦總局督催糧運總局古城設立屯採總局安西玉門敦煌巴里坤奇臺吉布庫濟木薩吐魯番喀喇沙爾庫爾勒布告爾庫車等處設立採運局吐魯番喀喇沙爾庫車阿克蘇烏什等處設立軍裝硝藥局安西州小宛布隆吉四家灘白墩子紅柳園大泉驛馬蓮井庫車托和爾阿克蘇渾巴什薩依里克齊蘭臺瑪納巴什卡納克沁屈爾蓋察巴克圖木舒克雅哈庫圖克英吉沙爾雅滿雅爾牌素巴特英阿瓦特龍口橋玉代里克黑孜堡等處

設立柴草局又於玉門縣屬境設立柴草站五處哈密屬境設立柴草站十六處巴里坤屬境設立柴草站五處吐魯番屬境設立柴草站七處喀庫屬境設立柴草站九處察爾齊札木臺玉爾滾拜城賽里木河色爾等處各設立柴草站一處所有在事大小文武員弁及行營辦理營務文案支應委員隨營供差並派赴各臺局備供押運差遣文武各員弁應需薪水均按官階支給文職道員武職提督月給銀八十兩知府總兵副將月給銀六十兩同通州縣參游月給銀四十兩佐雜都司月給銀三十兩守備月給銀二十四兩千總月給銀二十兩把總月給銀十六兩



經制外委月給銀十二兩從光緒七年起仍照舊章支發  
據實開報

一甘肅關外各臺局站設立經帖各書支給口食並酌給  
紙張筆墨油燭款

查甘肅關外哈密行營糧臺爲南北兩路總匯之所一切  
事務紛繁設經承十二名帖寫二十四名月支筆墨油燭  
紙張銀三十兩其行營軍裝製辦總局哈密督催糧運總  
局古城屯採總局事務亦繁每局設經承六名帖寫十二  
名月給紙張筆墨油燭銀二十四兩安西玉門敦煌巴里  
坤奇臺吉布庫濟木薩吐魯番喀喇沙爾庫爾勒布告爾

庫車等處各採運局暨吐魯番喀喇沙爾庫車阿克蘇烏什等處各軍裝硝藥局每局設經承四名帖寫八名月給紙張筆墨油燭銀十二兩又各柴草局事務較簡每局只設字識二三名不等月給紙張筆墨油燭銀六兩各柴草站每站設字識一名月給紙張筆墨油燭銀四兩經承每名月支工食銀八兩帖寫字識每名月支工食銀六兩茲自光緒七年起仍照舊章支發據實開報

一甘肅關外各臺局招募防護勇夫並設纏回字識通事照章支給口糧款

查甘肅關外各臺局凡收儲軍餉軍糧軍火重地向按局

務大小分別招募勇夫防護期免疏虞行營糧臺招募護勇一百名行營軍裝製辦總局哈密督催糧運總局古城屯採總局各募護勇六十名其各採運局軍裝硝藥局每局招募護勇四十名及二三十名不等各柴草局每局招募護勇四名夫八名各柴草站每站募護勇二名夫六名以資差防應需口糧均係按照楚軍營制行糧章程什長日支口糧銀一錢六分勇丁日支口糧銀一錢四分長夫日支口糧銀一錢又因回疆文字言語迥不相同凡遇獲匪讞案訊取供招察探地勢情形及軍民交易必須有纏回字識通事繙譯傳告統領營官募用一二名不等糧臺

及各局站按事之繁簡或募用三四名二三名一二名不等每名日支口糧銀一錢自光緒七年起均各照章支給據實開報

一甘肅關外軍營需用糧料柴草分途採買均照各處市估發價及應用倉夫斗級工食款

查軍需糧料柴草例准查明地方情形確訪時值採買關外軍營需用糧料甚鉅或由關內附近州縣採買運送或就關外地方察看情形派員分途設局採買以濟軍食所需糧價各處情形不同年歲豐歉不一價值難歸一致計光緒七八兩年採買大米每百觔需價銀三兩三四錢至

五六兩不等小麥每百觔需價銀一兩二三錢至一兩七八錢不等包穀每百觔需價銀四錢三四分至五六錢不等青稞雜糧每百觔需價銀六錢二三分至一兩四五分不等柴草每百觔需價銀二錢一二分至三四錢不等均係按照各處當時市估給價其採買轉運各局所需倉夫斗級各按局之大小酌量僱用計哈密督催糧運總局古城屯採總局各僱倉夫四名斗級二名其各採運分局每局僱倉夫二名斗級一名每名日支口糧銀一錢茲自光緒七年起仍照舊章支發據實開報

一甘肅關外各臺局蓋造房屋支給經費及租賃民房支

給租價款

查關外各臺局辦公並存儲餉裝糧料柴草等項凡無官舍民房之處係由各臺局自行隨時蓋造其有民房處所卽按房間多寡大小酌量給價租住每月支給房租銀二十兩至十兩六兩不等其自行修造房廠者工料經費均照各處時估核給不另支給租價茲自光緒七年起仍按照舊章支發核實開報

一甘肅關外解運軍餉軍裝軍火器械員弁勇丁盤費款查關外餉項軍裝由關內解至肅州轉運局再由肅局員弁轉解哈密由哈另派員弁分解各路軍營應用所有管

解員弁每批餉裝派委一二員各帶護勇四名按程途之遠近酌給盤費由肅州至哈密又由哈密南路至和闐北路至瑪納斯每員每站支給往返盤費銀三兩茲自光緒七年起仍照前章支發據實開報

一甘肅關外轉運軍餉軍裝糧料需用駝騾車輛支給腳價款

查關外需用軍餉軍糧軍裝由內地運至肅州再由肅州遞運出關先儘舊設官車駝騾載運餘係由各臺局就近覓僱民車駝騾輪番運送由肅州運至哈密又由哈密接運前進程途遠近不一南路多涉戈壁北路間有山嶺每

百觔百里車運給腳價銀四錢駝騾給腳價銀三錢現存官車駝騾無幾多係覓僱民車駝騾節次遞運茲自光緒七年起照依舊章支給據實開報

一甘肅關外官車官駝騾馬派員經管應用牽夫車夫支給工食及草料雜費並照章准報倒斃款

查關外舊設官車官駝騾馬各按駐紮處所運事繁簡分幫派員經管官車自二十輛爲一起或三十四十輛不等駝騾自六十隻頭爲一起或八十至一百隻頭不等其經管委員各照官階支給薪水每員給夫二名外用車夫牽夫按每車一輛用車夫一名每駝六隻用牽夫一名每騾



馬二頭匹用牽夫一名每名日支工食銀一錢又駝每隻日支料四筋草二十筋騾馬每頭匹日支料六筋草十五筋又車每輛月支膏油銀三錢駝每隻月支油鹽銀二錢騾馬每頭匹月支飲水歇店燈油銀四錢此外灌藥及添補什物修葺棚廠槽口卽照各處時估核給又此項車騾駝馬騾頭向照楚軍馬隊章程按每百隻頭匹扣足一年准照十分倒三之例開報請銷如一年倒斃數在三分以下應按實數具報若逾三分之數責令經管委員補賠其報倒成數不再發價買補以期漸次減裁茲自光緒七年起均照舊章支發據實開報

一甘肅關外軍營遣撤官弁勇丁及假汰老弱傷殘病勇並陣亡病故員弁勇夫靈柩回籍酌給車腳價款

查關外各軍營遣撤外省員弁勇丁回籍長途戈壁跋涉維艱酌定於防所起程行至肅州止每官一員給車一輛作重八百觔勇丁令其步行隨帶行李按八百觔合給車一輛每勇一名隨帶行李不得過五十觔以示限制其假汰老弱傷殘患病勇夫難以行走者每六名合給坐車一輛又從前陣亡病故官弁勇夫陸續搬運靈柩回籍均於起程地方起至肅州止每具給車一輛茲自光緒七年起支過前項車腳銀兩據實開報

一甘肅關外馬步各軍營打仗陣亡受傷弁勇支給恤賞養傷款

查楚軍恤養章程凡打仗陣亡弁勇每名給恤賞銀三十兩受頭等傷每名給養傷銀十五兩二等傷每名給養傷銀十兩三等傷每名給養傷銀五兩歷經照章辦理茲自光緒七年起據實開報

一甘肅關外安設塘站夫馬馳遞文報並派撥武弁字識獸醫鐵匠支給草料薪工款

查關外地方久爲回逆竊踞光緒二年大軍進剿挨次設立軍塘馳遞文報按程途之遠近安設正腰各站每站派

一武弁經管設號書一名安馬十餘匹或二十餘匹至三十匹不等均係兩馬一夫每三站設獸醫鐵匠各一名令居適中之地往來醫馬釘掌號書獸醫鐵匠每名日支工食銀一錢四分馬夫每名日支工食銀一錢每馬一匹日支料六筋草十五筋倒斃馬匹均照楚軍馬隊倒斃章程按支茲自光緒七年起仍照章分別支給據實開報

一甘肅關外各軍裝製造局原募浙粵及本地匠工並各軍營隨帶醫生分別支給薪工款

查關外軍營習用洋礮洋槍悉由外洋採運日久損壞均需隨時修整向於哈密喀喇沙爾阿克蘇等處設立軍裝

製造各局由上海招募浙粵各工匠分別等第匠首每工給銀一兩四錢四分一等匠每工給銀一兩八分二等匠每工給銀七錢二分三等匠每工給銀四錢三分二釐四等匠每工給銀二錢一分六釐本地工匠分別等第每工給銀二錢及二錢五分至三錢三分不等各按實在工數核給曠日不支其軍裝製造局製造零星軍物僱用長匠每名日給工價銀一錢七八分至二錢一二分不等各按工作優劣每工匠八名合給火夫一名日支銀一錢一分又關外地處極邊員弁勇夫不合水土多患疾病由內地招募醫生每營局一二名不等每名月支銀八兩每名准

帶跟丁一名日給口糧銀一錢茲自光緒七年起均照舊章支發據實開報

一甘肅關外配製火藥照時價採辦物料款

查關外需用洋土火藥向由內地製辦解運各軍應用南疆平定經左宗棠於喀喇沙爾庫車阿克蘇烏什等處就地設局採辦硝磺招募工匠製造火藥搭發各營以備閒時操演所需物料以硝磺爲大宗茲自光緒七年起照舊於本地採買硝磺提煉每觔藥需價銀一錢其配用酒炭零星藥料均照時價採買通計造成加工土火藥每百觔需工料銀一十六兩零土洋藥每百觔需工料銀二十九

兩零據實開報

一甘肅關外添購各項軍裝及一切零星應用什物按照時價採辦款

查關外軍裝以帳房號衣旗幟單夾棉衣褲包巾帽兜鞋襪爲大宗其餘鋤鍬鍋碗車駝騾馬什物紙劄筆墨藥料箱匣口袋篋包蘆蓆繩索等項多由後路各臺局採備提用閒值後路未經解到勢難懸待不得不就地採辦以應急需抑或遇有本地物價相宜藉省運腳及應隨時修整並一切應用零星什物必須就地採買者均飭由各局臨時按照市價採製物料名目不一時價貴賤不等難於畫

一茲自光緒七年起仍係照舊辦理據實開報

一甘肅關外流寓間員客民分別資遣回籍酌給川資口食車腳款

查關外平定以後南北兩路各城流寓間員多係歷年隨營効力著有微勞或因陸續裁營給假無資回籍或從前已經假歸復來投效無可安置甚或因病淹滯資罄難歸該員等萬里從征行囊匱竭欲歸不得情極可憫若不分別資遣誠恐流離失所別滋事端茲自光緒七年起隨時由保甲局確查有職之員驗明保札每員酌給川資銀或二十兩十六兩十二兩八兩不等其投效勇丁人等均按



程途遠近每名每日給口食銀一錢又關外道多戈壁跋涉維艱凡資遣有職人員每一員或三員合給坐車一輛勇丁人等每六名合給行李車一輛均按八百筋扣算於起程地方起至肅州止分別支給據實開報

一甘肅關外新設烏魯木齊提標各營汛步隊七旗照土勇餉章支給薪糧款

查烏魯木齊提標兵燹以後營制廢弛上年酌撤卓勝軍六營招募土勇權抵制兵應需月餉照楚軍坐糧章程酌減不募公長夫每旗以三百七十人爲定額內旗官一員月支薪水銀三十六兩公費銀二十四兩書識公用公費

在內均不扣建哨官三員每員日支薪糧銀二錢四分什  
長二十八名每名日支口糧銀一錢二分親兵四十名護  
勇十五名每名日支口糧銀一錢一分正勇二百五十二  
名每名日支口糧銀一錢火勇三十一名每名日支口糧  
銀八分以上共計每旗大建月支銀一千一百九十四兩  
三錢小建月支銀一千一百五十六兩四錢九分均按湘  
平支給至該土勇各旗官弁內有由提標揀派員弁兼充  
已由甘藩司挂發廉俸者均隨時按名扣除不另支給薪  
工計從光緒八年七月初一日挑選成旗起係照前章支  
發據實開報弁勇數目另單開載

一甘肅關外設立總分善後征糧保甲蠶桑各局調派文武員弁募用經帖護勇倉夫斗級纏回字識通事支給薪糧並酌給紙張筆墨油燭款

查新疆兵燹以後地畝荒蕪人民離散底定之初經左宗棠揀派隨營文武各員分赴各城次第設立總分各局開辦善後保甲清丈征糧各事宜招徠安集散發農器牛籽各按局之大小事務繁簡酌准募用經帖護勇倉夫斗級支給紙張筆墨油燭銀兩計南路東四城善後總局兼辦阿克蘇善後西四城善後總局兼辦喀什噶爾善後各募經承十名帖寫十六名護勇六十名纏回字識通事各四

名月支筆墨紙張油燭銀四十兩喀喇沙爾庫車烏什英  
吉沙爾葉爾羌和闐六城善後局各募經承四名帖寫八  
名護勇三十名纏回字識通事各三名月支筆墨紙張油  
燭銀二十四兩嗣因各局清丈地畝推糧過戶編造冊籍  
事務紛繁從七年正月起各加募經承四名帖寫八名喀  
什噶爾葉爾羌和闐英吉沙爾瑪納巴什阿克蘇烏什七  
處征糧局各設經承四名帖寫八名護勇二十名纏回字  
識通事各二名斗級二名倉夫四名月支紙張筆墨油燭  
銀十六兩吐魯番迪化州兩善後局及沙雅爾拜城瑪納  
巴什三處善後分局阿克蘇蠶織總局各設經承二名帖

寫四名護勇二十名纏回字識通事各二名月支紙張筆  
墨油燭銀十二兩阿克蘇阿依克葉爾羌和闐喀什噶爾  
英吉沙爾庫車庫爾勒土魯番哈密敦煌十一處蠶桑分  
局哈密新城老城吐魯番新城老城喀喇沙爾庫車阿克  
蘇烏什英吉沙爾喀什回城漢城葉爾羌和闐古城迪化  
奇臺昌吉綏來濟木薩阜康巴里坤二十一處保甲局每  
局設經承一名帖寫二名護勇十名纏回字識通事各一  
名月支紙張筆墨油燭銀八兩其辦事文武員弁以及經  
帖護勇倉夫斗級纏回字識通事應需薪糧工食均照各  
臺局原定章程支給茲自光緒七年起仍照舊章辦理據

實開報

一甘肅關外設立蠶桑總分各局招募司事工匠充當教習分別支給工食款

查關外軍務甫定左宗棠以南疆各城土沃宜桑非廣興飼蠶繅絲諸法不足以盡地利因於光緒六年由浙招募司事工匠派員帶赴阿克蘇設立蠶織總局又於阿克蘇阿依克葉爾羌和闐英吉沙爾喀什噶爾庫車庫爾勒吐魯番哈密敦煌等處設立蠶桑分局各設司事酌派工匠分途教習應需工食按照各省原定工價支給計司事每名日給薪糧銀八錢教習絡絲織機諸法首匠每工日支

銀六錢教習種桑接桑飼蠶收繭諸法各匠每工日支銀四錢三錢不等又學成纏徒每名日支工食銀五分八分至一錢不等茲自光緒七年正月起仍照原定章程按支據實開報

一甘肅關外分設義塾延師教習支給薪水津貼及塾童書籍紙筆墨硯款

查關外初復左宗棠前以各城地居邊徼文教久湮亟應廣選儒師分設義學因時訓導胥沾教澤於哈密所屬設立義學五堂吐魯番所屬設立義學六堂喀什庫所屬設立義學四堂庫車所屬設立義學五堂阿克蘇所屬設立義

學五堂烏什所屬設立義學三堂喀什噶爾所屬設立義  
 學五堂瑪納巴什所屬設立義學三堂英吉沙爾所屬設  
 立義學三堂葉爾羌所屬設立義學七堂和闐所屬設立  
 義學四堂巴里坤所屬設立義學四堂奇臺縣所屬設立  
 義學四堂濟木薩所屬設立義學三堂阜康所屬設立義  
 學二堂迪化州所屬設立義學六堂昌吉所屬設立義學  
 二堂綏來所屬設立義學四堂呼圖壁設立義學二堂以  
 上共計義學七十七堂每堂塾師一員月支薪水銀二十  
 兩加給津貼硃墨油燭銀四兩又每塾師准給跟丁一名  
 日支口食銀一錢每塾塾童十五六名至二十名不等所



有各塾童應需書籍均由後路各臺局購運散發所需紙筆墨硯均由各城局就地按照時價購發應用茲從光緒七年起均照原定章程支給據實開報

以上軍需善後款項二十四條均係循照左宗棠酌定舊章據實開報核與軍需則例未能逐一吻合實因關外久經兵燹道途荒遠物產彫零情形迥殊內地一切均極騰昂必須因地因時變通辦理善後諸政尤爲當務之急勢難省費然總計七八兩年用過銀兩通盤核算與定例應用之數不甚懸殊故未敢強爲牽合例章其自光緒九年  
起各款內如有應行裁減者當隨時報部以節糜費外所

有應發各款悉照前項款目章程支發開報俾昭核實再查新疆款目繁雜如有漏未列款者容再確查隨時補報合併聲明

軍機大臣奉

旨該部知道單併發欽此

SB

委署南路道廳州縣員缺片

八月二十二日

再新疆南路准設道廳州縣員缺應即委員往署暫刊木質關防鈐記給令啟用以重職守前經臣會同督臣譚鍾

麟

奏明在案臣維兩道綜理庶政同城之直隸州秉承一切

創立規模其責較重既奉准設之

旨勢未可以稽延所有阿克蘇兵備道員缺查有二品頂戴按察司銜陝西題奏道羅長祐才識宏通勤求治理堪以委署隨刊木質關防一顆文曰分巡甘肅阿克蘇等處地方兵備道關防溫宿直隸州知州員缺查有三品銜升

用道甘肅候補知府陳名鉅老成練達志趣不苟堪以委  
署隨刊木質鈐記一顆文曰溫宿直隸州知州之鈐記喀什噶  
爾兵備道員缺查有三品銜甘肅遇缺題奏道補用  
知府委署鎮迪道陳寶善才長識卓爲守兼優堪以調署  
隨刊木質關防一顆文曰分巡甘肅喀什噶爾等處地方  
兵備道兼管通商事宜之關防疏勒直隸州知州員缺查  
有道銜分省補用知府蔣誥才具開展勤奮有爲堪以委  
署疏附縣知縣員缺查有分省補用知縣許鼎九年力富  
強才具明晰堪以委署隨刊木質鈐記二顆一文曰疏勒  
直隸州知州之鈐記一文曰疏附縣知縣之鈐記除由

臣

分飭遵照並將刊就木質關防鈐記給領前往任事以資  
治理其餘各廳州縣容臣續行遴員委署屆時

奏報外所有現在委員署理准設南路道廳州縣各缺緣  
由謹會同陝甘總督臣譚鍾麟幫辦軍務廣東陸路提督  
臣張曜附片具陳伏乞

聖鑒謹

奏

軍機大臣奉

旨該部知道欽此

皇朝通志卷之五

五

劉襄勤公奏稿卷六

起光緒九年九月  
訖光緒十年二月

目錄

懇 獎敘江甯藩司摺

請 飭各省關趕解協餉片

請 補鎮迪道所屬廳縣員缺摺

請 獎敘興築烏垣城工片

已革縣丞酒醉戕斃武職大員審明定擬摺

發遣回城爲奴之犯請變通改歸南路州縣官管束  
片

請給南北兩路官員辦公津貼摺



南疆新設郡縣工費懇撥實餉摺

請將奇臺縣治移建古城片

補授兵部右侍郎顓懇 收回成命摺

請 旌節婦李周氏摺

刊給委署南路道廳州縣木質關防鈐記片

請頒回子郡王番篆摺

請將道員魏炳蔚畱營差遣片

喀什噶爾界務請由金順覆陳片

請給庫車吐魯番兩處回子郡王三年廉俸並卹銀

片

關外營旗局站實在數目暨陸續裁併新收繕單立案摺

南路城廨工作礙難中止仍懇 飭發銀兩片

覆陳呈控統兵大員並駐京委員侵蝕軍餉各節摺

卷之五

先王正金

懇 獎敘江甯藩司摺

九月初八日

奏爲援照部議先將籌解西餉歷年均足十成之江甯藩司懇

恩獎敘其餘協解足成之省關籌餉人員容再咨取職名併案請獎以昭激勸恭摺仰祈

聖鑒事竊查西征協餉自前督臣左宗棠率師度隴其時寇氛正熾動用浩繁部臣奉

命通籌指各省關竭力解濟嚴貽誤之處分供諸軍之要需全隴蕩平新疆繼復經左宗棠先後查明報解較多之省關籌餉大小各員籲懇

恩施其各督撫監督協濟公忠亦經據實陳明同膺

懋賞在案 臣等受代以來極思裁營節餉清以前之積欠  
減日後之指撥稍免各省悉索之苦而左宗棠所借洋款  
須爲陸續扣還實解到甘之銀遂頓覺其減色其短解者  
文牘頻催拖欠恆十之五六除設法騰挪酌裁營勇外統  
計幅員遼闊外部俄鄰比多接壤現在所存之營必須畱  
之分防始有備而無患關內漢回雜處撫綏彈壓不容稍  
疎值此度支艱窘無不力求樽節關外雖定分用六成而  
籌辦善後要政需費不貲重以地當極塞百物騰昂情形  
又迥殊於關內屢經往返函商通盤合算恆虞不支頻年

辦理一切幸賴有解足十成之處爲之牽補並荷

聖慈飭撥部款得以勉力撐持否則杯水車薪立形竭蹶前准戶部咨會屢年解足十成之江蘇等省仍聲明請獎等因<sub>臣</sub>等查江南自光緒五六年之內籌解西餉均於釐捐項下照依十成報解江甯布政使梁肇煌綜司出納備極經營深藉轉饋之功查照部議已在應行請獎之列其隨同董辦釐捐各員勤慎趨公始終不懈<sub>臣</sub>錦棠前以邊軍防戍將士久歷艱辛奏奉諭旨准其擇尤酌保則是籌餉之勞尤未可以掩抑左宗棠繫念西陲屢次寓言慮餉源之告匱既將轄疆協款提

解足成兼爲多方籌畫茲准咨送應保籌餉人員前來可  
否仰懇

夫恩先將江甯布政使梁肇煌

賞加頭品頂戴以勵其餘而示優異出自

逾格鴻施此外籌解足成之省關再當核明數目比較歲

時仍由<sub>臣</sub>等咨取各員職名並兩江咨送之員聲請

恩獎以昭激勸至各督撫監督諸<sub>臣</sub>受

恩深重誼應共體時艱卽左宗棠從前之請

殊施詎可屢邀<sub>臣</sub>等衡量事機亦何敢妄有援引第當撥

協紛乘督飭寮屬酌其緩急權其輕重於西事足濟其窮

於他事一無所誤具見挹注精心俾關內外藉資周轉紓  
朝廷西顧之憂收整頓及時之效臣等差免債事洵於大  
局有裨積年既久將來自應確查附陳在諸臣膺疆寄之  
隆邊籌原所不忽在臣等處受協之地公道不可不明也  
所有援照部議先將籌解西餉歷年均足十成之江甯藩  
司懇

恩獎敘其餘協解足成之省關籌餉人員容再咨取職名  
併案請獎以昭激勸緣由是否有當謹合詞恭摺具陳伏  
乞

皇太后



皇上聖鑒訓示施行再此摺係臣錦棠主稿合併陳明謹  
奏

軍機大臣奉

旨另有旨欽此

光緒九年九月三十日內閣奉

上諭劉錦棠等奏請將籌解西餉足數之布政使懇恩獎敘一摺西征餉需關係緊要所有協力接濟之員自應量加獎敘江甯布政使梁肇煌歷年籌解均足十成著賞加頭品頂戴以示鼓勵餘依議該部知道欽此



請飭各省關趕解協餉片

九月初八日

再各省關欠解西餉極多久荷

聖慈廑念恭讀光緒四年十二月十五日

上諭儻解不足數即將藩司監督照貽誤軍餉例指名嚴參等因欽此上年十月本年五月戶部議覆臣等請撥部款預籌的餉各摺內亦經聲明如再延不報解或解不足數定將各該藩司指名奏參是要需之不容少緩各省關早已稔知茲查本年應得八成以上的餉自正月至六月湖南已及五成河南及閩海江漢二關已及四成江蘇江西安徽四川已及三成有奇其餘浙江山東山西廣東湖

北福建等省或甫及一二成又或一成未及並全未起解不等綜計共報解銀二百四萬九千餘兩除劃還息借華洋各款及江南另解老湘一軍專餉銀二十二萬五千兩不計外實解甘肅糧臺者八十二萬五千餘兩其上年戶部酌提各省積欠銀五十萬兩亦惟河南湖北山東共解十萬時已半年入款祇有此數即使此後踴躍解足猶恐不敷周轉又況拖延既久行且援爲故事推其欠解之由非盡意存漠視亦或苦於籌措無如甘肅新疆統算年需實銀四百萬兩係屬必不可少現在奉撥部款業已湊放無存艱窘殆不可支論誤餉之處分至京餉而已極臣等

謹查成案雖曾奉有比例嚴參之

旨部議亦極森嚴若非勢當奇窘何敢上瀆

宸聰際此待用綦迫瞬屆年關籌商再四惟有籲懇

天恩飭下各省關督撫將軍嚴飭藩司監督將九年分的  
餉並戶部限提積欠之五十萬如數提前趕解俾資接濟  
至八年以前之欠數部議雖令補解今又數月未准報解  
一批但能早補一分則關內外早清一分之欠免致逐年  
遞增無所底止併懇

飭各省關分年解補以便及時清釐雖當拮据之時務求  
騰挪之術爲之多方湊集期於有裨計各省關必能其念

邊籌設法挹注儘解以濟急需如仍似前延欠責有攸歸  
深懼容隱貽誤應由臣等查明隨時指名嚴參以維事局  
理合附片具陳伏乞

聖鑒訓示施行再此片係臣錦棠主稿合併陳明謹  
奏

軍機大臣奉

旨著戶部嚴催各省迅速提解毋稍遲誤欽此

請補鎮迪道所屬廳縣員缺摺九月

關日

奏爲

微臣

暫轄新疆鎮迪道所屬廳縣員缺謹遵照變通章程遴員彙補以重地方而資治理恭摺仰祈

聖鑒事竊臣前准吏部咨會大學士陝甘總督左宗棠片奏哈密及鎮迪道所屬文武地方官均應歸劉錦棠統轄所有升調補署考核及一切興革事宜均可就近辦理分別奏咨以專責成陝甘總督相距過遠毋庸兼管光緒六年十一月初四日奉

上諭左宗棠奏請將哈密鎮迪道歸劉錦棠統轄等語哈密及鎮迪道所屬文武地方官均著暫歸劉錦棠統轄欽



此仰見

朝廷塵念邊陲委任專壹欽奉之餘莫名感悚頻年遇鎮  
迪道屬及哈密各官需員均係由臣委員署理畱心察訪  
或有始終異轍及才不稱職者隨時分別撤參在案惟查  
官貴真除事宜久任古今以循良稱者由其與民相信已  
深然後惠政斯成仁聲四溢如因遷調頻仍未竟厥施則  
莫不歎其爲日之太促也臣於吏事素少講求自承

恩命邊寄權膺責有攸歸悚惶彌切前因關外無兩司之  
考察核與除官之制諸多未符屢商督臣譚鍾麟揀補以  
免虛懸嗣接覆緘補署州縣應照變通章程悉由行營揀

員奏補教職則咨部請選不必由甘藩司具詳多一番周折徒曠時日等語誠以新疆異常瘠苦早寒凜冽人率視爲畏途而地處極邊從前各城設有旗營駐防兼事屯墾旗民交涉多用滿員亦或滿漢並用每揀實缺人員升調刻下迴非昔比分駐多係營勇兼之水土驟難服習又無內地堪調之員光緒四年左宗棠請將綏來縣知縣恩祿昌吉縣知縣色普正頰等開缺畱於關內另補是其明徵

臣維吏治關係民生

國計塞外新定首重招徠撫綏擇吏固必廉明尤貴能耐勞苦所以各缺未卽及時揀補者實緣行營旣無分任考

察之員臣於各員之操守才識必須詳細察看始足徵信無疑值此南路設官分職業已揀員往署則北路舊設之官員缺未便久懸就各差遣人員畱甘者多且有前隨左宗棠入隴曾經署缺復隨行營供差情形較爲熟習自應因地擇人庶足以重職守臣謹援照變通章程逐加遴選彙案請補各缺以資治理所有鎮西廳直隸撫民同知係衝繁難三項要缺查有甘肅候補班遇缺前先補用直隸州知州甘承謨心地明白辦事穩練堪以請補吐魯番同知係衝繁難三項缺查有甘肅候補直隸州知州黃丙焜才具開展有守有爲堪以請補昌吉縣知縣係繁難二項

邊遠要缺查有補用知府直隸州知州甘肅候補知縣方  
希林勤慎廉明任事實心堪以請補綏來縣知縣係衝繁  
難三項邊遠要缺查有同知銜甘肅候補知縣李原琳年  
力正強才具開展堪以請補除截缺各日期先後不一前  
值軍興難悉查考應請免敘外以上四員詳細履歷謹另  
繕清單恭呈

御覽合無仰懇

天恩俯念邊缺緊要准以甘承謨等分補鎮西廳等四廳  
縣員缺均堪勝任尤於地方有裨如蒙

俞允俟奉准部覆後除甘承謨一員業經赴部投供

欽派王大臣驗放奏請發往甘肅補用毋庸送部引見外其黃丙焜等三員卽行給咨送部引

見以符定例臣爲人地相宜各專責成起見是否有當謹會同陝甘總督臣譚鍾麟烏魯木齊都統臣恭鏜恭摺具陳伏乞

皇太后

皇上聖鑒訓示施行再新疆官制現正籌議整頓一俟奉准定章再行循照辦理合併陳明謹

奏

請一獎敘興築烏垣城工片

九月二十六日

再臣接准烏魯木齊提臣金運昌咨開烏垣自經兵燹城

垣並門樓門洞以及四隅角樓概已坍塌光緒七年春閒  
調集在防馬步各營分段興築現將垣牆四圍加高培厚  
一律完固至四門城樓四隅角樓四城門洞南北月城門  
洞於光緒七年六月動工至八年九月止由升任迪化直  
隸州知州陶模及現署知州劉兆梅先後監修完竣所有  
置買瓦甎鐵木各項並員弁匠工兵勇人等津貼犒賞其  
用銀一萬一百一十二兩五錢八分又續建堆房抱舍十  
二間火藥局九間義學十一間並濠溝橋梁共用銀一千

三百四十一兩五錢六分二釐綜計共用銀一萬一千四百五十四兩一錢四分二釐除由陶模稟請在於迪化善後房租及古城釐金項下撥用銀三千九百一十一兩五錢外實不敷銀七千五百四十二兩六錢四分二釐因自念身受

國恩毫無報稱不敷銀兩已於歷年所餘薪公項下動支作爲捐修之款相應開單咨請

奏咨立案等因臣維新疆自戡定後各處城垣半多殘燬亟須次第修理以資捍衛祇苦功程浩大籌款維艱金運昌承修之迪化州城殘塌已久工鉅費繁共用銀一萬一

千四百餘兩雖與例估不無軒輊然以塞外物價騰昂覈較尙屬節省業經臣飭署鎮迪道陳寶善逐一勘驗加結具報茲據陳寶善詳覆履勘委係工堅料實並無浮冒加具印結懇請具

奏前來臣查前項城工經費僅於善後房租及古城釐金項下撥支銀三千九百一十一兩五錢自應准其動用已據署迪化直隸州知州劉兆梅造冊加結呈由行營糧臺核轉彙案報部核銷其由該提督捐修之款應請免其造報並懇

天恩俯准飭部立案至該提督捐修鉅款克竣要工應否



仰懇

恩施准予議敘伏候

聖裁其在事出力員弁人等督任畚揭始終罔懈不無微  
勞可否由臣彙案擇尤酌保之處出自

逾格鴻慈除咨戶工二部外是否有當謹會同烏魯木齊  
都統臣恭鏗合詞附片具陳伏乞

聖鑒訓示謹

奏

軍機大臣奉

旨金運昌著該部覈給獎敘其餘在工出力人員著該大

臣擇尤保獎毋許冒濫餘依議欽此

刑部  
刑部  
刑部

卷之二

七

已革縣丞酒醉戕斃武職大員審明定擬摺十月初二日

奏爲已革縣丞酒醉昏迷戕斃武職大員審明定擬恭摺具陳仰祈

聖鑒事竊查指分貴州試用縣丞周鏡堂卽周家鑑因酒醉昏迷戕傷安遠營左哨副百長江西補用總兵楊秀元身死一案前據統領安遠軍甘肅甯夏鎮總兵譚拔萃查驗取具生供嗣據報因傷殞命覆移由庫車善後局員驗傷解營審辦當經臣發委前署哈密通判朱冕榮審訊並將周家鑑縣丞咨部斥革旋以案關營員復經臣行提一千人證來營發委行營發審委員分省補用知縣陶炳南

前湖北應城縣知縣黃維哲確審詳辦去後茲據委員陶炳南等覆審明確錄供詳解前來臣親提研鞫緣周鏡堂卽周家鑑籍隸湖南甯鄉縣同治十年投効貴州武字營於克復清平黃平案內得保分省補用從九品十三年在黔捐局加捐縣丞指省貴州尙未驗看與安遠營左哨副百長江西補用總兵看守庫車北門之同縣人已死楊秀元先不認識光緒六年周家鑑出關赴庫謀事會遇楊秀元彼此問知姓名從此交好並無嫌隙八年三月十五日周家鑑接到家信憶及家貧母老伊又賦閒不覺憂愁是日下午至市飲酒解悶傍晚時飲入醉鄉至譚楚光屠鋪

索茶解渴譚楚光遂至廚房燒茶詎周家鑑酒氣上湧一時昏迷不識如何卽取譚楚光肉架上屠刀走出道經楊秀元卡房入內唬哭維時楊秀元正在棹上寫字當以時當十五不應唬哭犯伊禁忌之言向其理斥周家鑑酒後糊塗不服混罵楊秀元分辯回詈不期周家鑑順用屠刀向楊秀元冒戳兩下適傷其右胎膊心坎撲跌倒地致刀尖劃傷其左肱肘經楊秀元之親兵董瑞庭羅福勝聞聲趨至喝阻奪刀並將周家鑑細縛投知該營左哨正百長許明耀報經譚拔萃前往查驗詢悉情由飭醫調治比時周家鑑昏迷無知迨後酒醒心始明白悔恨莫及楊秀元

傷重調治罔效延至十六日早因傷殞命復報經譚拔萃  
移局驗傷解營委審據供前情不諱嚴詰委因酒醉昏迷  
冒戳適傷並無捏飾情弊亦無起衅別故供證確鑿案無  
遁飾查律載鬪毆殺人者不問手足他物金刃並絞監候  
等語此案已革縣丞周鏡堂卽周家鑑因酒醉昏迷順用  
屠刀戳傷楊秀元心坎等處身死自應按律問擬周鏡堂  
卽周家鑑合依鬪毆殺人者不問手足他物金刃絞律擬  
絞監候察核戳由酒醉昏迷訊無別故情罪尙輕本應仍  
照變通章程錮禁三年惟周家鑑係文職人員楊秀元亦  
係武職大員若僅照變通章程鬪毆情輕人犯一律錮禁

未免無所區別應請從重發往黑龍江充當苦差以示懲  
做據供母老丁單但查死者亦係母老子幼不准查辦畱  
養譚楚光不知周家鑑取刀情事應與奪刀細縛周家鑑  
救阻不及並無不合之親兵董瑞庭羅福勝均請免議無  
干省釋屍棺飭令資送回籍給屬領埋兇器屠刀案結銷  
燬除全案供招咨送刑部外所有審明定擬緣由是否允  
協謹恭摺具陳伏乞

皇太后

皇上聖鑒訓示施行謹

奏



軍機大臣奉

旨刑部議奏欽此

發遣回城爲奴之犯請變通改歸南路州縣官管束片計  
二十七日

再臣於上年春間准陝甘督臣譚鍾麟咨准湖北撫臣彭  
祖賢咨查新疆道路是否一律疏通擬將發往新疆回城  
爲奴之遣犯張菽培等照例起解等因到營臣查例載軍  
流人犯應由所發省分督撫大臣按所犯罪名查照軍流  
道里表酌量遠近並在配軍流多寡均勻撥發先期定地  
又發遣回城爲奴之犯先行酌給印房各章京筆帖式役  
使該章京等足敷役使再分給大小伯克爲奴毋庸分給  
小回子以免拖累各等語所有前項湖北遣犯比以伊犁

正值交收而南路各城參贊辦事領隊各大臣均未簡放其印房章京筆帖式等員以及駐防旗綠兵丁概無存畱人犯到配無所歸束咨復暫緩發往在案現在南疆各城改設官治業已

奏明委員署理一切規制自應及時籌議向例發遣回城爲奴之犯所以分給各章京筆帖式及大小伯克役使係因別無衙門可以安插今官署既定前項遣犯又轉准湖北咨催起解前來事關刑律未便拘例再延相應請

旨飭部核議將發遣回城爲奴之犯量爲變通改歸南路各州縣印官安置管束以昭法守而專責成是否有當謹

會同陝甘總督臣譚鍾麟合詞附片具陳伏乞  
聖鑒訓示謹

奏

軍機大臣奉

旨刑部議奏欽此

東洋通志卷之八

一

請給南北兩路官員辦公津貼摺

十一月初四日

奏爲新疆邊遠凋瘠南北兩路經始善後事繁費艱道員暨正雜官吏擬按缺分優絀分別酌給津貼以資辦公而均苦樂恭摺仰祈

聖裁事竊維制祿馭富道貴有以養其廉而時異勢殊事貴有以通其變新疆土曠人稀殘破之餘流亾甫集貧寡交乘北路鎮迪轄境歷年招徠安集至今大縣人民多者不過一二千戶少者數百戶回疆戶口雖較繁殷惟淪胥日久疊遭安夷搜括席捲杼柚罄空其瑪納巴什喀喇沙爾拜城等處蹂躪特甚子遺之民翊戴

皇仁彌殷瞻就際茲邊圉粗輯百廢待興慎選廉能與民  
休息久安長治之道無逾於此願士做水煩各有所妨莅  
官位事宜慮其始一官一邑庇民必有以庇身羣策羣力  
稱事始期於先事廉工應領之數與其日用必需之數兩  
相較籌當使賢者優爲而中才以次舉能勉安所遇然後  
能責其盡職興廉懲貪可得而言矣伏查南疆新設郡縣  
廉俸工食部議准照鎮迪道屬賦役掛支率由舊章原屬  
大公至正惟道員廉銀歲祇三千兩同知直隸州知州八  
百兩通判知縣六百兩俸工役食照章減折支給爲數更  
屬無多就地別無租課羨餘堪資墊補而地介西表今茲

州縣所治去

京師遠者萬有餘里近亦八九千里羣吏奉檄之官車馬騶從之費亦已數倍尋常而幕友丁胥薪工有費迎送餼牽慶弔有費俯仰事畜服食有費荒徼殘區百物艱貴家常粗糲動費不貲入不償出其大彰明較著者也曩者臣

駐軍前敵創舉善後嚴禁攤派八城局費薪糧各視其地之衝僻事之繁簡以爲差等節省之中仍示以寬大而事後熟察且有因公負累者迪屬卸署人員入塞半無資斧臣所稔知方今全疆善後未能卽了南疆工役正殷一旦易局而官勞費如前而廉項入款較前頓減雖有廉吏必



不能支官病民窮事何以舉迨至盤查交代追取虧挪甚且貪墨敗官重干例議應得之咎夫復何辭而致此之由究難免於納之筭而啟其實者臣忝邊寄權轄全疆謀慮之疏壅蔽之尤後將誰執其咎哉竊見乾隆間移徙陝甘滿營實邊駐防其時官兵馬甲餼糧料草均按雙分支給綠營換防官兵既支行糧其家屬仍准全支坐糧

祖宗厚澤深仁雖下逮戍卒征夫罔不曲盡其情各遂所欲

成憲昭垂至足欽矣臣愚擬懇

天恩允照黔省奏

准津貼州縣新章由臣分別酌擬請

旨遵行通計南北兩路合吐哈兩廳其道廳州縣分防縣丞二十五員缺又原設佐雜教職十四員缺內巡道三員缺分相等擬請每員各月給津貼銀一百兩歲各加銀一千二百兩其北路之鎮西迪化昌吉阜康南路之喀喇沙爾瑪納巴什拜城同通州縣七缺與哈密通判均屬著名瘠苦擬請每員各月給津貼銀六十兩歲各加銀七百二十兩又北路鎮西迪化阜昌四廳州縣現任之學正訓導吏目典史巡檢照磨合哈密巡檢共八員缺擬請每員月給津貼銀十六兩歲共加銀一千五百三十六兩懸缺未

設各雜職及南服新募書吏應加口分均請由臣隨時察核

奏明辦理其餘缺分稍優之處北如奇臺綏來濟木薩呼圖壁共知縣縣丞巡檢典史正雜七缺南如葉和喀英阿烏庫車合吐魯番闡展共同知州縣巡檢正雜十三缺土沃民殷均請毋庸津貼以示區別以上津貼巡道正雜各官通共歲需實銀一萬八百九十兩如荷

鴻慈允准均請從此次奉

旨之日起支以清起訖仍依前次部覆各官廉俸公費統歸西征糧臺軍需支銷項下彙總開報一俟地方復元卽

由督臣察核

奏請停止無缺之員署無員之缺均請全支廉銀以示體恤似此辦理庶苦樂均適官民稱便於地方吏治民生裨益匪淺所有新疆邊遠凋瘠南北兩路經始善後事繁費艱道員暨正雜官吏擬按缺分優絀分別酌給津貼以資辦公而均苦樂各緣由謹會同陝甘總督臣譚鍾麟烏魯木齊都統臣恭鏜幫辦軍務廣東陸路提督臣張曜合詞恭摺具

奏愚昧之見是否有當伏乞

皇太后

皇上聖鑒裁奪施行謹  
奏

軍機大臣奉

旨戶部議奏欽此

南疆新設郡縣工費懇撥實餉摺

十一月初四日

奏爲南疆新設郡縣建置一切工費浩繁無可籌措懇  
天恩飭撥實餉以濟要工而維事局恭摺仰祈

聖鑒事竊新疆地處極邊幅員遼闊要荒之外屏蔽爲先  
南路增置郡縣城垣衙署等工勢不容已臣於本年四月  
閒業將籌辦大概並懇

飭撥的款各情形奏明在案惟邊荒燼餘民窮財竭補苴  
經始事同締造當茲時局至艱餉需奇絀

皇太后

皇上憂勤惕厲

列聖力公志高

卷八

三

欽定四庫全書  
卷之六  
三  
儉德日崇雖司農歲進正供且撥充

國用微臣受

恩深重具有天良苟事所得已餉饋稍資挹注局勢尙堪  
勉支何敢以財用細微上煩

慈系惟前項工程臣與張曜往復通籌大率城垣爲重土  
工爲多回部子遺殘喘重隸

聖化極應謹體

皇仁輕徭薄賦與之休息以故土工大凡專資勇丁之力  
兼雇赤貧以工代賑蠲力役絕攤派費省事集而民和其  
便一也臣等初議城垣因創隨宜各城衙署通就官局補

葺藉省工費其便二也需材隨地購辦工雇回匠黜華崇實其便三也臣曩接准部覆比將前事等因咨行遵辦並檄飭各營局確估工費分齎臣與張曜會核定奪一面熟察緩急次第興工去後茲據各該營局陸續詳齎估冊具報興工前來臣逐加覈閱城工可因舊制改作者東僅庫車烏什西僅喀英葉瑪暨疏附縣城七處其東路之喀喇沙爾阿克蘇拜城西路之和闐直隸州城于葉兩縣城均待擇基另建蓋滄桑更變今昔迥殊或遺趾雖存而近時市集居民距城寫遠官民睽隔於事非宜度地因時勢不容已隴邊土性斥鹵下流逾甚土城年久剝落坍塌鮮可



因依創制之初土程允宜堅固庶能一勞永逸費不虛糜以故新建之城六城根礮臺雉堞甕門一律通用燒輒雜石城樓官廨鳩工庀材均取堅樸改修之城七去其潮鹹輸土重築添修城樓礮臺間須推廣城基工料所費亦復不少官司所治倉庫廐獄暨同城佐雜衙門科房傳舍嚮與堂事相聯屬例建

壇廟亦應從簡隨署兼營善後等局原本草創改局爲署格於程式而臨民莅事諸多未宜礙難拘牽原議者勢也邊疆百物奇昂工匠稀貴入山取材路長腳多動費鉅款通盤確估八城東西兩道所轄新設道廳州縣十五員缺

計其城工十三起衙署十五起除嵩武楚湘董定諸軍幫  
修土工外所需鐵木輒石陶瓦物料匠役薪工犒賞諸款  
節之又節通共需實銀三十七萬四千兩有奇工作週際  
環興鉅款頓增勢難停待就地絕無絲毫進項可籌協餉  
只有此數如本年遵照部議原盼解足八成現屆十月計  
算協解成數除劃抵撥還華洋商債外實在解甘銀僅一  
百二十餘萬兩征軍餉需暨臣權轄之南北兩路印委人  
役薪廉正雜諸款統恃協餉通融縱令暢解如常出入祇  
足相抵矧今入款既大遜於往常而一耗於清還商債坐  
佔實餉三百萬兩之多再耗於續裁卓勝五營代晉省挪

空現餉二十餘萬兩而前項城工衙署專款積少成鉅又需銀三十七萬四千兩仍待由萬艱之軍餉點綴通挪嚮使督臣固執前議到甘之百餘萬兩必與臣軍分成提用局勢早已難措幸譚鍾麟深維大局餉饋必先塞外遇有急需設法摒湊飛輓時懼不給體

國之忠悉慮之公舟誼至足紉矣昨與臣書云息借洋款部議停止自應恪遵惟念來源日見枯竭催索鮮應羅掘成虛稔知臣軍前竭後空困窘萬狀擬暫嚮陝鄂華商籌借銀兩湊解西來權濟眉急而議之成否數之多寡仍難逆計也近迫歲闌積年挪空之餉填補無方而及時應出

之需點金乏術其城工衙署專款爲數既鉅需用正殷尙屬虛懸無著如臣禱昧委實難支再四籌維惟有籲懇聖慈俯念郡縣建置關重邊荒窮窘異常

恩准飭撥部儲實餉三十七萬四千兩俾濟要需而維事局邊事幸甚微臣幸甚此項部撥銀兩仍

飭就各省關欠解協甘軍餉項下定限照數解部歸還以重庫款臣不勝感悚屏營之至除遵造城垣衙署工段工料簡明切實估冊分別另案咨部查覈外所有南疆新設郡縣建署一切工費浩繁無可籌措籲懇

天恩飭撥實餉以濟要工而維事局各緣由是否有當謹

會同陝甘總督臣譚鍾麟幫辦軍務廣東陸路提督臣張曜合詞瀝陳伏乞

皇太后

皇上聖鑒訓示謹

奏

軍機大臣奉

旨該部議奏欽此

請將奇臺縣治移建古城片十一月  
初四日

再奇臺縣治屏營驛逼近天山之陰山原高亢周迴數里  
內無井泉河渠之利官民汲引冬恃冰窖春夏則恃天山  
雪水融化引流作瀦偶值亢旱雪少輒患枯渴就地掘井  
恆深至百餘仞莫能及泉該縣城關附郭嚮少居民商旅  
不集亦有由也乾隆建城之初蓋取建瓴臨下之意且與  
木壘古城兩營東西相距各九十里縣治居中聯絡防守  
兩資已耳不若古城地當孔道東接巴里坤西達烏垣南  
屏天山北至科布多東北通烏里雅蘇台西南為出吐魯  
番閒道形勢允稱扼要且其地適濱水磨河格根河下瀉

之衝眾流所歸故其土性沃衍人煙稠密縣境東西地頭  
二三屯各腴區密爾環抱樵汲芻糧取購近便駐師興屯  
於事攸宜建官出治尤爲允協前烏魯木齊都統臣景廉  
督師西征特設軍府於此就孚遠古城之東築兩土城蟬  
接鱗次委官試署商民市集亦卽附麗其間意至善也現  
查其倚南一堡業經增修完固作爲孚遠新城古城領隊  
與其協佐領官兵駐紮其中仍景廉軍府之舊也北城嚮  
爲市集惟其城根北邊坐落水磨河外無護隄隙地難議  
增改垣中南北相距僅五十七丈城身高只丈餘厚只五  
六尺規模太狹查其西關卽古城營舊堡基址尙存平廣

爽塏漸已由聚而邑前據署知縣甘承謨稟陳前由請將  
 奇臺縣治改建古城前來臣比檄委署鎮迪道陳寶善履  
 勘詳奪去後茲據陳寶善委勘詳覆前情無異並准陝甘  
 督臣譚鍾麟烏魯木齊都統臣恭鏜咨請會

奏改建到臣行營臣維經費至艱建置關重事苟得已自  
 以仍舊爲宜惟城治務擇形勝便民茲按奇古兩相比較  
 利病相去判若天淵則奇臺縣治移建古城洵屬正辦譚  
 鍾麟恭鏜來咨意見脗合如蒙

聖恩允准再由臣調營幫工藉資節省古城營游擊千把  
 經制額外各官弁暨分防奇臺汛把總均應照舊駐紮其



古城巡檢應請移置奇臺兼管驛丞事務奇臺典史應隨  
印官移駐各專責成俟奉

旨後臣當欽遵檄飭確估照例造具工段冊咨部查覈所

需經費由臣附入南路城工彙案請銷以昭覈實臣爲地

方起見是否有當謹會同陝甘總督臣譚鍾麟烏魯木齊

都統臣恭鏜合詞附片具陳伏乞

聖鑒訓示謹

奏

軍機大臣奉

旨該部議奏欽此

補授兵部右侍郎顓懇 收回成命摺十一月十六日

奏為欽奉

恩綸瀝陳下悃顓懇

曲賜矜全

收回成命俾微臣得稍安愚拙以保餘生恭摺仰祈

聖鑒事竊臣於十一月初八日承准吏部咨開文選司案

呈光緒九年十月初五日內閣鈔出初四日奉

上諭劉錦棠著補授兵部右侍郎未到任以前著徐用儀

署理欽此恭錄知照到臣行營跪聆之下感

高厚之隆施實悚慚於無地分宜恪遵

劉慶功公卷高

三

諭旨恭拜新除特微臣萬不獲已之下情勢有不得不爲  
我

皇太后

皇上陳之者臣前以舊疾增劇屢疏乞退就醫渥蒙  
賞頒珍藥寬給假期

溫詔優褒迥出非分遵卽加意服調會當暑盛寒消仰賴  
造命之福疼痛較前略減謹已具摺如期力疾銷假仍懇  
另簡賢員接替

俯准開缺交卸以免誤公在案蓋深維

聖慈曲被卽捐糜踵頂猶未能酬其萬一兼以南路改設

官治規制一切必須及時舉行裁營節餉最爲當務之急  
 病苟勉可支撐義應強起籌辦竊計粗有端緒遂當拜疏  
 堅伸前請懼以久病戀棧無濟邊籌乃自入冬以來腿痛  
 已發數次並添手麻耳鳴之證百計覓醫正苦診治無驗  
 何期復叨

殊遇超擢上卿在

朝廷寵臣特甚不惜破格之加臣竊自恨福薄災生日久  
 櫻疾不愈宋臣朱熹有言一日立乎其位則一日業乎其  
 官一日不得乎其官則一日不敢居乎其位此言當官不  
 稱斷難忍待須臾非謂以病軀尸位也矧以臣之庸陋以

視侍郎之職固共知其萬萬不逮卽昔年所恃膂力方剛習勞戰守以少報涓埃者亦因久役寒侵漸成沈痼此臣內度之身疲茶無能而未敢居者也尤難已於請者臣自幼棄學從征轉戰各省馳驅戎馬以迄於今未嘗研究經史伏思兵部佐平邦國侍郎位隆陪貳必其學行素著資望允孚始足上邀

特簡實緣科目爲取士之正途不獨多識往行尤貴熟諳朝典敷歷有年措施悉當堪以示屬司之正軌絕速化之倖思法至善也屬因軍興推廣用人之格士之困於仕進者効力前驅多登薦剡於是收用旣雜濫竽不免然或僅

晉虛銜鮮有若臣之屢躋顯秩而臣前拜太常寺卿通政司之

命時值軍事方殷臣沐

逾格之榮待罪行閒正所以激勵將士雖差足以自解恆懼不衷爲災極思陳情開缺期得請以守愚漢臣諸葛有言才須學學須識臣旣失學則才識果何由生故凡核治文牘人之所一思了然者臣必更番審察而始決是其明徵臣苟以不學之粗質忝廁司馬之崇階揆之

國家慎重名器之道顯有所妨從來以他途進占清班貽譏史乘者代不絕書

聖朝德懋懋官一章一服悉經權衡以與靡不曰賢今臣無端獨承

眷卑則倖獲高官之漸竟若自臣而開上累爵人之

盛德臣具有天良捫心何以自安此尤臣之所大懼而未

敢居者也臣賦性駑鈍頻年

懋賞疊膺邊疆忝任方愧叨榮已極茲蒙

恩擢不禁寵極而驚感深而泣為臣夢想所不到誠恐大

駭觀聽致礙任賢使能之大經用敢不揣冒昧披瀝上陳

顛懇

天恩矜全

收回成命庶臣藉安愚拙以保餘生斯官常幸甚微臣幸甚臣年甫四十報

國之日方長一俟邊局略定併懇

恩准收銷兵符俾臣回籍養疴但得醫治稍痊卽當泥首宮門求

賞差使以伸犬馬戀

主之忱干瀆

宸嚴不勝感悚激切待

命之至謹繕摺具陳伏乞

皇太后



皇上聖鑒訓示施行謹

奏

軍機大臣奉

旨覽奏情詞懇摯具見惻忱該侍郎向來辦事認真朝廷深資倚任惟當勉圖報稱將新疆應辦事宜妥爲經畫一面加意調治以慰塵系毋許固辭欽此

請 旌節婦李周氏摺

光緒十年正月二十二日

奏為節婦年近七旬孝慈素著足式里閭謹據情籲懇  
旌表以闡貞潛恭摺仰祈

聖鑒事竊

臣

據統領董定軍遇缺題奏提督董福祥記名

提督田九福署迪化州學正李思范等稟稱已故民人李  
柏林之妻李周氏現年六十九歲籍隸甘肅甯夏府靈州  
係總兵銜雷陝西補用副將霍伽春巴圖魯李雙樑之母  
質稱淑慎德本幽閒道光二十年李柏林病故遺子二人  
長雙棟年甫四齡次雙樑尚在襁褓氏時年二十五歲含  
悲守節矢志撫孤家況奇貧翁姑垂老氏度日維艱養殮

時有不給而甘旨之奉悉藉紡績經營未嘗或缺道光丁未戊申年間翁姑相繼物故周氏竭力營葬備歷苦辛其節其孝久已鄉閭嘖稱同治元年氏長子雙棟又復病故迨雙棟成立適值逆回擾亂顛沛流離之際周氏命雙棟從軍擊賊勉以忠義雙棟秉承母教轉戰各處得保今職其深明大義尤爲巾幗中所罕見職等同居梓里夙稔蘭猷觀其比美郝鍾洵足高標綽楔現在李雙棟與職等均在新疆軍營効力未克呈由地方官詳請咨奏惟以誼關戚友情切鄉鄰見聞旣眞不忍聽其湮沒謹造具事實冊結聯銜稟懇核

奏前來 臣查節孝貞烈婦女例准請

旌並准繕具事實冊結送部由部核覆彙題歷經各直省遵辦在案茲節婦李周氏像比甘泉心澄古井勵綺年之苦志祇憑紡績爲家勛大義於藐孤能執干戈衛

國況值雙親待哺奉養無虧斯爲一節可嘉表彰宜亟旣符年例應沐

褒揚提督董福祥等夙共里閭熟知閩範事允孚於眾論臣難壅於上聞合無仰懇

天恩

優旌苦節庶並維持風化悉荷

皇仁除冊結咨部外謹會同陝甘督臣譚鍾麟甘肅學政  
臣陸廷黻合詞恭摺具陳伏乞

皇太后

皇上聖鑒訓示謹

奏

軍機大臣奉

旨著准其旌表禮部知道欽此

刊給委署南路道廳州縣木質關防鈐記片

正月二十日

再新疆南路准設各官員缺亟應一併委員署理暫刊木質關防鈐記給令啟用以重職守所有理事同知銜喀喇沙爾撫民直隸同知員缺查有分省補用直隸州知州龍魁明幹有爲勤能素著堪以委署隨刊木質關防一顆文曰理事同知銜喀喇沙爾撫民直隸廳同知關防庫車撫民直隸同知員缺查有分省補用知府潘時策舉止安詳辦事誠實堪以委署隨刊木質關防一顆文曰庫車撫民直隸廳同知之關防拜城縣知縣員缺查有畱陝補用知縣銜蔣澤煦明白樸實辦事可靠堪以委署隨刊木質鈐

記一顆文曰拜城縣知縣之鈐記烏什撫彝直隸同知員缺查有鹽提舉銜甘肅補用知縣羅正湘年富才明勤能穩慎堪以委署隨刊木質關防一顆文曰烏什撫彝直隸廳同知之關防英吉沙爾撫彝直隸同知員缺查有畱甘補用直隸州知州劉嘉德性情質直勤慎廉明堪以委署隨刊木質關防一顆文曰英吉沙爾撫彝直隸廳同知之關防莎車直隸州知州員缺查有三品頂戴道銜分省補用知府忠曾器局安詳練達有爲堪以委署隨刊木質鈐記一顆文曰莎車直隸州知州之鈐記葉城縣知縣員缺查有分省補用知縣周振嶽年富力強才具明晰堪以委

署隨刊木質鈐記一顆文曰葉城縣知縣之鈐記瑪喇巴  
什水利撫民直隸通判員缺查有分省補用知府楊溢中  
樸實謹厚能耐勞苦堪以委署隨刊木質關防一顆文曰  
瑪喇巴什撫民直隸廳通判兼管水利之關防和闐直隸  
州知州員缺查有知府銜畱甘補用直隸州知州劉式南  
練達老成畱心民事堪以委署隨刊木質鈐記一顆文曰  
和闐直隸州知州之鈐記于闐縣知縣員缺查有同知銜  
分省補用知縣許茂光性情質直通達治理堪以委署隨  
刊木質鈐記一顆文曰于闐縣知縣之鈐記又喀什噶爾  
兵備道員缺前經臣檄委三品銜甘肅升用道候補知府



陳寶善前往署理嗣據陳寶善稟稱病勢難支懇請改委  
前來自應遴員接署以專責成查有二品頂戴甘肅遇缺  
題奏道黃光達年壯才明操守謹飭現辦葉爾羌和闐善  
後總局堪以就近委署除由臣分飭遵照並將刊就木質  
關防鈐記分別給領前往任事以資治理外謹會同陝甘  
總督臣譚鍾麟幫辦軍務廣東陸路提督臣張曜附片具  
陳伏乞

聖鑒謹

奏

軍機大臣奉

旨該部知道欽此

刑部  
勅  
諭  
部  
知  
道  
欽  
此

四



請頒回子郡王番篆摺

正月二十一日

奏爲據情代懇

天恩飭部補鑄回子郡王番篆頒發祇領俾昭信守恭摺  
仰祈

聖鑒事竊 臣於光緒七年閏七月二十七日具

奏已故吐魯番魯克沁回子札薩克郡王阿克拉依都之  
子瑪木特年已及歲請

旨飭議承襲世爵一摺嗣准理藩院來咨於八年九月初  
一日議

奏本日奉

旨允准等因欽此欽遵當卽恭錄轉行遵照並據情代謝  
天恩各在案茲據署吐魯番同知劉嘉德詳據新襲魯克  
沁回子札薩克郡王瑪木特呈稱世職故父阿克拉依都  
於咸豐二年充當葉爾羌三品阿奇木伯克比經呈明吐  
魯番領隊大臣將番篆交二品臺吉穆胡談權宜護理旋  
於同治三年因安集延逆酋竄擾吐境搜括財物番篆遺  
失無從尋覓現於該處找獲承平年間蓋用舊印公件一  
紙黏懇轉報具

奏等情前來臣查該回子郡王番篆前被安逆搜擄遺失  
現在瑪木特既經承襲世爵所有應需番篆理合據情請

旨飭部照例補鑄頒發臣營以便轉給祇領俾昭信守除將齎到篆模分咨部院查照外謹會同陝甘總督臣譚鍾麟烏魯木齊都統臣恭鏜合詞恭摺具陳伏乞

皇太后

皇上聖鑒訓示施行謹

奏

軍機大臣奉

旨該衙門知道欽此

新編 日本書紀 卷之八

八

請將道員魏炳蔚畱營差遣片

正月二十一日

再道員魏炳蔚經前陝甘總督

臣左宗棠

奏赴行營効力歷辦營務善後保畱甘肅補用旋即請咨赴部引

見因與現任甘肅藩司魏光燾係屬同宗叔姪例應迴避聲明改發陝西上年五月到陝繳照冬間請假回籍省親比由陝西撫

臣

核准咨部有案

臣

查該道員曾辦新疆南路善後局務尙有經手事件當經札調由籍前來清釐值此整飭邊事之際正資力於熟手合無籲懇

天恩俯念邊徼需才准將鹽運使銜陝西候補道員魏炳



蔚畱於臣營差遣以資臂助出自

鴻慈除分咨外理合附片具陳伏乞

聖鑒訓示謹

奏

軍機大臣奉

旨著照所請吏部知道欽此

喀什噶爾界務請由金順覆陳片

二月初一日

再南路喀什噶爾西邊界務前因張曜長順互陳情形兩歧總理衙門議覆請

飭由臣與金順確查具奏奉

旨依議欽此恭錄鈔摺咨行到臣伏查南段分界時越二年迄今尙未就緒上瀆

宸聰微臣同深愧悚惟刻下所執之界若遂由臣主辦則

雖原悉大概形勢亦必另派大員知會俄官前往會勘執辦始爲有據程途過遠未暇與論界土之應否索還而卽此往返已屆深秋在彼將來轉得有詞該處界段牧場上

年金順所派之沙克都林札布均經親歷久已了然於胸  
比回伊犁金順計早詢悉其詳且查俄領事官近駐伊城  
卽其外部大臣亦相距匪遙尤易探其底蘊應由金順就  
近查奪主稿覆陳庶免延誤除由臣商金順籌辦外理  
合附片陳明伏乞

聖鑒訓示謹

奏

軍機大臣奉

旨知道了欽此

請給庫車吐魯番兩處回子郡王三年廉俸並卹銀片  
二十  
六日

再臣於光緒四年在喀什噶爾行營採訪庫車回子郡王  
愛瑪特吐魯番回子郡王阿克拉依都均因漢回變亂隨  
同官兵打仗被執遇害各情咨由前陝甘督臣左宗棠具  
奏請卹奉

旨各賞給卹銀一千一百兩嗣臣因阿克拉依都之子瑪  
木特愛瑪特之子阿密特例應承襲郡王世爵先後請  
旨飭議復荷

皇仁允准承襲

聖恩優渥該各藩部業已感激無地茲據新襲庫車回子  
郡王阿密特新襲吐魯番回子郡王瑪木特稟稱墳墓衙  
署曾毀於賊故父遺櫬尙未營葬艱窘殆不可言再四思  
維惟有請領

卹賞銀兩並懇

奏請借支廉俸以濟急需等情前來臣覆查該新襲回子  
郡王等墓署待修遺櫬待葬需費不資委係實在情形雖  
當餉項支絀凡可從緩之項皆須暫行停發以資騰挪而  
此項

卹銀久經奉

旨照准應懇

天恩垂念回部窘迫准其照數發給並酌准預支三年廉俸以濟其窮將來卽歸軍需項下開報至各郡王廉銀每年應領若干臣營無案可稽相應請

旨飭下理藩院查明咨照以便遵行是否有當謹附片具陳伏乞

聖鑒訓示施行謹

奏

軍機大臣奉

旨該衙門議奏欽此

別長功參高

金屋藏嬌

卷二

關外營旗局站實在數目暨陸續裁併新收繕單立案摺  
 二月二十八日

奏爲查明關外楚湘皖蜀諸軍馬步各營旗弁勇開除實在數目暨陸續裁併新收各局站謹分晰繕具清單

奏明立案恭摺仰祈

聖鑒事竊臣部關外馬步諸軍暨烏魯木齊提標土勇截至九年三月底止共存五十八營旗併駐防處所業經遵照部議分別

奏明在案其自九年四月起先將卓勝軍馬步五營咨商金運昌分起一律遣撤又道員羅長祐所統湘軍馬步各



營駐紮阿克蘇等處地段本寬臣再三籌度分撥抽紮酌裁步隊兩營以節月餉該兩軍遣勇口糧結算至九月十一月底不等由臣行營糧臺竭力騰挪先後找放清楚計共裁撤步隊五營馬隊兩營統共開除員弁勇夫四千六百六十一員名額馬五百四匹現除皖軍業經全撤不計外查湘楚蜀各軍併烏魯木齊提標土勇僅存馬步五十一營旗開花礮隊三哨小馬隊五哨合計實在共額設弁勇二萬五百一十七名額外營哨官併馬夫火夫長夫一萬七百十四員名額馬三千七百八十二匹此臣部諸軍截至九年十二月底止現存實數也至關外向設局站極

多臣自接綰

欽符以來體察情形陸續裁減上年曾將下存數目併設立處所薪糧章程陳請

飭部立案刻下各臺局站以及義學均為善後急務特當度支艱窘除萬難裁撤之處仍照常安設外其餘經臣權衡緩急量為裁併計共裁撤保甲五局採運六分局軍裝硝藥五局又開除新收蠶桑各一局此外柴草供支飭由各站驛書兼辦免支薪糧計共裁撤柴草二十六局四十六站此南北兩路截至九年十二月底止開除各局站實數也以上抽裁營局原冀少紓餉力此外用款苟非萬不

得已何敢妄動絲毫祇以邇年塞外痘疫流行日甚一日軍民病此恆多不治臣日覩情形自應仰體

聖慈設法拯救適據各善後局委員呈請仿照內地設局點種牛痘臣查牛痘之法本極妥善凡早經種過者多不再發卽間有傳染亦極輕微並無險證歷試不爽此法東南盛行近漸行於西北關外民力拮据臣因酌撥經費派員先行試辦訪察極有效驗旋飭於哈密巴里坤昌吉喀什沙爾庫車阿克蘇烏什喀什噶爾葉爾羌等處招募痘醫酌給薪工夫役扼要設局一面分段點種一面選擇回童入局教授以廣流傳開局以來全活甚衆上年烏訥恩

蘇珠克圖舊吐爾扈特東部落盟長札薩克畢西埒勒圖  
 郡王巴雅爾聞知喀喇沙爾吐爾扈特人眾子弟得種牛  
 痘均獲保全呈由金順轉咨撥醫仿辦據稟業著成效伏  
 查蒙回各部素畏天花但聞有患痘者無論平順與否餘  
 皆相率避處紛紛轉徙盡室偕行此風相沿日久未便強  
 禁誠能以牛痘之法行之漸推漸廣利賴均沾免使時相  
 震動不安其居將來民間競傳其術公局即可裁節是日  
 下所費無多而可爲綏輯邊氓之一助也茲據行營糧臺  
 開單呈請

奏咨前來臣覆核無異其自十年起南疆設官已定一俟

諸務辦有頭緒仍當隨時察看情形力求裁省以仰副  
朝廷安邊節用之至意所有關外馬步各軍營旗弁勇除  
存實數暨陸續裁併新收各局站謹分晰繕具清單恭呈  
御覽伏乞

皇太后

皇上聖鑒飭部立案施行謹

奏

謹將甘肅關外楚湘皖蜀諸軍馬步各營旗員弁勇丁夫  
馬數目自光緒九年四月初一日起至十二月底止繕具  
四柱清單恭呈

御覽

計開

舊管

光緒九年三月底止關外實存駐防行糧步隊三十營坐糧步隊三旗提標土勇步隊七旗行糧馬隊十六營坐糧馬隊二旗開花礮隊三哨小馬隊五哨共計舊存額設弁勇二萬三千五百一十七員名額外營哨官一百五十員額外火夫四百六十名額外長夫馬夫一萬一千七百六十五名額馬四千二百八十六匹礮車十八輛車騾四十八頭

新收

無項

開除

光緒九年七月底止裁撤卓勝軍步隊二營共計裁撤舊額弁勇一千員名額外營哨官十員額外長夫三百八十

四名

光緒九年八月底止裁撤卓勝軍馬隊二營步隊一營共計裁撤舊額弁勇一千員名額外營哨官五員額外火夫五十四名額外長夫馬夫八百一十四名裁減額馬五百四匹

光緒九年九月底止裁撤老湘左軍步隊一營共計裁撤  
舊額弁勇五百員名額外營哨官五員額外長夫一百九  
十二名

光緒九年十一月底止裁撤老湘右軍步隊一營共計裁  
撤舊額弁勇五百員名額外營哨官五員額外長夫一百  
九十二名

實在

光緒九年十二月底止實存行糧步隊二十五營坐糧步  
隊三旗又提標土勇步隊七旗行糧馬隊十四營坐糧馬  
隊二旗總計五十一營旗開花礮隊三哨小馬隊五哨共



計實存額設弁勇二萬五百一十七員名額外營哨官一百二十五員額外火夫四百六名額外長夫馬夫一萬一百八十三名額馬三千七百八十二匹礮車十八輛車騾四十八頭

查關外馬步各軍內步隊三旗馬隊二旗均係開支坐糧據行營糧臺呈稱前案實在項下誤繕行糧步隊一旗馬隊一旗字樣此次舊管實在兩柱謹卽更正備案合併陳明

謹將甘肅關外設立各臺局站義學自光緒九年正月初一日起至十二月底止繕具四柱清單恭呈

御覽

計開

舊管

光緒八年十二月底止實存哈密行營糧臺哈密行營軍  
裝製辦總局哈密督催糧運總局古城屯採總局安西玉  
門敦煌巴里坤奇臺吉布庫濟木薩吐魯番喀喇沙爾庫  
爾勒布告爾庫車等處十二採運分局吐魯番喀喇沙爾  
庫車阿克蘇烏什等處五軍裝硝藥局安西小宛布隆吉  
四家灘白墩子紅柳園大泉驛馬蓮井庫車托和爾阿克  
蘇渾巴什薩依里克齊蘭臺瑪納巴什卡納克沁屈爾蓋

察巴克圖木舒克雅哈庫圖克英吉沙爾雅滿雅爾脾素  
巴特英阿瓦特龍口橋玉代里克黑孜堡等處二十七柴  
草局玉門屬境五柴草站哈密屬境十六柴草站巴里坤  
屬境五柴草站吐魯番屬境七柴草站喀庫屬境九柴草  
站察爾齊札木臺玉爾滾拜城寨里木河色爾等處共計  
四十八柴草站東四城善後總局兼辦阿克蘇善後局西  
四城善後總局兼辦喀什噶爾善後局喀喇沙爾庫車烏  
什英吉沙爾葉爾羌和闐吐魯番迪化州等處八善後局  
沙雅爾拜城瑪納巴什等處三善後分局喀什噶爾葉爾  
羌和闐英吉沙爾瑪納巴什阿克蘇烏什等處七征糧局

阿克蘇蠶織總局阿克蘇阿依克葉爾羌和闐喀什噶爾  
英吉沙爾庫車庫爾勒吐魯番哈密敦煌等處十一蠶桑  
分局哈密新城老城吐魯番新城老城喀喇沙爾庫車阿  
克蘇烏什英吉沙爾喀什噶爾回城漢城葉爾羌和闐古  
城迪化州奇臺昌吉綏來濟木薩阜康巴里坤等處二十  
一保甲局哈密義學五堂吐魯番義學六堂喀庫義學四  
堂庫車義學五堂阿克蘇義學五堂烏什義學三堂喀什  
噶爾義學五堂瑪納巴什義學三堂英吉沙爾義學三堂  
葉爾羌義學七堂和闐義學四堂巴里坤義學四堂奇臺  
義學四堂濟木薩義學三堂阜康義學二堂迪化州義學

六堂昌吉義學二堂綏來義學四堂呼圖壁義學二堂共計義學七十七堂

新收

光緒九年正月起新設哈密巴里坤昌吉喀喇沙爾庫車阿克蘇烏什喀什噶爾葉爾羌等處九牛痘局

查關外向無傳種牛痘之法近因痘疫流行因在內地招募痘醫安設各處醫治每處設痘醫二名每名月給工食銀八兩每名給跟役二名合給火夫一名通事二名月給油燭紙張銀四兩跟役火夫通事每名日給口食銀一錢其餘藥資等項由各官局按月核給新設布告爾蠶桑分

局一處司事工匠夫役薪糧口食照章支給  
開除

光緒九年八月底止裁撤奇臺吉布庫濟木薩庫爾勒布  
告爾庫車等處六採運分局

光緒九年九月底止裁併吐魯番喀喇沙爾庫車阿克蘇  
烏什等處五軍裝硝藥局

光緒九年十一月底止裁撤安西小宛布隆吉四家灘白  
墩子紅柳園大泉驛馬蓮井庫車托和爾爾渾巴什薩依里  
克濟蘭臺瑪納巴什卡納克沁屈爾蓋察巴克圖木舒克  
雅哈庫圖克英吉沙爾雅滿雅爾牌素巴特英阿瓦特龍

口橋玉代里克黑孜堡等處二十六柴草局又裁撤玉門屬境五柴草站哈密屬境十五柴草站巴里坤屬境五柴草站吐魯番屬境六柴草站喀庫屬境九柴草站察爾齊札木臺玉爾滾拜城寨里木河色爾等處六柴草站共計四十六柴草站

光緒九年八月底止裁撤敦煌蠶桑分局又裁撤奇臺昌吉濟木薩阜康巴里坤等處五保甲局

實在

光緒九年十二月底止實存哈密行營糧臺哈密督催糧運總局哈密行營軍裝製辦總局古城屯採總局安西玉

門敦煌巴里坤吐魯番喀喇沙爾等處六採運分局阿克  
蘇哈密吐魯番三柴草局東四城善後總局兼辦阿克蘇  
善後局西四城善後總局兼辦喀什噶爾善後局喀喇沙  
爾庫車烏什英吉沙爾葉爾羌和闐吐魯番迪化州等處  
八善後局沙雅爾拜城瑪納巴什等處三善後分局喀什  
噶爾葉爾羌和闐英吉沙爾瑪納巴什阿克蘇烏什等處  
七徵糧局阿克蘇蠶織總局阿克蘇阿依克葉爾羌和闐  
喀什噶爾英吉沙爾庫車庫爾勒布告爾吐魯番哈密等  
處十一蠶桑分局哈密新城老城吐魯番新城老城喀喇  
沙爾庫車阿克蘇烏什英吉沙爾喀什噶爾回城漢城葉



爾羌和闐古城迪化州綏來等處十六保甲局哈密巴里  
坤昌吉喀喇沙爾庫車阿克蘇烏什喀什噶爾葉爾羌等  
處九牛痘局哈密義學五堂吐魯番義學六堂喀庫義學  
四堂庫車義學五堂阿克蘇義學五堂烏什義學二堂喀  
什噶爾義學五堂瑪納巴什義學三堂英吉沙爾義學三  
堂葉爾羌義學七堂和闐義學四堂巴里坤義學四堂奇  
臺義學四堂濟木薩義學三堂阜康義學二堂迪化州義  
學六堂昌吉義學二堂綏來義學四堂呼圖壁義學二堂  
共計義學七十七堂

軍機大臣奉

旨該部知道單二件併發欽此



軍機大臣字寄光緒十年二月十七日奉

上諭戶部奏西路軍餉浩繁急須統籌全局並詳籌未盡事宜各摺片近年部庫及各省庫款倍形支絀而供億浩繁以西路餉需爲尤鉅似此年復一年殊非持久之道部臣通盤計算請飭統籌係屬顧念時艱力圖久遠起見著劉錦棠金順張曜譚鍾麟按照該部所奏各節悉心區畫切實籌商將款項之應用應抵兵勇之應畱應汰務就左宗棠原議三百數十萬之餉量入爲出樽節開支以期經久而昭核實議定後速行具奏原摺片均著鈔給閱看將此由五百里各諭令知之欽此



南路城廨工作礙難中止仍懇

飭發銀兩片

二月二十八日

再臣於上年十一月將估計修理南路新設各官城署一切共須實銀三十七萬四千兩奏懇

飭撥部款嗣准戶部鈔咨會議摺稿以部庫入不敷出實難輕予外撥擬由江西湖北湖南江南山西四川及河東道各處共提銀十八萬兩限十年五月以前如數解交甘肅糧臺卽將應建城垣礮臺等工趕緊興修官廨從緩辦理奉

旨依議欽此等因承准之餘伏見

朝廷廑念西陲正當賑務紛乘海防喫緊特

准指撥款目欽感曷言此項工用所迫計各省必能先其所急如期趕解除一面飛催外其衙署各項部臣議令暫緩意在少紓餉力自應恪遵惟查南疆改設官治原欲一新纏回之耳目俾滌舊染之污公衙須有定所規制亦有定程非爲官吏之安居乃爲民望之所屬軍興以來腹地州縣衙署間尙未及修復誠有如部議所云者然其民情迥異邊氓兼值互市通商立制之初未宜過從簡易蓋顯以示

天朝之威儀卽隱以杜外夷之窺伺臣自接准改設官治之部覆遵籌興修城署倉監

壇廟用資保障而具規模飭各營局酌估初議需銀八十餘萬經臣再三駁飭凡舊有之寸木片石均令湊集歸於實用土工則多屬之防營責以倍加奮勉隨處撙節通計至少需銀三十七萬四千兩早飭一律動工經費權於軍餉騰挪本待請撥部銀遂爲彌補今城工准撥十八萬兩衙署緩辦工作已興礙難中止趁此營勇助勞事半功倍官制既經大備吏治較易講求已往之勞費不虛將來之苛派可免綏輯邊荒此其尤大要也際茲時事多艱司農每形支絀何敢更申前請祇以工難停罷萬不獲已擬請將未撥之十九萬四千兩仍懇



天恩飭部在於欠解西餉各省關照數限解以濟要需臣  
忝膺重寄苟稍可以裁省無不力爲經畫刻下事局所關  
併修衙署各工綜計所費無多日後所全實大區區愚忱  
不勝感悚待

命之至除咨部外謹會同陝甘總督臣譚鍾麟幫辦軍務  
廣東陸路提督臣張曜附片具陳伏乞

聖鑒訓示施行謹

奏

軍機大臣奉

旨戶部議奏欽此

覆陳呈控統兵大員並駐京委員侵蝕軍餉各節摺二十月

日八

奏爲查明軍營假退員弁呈控統兵大員並駐京委員侵蝕軍餉各節據實覆陳請

旨定奪恭摺仰祈

聖鑒事竊臣於光緒八年十二月初八日承准軍機大臣字寄光緒八年十一月十一日奉

上諭刑部奏軍營員弁呈控統兵大員並駐京委員侵蝕軍餉請飭查辦一摺據稱從九吳正剛守備張喜各供均投效哈密辦事大臣明春軍營欠領薪水口糧銀兩甚鉅

該員等先後來京向催餉委員副護軍參領常恩請領不發並健威兩軍每年領到協餉十餘萬兩未發過弁勇薪糧前因遣散馬隊奏請專餉八萬兩由號商匯至涼州經道員鐵珊查知祇有四萬兩亦未深究各等情案關統兵大員侵蝕軍餉是否屬實亟應澈底根究著劉錦棠按照所控各節確切查明據實參奏吳正剛張喜卽著刑部解往歸案質訊原摺一件呈二件著鈔給閱看將此諭令知之欽此欽奉之餘復准刑部咨同前因當卽恭錄分別咨行遴委<sub>臣</sub>營營務處分省題奏道員袁鴻祐分省升用同知鄭錫淶會同按照該員弁等呈控事理逐層確查據實

稟覆以憑核奪覆

奏去後嗣於光緒九年三月十六日據報刑部遞解之官犯吳正剛張喜到哈隨飭袁鴻祐等查驗年籍悉心推訊茲據稟稱此案牽涉人證多名離營已久程途寫遠更有事外株連無從著落若必概待傳到遷延不了拖累滋甚迭次稟請行催除湯國俊黎飛雄周思敬李朝儁未能到案張廷舉趙半箇娃馮麗成由地方官訊取供結徐小田卽徐常鎬具稟告假多年呈內所指一概不知外所有應訊之要證常恩魏長林馬定邦師玉春陶聯陞李洪超劉成圖謝長清等業經先後提案隨時提該原告吳正剛張

喜按款質訊取具切實供結稟請核辦前來臣逐一查閱其有關章程冊據者仍咨哈密辦事大臣明春查取校核如吳正剛原控辦理健銳中營文案照依楚章每月薪水二十四兩積算至一千四百餘兩查楚軍文案向由營官酌給薪水從無限定二十四兩之規咨查該健銳軍餉章各營弁勇係照楚軍章程支給其文武員弁書役人等係照前哈密辦事大臣文麟威儀軍章程支給每書識一名月支銀二兩四錢概由營官自行招募又按威儀軍於光緒二年九月內由左大臣處籌款遣散弁勇四百八十餘員名其餘歸併步隊一營馬隊兩旗等語查左宗棠原撥

此項兼定資遣章程均係照章將所借撥銀三萬兩按名散放有案可稽又控健威軍馬步六營威儀軍馬步三營總共弁勇一千七百餘員名數年來並未發過大餉祇於年節犒賞每年不過萬兩歷年領到之餉究歸何處等語咨查該軍營制每馬隊一營員弁勇夫共七百六員名計健銳威儀兩軍馬步共十一營外隨營文武員弁書役人等共三百九十一員名營中用款以採買糧料爲大宗年須市斗萬石有奇當光緒五年以前每石價銀十餘兩十兩不等每年收到各省之餉間尙不穀糧價勢不能不按成酌發騰款製辦冬夏衣履並發月餉年復一年積欠纍

累所有歷年支用餉數據鈔清冊併送戶部暨各省發餉公文照核悉符又控山東欠餉經常恩承領未解回營有前坐催委員師玉春等可證等語據補用總兵師玉春投稱光緒二年奉委催領山西山東協餉先於山西領獲銀三萬三千兩除兌還商款外實解到營六千兩三年轉赴山東四年領獲銀一萬五千兩回營銷差至常恩經手之餉實不知情無可指證據副都統銜補用參領常恩投稱前奉委催領山東之餉東省撥銀二萬委員解赴察哈爾都統衙門轉給承收採辦軍裝比經造報四年十二月領銀三萬兩內除一萬五千兩交本軍委員志勝領解回哈

外下餘一萬五千兩與原催委員候選知府景春經手領獲之五萬兩俱會同撥還商款糧價旋卽聞訃丁憂咨查係因營中匯借商款并積欠回部糧價極夥索取甚迫各隨委員守領曾經奏明在於山東應解餉內先爲撥還借款糧價共銀四萬兩商款三萬五千兩札飭該參領等照撥嗣因山東欠發銀一萬兩致將回部糧價祇撥三萬另由川楚兩省撥歸一萬有片稿部文可查又控遣散中前兩營馬隊共弁勇二百八十名又准後營假勇五十名有魏長林馬定邦黎飛雄可證等語據陝西候補遊擊魏長林投稱同治十三年管帶健銳中營馬隊補用都司馬定



各勇請  
邦投稱光緒三年管帶健銳前營馬隊均於光緒六年十  
一月奉札裁撤每營員弁勇夫三百三十一員名分別回  
漢先後遣盡祇發半年欠餉計營官一員銀一千二百兩  
哨官五員每員銀五十兩什長二十五名每名銀四十六  
兩八錢馬勇二百二十五名每名銀四十五兩長夫七十  
五名每名銀十八兩兩營計共給銀二萬八千二百三十  
兩當經造具冊領悉數領訖願具甘結互質吳正剛供稱  
該營原分回漢分起遣散但見頭起回勇之數卽已離營  
未知續裁後起漢勇咨查從前抽裁健銳馬步五營共官  
弁勇夫二千七百八十員名又裁隨營文武員弁書役一

百八十四員名悉照奏定章程補放半年欠餉共需銀八萬六千五百八十一兩八錢請由戶部墊發俾速資遣至各處欠解協餉截至光緒六年六月川鄂兩省欠至一百五十餘萬斷難補解開諭閤軍悉行報効概不找補領到餉銀照數分給奏咨在案均有冊領文稿可查又控聞風鑽謀視銀如泥送蜀軍告假員弁李洪超川資一千兩假稱製造軍裝等語據提督李洪超投稱前帶蜀軍右營請假回川路過哈密送明大臣車輛騾馬并紙張等件明大臣行知四川催餉委員給銀千兩以償價值毫無別項情弊互質吳正剛供稱當日所聞說是送與川資不知抵有

車馬紙張各物又控章廷舉謝長清等皆充當營官歷保  
二品受傷成殘今在高臺乞食等語據安肅道就近傳訊  
詳送供結補用參將張廷舉曾投効明大臣部下告假之  
際給過川資銀二百四十兩現於高臺與人夥開小店餬  
口並未乞食補用副將謝長清投稱十年前在文大臣麾  
下充當營官受傷成殘請假出營其時明大臣尙未接統  
現在高臺開店爲業尙未乞食互質吳正剛供稱曾見兩  
人旅寄高臺幾與乞食相似亦是極言其貧又控恣意嗜  
好不懼物議收戲旦趙半箇娃爲干兒畱住署內又爲花  
鼓戲旦馮麗成在署招賭故軍中有兵勇不如戲旦之謠

等語據安肅道就近提訊趙半箇娃詳送供結稱係唱戲  
爲生光緒五年出關曾在哈密營中演戲酬神並未出入  
衙門拜認干兒隨又進關在金塔班演唱度日又據庫爾  
喀喇烏蘇糧員就近提訊馮麗成詳送供結稱於光緒八  
年來哈卽在茶鋪工作並未在明大臣衙門邀賭抽頭是  
年冬月離哈現來精河貿易質之吳正剛供稱當時見有  
匿名揭帖不能確指住署招賭之實據又控光緒八年二  
月來京稟陳苦衷常恩匿不與面囑託劉成圖相勸同路  
旋陝就陝餉局算給薪糧詎意抵陝四月之久僅於劉成  
圖手給銀一百五十兩欲歸不得欲止不能祇得轉京泣

叩等語據常恩稱八年二月晤劉成圖談及有前充健銳軍營營書吳正剛來京欲向借用銀兩託其吹噓參領答以此人素未謀面營友甚多何能應付以後劉成圖如何勸他如何借銀概不得知據參將劉成圖投稱前年進京投咨引

見適晤吳正剛據說欲向常恩算加薪水不得會面即欲在部稟控參將因念同營婉言勸阻約同出京願代償銀一百五十兩此係參將擔承吳正剛并無異議互質吳正剛供稱原未晤過常恩有劉成圖婉勸出京共借銀一百五十兩實係相愛此案亦不與伊相干又控奏請專餉八

萬兩由協同慶號匯兌涼州祇有四萬被鐵道查知有張喜可證等語查核張喜呈內相同據遊擊陶聯陞投稱光緒六年奉明大臣委赴戶部請領專餉八萬六千六百兩適哈密回王呈請在京餉內撥兌三萬兩交赴京之差弁那斯胡里明大臣面諭照撥旋經如數領到當撥交回弁那斯胡里三萬兩協同慶號匯兌涼州四萬兩本軍委員志勝由京回哈帶解銀一萬兩遊擊隨自解銀六千六百兩張喜祇知匯兌之四萬不知尙有撥兌回弁之三萬與志勝帶解之一萬行據甘涼道鐵珊稟覆傳訊協同慶號供稱明大臣所匯京餉實係四萬兩又據哈密回王沙木

胡索特結稱光緒六年職父邁哈默特差弁那斯胡里赴京請領福晉

冊封並製買衣料等物值明大臣差領京餉呈請就撥糧價以便分完共挪商款蒙准撥銀三萬兩交那斯胡里卽於是年在明大臣應撥糧價內照扣歸還互質吳正剛張喜供稱當初不知另有撥解各項但指匯數言之至張喜原控同治四年投入健銳軍充當馬勇一十四年共領過銀一百二十四兩向算存儲口糧八百六十九兩僅給盤費銀十五兩本欲轉懇恩施奈營中不肯進言再四籌維惟有常恩與明大臣有表兄弟之親駐京坐催可以轉請

算給等語據常恩稱光緒元年到營并不知有張喜其人  
祇丁憂在京時不記日期據家人回說有張姓投信一件  
拆閱係前統健銳軍原任烏魯木齊提督成祿所致托幫  
張喜盤費數十金資其回籍參領細思與成提督素未謀  
面若張喜更不認識成在刑部何能給信疑其有詐遂令  
拒絕而去咨查係同治十二年接統健銳軍出關該弁請  
假卽給馬匹盤川遣出口糧無存至於舊欠係前統該軍  
成提督任內之事無從查算原訊該弁同治十二年以後  
尙當馬勇係在何營何哨無以爲對有守備馬富侯千總  
褚餘良與張喜面質光緒五年二月張喜來哈求差未收



伊等轉懇明大臣賞給盤費路票不許在哈逗留互質張喜供稱同治十二年以前應找口糧原係成前統領缺餉欠發因歸明大臣接統是以向算餘卽詞窮吳正剛按算尙應找銀八錢比已照補據與張喜同供營中歷欠最鉅明大臣發銀不敷使費且聞匯餉數短懷疑呈控冀可多算攙領今蒙訊明不敢誣執各出具誤控悔結懇免究辦經臣親提研鞫無異應卽擬結此案吳正剛所控以遣勇不符爲冒支而求增薪水係其切己之圖張喜所控以匯餉不符爲侵盜而求領舊欠係其切己之圖例應隨同管隊頭目公同陳告乃吳正剛但見頭起遣勇又以僅放欠

餉半年疑有剋扣張喜因聞匯餉止四萬兩疑係假冒各  
向常恩索借不遂赴部具呈奉

旨飭臣查參茲已質訊明確似此以卑控尊誣砌虛款本  
應按律問擬姑念其向算短欠薪糧非出無因一經環質  
自知情虛卽據首悔核與始終誣執者有閒相應請

旨將從九吳正剛由部斥革守備張喜卽行革職均遞解  
回籍交地方官嚴加管束嗣後不准在外滋事並不准投  
效各路軍營希圖開復以示懲儆哈密辦事大臣明春接  
統健銳各營前因各省欠餉難恃奏明抽裁營伍其餘遣  
勇匯餉各數目歷有各營官及回王並經手各委員供結

冊領可憑實未從中侵蝕餘款亦屬虛無惟勇夫口糧既照楚軍章程開支而營書乃照威儀軍之章月僅給薪銀二兩四錢塞外苦寒百物騰貴殊失體恤之道且其平日隊伍疏於訓練規制未能整肅皆緣餉項艱窘不免馭之過寬幸賴

天威耆定全疆業已陸續裁畢明春久征邊塞曾著戰功可否寬其既往之處出自

鴻施其常恩前此經手領餉交卸清楚丁憂回旗與訊明案內人證均無不合應請概免置議未到免提以省延累所有查明軍營假退員弁呈控統兵大員并駐京委員侵

蝕軍餉各節理合據實恭摺覆

奏是否有當伏乞

皇太后

皇上聖鑒訓示施行謹

奏

軍機大臣奉

旨明春著免其議處餘依議該部知道欽此



劉襄勤公奏稿卷七

起光緒十年  
四月訖八月

目錄

- 請 卹道員羅長祐並戰績事實 宣付史館摺
- 遵 旨統籌新疆情形以規久遠摺
- 哈密辦事協辦衙門員役暫照向章支廉片
- 新疆南路軍臺一律安設驛站酌擬經費章程摺
- 哈密巴里坤軍臺擬改驛站分段管理片
- 請 卹總兵何作霖並附祀忠壯專祠片
- 請更正湯彥和陳美仙官階片
- 酌裁馬步各營改併成旗並實存數目繕單立案摺

查明喀城底臺遞送摺件遲延片

請率師與法夷決戰摺

遵 旨酌度仍申前請摺

遵保各省籌餉人員並各督撫將軍關心協餉籲懇

恩施摺

懇 恩賞加張曜錫綸等頭品頂戴片

酌保關外諸軍出力人員摺

請一卹道員羅長祐並戰績事實 宣付史館摺 四月初三日

奏為道員立功後積勞病故志節可傳籲懇

天恩俯准優卹建祠將戰績事實

宣付史館以彰忠藎而資觀感恭摺仰祈

聖鑒事竊統領湘軍二品頂戴按察使銜署甘肅阿克蘇

兵備道畱陝題奏道騎都尉世職訥齊欣巴圖魯羅長祐

上年患病累月經 臣 給假在營調理遣醫診視入春後潮

熱自汗驚悸咯血等證層見疊出正月抄手書抵 臣 言狀

條陳減除差徭未盡數事並舉替人有云死不足悲惟

國恩未報時事多艱伏枕飲泣不能自已尤殷殷以忠藎



相勗臣見其字迹欹斜語皆沈痛不忍卒讀因地方緊要一時乏人接替該道員雖因積勞致疾而年力尙富冀能將養復元是以未卽許其解任詎於二月初二日因病歿於阿克蘇行營邊事需才正殷以南疆極稱得力之員竟爾遽奪其算臣接報之餘不獨爲羅長祐悲更爲邊氓惜也臣與羅長祐居同里閤稔知其幼時卽異凡童讀書過目成誦能得其大旨師事原任陝西撫臣劉蓉嘗深器之年二十仗劍遊浙繼度隴襄辦今大學士左宗棠營務肅清關隴累功由通判保升花翎知府光緒元年臣奉檄由西甯整旅進規新疆其時全疆淪陷日久冰天雪窖之地

險阻艱難聞者生畏幕客方紛紛求去羅長祐獨毅然請  
行左宗棠素愛其才壯其氣委綜臣軍營務隨同出塞所  
有臣軍糧事餉事運事兵事相機籌策罔不殫心二年六  
月攻拔輯懷既而迪化鞏甯昌吉以次克復適臣染患時  
疾甚劇暫駐迪化醫治遣羅長祐暨甯夏鎮總兵譚拔萃  
提督董福祥等會攻瑪納斯城鏖戰兼旬繼而該逆哀詞  
求撫羅長祐心知其詐稟商今伊犁將軍臣金順令其盡  
繳馬械始允投誠縱令歸巢自決該逆旋率悍黨結隊出  
城聲言赴營自投迨與我軍薄近仍復齊施槍礮挺矛直  
前拌死衝突幸官軍先繞長壕埋伏截賊歸路地道齊轟

賊眾內外隔絕官軍合力圍剿賊目韓刑膿馬有才等伏  
誅臣初心許羅長祐能勝將領之任於茲益信三年三月  
攻克達坂城臣卽取道小草湖進攻托克遜別遣羅長祐  
譚拔萃等乘勝趨吐魯番羅長祐謂安夷恟懼未定疾乘  
之可迫走也夷逆奔則脅從之眾可不戰而勝遂促隊星  
馳未至而該夷果棄城先遁纏土回子效順就撫悉免窮  
治秋毫無犯一面宣諭

皇朝威德歡聲振地嗣仍隨臣移師南指且戰且前數月  
之間遂將喀喇沙爾庫爾勒庫車拜城阿克蘇烏什葉爾  
羌喀什噶爾各城池一律規復厥功爲多全疆肅清以道

員拜

賞穿黃馬褂雲騎尉世職

恩命旋蒙

特恩改爲騎都尉世職羅長祐益加感奮時以圖報不及爲懼四年十月安酋阿里達什噉其殘黨糾布魯特謀襲

喀什噶爾

臣

時正值足痛大作力疾出師羅長祐自請前

驅陣斬阿里達什逾年正月其餘黨阿布都拉哈瑪復勾

結愛克木汗大舉寇邊

臣

親督馬步進駐烏帕爾以扼賊

吭羅長祐由間道徑擣博斯塘特勒克賊巢直犁其庭赴機神速往往如此嗣是籌辦善後時與

臣

往復討論條舉

累千萬言其略云回疆積病在於差徭無制尤在頭目太多回性冥頑逐末輕本言語文字不通非乘建置之始改絃更張無能爲治請沙汰冗沓慎選賢能輕徭薄賦與民休息重農桑以正其趨興教化以植其本修內乃可攘外治法必賴治人所論均切時要故善後多資其議自臣奉命接綰兵符駐師哈密檄羅長祜移紮阿克蘇操防之外凡中外交涉邊險要害種落性情習尚罔不運以精心旁諮博採洞燭底蘊用能通方應變操縱自如繼經臣奏委署理阿克蘇道仍統湘軍時已因勞致疾強起從公去秋之季輕騎周歷轄境查察卡倫問勞撫輯殆無虛日茲二

月朔猶力疾巡防次晨由所部壽字馬隊肩輿回防所汗  
出如注救治罔應臨終無一語及家私但云所志未竟負  
國負知目不能瞑諭令官僚將佐照常治事守法奉公言  
畢而逝臣維羅長祐才識閎通志節堅定與臣共役垂十  
年不避艱險發縱指示必竭肫誠每臨巨寇輒帕首爲諸  
將先決策制勝靡有遺遁故能戰勝攻取所嚮有功開誠  
布公信賞必罰廉而有恩故能和輯將卒戰守兩資尤能  
畱心時務通達治體事無鉅細必以躬親慘淡經營苦心  
研究每發一論中邊俱透容有過當之處從無不及之處  
臣常勸其稍稍節勞順時自衛然終習慣成性漫不經意

立功之由基於此致疾之由亦卽根於此矣左宗棠稱其文武兼資器識凝卓兩次奏請

天恩破格錄用

臣

前遵

特旨保薦將帥謬附以人事

君之義將該道員登諸剡章蓋惟知之深故敢言之切推其志節才識擴而充之使天假之年更經歷練則其功業所就有未可以尋常限者時事多艱邊圉粗定

臣

以駑鈍忝膺重寄正賴二三同志相與維持贊助廣益集思今羅長祐年甫三十有七遽齎志以歿人才難得似此慷慨激昂敦尚志節饒有古劉崐祖逖風實一時邊材特出之選

也其在新疆戰績均經隨時奏明有案茲因積勞盡瘁志節可哀並據提督湯彥和等連銜稟稱羅長祐功在地方軍民感戴懇請具奏前來擬懇

天恩俯允從優

賜卹

准於新疆阿克蘇地方建立專祠並將其生前戰績事實宣付史館以彰忠藎而資觀感出自

鴻施除分別揀員接統湘軍署理阿克蘇道以重地方另案

奏明外所有道員立功後積勞病故志節可傳籲懇



天恩俯准優卹建祠將戰績事實

宣付史館以彰忠藎而資觀感各緣由謹據實臚陳伏乞  
皇太后

皇上聖鑒訓示謹

奏

軍機大臣奉

旨另有旨欽此

遵一旨統籌新疆情形以規久遠摺

四月二十八日

奏爲遵

旨統籌新疆兵餉官制屯田情形並陳欠餉不可折發全疆宜聯一氣以規久遠恭摺仰祈

聖鑒事竊

臣

承准軍機大臣字寄光緒十年二月十七日

奉

上諭戶部奏西路軍餉浩繁急須統籌全局並詳籌未盡事宜各摺片近年部庫及各省庫倍形支絀而供億浩繁以西路餉需爲尤鉅似此年復一年殊非持久之道部臣通盤計算請飭統籌係屬顧念時艱力圖久遠起見著劉

錦棠金順張曜譚鍾麟按照該部所奏各節悉心區畫切實籌商將款項之應用應抵兵勇之應畱應汰務就左宗棠原議三百數十萬之餉量入爲出樽節開支以期經久而昭覈實定議後速行具奏原摺片均著鈔給閱看等因欽此跪讀之餘仰見

睿謨廣運下逮芻蕘莫名欽悚伏查新疆兵備向有旗綠之分旗則酌撥滿洲錫伯索倫之兵綠則酌撥陝西甘肅標路之兵或攜眷駐守或按期換防當時

廟算於各本營掛支額糧可免驟增新餉拓地周數萬里之遙兵不更添而防戍周匝棋布星羅北路郡縣而外以

伊犁爲重鎮設將軍領隊以下官並設理事撫民同知塔爾巴哈臺設參贊烏魯木齊設都統領隊庫爾喀喇烏蘇古城巴里坤設領隊又有烏魯木齊提督巴里坤鎮總兵所轄官弁南路則葉爾羌設參贊和闐設協辦喀什噶爾英吉沙爾阿克蘇烏什庫車喀喇沙爾設辦事吐魯番設領隊哈密當南北之總匯設辦事協辦各一員又喀什噶爾有換防總兵及各城副參遊都守所轄官弁更有章京通判糧員筆帖式等專司征收各務大小員弁多至數千兵屯並興以資彈壓而關荆榛遠近相維疏密相間種民效順部落畏威百數十年安之若素惟回疆民事委之於

阿奇木伯克情僞無可訪諮上下恆多隔閼民怨沸騰官  
尙罔覺馴至全疆淪陷一切蕩然無存耗宇內之金錢始  
得削平大難譬人久病之後一息僅屬專賴滋培征軍之  
畱戍者除臣部諸軍外明春恭鏜所統各營近雖已散而  
北有金順錫綸之軍南有張曜之軍若伊犁塔爾巴哈臺  
烏魯木齊古城巴里坤所存之旗兵亦已漸次收集餉章  
歧出頭緒紛紜以云省費誠有可省左宗棠屢疏請設行  
省實見時會所趨舍此不足言治勇糧則積久愈深協餉  
則報解日短雖頻年多方騰挪陸續裁遣無如月餉善後  
所需出入斷難彌縫臣仰荷

恩綸謬負督辦之責而自湘楚及提鎮各營外如金順張  
曜錫綸所部未能代爲籌畫窮年累月限制毫無竭各省  
之轉輸煩

朝廷之廛系時覺寢饋不安部

臣

責以考核又復深諒其

艱故以定額餉定兵額一事權三者爲當務之亟誠係今  
日新疆之要圖所貴先具規模力求搏節於大局則骨節  
靈通於協濟則力堪供億謹按部

臣

原奏就

臣

管見所及

總舉四端敬爲我

皇太后

皇上陳之一擬畱兵勇以定餉數也查承平時新疆旗綠

各營數逾四萬協餉係與甘肅併估一歲之中預撥正餉四百一十五萬有奇常例分半提用曾經左宗棠查明奏報有案其換防之兵九千餘人來自關內則關外歷來得餉較優經出之名亦夥就地抵征無幾概仰支於撥協亂後情形迥殊於昔安集延各部爲俄所併哈薩克布魯特大半歸俄於是南北兩路邊界多與毗連所在防範宜周不僅伊犁一隅扼要也從前額兵職官北路獨多今則兩路並重南路形勝以喀什噶爾爲最阿克蘇烏什次之現擬規復兵額全疆旗綠定以三萬一千人爲準應如部臣所議將舊有之烏魯木齊巴里坤古城庫爾喀喇烏蘇吐

魯番各處旗丁歸併伊犁卽以伊犁將軍與塔爾巴哈臺  
參贊爲駐防旗制合馬步勇營共足萬人餘以六千三百  
人歸喀什噶爾道屬以四千五百人歸阿克蘇道屬以六  
千四百人歸鎮迪道屬其巴里坤鎮則定三千八百人甘  
肅兵餉舊章滿年四本八折馬兵每名月支銀二兩糧二  
石應支銀十六兩糧八石步兵每名月支銀一兩五錢糧  
一石五斗應支銀十二兩糧六石守兵每名月支銀一兩  
糧一石應支銀八兩糧四石遇閏遞加馬步之餉稍裕守  
兵幾難自存內地人稠猶有疲弱充數平時多不歸伍偶  
值迎送差使始行招集餉數過少不能嚴以相繩新疆地



曠人稀求其虛應伍籍亦不可得精壯之丁遠來邊外募之爲兵必須優給餉銀方敷食用勇營無款可裁勢宜仍照行糧支給臣曾瀝陳苦況仰蒙

聖慈准如所請兵制未復舊勇久役思歸若改坐糧大都籍隸東南距家萬里必非所願卽伊塔兩處之錫伯索倫兀魯特察哈爾等各項旗兵經此亂離異常寒苦月餉暫宜寬給以稍養其元氣約計三年之內當可設法將舊勇裁併旗兵困亦少舒再按坐糧起支以馬步三萬一千人併算馬三步七每年照行糧需銀二百九十一萬餘兩照坐糧每年需銀二百十萬餘兩茲除金順錫綸兩軍外臣

與張曜所部共計二萬七千五百餘員名適譚鍾麟息借陝西商款之三十萬分解哈密十八萬臣卽勉爲挪湊已將董字定遠蜀軍改營爲旗裁併二千張曜之嵩武軍自光緒元年出關時閱十年不無疲廢擬商抽裁千數百人至臣前接部覆議准修建南路城署當卽分飭遵辦趁此防營相助事半功倍經費暫於軍餉挹注共需三十七萬四千餘兩滿擬照數請撥部儲歸款卽可權挪再裁二千餘人旋經戶部議駁艱窘概可想見祇以勇存餉積年須多耗二十餘萬能暫騰撥的款臣得資以周轉將來並張曜所部於二萬一千之額亦無所溢實爲一舉兩得部庫

未充臣更何敢堅申前請伏讀

諭旨務就左宗棠原議三百數十萬之餉量入爲出揆時度勢目前斷不能敷無論如何兵勇共留三萬一千人萬難再減除已改之坐糧標勇士勇外餘存之營尙須照支行餉則臣部應分餉銀百五十萬加善後經費銀十四萬添製軍裝器械銀十六萬金順錫綸共分餉銀九十四萬加善後經費銀十六萬添製軍裝器械銀十萬張曜共分兵餉製辦銀四十萬已需三百四十萬頃接譚鍾麟緘商關內須分餉銀百二十萬是合甘肅新疆現尙須的餉四百六十萬較之向額四百一十五萬僅多費銀四十餘萬

若舊勇裁畢統改坐糧新疆每年可省兵餉八十餘萬其善後之三十萬兩於三年後均可停止則每年合關內外止須協銀三百數十萬適符左宗棠前奏所定之數此通籌額兵以定餉數之大略也一酌改營制以歸實用也查向來駐防旗營例分前鋒領催馬甲步甲及養育兵月餉季糧各有等第綠營分馬步守三項今於伊塔兩處共擬分兵萬人必照旗例則概須以次安設成規稍繁邊防關緊征勦極不可忽臣愚妄擬伊犁分七千人塔爾巴哈臺分三千人伊犁卽就該處現存之錫伯索倫察哈爾兀魯特及現擬移烏魯木齊各城之旗丁內挑選三千人以作

旗兵再於金順所部勇營挑留四千人作馬步游擊之兵應如何歸舊設之伊犁總兵等官統馭卽由將軍轄制酌定伊犁各城旗丁素多此後生齒繁衍似應酌添旗兵之額旣便安插且卽資其捍衛並由將軍詳察籌擬塔城挑留旗兵一千人再於錫綸所部勇營挑留二千人作馬步游擊之兵該處亦有綠營官弁應由參贊酌奪便於隨時調派兵力實已不單戰守自當確有把握惟該兩軍並張曜之嵩武軍均議裁汰舊勇必須鉅款解到乃能分遣應請

飭下原協各該軍之省關迅籌大批起解以便各得趕定

汰畱藉免貽累日後其三道所屬總二萬一千人馬步分編擇駐險要馬爲馬營步爲步營不相攙雜有事出征一兵可得一兵之用左宗棠楊昌濬等前議減兵加餉聲明酌提馬步數成擇地團紮操練技藝必須精強槍礮務期有準係爲猝有戰事起見關外防守較前尤須嚴密正在復兵伊始除酌撥各處分汛足敷彈壓匪類查緝盜賊外餘兵隨所隸之將軍參贊巡撫提鎮駐紮常川練習俾成勁旅嚴除應差掛名離伍之陋習卽偶有蠢動直可滅以朝食不必悉藉客勇始足以殄寇氛餉則由勇改兵舊本行糧今議俟後復兵改支坐糧業經節省因其旣已著籍

不須往返川資且室人聚處糧餉所入無顆粒分毫之浪  
擲苟善用其經營之術尙勉足以支撐倘更減於坐糧則  
將無以存活何能養其鋒銳緩急足恃是則司農給餉當  
持之以堅不可久而核減邊將練兵當馭之有道不可從  
而冒侵庶幾防剿兼資斥堠無驚允堪靖鄰固圉旗綠各  
兵常駐其地從此不須換防兼衛身家其志益固此酌改  
兵制以備征守之大略也一酌定官制以一事權也查關  
外向止有鎮迪一道近則南路添設兩道並劃哈密通判  
以隸新疆計廳州縣二十餘屬回疆始有治民之官旗丁  
概歸伊塔駐防前此之都統參贊辦事協辦領隊各官若

仍沿例

簡放則直無事可辦無隊可領坐使有用之材置諸閒散之地諸臣世受

國恩豈肯徒糜祿精且各州縣撫此子遺疲瘠不堪每遇大僚過境雖無不格外體恤然如車馬所需本係例所應供況長途戈壁使臣遄征艱辛已極有司守土往往不待傳索誼應稍盡東道之情塞外百物騰昂一差經過恆致負累茲欲從新整理臣愚擬請除畱伊犁將軍塔爾巴哈參贊兩處旗營外其餘兩路之都統參贊辦事協辦領隊各缺概予裁撤移烏魯木齊提督於喀什噶爾移喀什噶



爾舊有之換防總兵於阿克蘇其所屬各營旗分防城隘應更詳勘明確再行定議烏魯木齊地可兼扼南北卽裁都統則臣原議請設甘肅新疆巡撫藩司未可再緩鎮迪道屬之兵卽作撫標倘緣節費不亟設省別無鈐轄之方至暫畱都統仿前節制鎮迪之例係屬權宜敷衍終亦務須更張每歲協餉仍歸陝甘總督統估按數分起撥解關外各部不許各自派員坐催守提免耗薪水旅費且免不肖委員挪餉帶貨多索車馬而攤銷抵餉之累亦將不禁自除又配造子藥所需物料雖不必盡由內地置辦而價昂工貴甚不合算應歸總督督飭甘肅新疆總糧臺分別

購製撥解各處應用共費若干年終由應分協餉內劃抵歸款本地歲入之項除伊塔兩城不計外三道所屬歲征銀六萬八千餘兩額糧二十四萬餘石撥發各營扣收價銀目前但勉敷各文員廉俸書役工食及各軍臺塘汛驛站卡倫兵丁夫馬工料之需日後墾荒益廣額糧必增入款可望起色營旗各員參用營勇之章便於訓練如副將作營官卽以中軍都司爲總哨千把經制外委爲正副哨長參將游擊作營旗官卽以中軍守備爲總哨千把經制外委爲正副哨長都司守備作旗官卽以中軍千總爲總哨把總經制外委爲正副哨長兵署卽同行營壁壘營官

總哨哨長共居壘中兵房隨哨蓋建無故不准出外逐日操演俾其常存銳氣以免日久疏懈漸就頹唐否則各居衙署散漫無歸驟難查察其應如何安置眷屬容再詳擬從此官署兼仿行壘之式則隊伍自然整齊馬步分起編列成營則聲息自然聯絡治兵之官不似往者之冗牧令勤求民瘼誠意感孚使之渥沾

聖化去其阿奇木伯克之權薄賦輕徭相與維繫數年之間語言文字或可漸軌於大同部臣所謂同是血氣之倫綏之斯來理有固然此籌議官制以一事權之大略也一屯田歸兵徐議抵餉也前准戶部咨鈔摺稿以餉款艱難

新疆南北兩路急需大興屯政以裕邊儲欽奉

諭旨飭臣等酌議辦理方與諸臣熟商此次戶部又以屯田抵餉爲言查屯田之說自漢以後言兵農者莫不引爲足食節餉之大經其制不一唐之營田明之衛田所在有屯後率有名無實新疆旗屯兵屯商屯回屯酌收租糧其效惟伊犁爲最大次則塔爾巴哈臺亦設屯營南路各城較少而伊拉里克之水利經故督臣林則徐議修於是中外稱善臣前率師經歷兩路曾經訪及屯務如伊拉里克隸吐魯番舊有民耕坎井其法係向天山之麓開井而下更爲上下浚渠循此間十數丈以次接開渠道暗通導引

雪水伏流以資灌溉每修一坎費錢約千餘緡澆地二三百畝不等其不修明渠者一恐風吹沙壓一則渠深數丈搬土較難惟吐魯番土質堅緻乃能瀦流固岸不虞浮壅本是成法林則徐復爲加意講求其利益溥故該處之地民但有力無不爭墾臣曾於南路哈密各處仿此試開或無水可迎或旋開旋塌地勢所限有非人力所能強爭者至若旗屯兵屯地率專爲片段中無民地淆雜抵餉之議臣昔以費繁餉絀興屯爲大利源極思仿而行之比年試辦始知其效不可驟期久遭兵燹水道湮塞興修各工咸資力於營勇未克一律盡力於農非如宋臣陳恕之所云

軍卒驕惰也各勇遠征絕徼復迫之東作心志既不專壹  
人地本屬生疏將領雖嚴加程督而時而未耜時而干戈  
無非勉強以應終難諳悉駐營多在衝途附近之可墾者  
早經土民承種卽以哈密言之擇地撥歸營屯求其與民  
無礙除戈壁不任開墾外偏在大泉灣塔爾納沁等處遠  
隔百餘或二百里上年總計各處所獲糧石扣還成本略  
無贏餘倘因屯墾之故移營以就則應防之汎地又須添  
營填紮不特甫闢之土成否尙未可必卽使豐收已先專  
糜月餉統算豈不極虧此而欲抵實餉必俟兵制定妥寬  
予年限乃有著落蓋農夫之於耕務先諳其土性播種隨

宜然後秋成無誤勇丁各懷故土之思暫耕於此雖任耰鋤之役不期收穫之豐又須購器豢牛籽種之需耗費頗鉅事屬大眾祇圖塞責如或界接民田雖毫無騷擾亦甚恐惶澆水爭先漫無分誌燥涇過度日至鮮成民田固隱受其困而官本亦坐耗矣南路纏回多以農務爲生間有荒萊則實苦於無水張曜謂其有類石田北路烏魯木齊一帶恭鏜咨稱旗兵各屯折抵均無所獲伊犁境內金順升泰覆咨亦云通算迄無利益伊地夙號膏腴果能不相攘害咸願耕於其野委棄殊爲可惜塔城亦多沃壤錫綸當不忽視現擬復兵臣愚請於裁勇後除伊塔兩處由金

順等妥籌外餘就各兵駐防之所如有荒地可撥爲之酌數分給卽同已業兵雖不皆土著旣經入伍自各願有室家令其操防之暇從事隴畝人情各營其私致力自倍尋常甲年無息取償乙歲扣抵復從其輕必且樂此不疲公家旣得略抵餉項倉儲亦得藉以充盈有恃不恐其利可以操券苟務期效旦夕考成所迫始長慮而卻顧卒致無功此興屯抵餉難求速效之大略也以上四者部臣籌之甚切臣苦識慮短淺有慚遠謨而邊寄忝膺用敢竭誠條上籲懇

飭部詳核覆奏請



旨頒行以節財用而策治安抑臣更有請者部臣鑒於邇來勇籍之多虛冒務求核實歸併有云補發半年欠餉餘欠悉令報效值此度支萬窘幾於籌無可籌乃援明春裁營補發半年欠餉之請以爲舊章意謂似此清釐雖較積欠大減究於實數無虧然於臣部各軍則其情事大相逕庭查鄉勇越境勦賊始自故大學士曾國藩由湘而推行於江西湖北厥後帥臣各就其鄉招募遂徧各省臣曩隸老湘軍稔知勇夫之於領餉亦若農人之占天時按候無差每屆准假算明找補不爽絲毫故咸踴躍用命父兄死事子弟繼之上無剋冒之弊下盡心力之能規制森嚴莫

敢櫻犯以言乎勦則電掣風馳無堅不破以言乎防則修  
工護運無役不從感

聖朝之信賞爭先恐後髮捻苗回次第芟夷湘楚各軍從  
無折發舊欠之舉勇夫遠戍窮邊離其父母兄弟妻子至  
有十餘年未獲一還家者少壯從戎今且垂暮平時存銀  
不能支取家中或致凍餓然猶有所待上之所以慰勇者  
曰俟後騰餉給假分釐皆清勇之所以慰家者曰少遲領  
欠假旋聊敷事畜此實塞上征夫里閭老幼所賴以爲養  
命之源歷年遵行不渝者也古語有之政莫大於信我

皇太后

皇上平定四方賦不少加而偶災必賑

儉以自奉而養軍惟優

厚澤深仁獨超往古薄海臣民罔不淪浹肌髓比者西陲  
敕靖各勇方慶凱旋有日前之歸者役期若干領欠若干  
還而自按若竟短扣能無寒心況其甘於遠役原恃餉寬  
聊可爲身家之計豈料至於折發勇數並無浮報入營悉  
屬的期彰彰在人耳目儘堪稽考部臣極虞年積一年姑  
具此說微臣受

恩深重儻可強爲試行甚願因之清欠而身任其職洞悉  
其隱不敢緘默

朝廷亦何吝此致失大信於功成之後耶伏懇

天恩矜念久征之勇俟其裁撤仍照原欠之數算找則所全實大矣全疆既籌經久之策要在通力合作將來統畱兵勇三萬一千人三道所屬縱橫約二萬里共擬分兵二萬一千更難兼防外境伊塔分駐萬人轄境比之昔年已形狹小防戰亦應預籌其與俄人交涉守約立威軍壘務須整飭城防務須布置必兵數無缺餉數無侵斯鎮守非虛士氣常振紀律嚴明則商賈不至裹足戶民得以安居強鄰亦當震懾前者伊犁收還臣卽縷晰函商金順速爲籌辦洎今未接其覆書金順成老碩望戰績卓然一經振

刷精神加之整頓自足爲西域之長城統計新疆近費已不下數千萬俄壤緊接嗣後但可進尺不能退寸盡在邊臣激發天良廉以持躬恩以孚眾更精求武備聯爲一氣勿存旗綠之見尙可互借聲援積弊旣除鎧仗一新軍容苟有可觀成效乃有可觀如荷

鴻慈垂誠臣雖駑鈍惟罄人十已千之力稍酬

高天厚地之施金順等渥承

眷畀必當迅圖振奮力保巖疆久遠之規實基於此矣除關內兵餉一切另由督臣譚鍾麟通籌具

奏外臣與金順張曜等相距過遠必待一一函商須延數

月重以西餉萬分拮据去冬息借之銀訂於四月歸楚不特無款可還而本年報解寥寥卽每月應發之鹽菜銀兩亦苦無以點綴萬竈所託迫切殆難言狀惟有懇

恩迅飭趕解以濟燃眉邊局幸甚不揣冒昧謹先恭摺覆陳是否有當伏乞

皇太后

皇上聖鑒訓示施行謹

奏

軍機大臣奉

旨該部議奏欽此

聖賢集卷之五 雜錄 一

三

哈密辦事協辦衙門員役暫照向章支廉片

四月二十八日

再臣前准戶部咨鈔覆陳哈密辦事大臣明春奏懇指撥酌留各項人員經費並估撥公費請

飭由臣體察情形會同伊犁將軍陝甘總督妥議具奏一摺奉

旨依議欽此欽遵鈔行到臣伏查哈密地方爲新疆南北兩路之總匯從前回戶頗多兼有換防兵丁及各處定發遣犯均須於此停頓必得大僚鎮守方免意外之虞此次亂平所有哈密回務經前督臣左宗棠奏歸哈密通判管理換防之兵亦正議停情形迥殊於昔誠如部臣所云且



現既請設撫藩除伊犁塔爾巴哈臺兩處旗營外其餘兩路之都統參贊辦事協辦領隊各缺概擬請裁不僅哈密一城也惟目下大局未定哈密協辦大臣已蒙

簡放有人則辦事協辦衙門應用員役似應暫照向來額設章程開支廉費以免賠累除咨部外是否有當謹會同

伊犁將軍臣金順陝甘督臣譚鍾麟附片覆奏伏乞

聖鑒訓示施行謹

奏

軍機大臣奉

旨該部議奏欽此

軍機大臣字寄光緒十年四月二十八日奉

上諭近來寄信緊要事件往往漏洩甚至外間傳播刊入新聞紙中總由該大臣等於接奉寄諭後並不親自經理諸事假手於人縱令幕友委員任意宣洩幾事不密則害成似此情形殊堪痛恨嗣後著該大臣將軍督撫等於此等事件加意慎密除有必須咨行之處擇要恭錄知照外概不准稍有宣露儻仍漫不經心致有漏洩一經發覺定惟該大臣將軍督撫等是問不稍寬貸將此由四百里各諭令知之欽此



新疆南路軍臺一律安設驛站酌擬經費章程摺五月二十八日  
奏爲新疆南路郡縣暨哈密巴里坤所設軍臺均仿照北  
路一律安設驛站酌擬經費章程以紓民力而重郵傳恭  
摺仰祈

聖鑒事竊新疆極邊遼遠郵遞文報尤關緊要向來北路  
於州縣驛站外另於標綠各營安設營塘軍臺專遞上下  
夾板要件及限行緊急公文應需夫馬工料均准作正開  
報南路安設臺站卽由各城大臣在於例估經費項下統  
支光緒初元進規新疆經大學士前陝甘督臣左宗棠先  
飭安設玉門安西塘站歸肅州鎮總兵經管哈密鎮西廳

轄境塘站歸巴里坤鎮總兵經管北路肅清大軍由北而南經臣隨時體察商酌節節安設塘驛其時軍事方殷文報最爲繁重未可刻延地方初復薪桂米珠夫馬薪糧之類不能不從寬優給以免貽誤事機雖歷年經臣次第覈減然北路各驛驛書每名仍月給工資銀八兩每馬一匹用驛卒一名月給工資銀六兩草乾銀三兩六分兩馬一夫月給工資銀四兩火夫每名月給銀四兩每驛月支紙張油燭銀四兩所需鞍屨繩索灌藥釘掌一切雜費在外南路每站驛書一名月給薪水紙張油燭並津貼銀十兩至十五兩不等麥麪各六十觔其夫馬工料由公家支給

經費者驛夫毛拉通事每名月給工食銀三四兩不等各給麥麵六十筋每馬一匹日支料六筋草十筋至十五筋不等巴里坤哈密鎮協所管軍臺銀糧料草與驛站經費約略相等實因邊事孔棘時地攸殊是以章程未能畫一現賴

皇威丕暢全疆廓清南路增置郡縣規模粗具所有南北兩路塘驛軍臺亟應從新釐剔酌定畫一章程均歸印官經管文報通歸驛站接遞以肅郵政而專責成

臣恭讀雍

正六年五月初六日

上諭各省所設驛站夫役原以預備公事之用國家歲費

帑金本欲使州縣無賠累之苦民間無差派之擾官民並受其福等因伏見

聖慈曲體薄海臣民其沐

鴻施新疆長途戈壁水草缺乏官道設站處所傳舍之外絕少人煙入冬冰雪嚴寒常有裂膚墮指之慘雖募外路夷夫非厚其廩餼無人應役南路新設官治事同一體原設臺站自應仰體

皇仁改爲驛站援照北路一律開報經費以免擾累其北路向例兼設之營塘軍臺現既歸併驛站亦應酌加夫馬以資周轉惟

國家經費有常當用固不能過惜而可省要在必省此次  
釐定務使夫馬芻料役食相稱不致誤公官無墊賠民無  
差擾然後事可經久饒不虛糜伏查哈密協營原管十三  
軍臺應改歸哈密廳通判管轄巴里坤鎮標原管十七軍  
臺應分隸鎮西撫民直隸廳同知暨奇臺縣知縣各按地  
界管轄通計哈密廳通判管轄十三站北路鎮迪道管轄  
六十一站南路阿克蘇道屬三十九站喀什噶爾道屬三  
十七站共計一百五十站其地方之衝僻道里之遠近均  
係按照現在情形詳細查察斟酌增損逐一釐訂擬每站  
設驛書一名月支工食銀四兩八錢白麪四十五觔兩馬



一夫每名月支工食銀三兩白麪四十五觔每驛月支油燭紙張銀三兩每馬一匹日支京斗料四升草十四斤外備站價一項擬馬一匹月支銀四錢五分從前所用臺員驛卒火夫毛拉通事諸名目概行裁汰除公費外均扣建給領遇閏照加至每歲倒馬之數擬照塘馬十分倒三之例准其據實開報照例給價買補以資整頓一俟局勢大定元氣漸復統歸甘肅布按兩司隨時酌覈減支俾符定制以上所擬均由臣熟籌局勢及物價人工權宜核定雖未能合於舊章而比較現支款目實已大加裁減省之又省約計南北兩路每歲共支銀五萬四千一百餘兩麪五

十四萬四千三百餘觔折合京斗糧五千四十石京斗料  
二萬四千七百餘石草八百六十四萬八千餘觔銀歸軍  
需項下報銷麩料草束卽歸地方撥給缺草各站照章每  
馬一匹月支草價銀六錢似此辦理南北均歸一律擾累  
得以永除實於郵政民生兩有裨益除將安設驛站馬匹  
里數暨掛支銀糧料草各數日開單分別咨送戶兵二部  
查照外所有新疆南路郡縣暨哈密巴里坤所設軍臺均  
仿照北路一律安設驛站酌擬經費章程緣由是否有當  
謹會同陝甘督臣譚鍾麟合詞恭摺具陳伏乞  
皇太后

皇上聖鑒訓示施行謹

奏

軍機大臣奉

旨該部議奏欽此

哈密巴里坤軍臺擬改驛站分段管理片

五月二十八日

再前准兵部咨會哈密協營軍臺十三處月支銀數覈與例案不符應將臺弁照案通改爲月支銀三兩字識兵夫獸醫鐵匠改爲月支銀一兩五錢以至九錢及四錢五分不等馬駝均改爲月支草價銀六錢每日支料四升公費概改爲每臺月支銀一兩二錢其餘溢支銀數與夫麪筋一律不准開銷以此次奉到部文之日起支從前支款由臣奏明立案照例造銷等因伏查承平時關外巴里坤哈密等處軍臺充役官兵人等係由綠營輪派當差各有本營掛支糧餉兼支臺差津貼此時綠營兵額未復其半各

軍臺弁兵夫役均係從新雇募關外沙磧寒苦倍常百物昂貴掛支糧餉必須勉敷食用始能責令趨公左宗棠前此權宜酌定不過足資衣食之需委非優給現在哈密十三軍臺並巴里坤鎮標所管十七軍臺均經臣酌擬一律改爲驛站分隸鎮西哈密二廳暨奇臺縣各按所轄地段管理以專責成所有酌定人役薪糧章程自應以此次欽奉

諭旨之日爲始俾清起訖而免軫軼除咨部外謹會同陝甘總督臣譚鍾麟附片陳明伏乞

聖鑒訓示謹

奏

軍機大臣奉

旨該部議奏欽此

聖朝聖德公義和

三

請卹總兵何作霖並附祀忠壯專祠片

閏五月十四日

再頭品頂戴

賞穿黃馬褂記名遇缺題奏提督已故甘肅西甯鎮總兵何作霖上年秋間交卸赴蘭州省途次病故業經陝甘督

臣譚鍾麟

奏報在案臣查該故員籍隸湖南湘潭縣咸豐四年投効原統老湘軍

予諡壯武道員王金鑫部下隨勦髮逆所向有功嗣值捻逆竄擾直東各省官軍跟蹤追勦該故員無不冒險衝鋒出奇制勝勦擒蕞事秦隴回氛正熾大學士前陝甘總督臣



左宗棠檄臣叔父劉松山率師西征該故員卽領老湘前軍肅清陝北厥功甚偉旋進攻金積堡老巢間道而來兵單糧絕臣叔父劉松山受傷殞命統將新失人心惶駭臣於此時接統湘軍事機萬分喫緊卒以血戰蕩平多賴該故員之力嗣是西甯之役以小峽口爲險要該故員督隊身先士卒鏖戰兩月故能迅告成功蒙

恩簡放西甯鎮總兵員缺其生平戰績隨時奏報有案乃年齒未衰竟至一病不起蓋其屢受重傷精力俱瘁有由來也茲據甘肅候補道楊銘潛等備錄該故員事實稟請轉

奏前來合無仰懇

天恩飭部照軍營積勞病故例從優議卹並乞

恩准附祀

子諡忠壯前廣東陸路提督

臣

劉松山甘肅省城專祠以

勵勲勞而資觀感謹會同陝甘總督

臣

譚鍾麟附片具陳

伏乞

聖鑒訓示施行謹

奏

軍機大臣奉

旨著照所請兵部知道欽此



請更正湯彥和陳美仙官階片

閏五月十四日

再提督湯彥和陳美仙二員自咸豐年間由武童投効湘軍獲保今職前據該提督等造齋出身履歷清冊同治六年陝西同朝等處勦賊獲勝案內經前任西安將軍臣庫克吉泰前任陝西巡撫臣喬松年保奏都司湯彥和陳美仙請免補游擊以參將儘先補用並加副將銜卷查此案經部核駁都司湯彥和陳美仙改爲免補都司以游擊儘先補用旋經前陝甘總督臣左宗棠復奏部駁同朝勦賊出力各員內都司湯彥和陳美仙請仍照原保以參將儘先卽補同治七年克復陝西綏德州城並河北直隸地方

竊平要逆案內彙保底銜援照同朝原保開列經左宗棠  
保奏湯彥和陳美仙均得保儘先推補副將並加總兵銜  
嗣隨湘軍征剿該二員均由總兵銜儘先副將逐層累保  
歷經奉

旨允准欽遵行知在案而同朝原保之儘先補用參將又  
經兵部議駁均屬虛懸經臣飭查去後茲據湯彥和陳美  
仙呈稱同治七年隨軍肅清直東渡河而西二次部駁同  
朝之案行知未及領獲是以克復綏德州保案底銜仍照  
原保之儘先參將開列以致嗣後保階遞誤請將後此各  
案逐層遞減填補儘先參將虛懸之階呈懇

奏咨更正前來臣查湯彥和等束髮從戎隨同轉戰各省宣力二十餘年戰功懋著老湘一軍自肅清直東後渡河而西由陝北直攻甯靈昕夕靡暇其時驛遞繞道迂折每多遲誤該員等未得領獲續駁行知遂由儘先補用參將累功保至提督核其情節屬實合無仰懇

天恩俯准將官軍克復綏德州城案內湯彥和陳美仙獲保之總兵銜儘先推補副將移補該員等前案駁空之儘先參將一階以後各案保獎均照綏德州案逐層遞減爲記名總兵

飭部更正其該員等於蕩平金積堡等案內得保

封典清字勇號頭品頂戴仍照原案一併註冊以昭核實而免歧異之處出自

逾格鴻施除將該員等造具出身履歷咨部查核外謹附片具陳伏乞

聖鑒訓示謹

奏

軍機大臣奉

旨兵部議奏欽此

酌裁馬步各營改併成旗並實存數目繕單立案摺

六月二十

日七

奏爲酌裁楚湘蜀軍馬步各營改併成旗並現在實存官  
弁勇夫數目謹分晰繕具清單

奏明立案恭摺仰祈

聖鑒事竊 臣部馬步諸軍暨烏魯木齊提標土勇截至九  
年十二月底止共存五十一營旗開花礮隊三哨小馬隊  
五哨業經遵照部議

奏明立案其自十年正月起經 臣再三籌度先於行糧馬  
隊內飭將蜀軍呼敦左右二營楚軍定邊一營湘軍定遠



小馬隊一哨裁併改爲定遠行糧馬隊一旗呼敦行糧馬隊二旗定邊坐糧馬隊二旗又於行糧步隊內裁撤湘軍定遠中軍一營並將董字左右二營定遠左右二營蜀軍正副二營楚軍安遠左右二營建威一營裁併改爲董字左右二旗定遠左右二旗蜀軍正副二旗安遠左右二旗改建威營爲安遠前旗以上馬步改營爲旗照章共畱員弁勇夫五千九百一十五員名額馬六百三十五匹外共開除二千九百六十三員名額馬一百二十一匹其各營遣勇口糧結算至二三月底不等由臣極力騰挪並將分收上年息借陝商之款湊放清楚又喀喇沙爾地方險要

因就所轄蒙部內挑選蒙古馬隊一旗照依土勇馬隊章程開支以資防衛其阿克蘇道標土勇一旗經部議准現已挑募合之楚湘蜀軍並烏魯木齊提標土勇共五十四營旗開花礮隊三哨小馬隊四哨統共額設弁勇一萬九千一百六十三員名額外營哨官一百二員額外火夫長夫馬夫九千六百二名額馬三千七百八十八匹此臣部截至十年三月底止現存實數也茲據行營糧臺開單詳請奏咨前來臣覆核無異計馬隊改旗者共三營步隊改旗者共九營又併小馬隊一哨較之上年營旗之數雖多三旗而實在弁勇減併不少論邊地之遼闊防勇未敢議

裁論欠餉之遞增必須及時清理似此設法酌改減一勇卽省一勇之糧兼之汰弱畱強挑一勇真得一勇之用於防守嚴密之中力求裁省以期上副

朝廷綏邊節用之至意所有臣部諸軍改營爲旗挑募情形並現在實存數目謹分晰繕具四柱清單恭呈

御覽伏乞

皇太后

皇上聖鑒飭部立案施行謹

奏

軍機大臣奉

旨該部知道單併發欽此

刑部功人部

刑部



查明喀城底臺遞送摺件遲延片

六月二十七日

再

臣

奉

旨飭查長順所奏喀城底臺遞送摺件遲延有無折損情弊其喀什底臺驛書等先經長順飭提發交阿克蘇善後局管束臣卽欽遵恭錄行知阿克蘇道查訊去後茲據前護阿克蘇道署溫宿直隸州知州陳名鈺詳稱訊據喀什噶爾底臺驛書潘定貴供稱去年九月十七日午時下刻長大臣發來夾板摺件伊適先赴回城探看熟識友人往返四十餘里迨聞信趕回掛號發遞業已遲逾因此行查心中惶恐卽以遲填時辰爲風雨阻滯攤算地步回供極

是糊塗今蒙審訊不敢捏飾此外實無折損及別項情弊再三究詰矢口不移一臺雅滿雅爾驛書郭鍾嶽訊明未曾延誤等情前來臣查限行

奏報必須隨到隨遞此案喀什底臺驛書潘定貴因探友稽延雖訊無折損情弊其前稱遲填攤算亦未始終狡執而因擅離公舍致誤要件時刻實屬咎有應得惟例無似此誤時作何治罪之專條自應變通定擬將潘定貴酌照不應重律擬杖八十並加枷號一箇月滿日折責革役以示懲儆其雅滿雅爾臺之驛書郭鍾嶽既未延誤應毋庸議現在南北兩路驛務臣正設法酌改以歸畫一除新定

章程嗣後不准稍涉疏忽外所有遵

旨查明擬辦緣由是否有當謹附片陳明伏乞

聖鑒訓示施行謹

奏

軍機大臣奉

旨知道了欽此





請率師與法夷決戰摺

七月初一日

奏爲近聞法夷背約要挾

微臣

謹擬布置西塞請

旨率師東下與之決戰以紓積憤恭摺密陳仰祈

聖鑒事竊查法夷上年逞兵越南越之劉永福督團屢與交鋒時亦獲捷

朝廷保護藩封

命將出關以彰撻伐宿勳如彭玉麟岑毓英銜

詔分防兼籌水陸薄海臣民罔不舉手加額羣相稱慶待此一戰以威強虜匪獨可全屬國正以自固藩籬恍然於前此之俯從款議者實

聖朝體念民艱免增勞費非示弱也迨後法夷漸次北侵越之山西北甯先後不守勢將逼近粵西滇南之界防軍驚潰

嚴旨逮問撫提以下諸臣法夷探知籌戰已決乃於是時就款津門未返越南侵地且乞中界通商第以不索兵貲號爲恭順

朝廷慎於勞師襲遠姑如其議已屬曲示寬大力顧邦交彼旣陽博修睦之名陰遂吞併之志犬羊之性猶爲未足比者紛紛傳播法夷故肇衅端數以兵船駛赴津滬虛聲恫喝其說果信是爲邇來彼族要挾僅見之事微臣不禁

積憤填胸極願飛搗其巢痛加剷洗暢我

皇威臣以菲庸忝膺邊寄深慚奉職無狀奚容更預外謀矧現在將帥如雲悉蒙

簡用鴛鴦鈍如臣曾何足數願臣不能已於請者稔聞泰西諸國恃其礮利船堅稱雄海表法夷則尤狡鷲異常輕於發難頻歲各夷安分海宇枚平津滬閩之局廠仿造船礮子藥極圖自強據傳已有明效

疇育無私雖商旅咸萃市途而條章務須遵守今彼違約來犯妄肆要求則我之理直各國圖保商務斷不相助則彼之勢孤或謂戰不難於陸而難於水不難於越境而難

於海疆固是持重之論然就目前局勢沿海戒嚴彼或佯以兵艘分擾而於河口停泊我卽立與轟擊以逸待勞以靜待動權常操之在我海口之最扼要者莫若津沽自李鴻章籌防籌戰慘淡經營屹然可恃久爲中外所共信彼卽欲興傾國之師我靜駐以攻之曠日持久彼登陸旣勢苦不能常泊又所費甚鉅此理之顯然者次則滬瀆香港皆駐重兵閩浙各埠悉有準備彼之力量幾何商口爲大家所護持豈容彼獨逞私而廢槍礮之精銳我與之同兵勇之眾多彼遠不逮就以水戰而言均恃利器均駕鐵船勝負亦恆相半又況我僅防衛各口不求涉洋遠征礮臺

扼紮早已周密彼既不得薄岸縱擅精巧之技苦無所施此沿海決戰之確有把握也至於陸戰則前此粵匪動聚數萬或十數萬每以重價購用外洋槍礮豕突狼衝共稱難制捻匪善騎剽疾萬馬飛騰瞬息百里官軍跟蹤追擊以步當馬回匪素業獵牲槍法至以條香爲的命中百不失一河湟甯靈其地山谷盤亘湖渠泥淖猝蹈不測卽臨奇險若俄屬安集延之酋長牙虎柏竊踞回疆各城曾用後膛開花各種槍礮以與我抗卒亦次第削平安夷旋屢入寇名爲該部尋讐實由俄國嗾使臣時駐軍喀什噶爾思必大加懲創方免頻來擾邊整隊間道而前其中童山

突兀峻坂懸崖數百里內無一村落蓋向爲人跡所不到  
狐兔所不窟陰瘴驟觸弱者絕息緣崖上下日月蔽虧人  
畜湊乘少不抖擻遂遭踐躪時而層冰乍裂忽焉殷雷土  
塊斗隕緊躡其後以視昔之陰平險巘殆無不及旣得迎  
頭攔截士氣百倍陣斬無遺至今沿邊安枕後值收回伊  
犁軍士踴躍之情俄人隱有所憚法夷近敢據我藩邦和  
而復背非逆料中國不果於戰卽謬揣中國不善於戰用  
是公然鼓其螳臂冀以飽其慾壑斯正中國威震四夷之  
會羣僚竭忠圖報之時臣之骸疾雖迄未痊而當  
國家有急奮不顧身不揣冒昧擬就關外諸軍挑選三千

人再於關內添募三千合足六千人率之東下暫駐陝境  
以待臣一面趨叩

闕廷謹聆

聖訓指授機宜敵情瞬變屆時何處喫緊臣當力任其難  
倘彼不復分擾則請趕赴越南凡法夷盤踞之區往行進  
剿兵壯器精及鋒而試務令歸越藩之侵地絕中界之通  
商不使稍占便宜法之兇燄既挫各國懼干

天怒隱以化其桀黠就我範圍待法夷之窮蹙然後納款  
越藩仍其舊籍以屏蔽滇疆樹海上之金湯此保越陸戰  
之確有把握也臣自弱冠從戎攻剿踞賊流匪屢殲強悍



有時地險糧盡多方經畫從未失利彼縱器勝於我而海道接濟立見其窮一俟對壘必設法以困之且彼通國人數不敵中國一省遽犯不遑焉能爲役臣於戰事苟無確見何敢於

君父之前妄自陳請特以機不可失未可再涉遲疑言實有徵並非故爲矜詡

爵賞斷不敢邀鋒鏑所不敢避伏願我

皇太后

皇上鑒臣報效之愚悃斷自

宸衷俾臣得竭犬馬之勞斯爲幸甚如蒙

俞允新疆布置情形以臣管見刻下兵餉官制尙未議妥  
臣既東拔則自肅州西邁殊覺空虛擬援光緒二年故事  
督臣出駐肅州庶玉關內外脈絡皆可貫通再以張曜移  
紮阿克蘇則南疆東西聲息不虞隔闕北路伊犁烏魯木  
齊等處防戍如故臣所緝之

欽符亦請就交督臣趕辦清欠復兵諸務全局既定當卽  
籲請

收銷似此一轉移間實於西南事局有益無損而從此交  
涉各夷先之以威守之以信使之由畏而懷不必侈言遠  
略自足

聖鑒訓示施行謹  
涵濡無外矣區區蟻忱不勝悚惶待  
命之至謹繕摺密陳伏乞

皇太后

皇上聖鑒訓示施行謹

奏

軍機大臣奉

旨覽奏忠勇之忱深堪嘉尚刻下新疆甫就蕩平一切設  
官裁勇各事切須妥籌布置且該處密邇俄邊尤須得人  
鎮撫張曜一軍前有旨諭令北來所有新疆防守事宜該  
大臣尤當統籌兼顧毋庸率師東下用副委任欽此

軍機大臣字寄光緒十年七月初六日奉

上諭越南爲我大清封貢之國二百餘年載在典冊中外咸知法人狡然思逞肆其鯨吞先據南圻各省旋又進據河內等處戕其民人利其土地奪其賦稅越南君臣閭懦苟安私與立約並未奏聞法固無理越亦與有罪焉是以姑與包涵不加詰問光緒九年冬間法使寶海在天津與李鴻章議約三條正飭總理各國事務衙門會商妥籌法又撤使翻議我存寬大彼益驕貪越之山西北甯等省爲我軍駐紮之地清查越匪保護屬藩與法國絕不相涉本年二月間法兵竟來撲犯防營當經降旨宣示正擬派兵

進取力爲鎮撫忽據該國總兵福祿諾先向中國議和其時該國因埃及之事岌岌可危中國明知其勢處迫蹙本可峻詞拒絕而仍示以大度許其行成特命李鴻章與議簡明條約五款互相畫押諒山保勝等軍應照議於定約三月後調回迭經諭飭各該防軍扼紮原處不准輕動生衅帶兵各官奉令維謹乃該國不遵定約忽於閏五月初一初二等日以巡邊爲名在諒山地方直撲防營先行開礮轟擊我軍始與接仗互有殺傷法人違背條約無端開衅傷我官兵本應以干戈從事因念訂約和好二十餘年亦不必因此盡棄前盟仍准總理各國事務衙門與在京

法使往返照會情喻理曉至再至三閏五月二十四日復明降諭旨照約撤兵昭示大信所以保全和局者實已仁至義盡如果法人稍知禮義自當翻然改悔乃竟始終怙過飾詞狡賴橫索無名兵費恣意要求輒於六月十五日佔據基隆山礮臺經劉銘傳迎勦獲勝立即擊退本月初三日何璟等甫接法領事照會開戰而法兵已在馬尾先期攻擊傷壞兵商各船轟毀船廠雖經官軍焚毀法船二隻擊壞雷船一隻並陣斃法國兵官尙未大加懲創該國專行詭計反覆無常先啟兵端若再曲予含容何以伸公論而順人心用特揭其無理情節布告天下俾曉然於法

人有意廢約衅自彼開各路統兵大臣暨各該督撫整軍  
經武備禦有年沿海各口如有法國兵輪駛入著卽督率  
防軍合力攻擊悉數驅除其陸路各軍有應行進兵之處  
亦卽迅速前進劉永福雖抱忠懷而越南昧於知人未加  
拔擢該員本係中國之人卽可收爲我用著以提督記名  
簡放並賞戴花翎統率所部出奇制勝將法人侵佔越南  
各城迅圖恢復凡我將士奮勇立功者破格施恩並特頒  
內帑獎賞退縮貽誤者立卽軍前正法朝廷於此事審慎  
權衡總因動眾興師難免震驚百姓故不輕於一發此次  
法人背約失信眾怒難平不得已而用兵各省團練眾志

成城定能同仇敵愾並著各該督撫督率戰守共建殊勳  
同膺懋賞此事係法人渝盟肇衅至此外通商各國與中  
國訂約已久毫無嫌隙斷不可因法人之事有傷和好著  
沿海各督撫嚴飭地方官及各營統領將各國商民一律  
保護卽法國官商教民有願畱內地安分守業者亦當一  
律保護倘有干預軍事等情一經察出卽照公例懲治各  
該督撫卽曉諭軍民人等知悉倘有藉端滋擾情事則是  
故違詔旨妄生事端我忠義兵民必不出此此等匪徒卽  
著嚴拏正法毋稍寬貸用示朝廷保全大局至意將此通  
諭知之欽此



皇朝通志

卷一

四

遵 旨酌度仍申前請摺

七月二十四日

奏爲遵

旨詳加酌度仍申微臣前疏之請以期迅赴事機恭摺密

陳仰祈

聖鑒事竊臣於本月二十日承准軍機大臣密寄光緒十

年七月初四日奉

上諭新疆防務經劉錦棠隨時布置該大臣駐紮哈密足資控馭伊犁有金順防營兵力亦尙敷用喀什噶爾防務較鬆現在北路邊防緊要張曜一軍如可抽調著劉錦棠詳加酌度遴選熟習邊情之員帶營前往喀什噶爾接替

卽令張曜督率所部迅卽北來聽候諭旨調派該大臣酌定後一面奏聞一面卽將此旨知會張曜遵照辦理將此由六百里密諭知之欽此跪讀之餘值

宵旰之憂勤恨馳驅之難驟縮地無術不禁寢饋難安恭  
釋

諭旨飭臣詳加酌度仰見

眷懷西域指示周詳莫名欽服連日以來遵卽審度時勢綜計道途之遠近以協拔守之機宜不揣冒昧敬爲我

皇太后

皇上陳之臣與張曜共事一方稔知其勲蹟卓然老成幹

濟此次苟能領兵應

詔洵於事局有裨無如喀什噶爾緊接俄鄰爲南疆之重鎮當此通商之始固在守之以信尤先之以威今將張曜一軍抽調在中國因其防疆旣靖可以權移在彼族將謂遠塞召援轉生疑訝且須遴選資望素著之員前往換紮方能鎮撫其間就臣部之在南路者惟阿克蘇之湘軍較近自道員羅長祐病故後接統之提督湯彥和勇略雖饒而新膺統帶其資尙淺欲以上游各軍藉歸鈐轄勢遠未克相下幫辦甫去正宜力求和衷似此爲時過促窒礙頗多此抽調張曜一軍之限於統將接替者有如飛調現

紮北路奇臺統領安遠軍甯夏之統兵譚拔萃往駐該員  
久統營伍威望可孚而自奇臺至喀什噶爾按程五十餘  
站譚拔萃如得替防須於八月始可由奇拔隊而南沿途  
縱無阻延抵哈已須冬月張曜所部之營分防和闐葉爾  
羌各處倘不待集舊部而單騎以就外軍則兵與將不相  
習將與帥不相習何能如臂指之効用求速亦復不得查  
由喀什噶爾以至哈密計將六十站臣卽恭錄

密諭飛致張曜不俟接防之軍趕緊料量亦須於九月始  
可由喀而東邊陲風雪凜冽異常坦道迷離斷難飛越卽  
使將士咸懷忠憤渾忘手足皸痲願奮往於冰天不少休

於途次抵哈亦在臘初又況長途戈壁隨行輜重平時且須略憩矧屆隆冬屈計由哈入關迄抵防所須俟來年莫春若以北路邊防緊要而言誠懼緩莫能應而喀什接替之際急切或致疏虞既無益於北防轉有妨於西守邊關所係不得不慎重出之

睿謨早已鑒及

諄飭由臣酌定若不熟權緩急捫心何以自安此抽調張曜一軍之限於道遠天寒者也臣前因聞外間傳播法夷妄肆鴟張背約要挾遂覺積憤填胸曾於月朔密疏請旨率師東下與之決戰其於新疆布置情形就臣管見擬

援光緒二年故事督臣出駐肅州以通玉關內外之脈張  
曜移駐阿克蘇以壯南路東西之聲援騰出微臣於關外  
挑選三千人再於關內添募三千合足六千人趨程拔往  
以爲後勁蓋已熟審事局乃敢陳於  
君父之前茲先奉

旨垂詢則是海防益形喫緊津沽一帶實爲

京師門戶備禦尤須嚴密臣緣待罪塞外不獲立時奮起  
稍分

朝廷之憂繞幕傍徨莫知所措但使沿海防軍邇來仰承  
廟算大挫夷氛斯固敷天之幸或彼仍鼓螳臂兇梗相持

同一

飭撥西兵就行軍才智言之張曜自勝臣數倍就現駐道里計之張曜則遠臣數千此時局勢必求可爲先聲之一助庶

國家之所以優待邊軍與邊軍之所願竭力圖報者藉收尺寸之効亦卽少酬

高厚之施計臣前摺業奉

批旨在途能荷

俞允則拔行較捷略無遲滯如必俟臣覆奏再定

簡派應懇



天恩俯准如臣原擬以期迅赴事機張曜暫祇移駐阿克蘇去喀匪遙所部無須紛更耳目有所專屬呼吸仍係一氣不虞隔閼其喀什噶爾地方衝要卽由張曜揀委該軍統領之資深者一人責成彈壓臣與督臣奉

命就道東西相遇儘可熟商交替哈密縮轂南北委屬全疆行幕之咽喉督臣既改駐肅州則哈密之責已輕特兩路之饋餉務必於此停頓分齎行營糧臺向設舊城擬以一營保衛更以一營填紮臣之行壘堪資防範此外臣擇其可調者並卽將親兵營整隊候拔關隴靖謐擬商之譚鍾麟抽選勁旅以備臨時之需張曜比定東駐所有各軍

應悉歸其調遣呼應既靈然後責無旁貸全疆官制兵制  
會當定議防務善後及時振興足慰

宸廑

臣

現擬計行程稽之時日非

臣

領隊北上無能協於

機宜時事所迫除飛文密商張曜譚鍾麟外兼將拔隊一  
切暗爲準備奉

旨卽行仗

天威以殺敵勉竭犬馬之忱抒義憤以致身期靖鯨鯢之  
浪曷任激切待

命之至謹繕摺密陳是否有當伏乞

皇太后

皇上聖鑒訓示施行謹

奏

軍機大臣奉

旨另有旨欽此

軍機大臣字寄光緒十年八月十二日奉

上諭劉錦棠奏仍申前請迅赴事機一摺據稱張曜駐兵喀什噶爾拔營不易擬請自行領隊北上等語該大臣勇於任事深堪嘉尚惟新疆防務及善後事宜數年來劉錦棠綜理一切具有條理未便輕易生手張曜駐紮喀什噶爾雖程途較遠或於所部將領中酌派一人暫帶數營畱防一面再由該大臣派員前往扼紮張曜即可先行起程帶隊北上著劉錦棠速即行知張曜趕緊料理應由何路行走較爲迅速卽著張曜自行酌度奏聞張曜移營後喀什噶爾防務劉錦棠務當妥籌布置期臻周密將此由六

百里諭令知之欽此

遵保各省籌餉人員並各督撫將軍關心協餉籲懇 恩

施摺

八月二十二日

奏爲遵保各省關及後路各臺局籌餉差委出力人員謹繕清單並陳各督撫將軍臣關心協餉有裨事局籲懇

恩施恭摺仰祈

聖鑒事竊臣等於上年九月間疏請先將籌解協餉歷年

均足十成之江甯藩司懇

恩獎敘其餘協解足成之省關籌餉人員容再咨取職名

一併請獎以昭激勸並聲明各督撫監督諸臣督飭寮屬

力濟邊軍積年旣久自應確查陳明以彰公道等因仰荷

聖慈俞允比卽恭錄分別咨行茲准各省關將在事應獎人員咨送前來臣等伏查西餉向恃外協此次戡定兵勇未能遽減撥協之數較多於前旋值收還伊犁舉行善後固由

皇威遐邇

涵濡無外而將士用命咸資飽騰則省關不分畛域實有裨於邊疆就公誼言之部文嚴限

詔旨頻催本有協解之責原無可推之理就時勢言之出款遞加入款有定求其免於延誤要在妙於權衡在彼盡周急之懷初無關於損益在此如倒懸之解藉得爲之騰

挪遠征絕塞一切仰給於人頻年月餉之資裁遣之費差  
幸源源報解譬如渴極之飲涓滴皆甘臣等就其所入設  
法挹注因以勉力支撐各省關籌餉司道以下各員備極  
經營始終不懈有足多者又甘肅新疆總糧臺總司出納  
司道董核其成各員分任其役時經數稔勤慎趨公此外  
自鄂至肅水陸交運臺局各項差使員弁歷久辛勤不無  
微勞足錄茲謹核實酌保分繕清單恭呈

御覽伏懇

恩准獎敘免其逐一註考以昭激勸至各疆臣體

國公忠先其所急如四川督臣丁寶楨福州將軍穆圖善



署兩江督臣曾國荃安徽撫臣潘霽浙江撫臣劉秉璋江

蘇撫臣衛榮光前江西撫臣陳士杰署山西撫臣奎斌無

不繫念西陲盡心籌措臣等得所藉手未敢安於緘默應

如何優加獎敘之處伏乞

聖裁其署湖廣督臣卞寶第前署閩時措解甘餉甚鉅河

道總督臣覺羅成孚湖北撫臣彭祖賢河南撫臣鹿傳霖

陝西撫臣邊寶泉署湖南撫臣盧士杰各在藩司任內按

成解足得濟要需諸臣現任疆圻原非臣下所敢妄擬特

稽其前勞查照成案有不得不爲之瀆懇者可否均請

賞加頭品頂戴以示優異之處出自

逾格鴻慈是否有當謹合詞恭摺具奏伏乞

皇太后

皇上聖鑒訓示再此摺係臣錦棠主稿合併陳明謹  
奏

翠碧華公奏和 卷十

三

懇一恩賞加張曜錫綸等頭品頂戴片

八月二十三日

再新疆地方遼闊毗連俄壤仰賴

朝廷威稜邇來諸務粗有端緒臣錦棠猥以孱庸膺茲邊  
寄實有幸於職掌時覺寢饋難安其差免僨事者幸督臣  
譚鍾麟統籌兼顧經畫一切靡不殫心深蒙其利益其撫  
浙時關心西餉卽渾忘畛域之見也北路則幫辦軍務伊  
犁將軍臣金順夙勲重望鎮撫要邊南路則幫辦軍務廣  
東陸路提督臣張曜老成幹濟遇事整頓悉協機宜前烏  
魯木齊都統臣恭鏗塔爾巴哈臺參贊大臣錫綸整軍邊  
塞銳欲有爲署烏魯木齊都統內閣學士伊犁參贊大臣

升秦烏魯木齊都統前哈密幫辦大臣長順科布多幫辦大臣額爾慶額巴里坤領隊大臣沙克都林札布勤於職司迭次勘界尤屬懋著勤勞哈密辦事大臣明春烏魯木齊提督臣金運昌久征塞外勞瘁不辭至漕運總督臣楊昌濬前曾護理督篆幫辦善後其於邊事慘淡經營裨益實多以上諸臣悉蒙

眷畀或位重兼圻或望隆專闕誼應竭誠圖報何敢爲之妄乞

恩施祇以全疆大定伊犁統歸善後要政次第舉行諸臣幸得躬逢其盛可否仰懇

天恩將張曜錫綸升泰額爾慶額

賞加頭品頂戴餘均優予褒敘之處出自

鴻慈臣錦棠不揣冒昧謹專詞附片具陳伏乞

聖鑒訓示施行謹

奏

軍機大臣奉

旨另有旨欽此



光緒十年十月初四日內閣奉

上諭劉錦棠另片奏請將關內外各大臣獎勵等語陝甘總督譚鍾麟伊犁將軍金順前烏魯木齊都統恭鏗烏魯木齊都統長順巴里坤領隊大臣沙克都林札布哈密辦事大臣明春烏魯木齊提督金運昌閩浙總督前護陝甘總督楊昌濬均著交部議敘廣東陸路提督張曜塔爾巴哈臺參贊大臣錫綸科布多幫辦大臣額爾慶額均著賞加頭品頂戴伊犁參贊大臣升泰前經獲咎所請一併獎勵之處著毋庸議欽此





酌保關外諸軍出力人員摺

八月二十二日

奏為遵

旨酌保關外湘楚嵩武皖蜀諸軍異常出力之文武員弁  
其各項差使出力人員一併酌保謹分繕清單恭摺仰祈  
聖鑒事竊臣於上年五月以新疆大定伊犁收還諸軍防  
戍六年歷著勞績無異戰功

奏懇

天恩優獎奉到

諭旨准其擇尤酌保母許冒濫欽此跪聆之餘伏見  
聖朝廑念邊軍有勞必錄

奏為遵旨酌保關外諸軍出力人員摺

奏

綸音下逮罔不浹髓淪肌溯自全疆初復遊匪零星出沒各軍分防要隘聞警馳往搜捕不論昕宵無分遠邇炎熱熏蒸風雪饕撲每株守以免疏虞既常著有擒剿之勳實尤苦於當場之戰嗣是殘氛悉殄伊犁未卽交還重煩睿慮斯時臣等激勵軍士整隊嚴備防汎遼闊巡緝既未可稍懈而練習之勤夜以繼日寒燠無間翕然振興俄人訶悉其情隱有所憚在諸軍之奔命絕徼氣早奮於戰之先若強鄰之震懾

天威效儼收於戰之後是其中忠勇足嘉正值收復名城歸還甌脫得以親其役而逢其盛情勢固大異於平時者也

臣前聲請比照戰功獎敘誠以西域從戎寒苦固已倍蓰內地又當大難甫平防勦時有斬獲俾歸又安伊城旣復靖鄰固圉時閱六年較之從前晉防三年請獎一次不獨久暫攸殊亦且勞逸迥判更有進者此次統歸疆宇成熙代中興之全功爲千載一時之良會諸軍幸際

昌期其待

澤之殷固又異於平時者也若不從優請獎竟與尋常勞績靡所區分則無以作其銳氣而邊臣激勸之術亦有所窮轉非

朝廷慎重名器之意綜計諸軍文武員弁兵丁忍受戰瘞

於冰天備嘗艱險於沙漠歷年既久勞績異常茲謹遵旨擇尤酌保按其勞資釐定階職雖係比照戰功未敢稍涉冒濫其各項差使人員經營庶務久役辛勤因以湊赴事機未便令其向隅特一併遵保謹分繕清單恭呈

御覽伏懇

聖慈免其分別註考

恩准獎勵以示優異前准部咨各軍人員均先行咨部立案又有省分人員不准在他省列保各等因臣查此次所保人員均係立功在前部章在後外省人員向在邊疆效力自應一體列獎方昭公允合併聲明其後路各臺局並

各省關應獎人員臣已會同陝甘督臣譚鍾麟另摺開單  
籲懇

恩施除藍翎千總以下各弁照例咨部註冊外是否有當  
謹會同幫辦軍務伊犁將軍臣金順幫辦軍務廣東陸路  
提督臣張曜恭摺具陳伏乞

皇太后

皇上聖鑒訓示施行謹

奏

軍機大臣奉

旨另有旨欽此

聖朝勳公奏和

卷一

光緒十年十月初四日內閣奉

上諭劉錦棠奏遵保關外各軍出力員弁開單請獎一摺  
新疆底定以來經劉錦棠督飭各軍分防要隘搜捕餘匪  
馳驅於冰天沙漠之中閱時六載實屬懋著勤勞劉錦棠  
著交部從優議敘在事員弁亦均不避艱險異常出力自  
應量予鼓勵以昭激勸欽此





劉襄勤公奏稿卷八 起光緒十年九月訖  
光緒十一年三月

目錄

覆陳新疆遣犯酌量變通摺

已故道員羅長祐懇 恩允照成案附祀片

請註銷革員永不敘用字樣並 賞六品頂戴片

張曜一軍開拔遴員替防酌添營伍情形摺

懇 恩豁免關外鎮迪道屬歷年民欠各項銀糧摺

請豁免鎮西應征額糧片

授新疆巡撫瀝陳下悃摺

軍餉涸竭請嚴催趕解摺

擬借款行用補水等銀片

新疆南路擬設佐雜及分防巡檢各缺摺

哨弁戕斃營官脅眾譁潰隨即撲滅摺

試署直隸州知州員缺請實授摺

新疆命盜重案難照內地舊制遵部議擬辦摺

請 卹文藝等片

新疆驛站經費請參酌部議量爲變通摺

歷年欠發軍餉請 飭提款清釐摺

移營烏魯木齊日期摺

登覆各營應支雜支章程摺

辦結精騎馬隊潰勇片

伊犁匪徒勾勇劫殺經防軍撲滅摺

譚拔萃在營病故請卹摺

|  |  |  |  |  |  |  |  |  |  |  |  |
|--|--|--|--|--|--|--|--|--|--|--|--|
|  |  |  |  |  |  |  |  |  |  |  |  |
|--|--|--|--|--|--|--|--|--|--|--|--|

覆陳新疆遣犯酌量變通摺

九月二十四日

奏爲新疆遣犯宜酌量變通謹按部

臣

前奏並就地方情

形悉心會議恭摺覆陳仰祈

聖鑒事竊

臣

鍾麟准刑部咨議覆

臣

錦棠前奏發遣回城

爲奴人犯改歸南路各廳州縣印官安置管束一片請

旨飭下

臣

等通盤籌畫會商議奏等因伏查部

臣

前奏新

疆平靖已久正在招募屯墾似可將改發充軍人犯仍復舊例發往種地當差係爲疏通內地起見嗣奏新疆密邇外夷此例一開人數擁擠設如紛紛逃入異域難保不滋事端係爲慎重邊圉起見一貴隨時補救一貴因地制宜

要在妥籌安插方於時局有裨當飭南北兩路各巡道籌議具詳旋據各該道詳覆前來或稱西四城緊接俄境交涉事多目前兵制未定此等遣犯誠恐羈管難周或稱南路回民生聚日繁荒地不及北路之多郡縣初設百廢具舉於改交州縣役使爲宜或稱北路地曠人稀頻年招徠戶鮮加增若以各省罪犯改發種地用實邊徼誠爲目前至計臣等覆覈均與部議略同但臣順查伊犁距俄僅隔霍爾果斯一河沿途環居隨俄纏頭哈薩克漢回陝回俱非良善各犯照舊發遣於伊犁似不相宜臣秦亦慮撫馭失宜咨商嚴定管束章程以免流弊臣錦棠現在緘商臣

鍾麟通盤籌畫應如部臣前奏所云不必拘泥成法但求於事有濟例載新疆遣犯北路發烏魯木齊伊犁等處南路發回城爲奴今請北路以鎮迪道轄境爲限南路除阿克蘇道轄境應聽酌發外其喀什噶爾道所屬惟和闐直隸州尚有荒地且距外夷甚遠儘可安置此外各屬及伊塔等處均屬極邊衝要毗連俄境應請暫從緩議俟數年後酌量情形再行奏復定地舊例此因地制宜不能拘泥成法者一也溯查道光年間因新疆遣犯擁擠部議酌停二十六項咸豐八年因新疆遣犯日積日多部議改發極邊足四千里充軍加等擬遣者三十八條改發駐防爲奴



者三條至同治九年續纂暫行監禁八條俟新疆道路疏通再行照例發往又改發極邊烟瘴充軍仍以足四千里爲限到配後鎖帶鐵桿石墩二年者十一條又照前改發到配鎖帶鐵桿石墩一年者十四條是新疆人犯擁擠承平時已屬不免今定地較窄勻撥愈難設以數十年停遣一旦起解誠如部議接踵而至難以拘管若待人數擁擠復請停發亦屬不成事體應請將從前業經停遣者概行截止或暫行監禁八條人犯人數不多暫將此項人犯先行起解其餘已改歸內地發遣者悉仍其舊自此次奏定章程奉准部文之日起以後各直省辦理此等案犯照例

發遣仍將年逾五十不能耕作之人毋庸擬發新疆如此  
量爲變通庶於內地無日益加增之患而於新疆亦無壅  
滯之虞此隨時補救不能拘泥成法者又其一也至遣犯  
到配由臣等妥籌安插先儘兵屯察其年力精壯者照章  
發給牛籽口糧按屯均勻撥派種地當差交屯官兵目自  
行管束卽以屯官爲專管官其不能種地者由配所衙門  
於輿轎傘扇水火巡更等夫量爲役使卽給以額設夫役  
應得口分其餘小貿技藝各隨其長後有年老力衰者酌  
量應當差使責令承充俾資養贍均責成巡典官依限點  
驗仍照例各設總散遣頭取具連環保結以資鈐束然此

等遣犯素性不馴狡脫是其慣技必使其心有所懾而不  
敢逃情有所繫而不輕逃查例載民人發往伊犁烏魯木  
齊等處爲奴遣犯在配安分已逾十年止令永遠種地不  
准爲民若發往當差遣犯果能悔過悛改定限五年編入  
該處民戶冊內給地耕種納糧俱不准回籍又例載罪應  
緣坐等項犯屬仍照例簽發其餘發烏魯木齊等處人犯  
家屬均毋庸簽配如有情願攜帶妻室子女者聽其自便  
不得官爲資送各等語新疆邊界甫定諸事草創其撥派  
屯種之犯應請破除成例如原犯爲奴罪名定限五年原  
犯當差罪名定限三年果能安分出力卽編入本地民冊

給地耕種納糧如有能將該處脫逃遣犯拏獲者無論當  
差爲奴仍照例不拘年限准其爲民入籍犯屬除照例僉  
配不計外其有情願攜帶妻室子女者應請量爲資送藉  
以羈縻如此則各犯謀食有資安身有所又得室家相聚  
更遇招徠屯墾之際寬其期限予以自新復與專管官時  
常見面不許遠離散處雖在獷悍之徒當亦奉法維謹如  
再有啓不畏法輒敢逃逸者如係強盜免死發遣新疆給  
官兵爲奴人犯仍照例拏獲後卽行正法餘亦按例分別  
懲辦專管官依例議處倘有行兇爲匪及另有不法情事  
各按罪名輕重查照定例辦理俾知儆懼而免效尤庶犯

徒就此安置不致別滋事端而墾荒實邊之道卽隱寓其中矣所有遵議安插遣犯謹按部臣前奏並就地方情形擬請酌量變通緣由是否有當謹合詞恭摺具

奏伏乞

皇太后

皇上聖鑒

飭部酌議核覆施行再此摺係臣錦棠主稿合併聲明謹奏

軍機大臣奉

旨刑部議奏欽此

已故道員羅長祐懇

恩允照成案附祀片

九月二十四日

再道員羅長祐立功後積勞病故經

臣奏荷

恩綸署甘肅阿克蘇道羅長祐隨同劉錦棠辦理新疆軍務決策戰勝所嚮有功籌辦善後事宜亦能盡心區畫深資得力茲已積勞病故著加恩交部從優議卹並將該故員戰績事實宣付史館以彰勞勩欽此煌煌

天語竹帛比華袞而彌榮藐藐孤

臣

帶礪與山河而並壽

有勞必錄無美勿彰凡在同袍孰不聞風感泣勉圖效命於疆場至建祠曠典非

臣下所敢擅請

聖訓周詳尤應欽遵辦理惟念羅長祐前驅効力原隸湘

軍其戰績事實業經先後奏明不幸齋志以終實能以死勤事切同仇而思將帥怯聽鼓鼙感遺愛而念循良悲悽棠杜茲據署知州陳名鈺呈報該故員靈櫬已於本年八月十二日就道東下所屬纏民扶老攜幼攀舁伏道歔歔泣涕顚蒙之性去後之思愛戴不能自已蓋其平日之綏輯拊循實亦有足多者除俟其靈櫬行抵哈密由臣派員護送回南外合無仰懇

天恩允照道員張宗翰附祀成案准將羅長祐附祀

敕建原任廣東陸路提督臣劉松山蘭州省城專祠以妥英靈而昭激勸出自

鴻施是否有當理合附片陳明伏乞  
聖鑒訓示謹

奏

軍機大臣奉

旨著照所請該部知道欽此





光緒十年十月初八日內閣奉

上諭本年十月初十日恭遇

慈禧端佑康頤昭豫莊誠皇太后五旬萬壽前經降旨令  
吏兵等部八旗都統查明京外實任大員老親候旨施恩  
茲據查明京外大員老親有年逾八十者承歡祿養愛日  
舒長洵屬昇平人瑞允宜優加賞賚欽差大臣尙書銜甘  
肅新疆巡撫劉錦棠之祖母陳氏著賞給御書匾額一面  
紫檀三鑲玉如意一柄大卷江綢袍料二匹大卷八絲緞  
袍褂料二匹用示錫類推恩至意欽此

金華老圃公集卷之二

十一

請註銷革員永不敘用字樣並 賞六品頂戴片 六月十  
再據提督董福祥稟稱現在接防喀什噶爾要邊汛地遼  
闊事務殷繁邊情所繫首在剛柔得宜必須熟悉情形之  
員前往佐理查有已革五品銜甘肅補用知縣龍壽昌前  
在喀什噶爾承辦邊卡數年稔知其歷練已深近在哈密  
差遣應請飭該革員赴喀什噶爾襄理營務等情前來 臣  
查龍壽昌前於安化縣任內因案參革旋於光緒六年投  
効嵩武軍經幫辦軍務 臣張曜委辦喀什噶爾卡倫整理  
一切該員昕宵從事艱苦備嘗嗣是承辦營務均極得力  
張曜書來每稱其勤慎幹練不可多得上年差委到哈 臣

即緘商張曜將該革員暫留臣營迭經委辦要件實屬井

然有條前於新疆六年邊防請照戰功獎敘案內籲懇

天恩飭部註銷該革員永不敘用字樣在案刻值董福祥  
接防之際其間毗連外部接壤俄鄰交涉綦多務在得人  
而理已令該革員迅速馳往期有裨於邊事惟參革人員  
與外夷官商接見恐啟其狎玩之心可否仰懇

恩施賞給革員六品頂戴俾得勉效馳驅出自

逾格鴻慈臣為邊事擇人起見是否有當謹附片具陳伏

乞

聖鑒訓示施行謹

奏

軍機大臣奉

旨著照所請該部知道欽此

軍機大臣奉旨著照所請該部知道欽此

九

卷之三十一

七

張曜一軍開拔遊員替防酌添營伍情形摺十月十日

奏爲幫辦軍務廣東陸路提督張曜一軍遵

旨開拔遊員統軍前往替防並酌添營伍分布填紮情形  
恭摺仰祈

聖鑒事竊臣前奉七月初四日

寄諭飭令張曜一軍迅卽北來聽候調派比經恭錄知會  
因思張曜駐軍喀什噶爾程途過遠換防甚需時日卽遵  
旨詳加酌度仍申微臣前疏率師東下之請以便迅赴事  
機旋奉兩次

批迴均以新疆甫就蕩平密邇俄邊爲念



聖謨廣運塵念邊防之至意張曜自奉初次恭錄  
諄飭毋庸率師東下跪聆之下仰見

聖謨廣運塵念邊防之至意張曜自奉初次恭錄

密旨卽經量料諸務臣於各統將中擇其替防迅速而資

深者惟現駐喀什噶爾之統領董宇定遠軍頭品頂戴題

奏提督雲騎尉世職阿爾杭阿巴圖魯董福祥相距較近

該提督老成練達謀勇兼資從征塞上有年深諳邊務遂

飛檄迅率所部七營旗趕緊拔赴喀什噶爾接防並令總

統原駐喀什葉爾羌之恪靖西征馬隊分防各城另由駐

阿克蘇之湘軍內抽出步隊一營前赴瑪喇巴什以資防

護特喀什噶爾爲極邊要區強鄰逼處外部環伺通商以

來俄人所在覬覦現雖餉項艱絀萬分而該處營伍則勢不宜過於單薄已由哈密新募漢回馬隊二百五十人編爲兩旗起支坐糧飭令趲程赴喀又准張曜緘商該軍近年陸續添補陝甘勇丁欲其遠赴海疆似非所願擬酌留步隊二旗亦照坐糧支給俟編就後歸董提督節制調遣此填防喀什噶爾西四城之情形也其董提督所遺庫車喀喇沙爾防地延袤千餘里防範不容稍懈祇得另募行糧步隊一旗並將哈密協標步兵二百七十餘人添足一旗改支土勇口糧騰出哈密烏魯木齊之靖遠綏定馬步四營旗前往填駐均經先後拔行董提督已於九月初十

日率隊前進張曜已定親率馬步九營於九月十六日由喀什先行開拔暫留記名提督王連三照料後隊一俟接替各營到防再行陸續東下至該軍啟程日期並如何分起取道均由張曜自行具

奏在案臣維新疆防務沿邊一帶比多與俄接壤極關緊要張曜前以幫辦軍務駐喀什噶爾其地最要其望甚隆深資鎮攝此次驟抽該軍六千人以行雖於各處勻撥填紮而添補馬步僅乃數旗較臣前摺議覆兵制數目猶覺減少暫雖勉爲分布究無團紮之師足備緩急值此時局多艱臣惟有飭各將領竭力整頓嚴密防維較之平時慎

益加慎省益求省以稍紓

朝廷之西顧耳所有張曜一軍遵

旨開拔遴員統軍前往替防並酌添營伍分布填紮各緣  
由是否有當謹恭摺具

奏伏乞

皇太后

皇上聖鑒訓示謹

軍機大臣奉

旨該部知道欽此

引張勳公長高

欽定四庫全書

詩

懇 恩豁免關外鎮迪道屬歷年民欠各項銀糧摺十月十六日

奏爲關外鎮迪道屬歷年民欠未完額籽牛價各項銀糧  
籲懇

天恩概予豁免以紓民力恭摺仰祈

聖鑒事竊查關外久經兵燹民多流亡田地鞠爲茂草肅  
清後前督臣左宗棠飭各地方官散給牛籽招徠開墾已

墾熟地應納額糧均照善後章程限期分別征收無如地  
曠人稀迄未一律認墾卽已墾者收成亦甚歉薄其間或  
被旱災或被蝗災或被凍萎或報逃亡據各廳州縣隨時

具稟前來自光緒三年起經左宗棠暨臣錦棠先後委員查勘均屬實在情形各廳州縣積年代征舊欠日事追呼終苦無力輸繳擬請自光緒三年起至八年止鎮迪道屬各廳州縣實在民欠未完市斗額籽牛價借食各色糧一萬八千六百二十七石五斗六升六合五勺四秒五撮四圭京斗額糧一萬七千一百一石八斗二升五合七秒九撮四圭三粟牛價地課銀三千八百三十二兩三錢五分八釐五毫五絲四忽又昌吉縣光緒九年麥收歉薄減免極貧四十八戶三成額征京斗糧四十七石五斗五升三合二勺七秒三撮一圭五粟一律豁免以紓民力其自光

緒九年起以後應征各項糧石由臣錦棠通飭各廳州縣仍照已墾之數征收不准稍有蒂欠並竭力招墾以期速復舊額據鎮迪道轉齎各廳州縣造具請免銀糧清冊詳請具

奏前來臣等覆核無異合無仰懇

天恩俯念邊氓困苦准將鎮迪道屬光緒八年以前民欠各項銀糧並昌吉縣減免九年三成額征糧石概行豁免如蒙

俞允俟欽奉

諭旨後再由臣鍾麟飭司將該各廳州縣民欠各項銀糧



數目分別詳細開載刊刻謄黃徧行曉諭以廣

皇仁而恤民瘼是否有當除將清冊咨部查照外謹會同

署烏魯木齊都統臣升泰合詞恭摺具陳伏乞

皇太后

皇上聖鑒訓示施行再此摺係臣錦棠主稿合併聲明謹

奏

軍機大臣奉

旨另有旨欽此

請豁免鎮西應征額糧片

十月十六日

再甘肅新疆鎮西廳逼近天山山地氣高寒土磽產薄立夏始能布種亂後招墾民多卻顧比歲歉收經臣錦棠隨時撫恤本年入夏以來暘雨愆期六月十五日前後連日朔風積雪數寸春麥稞豆全行凍萎收成失望間有薄收一二三分不等入磨研麩概成黑灰不堪作食據代理該廳同知聞端蘭稟報前來當經臣錦棠委員查勘無異兵燹遺黎招徠粗集歲需牛具籽種均仰給於官司連歉之後遭此大稜杼柚罄空匪獨官本錢糧無力繳完卽日食生計因之頓促紛紛逃徙經臣錦棠飭由奇臺縣撥發倉糧

三千石交該印官擇尤計口散給賑食捐給寒衣俾資生  
活其丁壯人等各飭就牛駕車負販營生並以工代賑之  
類不令一夫失所一面札飭該廳張示曉諭明年仍籌發  
牛種以安其心俾免逃散其巴里坤駐防滿營兵食歲由  
鎮西廳倉糧撥濟由該營自行造銷茲准護領隊臣金貴  
牘稱本歲倉糧無著請飭籌撥前來遂並由奇臺撥給倉  
糧二千石以資接濟再有不敷應由該滿營領獲專餉內  
通挪買補以期兵民兼濟該廳本年應徵額糧並九年民  
欠擬懇

天恩概予豁免以廣

皇仁除撥給倉糧並懇免該廳本年錢糧九年民欠各細數應由甘藩司遵照彙案造銷並由臣等咨部查照外是否有當謹會同署烏魯木齊都統臣升泰合詞附陳伏乞聖鑒訓示再此片係臣錦棠主稿合併陳明謹奏

新編 皇朝通志 卷之八

八

光緒十年十一月初八日內閣奉

上諭劉錦棠等奏關外鎮迪道屬歷年民欠各項銀糧懇  
恩概予豁免一摺甘肅關外久經兵燹民多流亡前經左  
宗棠飭屬散給牛籽招徠開墾迄今尙未一律墾種卽已  
墾者收成亦甚歉薄且間有被旱被蝗凍萎情形若將各  
屬民欠未完銀糧照舊征收民力實有未逮加恩著照所  
請自光緒三年起至八年止鎮迪道屬各廳州縣民欠未  
完市斗額籽牛價借食各色糧一萬八千六百二十七石  
零京斗額糧一萬七千一百一石零牛價地課銀三千八  
百三十二兩零又昌吉縣光緒九年麥收歉薄減免極貧

四十八戶三成額征京斗糧四十七石零一律豁免以紓民力另片奏請豁免鎮西廳應征額糧等語甘肅新疆鎮西廳本年入夏以來暘雨愆期收成歉薄加恩著將本年應征額糧並九年民欠概予豁免該督撫卽刊刻謄黃徧行曉諭務使實惠均霑毋任吏胥舞弊用副軫念民艱至意餘著照所議辦理該部知道欽此

授新疆巡撫瀝陳下悃摺

十一月十五日

奏爲叩謝

天恩並瀝陳下悃恭摺仰祈

聖鑒事竊臣於十一月十一日承准吏部咨開文選司案

呈內閣鈔出光緒十年十月初二日奉

上諭劉錦棠著補授甘肅新疆巡撫仍以欽差大臣督辦

新疆事宜欽此恭錄知照到臣行營感

寵賚之自天倍悚惶於無地比卽恭設香案望

闕叩頭謝

恩訖伏念臣本至愚幼而失學遭時忝竊馳驅戎馬以至



於今其於文獻典籍經遠之略郵治之源卒未得分心研  
究是以智術短淺鮮所貫通而夙患腳氣暈眩諸證積年  
未痊曾經疏請開缺調理未邀

俞允祇以

微臣

受

恩深重身在行間際此時事多艱邊防緊要靖鄰固圉動  
爲全局所系不能不力疾趨公勉圖報稱每奉

恩綸輒累日寢食失次躋跼難安蓋惟質性凡庸是以捫  
心而自愧而

天恩高厚卽令捐踵以難酬此

微臣

所日夜兢兢者也新

疆幅員周廣幾二萬里高踞西北上游屏蔽畿輔

祖宗朝累煩

廟算始隸版輿疆比戎索天下大勢所在舉可知矣

皇太后

皇上啟

中興之景運建萬世之

鴻規命將出師整軍經武廓清全疆而時異事殊沿邊藩  
籬盡撤因時制宜之道計非設省建官不足以策治安而  
規久遠此新疆開設行省之議所由興也嗣經臣遵

旨議覆請照前督臣左宗棠原議量爲變通新疆各道郡  
縣仍合甘肅爲一省添設巡撫布政使等官以資控制敬

按時局遵

旨敷陳業蒙

聖明飭部核准至於封疆大吏任大責重新設邊缺諸凡  
創始允非得文武兼資之員難期勝任臣以軍務麤材不  
習吏事業於光緒八年七月初三日奏請添設撫藩摺內  
縷晰瀝陳早邀

聖慈洞鑒乃

殊恩下逮實爲夢想所不期而對揚

天休彌覺每懷之靡及蓋新疆之必設撫臣者時會之所  
趨也而微臣之自度不堪者才分之有限也不敢居而又

不敢辭者事情之所迫也惟有矢慎矢勤已干已百以期  
仰副

鴻慈於萬一仍乞

天恩俯賜察臣原奏

另簡賢能以重疆寄邊事幸甚微臣幸甚如蒙

恩允臣仍當暫畱行營幫同新任撫臣商辦一切斷不敢

置身事外致負

逾格恩施無任感悚之至除設省一切事宜由臣會商將

軍督臣隨時具奏辦理外所有微臣感激榮幸並瀝陳下

悃緣由謹繕摺叩謝

各事...  
天恩伏乞

皇太后

皇上聖鑒訓示謹

奏

軍機大臣奉

旨覽奏具見悃忱吏治與軍事相表裏該大臣能存敬畏  
籌辦一切自無貽誤著毋庸固辭欽此

軍餉涸竭請嚴催趕解摺

十一月二十六日

奏爲軍餉源涸流竭局勢難支謹遵部議請

旨嚴催趕解以應急需而全大局恭摺仰祈

聖鑒事竊本年西征新餉疊經部

臣

奏准解足八成以上

統限十月以前掃數解清毋得延欠並准分別獎劾前次

截至九月解款僅及三成待饟孔亟復經督

臣

奏經部議

奉

旨著該將軍督撫等嚴飭藩運各司將西征軍餉趕籌大  
批迅速解往俾資應用如能解足八成以上者照案奏請  
優獎倘再任意延欠卽著指名奏參欽此欽遵在案

審謨周運

軫念征夫凡荷戈遠戍之儔莫不同深感涕雖各省時艱同際海防供億浩繁然新疆邊遠苦瘠甲於天下軍餉一切要需純恃協餉接濟久在

聖明洞鑒亦各省疆臣所灼見而深知者也臣軍勇有定額餉有定數解有常期往年協解稍旺儘發各軍七八九關不等欠發之餉假旋全數找給歷經遵辦無異本年八月以前僅能湊解四關嗣因餉源久涸挪湊拮据每營每月酌發銀兩點綴鹽菜仍許餉到照章補發際此海氛未靖微臣寢饋不安但令勢可勉支何敢動煩

宸廩無如十月之限早已過期而截算本年新餉實解到  
甘者僅一百六十一萬六千餘兩臣與關內分別劃提現  
銀祇有此數出入兩抵差短過半頻年應出餉需經臣核  
實確估報部核准委實無可刪減而春閒騰餉裁勇近復  
挪款添募出款愈增入款愈短先已騰挪罄空以故每批  
解款到營隨到隨盡瞬屆歲闌各軍年關滿餉現尙無著  
何以勉繫士心而年外月餉亦難懸待明年新餉散發臣  
軍與協餉各省相距萬里而遙至轉解西路邊防計程又  
遠五六千里懸軍邊徼萬竈待炊而各省關協解近更寂  
寂無聞源竭流枯罔知所措又值微臣欽奉



恩命巡撫新疆張曜全軍業經拔行局勢一變西四城防  
務喫重應由臣部兼顧添募填防兵不能減餉則有加右  
絀左支不堪言狀當開設行省之初除舊更新諸務創始  
揆度事勢情形臣當進駐烏垣控制南北且便與藩司魏  
光燾遇事熟計通籌以免叢脞貽誤然非俟解款稍裕通  
融挹注則設省與舉遷一切要務均屬措手無從臣材輕  
任重羅掘計窮昨已緘商督臣權就蘭垣商號籌借大批  
飛輓應急仍就解到本年新餉劃還以清界限應懇  
天恩俯念新疆一隅關係大局邊軍遠戍待餉孔殷  
飭下協餉各省關將軍督撫等恪遵前次

諭旨嚴飭藩運各司趕籌大批迅速解濟仍遵部議務將  
本年應解西征八成新餉隨後埽數措解赴甘以濟飢軍  
大司幸甚微臣幸甚其金順錫綸兩軍同處窘鄉饑軍裁  
勇需用至急錫綸以書抵臣派員索借臣無以應伏懇  
恩施嚴飭專協省分趕速籌撥合併陳明除十一年新餉  
應由督臣主持行省應辦宜由臣等隨時會商奏明辦理  
外所有餉需涸竭請

旨嚴催趕解各緣由謹會同督臣譚鍾麟恭摺馳陳伏乞  
皇太后

皇上聖鑒訓示謹

奏

軍機大臣奉

旨另有旨欽此

擬借款行用補水等銀片

十一月二十六日

再臣接准部咨議覆南疆工程勢難停緩請撥的款以應要需擬將胡光墉應繳西征借款行用補水等銀十萬六千七百八十四兩並四川山東及江海江漢粵海閩海等關月協烏魯木齊軍餉銀八萬兩一併解交甘肅糧臺作為南路修理工程之用連前次議撥南路城垣礮臺工款於江西等省提解銀十八萬兩合共銀三十六萬六千七百八十四兩先後奏奉

諭旨欽遵各在案除胡光墉一款應俟浙江撫臣於該革員備抵產業內變價解交外其餘各省關應解銀二十六

萬兩內惟山西省及河東道各提銀一萬兩業經報解清  
楚山東省閩海江漢二關亦共先報解銀二萬二千兩此  
外江西湖北湖南河南四川等省江海粵海二關迄今未  
據報解分釐統計欠解銀二十一萬八千兩仰屋興嗟莫  
名焦灼竊臣自檄飭各承修委員估計工費後卽據陸續  
具報興工凡木石鐵炭一切物料及工匠口食在在皆資  
現款適值本年餉項支絀萬分無從挹注地方又無他款  
堪資設法通挪以致屢作屢輟未能限期告竣若再遷延  
時日誠恐倒塌潰裂盡棄前功合無仰懇  
天恩飭下各省關迅將應解前款銀兩限明年春季內埽

數解清不得藉詞延宕俾臣得以分發經手工程各員勒  
限蕝事以竟全功實於固圉綏邊大有裨益謹附片陳明  
並將各省關應解南路工程銀兩已解未解各數目繕具  
清單恭呈

御覽伏乞

聖鑒訓示謹

奏

軍機大臣奉

旨另有旨欽此同日承准知會奉  
諭旨令各將軍督撫等迅解矣

劉襄勤公奏稿 卷八

三

新疆南路擬設佐雜及分防巡檢各缺摺十一月二十六日

奏爲新疆南路道廳州縣擬設佐雜及分防巡檢各缺以資佐理恭摺仰祈

聖鑒事竊查南疆各廳州縣應設照磨吏目典史及各屬轄境遼闊須添佐職分防經臣等奏明承准部覆令由臣

等隨時體察情形會商妥議奏請辦理在案茲據署喀什噶爾道員黃光達護理阿克蘇道員陳名鈺等先後詳稱阿克蘇喀什噶爾兩道所轄廳州縣額徵錢糧通應報道綜覈估撥彙總報銷並有須量爲折變者擬各設道庫大使一員專管收支事件該庫大使衙署應修於道署儀門



之側其庫房則於道署大堂側起造以便主守其溫宿莎  
車和闐疏勒四直隸州設立吏目各一員拜城于闐葉城  
疏附四縣設立典史各一員喀喇沙爾庫車烏什英吉沙  
爾瑪喇巴什五直隸廳各設立照磨一員兼司監獄緝捕  
以上各廳州縣佐雜衙署均緊接監獄俾專責成又阿克  
蘇舊城地當衝衢五方雜處擬添設巡檢一員稽查匪類  
彈壓居民其餘各屬轄境較廣戶民隔居寫遠者擬於喀  
喇沙爾所屬之布告爾適中地方設立巡檢一員葉城縣  
現擬移建哈哈里克其莎車回城擬設巡檢一員資其就  
近彈壓詳請核辦前來

臣

伏查新疆土曠民稀佐雜各員

原未可以多設惟邊遠遼闊長途戈壁誠有鞭長莫及之勢自應酌量添設藉資控制該道員黃光達等察看情形細心商酌所擬尙屬妥協應懇

天恩俯准設立南疆八城佐雜各員缺俾有專司而資治理至此項設立之分防巡檢各缺擬均作爲要缺由外揀補其同城佐雜各員缺照例概歸部選仍懇照吉林新設民官各缺成案統歸因地擇人由外先行揀補一次又臣原奏葉城縣治設立葉爾羌回城于闐縣治設立哈拉哈什現據黃光達詳稱該兩縣治各應改設所轄適中之地擬將葉城縣移建哈里克地方于闐縣治移建克里雅

地方庶資兼顧且免添設分防佐雜等情臣覆查無異批  
令照辦相應請

旨飭部核覆以便遵循除未盡事宜容查明陸續具  
奏外所有新疆南路道廳州縣擬設佐雜及分防巡檢員  
缺各緣由謹會同督臣譚鍾麟合詞恭摺具陳伏乞

皇太后

皇上聖鑒訓示施行再幫辦軍務臣張曜現已入關故未  
列銜合併聲明謹

奏

軍機大臣奉

旨該部議奏欽此

引  
部  
力  
不  
能  
辦  
理  
請  
旨  
行  
部  
議  
奏  
欽  
此

三



哨弁戕斃營官脅眾譁潰隨即撲滅摺十一月二日

十六日

奏爲哨弁戕斃營官脅眾譁潰隨即追捕撲滅首要就擒地方如常靜謐恭摺仰祈

聖鑒事竊駐紮烏魯木齊精騎馬隊營官總兵王玉林由阜康移防未久忽據署鎮迪道英林迪化州知州潘效蘇稟本年十月十五日夜三更時該馬隊後哨哨長趙良敬乘王玉林熟睡率什長楊玉成等攜帶鋤刀悄入臥內猛將王玉林用刀戕斃喉黨持刃迫脅馬勇一百數十人向西譁潰躡追無及餘人越壘奔散等情前來臣錦棠竊計綏來西至奎屯嚮係臣部統領親軍甘肅西甯鎮總兵譚

上連汛地該潰卒倉猝盜兵驚愕無定夙知大道防汛嚴密勢必避而走險惟彼時地已凍合如其繞出安集海則頭頭是道且與伊塔兩城地界毗連不無可慮比飛飭譚上連迅率所部分道攔截相機剿撫查明首要之外脅從免治一面撥營策應並知會金順錫綸密爲戒備臣升泰聞報比飭英林等親往勘驗確查起衅根由收輯在營弁勇歸哨管束會商提臣金運昌專弁執持大令探蹤招撫宣示悔罪免死並傳飭北路印官營汛嚴防截堵殊該潰卒星夜亡命疾馳頃越昌吉而西十六日夜半已繞過樂土驛由綏來縣治東黑梁灣地方取徑西竄時譚上連先

已得報訶知潰卒所嚮隨督同所部署瑪納斯協副將張清和頭起馬隊提督李其森率隊分道攔截次日黎明李其森馬隊已先奪路迎堵譚上連等步隊亦至傳令軍士大呼下馬棄械自首者准撫眾心觀望未定趙良敬情急計生乘招諭之際暗執洋礮向李其森測準竊發洞中右顴登時殞命並嗾楊玉成等齊放槍礮怒馬衝突譚上連揮隊圍攻陣斃潰卒十餘名奪獲旗幟矛桿二十餘件洋槍十一桿戰馬三十餘匹生擒四名薄至河岸斫斃二名官軍亦有傷折趙良敬等潰圍向西南鄉牛圈子一帶狂竄分合不定官軍以步當馬跟蹤躡適十八至二十一



等日連霈大雪道路瀰漫莫辨軍士耐寒窮追墮指裂膚苦難言狀二十二日初更時追至湖家海子該潰卒全股麇聚民莊拚死抗拒譚上連率隊層層合圍陰輓柴草次日黎明督隊環攻槍礮齊發一面縱火焚堡且轟且燒一鼓殲滅生擒十餘名奪獲戰馬一百餘匹洋槍矛桿一百三十餘件突圍逸出者不過二十餘騎訊據擒犯供稱趙良敬冒火遁走楊玉成業已陣斃官軍陣亡七員名受傷二十四員名其牛圈子等處逃逸零騎經綏來縣知縣李原琳已革都司趙興體所調民團馬隊沿途截殺擒獲共四十餘名據譚上連李原琳先後稟報到臣錦棠行營飭

卽錄供詳報候奪惟趙良敬實爲此案渠魁罪不容誅並在逃各犯亟應嚴拏按治正懸賞緝拏間旋據統領安遠軍甯夏鎮總兵譚拔萃呈報趙良敬同餘犯劉正乾喬禮和等三名騎馬三匹業據署濟木薩縣丞曠琦弋獲同該營派去巡查押送古城訊據趙良敬供年四十七歲安徽宿州人嚮來在營喫糧光緒八年由精騎馬隊右旗撥歸後營本年二月陞充後哨哨長王營官每次領到餉銀當堂發散並無剋扣惟遇事督責鞭打辱詈令人難堪該犯前次督隊修路遭其怒罵罰跪多時懷憾在心十月十三日合操又被痛辱中哨史金山楊玉成首先倡率平日積

各人共推該犯作主議乘間殺害王營官洩忿遠遁連  
日集議不定微露風聲該犯懼事情敗露禍生不測十五  
日乘正副哨長內有四人出差未回定更後暗邀史金山  
暨同謀之二十餘人齊集後哨三棚定議三更後探聽王  
營官熟睡該犯一千各執馬刀在外堵禦斷其救援楊玉  
成手持鋤刀闖入臥內將王營官猛刀砍斃迫脅各哨隊  
一百餘人騎馬乘夜同逃日夜兼程將到瑪納斯被官軍  
截住大路混打一仗多有傷亡計議去嚮各人意見不合  
致馬彪帶十餘人爲一起楊玉成帶數十人爲一起該犯  
同史金山爲一起各投小路分竄二十二日楊玉成一股

仍在湖家海子會合不料官兵抄至致被圍住該犯由後門乘間率十七騎衝出棄械向東逃命昨到大龍口民家借宿被拏送案所供是實劉正乾喬禮和供詞略同已交縣鎖解赴哈訊辦並鈔具逸犯名單齎呈前來臣錦棠查趙良敬供詞核與英林等原報情節相符其無起衅別故似無疑義應俟趙良敬解到臣營覆訊定奪至西征馬隊原以二百五十騎爲定額該馬隊譁潰後隨經英林赴營點驗未潰人數實存弁勇六十一名續後連日逃回收伍通計存營哨長六員名正勇八十八名火勇十二名核計潰卒實止一百四十餘名據昌吉綏來營縣原報並裹脅

人數約近二百名經官軍兩次堵殺圍撲暨民團擒斬核與原潰人數無甚參差惟據犯供馬彪另起十餘騎又同逃之十七騎尚有十四名在逃未獲要犯史金山已否伏誅仍由臣嚴飭確查通緝務獲歸案訊明分別核辦斷不敢稍涉枉縱被戕之王玉林已據報驗右面受鋤刀砍傷一處從耳際起橫斷頭頸過半屍具殞殮淺厝存營弁勇由臣錦棠委員管帶其昌吉綏來之西南各鄉被害民戶被燬村堡已飭該縣履勘極力撫恤毋任一夫失所此精騎馬隊倉猝譁潰業經追捕撲滅辦理之實在情形也臣查王玉林本皖軍舊將前督辦臣左宗棠委帶精騎馬隊

治軍嚴整遇事奮勉臣等均所素知惟馭下嚴峻致罹斯禍幸賴

威稜遠懾譚上連等赴機迅速浹旬之間全股撲滅首要就擒地方如常靜謐足紓

宸廑臣錦棠忝司邊寄疏於防範應請

旨交部議處所有陣亡記名提督李其森應懇

天恩飭部從優議卹以彰勞勩而慰忠魂至總兵王玉林戰績卓著茲因治軍稍嚴猝被戕害可否一併

賜卹之處出自

鴻施其餘陣亡弁勇容臣錦棠查明照例辦理除譚上連

暨出力將士由臣分別記功獎勵外所有哨弁戕斃營官脅眾譁潰隨即追捕撲滅首要就擒地方如常靜謐各緣由謹會同督臣譚鍾麟提臣金運昌合詞恭摺具陳伏乞皇太后

皇上聖鑒訓示再此摺由臣錦棠主稿合併聲明謹奏

軍機大臣奉

旨覽奏已悉所有要犯史金山並在逃未獲各犯仍著飭屬嚴拏務獲究辦劉錦棠疏於防範咎有應得惟辦理尙爲迅速所請交部議處著加恩寬免李其森著交部從優

議卹王玉林著交部議卹餘依議欽此





試署直隸州知州員缺請實授摺

十二月二十日

奏爲新設邊要直隸州知州員缺揀員試署著有成效懇請實授以資治理恭摺仰祈

聖鑒事竊全疆甫就盪平遺黎初集南路新設郡縣諸凡創始纏民語言文字隔閼不通與內地情形迥別州縣爲親民之官非得明幹耐苦邊情熟習之員久於其任安輯撫綏難資治理臣前奏設南路各缺請照吉林新章由外揀補一次當經部臣覆准由臣先後委員試署在案又前奉部章甘肅升調補缺變通辦理無論何項缺出擇人地相宜之員請補俟軍務告竣另起序補班次各等語茲查

溫宿直隸州知州地當冰嶺衝要轄境遼闊撫馭率屬政務殷繁應作爲衝煩疲三項要缺疏勒直隸州知州撫輯回氓兼需彈壓外部現值辦理工務中俄交涉事繁應作爲衝煩疲難四項要缺以上二缺臣營無合例堪以請補之員該署溫宿直隸州知州甘肅候補知府陳名鈺老成穩練爲守兼優署疏勒直隸州知州分省補用知府蔣誥性情質直通達治理該二員均在甘肅新疆軍營歷練有年其於邊徼形勢土俗民情最爲熟習上年八月間委署斯缺設官之初經營部署講求吏治遇事躬親地方日見起色現屆試暑期滿輿情愛戴未便遽易生手應請補授

各該員實缺俾得從容展布期收成效雖以知府借補直隸州知州員缺銜缺稍有未符但人地相需例得專摺奏請除將該二員詳細履歷謹另繕清單恭呈

御覽外合無仰懇

天恩俯念邊陲員缺緊要難拘成例准以三品銜升用道甘肅候補知府陳名鈺借補溫宿直隸州知州員缺以道銜分省補用知府蔣誥借補疏勒直隸州知州員缺實於邊疆吏治民生大有裨益如蒙

俞允容俟接准部覆卽行給咨送部引

見以符定例臣爲邊才難得因地擇人起見是否有當謹

會同陝甘督臣譚鍾麟恭摺具陳伏乞

皇太后

皇上聖鑒訓示施行謹

奏

軍機大臣奉

旨吏部議奏單併發欽此

新疆命盜重案難照內地舊制遵部議擬辦摺

光緒十一年二月十一

二日

奏爲新疆命盜重案礙難遽照內地舊制並遵部議擬辦緣由恭摺具陳仰祈

聖鑒事竊臣准刑部咨開議奏嗣後新疆命盜等案應照例定擬罪名專摺奏明請

旨俟奉准部覆將應行立決人犯再行處決應入情實緩決各犯歸入秋審辦理其遣軍流徒各犯卽於南北互相調發等因奉

旨依議欽此仰見

朝廷明慎用刑矜恤庶獄之至意臣自應恪遵辦理惟新疆情形與內地迥別蒙回雜處種類繁多泯泯棼棼罔知畏法加之地方遼廓稽察難周游勇潛蹤動輒滋事若輩視搶劫殺人以為故常臣前於命盜案件奏請變通辦理原期辟以止辟而數年來劫殺之風猶未盡息蓋習染既深非旦夕所能丕變也查例載新疆地方兵丁跟役如有白晝搶奪殺人及為強盜等事該辦事大臣審實一面奏聞一面就地正法等語是新疆命盜案件承平之時已與內地立法不同又查關內各直省近年游勇搶劫殺人等案皆係就地正法尙未規復舊制況關外諸凡草創新設

州縣監獄未備若以亡命死囚久拘縲紲設有疏失逃入鄰境爲患滋深揆諸現在情形礙難遽照內地舊制合無仰懇

聖明垂察准將凌遲斬絞立決及秋審例實入勾各犯仍照變通章程辦理按季摘由奏報咨部立案俟數年後再行體察情形奏請辦理此外斬絞監候入緩人犯照例應歸秋審惟新疆所屬州縣距省遠者五六千里長途解犯匪特易滋疏失且恐屍親人證拖累難堪若僅憑州縣爰書又慮近於簡率再四思維惟有責成該管州道層遞加看如案情未確擬罪未協均就近提審統咨兼按察使銜



鎮迪道覆核轉詳再由臣按例定擬庶於變通之中仍寓  
慎重之意刻下案犯既未便照例解勘則秋審自難舉行  
擬請照內地舊事秋審之例屆時造具罪犯清冊咨送刑  
部核議內有改流及仍應監候者均候部覆祇遵至此項  
斬絞監候秋審入緩各犯原擬監禁五年四年折責省釋  
誠如部議未免過輕擬將此項人犯及遣軍流徒各犯嗣  
後均按例定擬隨時分別奏咨聽候部覆辦理其遣軍流  
徒等犯亦遵照部議南北互相調發仍按罪名之重輕定  
地方之遠近以昭平允而示區別據藩司魏光燾署鎮迪  
道兼按察使銜英林議擬詳請具奏前來臣覆核無異所

有新疆命盜重案礙難遽復內地舊制並遵部議擬辦緣  
由謹會同陝甘總督臣譚鍾麟署伊犁將軍臣錫綸恭摺  
具陳伏乞

皇太后

皇上聖鑒訓示施行再烏魯木齊都統臣升泰現在丁憂  
故未列銜合併陳明謹

奏

軍機大臣奉

旨著照所請刑部知道欽此

皇朝通志 卷之二

三

請 卹文藝等片 二月二十六日

再新疆南路各城自同治初年漢回安明等肇亂相繼淪陷所有西四城歷年陣亡殉難滿蒙文武員弁及各伯克等經 臣 飭據各善後局員採訪開具銜名清單咨送前督 臣 左宗棠奏請

飭下吏兵二部及八旗都統核明有無譌錯隨時更正分別從優議卹在案 臣 接綰兵符復飭逐加採訪據庫車善後局道員黃光達稟稱同治三年四月逆回田滿拉蘇滿拉同到庫車勾通漢回馬三保馬瀧二等圍城時英吉沙爾領隊大臣文藝告病回旗道經庫車與該處辦事大臣

薩臨阿會同守城因賊眾兵單至五月初三日城陷文藝  
薩臨阿及其家屬同時殉難並據聲明該大臣等有無升  
銜籍隸何旗無從查考上年准哈密幫辦臣祥麟交出正  
黃旗滿洲二甲松全佐領下三品頂戴三等侍衛兼騎都  
尉圖晟呈稱故父文藝由藍翎二等侍衛補頭等侍衛班  
長於道光二十七年補德州城守尉三十年調補京口副  
都統後補烏什辦事大臣同治二年調署英吉沙爾領隊  
大臣旋告病回旗於同治三年四月行抵庫車適值逆回  
之變與薩臨阿協力守城賊眾兵單城被攻陷圖晟故父  
及庶母秋氏王氏弟圖昌圖昇妹大姑家人徐忠蘇昇李

福李順僕婦李氏等三口使女二口共親丁人等十五名  
口同時殉難呈懇轉查各等情請

奏前來臣覆查該故員文藝及其家屬一門殉難遺骸委  
諸沙磧死事情形殊爲慘烈合無仰懇

天恩飭部從優議卹並分別

旌表以彰忠節而慰幽魂其庫車辦事大臣薩臨阿同時  
殉難並懇

飭部從優議卹惟薩臨阿籍隸何旗由何項官階何年補  
授名字有無譌錯臣行營無案可稽伏懇

飭下吏兵二部及八旗都統通查往年冊籍互相稽考如

有譌錯隨加更正以期核實理合會同陝甘督臣譚鍾麟  
伊犁將軍臣金順謹附片陳明伏乞  
聖鑒訓示謹

奏

軍機大臣奉

旨文藝薩臨阿均著交部從優議卹餘依議欽此

新疆驛站經費請參酌部議量爲變通摺

二月二十六日

奏爲新疆歲支驛站經費刻難一律照例請仍就現在情形參酌部議量爲變通恭摺覆陳仰祈

聖鑒事竊

臣

前奏新疆南路郡縣暨哈密巴里坤軍臺一

律仿照北路改爲驛站一摺現准部

臣

議覆哈密並南北

兩路同通州縣共設一百五十驛馬一千七百十六匹核與例額數目有減無浮應請照准至驛書一名照例月支工食銀一兩五錢兩馬一夫每名照例支半年本色糧六石半年折色銀六兩每馬一匹照例日給草料銀八分歲支站價銀三兩四錢二分五釐倒馬照例二分報倒買補



馬價應照甘肅定例每匹准銷銀八兩其餘浮多銀兩麩  
筋油燭紙張料草概應刪除等因奏奉

諭旨允准欽遵咨行到臣查甘肅驛站軍塘原額續增合  
計關內外共設馬六千三百五十餘匹夫三千六百餘名  
並所牛拉車馬夫歲共需銀二十五萬七千餘兩新疆既  
設行省驛站卽應分撥計東自哈密猩猩狹起西至喀什  
噶爾以達和闐州本城驛止共六千九百餘里北路亦二  
千八百餘里較他省站口道里悠阻過半甘省驛站前經  
督臣譚鍾麟認真裁減僅酌留東西大道甯夏西甯兩府  
驛馬一千六百八十餘匹夫一千三百四十餘名此外如

安西玉門軍塘暨鞏秦階等處偏僻各驛夫馬無多歲共需銀十萬六千餘兩節省經費爲數甚鉅新疆久經兵燹長途戈壁或十餘站或六七站全無耕種中間各驛食糧料草均由遠道搬運而來需用一切勞費倍蓰且民間傭作每日率取值二三錢較關內輒昂數倍若使在官人役終年所入尙不及傭值之十一亦誰肯舍其藝事枵腹從公臣前奏設新疆各驛共設馬一千七百餘匹較甘肅徵有所增夫僅八百餘名較甘肅實已大減蓋以餉項支絀不得不格外撙節然非厚其工食使之足敷養贍則在役者勢必紛紛求去竊慮有誤郵傳以故少設夫馬優給餉

精挹彼注茲爲一時權宜之計並聲明局勢大定元氣漸復再隨時酌核減支非遂以此爲定例也然合新疆南北兩路歲共支銀五萬餘兩較之從前支款裁減已多以關內外原額續增二十五萬七千餘兩之數計之節省將及十萬在部臣體念時艱自應律以成例然事經創始又必因地制宜兩得其平始無窒礙茲謹就部臣原議詳加斟酌所有馬料草價歲支站價買馬價銀倒馬分數及扣建減平截曠等項均應如部臣所議其每驛月支油燭紙張銀三兩每驛書一名月支工食銀四兩八錢每夫一名月支工食銀三兩仰懇

天恩俯念邊荒寒苦人役艱辛准照臣前議支給並准月支白麪四十五觔各於應得工食銀兩項下酌扣價銀六錢按月報繳以示限制於撙節之中仍寓體恤之意庶幾州縣可免賠累民間永無差派驛遞可期迅速矣一俟招徠漸廣隨時察酌情形奏請核減實於郵政大有裨益是否有當謹會同陝甘督臣譚鍾麟合詞恭摺覆陳伏乞

皇太后

皇上聖鑒訓示施行謹

奏

軍機大臣奉

刑部功人奏高

欽定四庫全書

旨著照所請該部知道欽此

四

歷年欠發軍餉懇

飭提款清釐摺

二月二十六日

奏爲遵

旨查明臣軍歷年欠發軍餉實數照依部議截算至光緒十年止以清界限並懇

天恩飭部指提的款解甘清釐以昭大信恭摺仰祈

聖鑒事竊臣前准部咨遵

旨會議具奏臣錦棠原奏統籌新疆兵餉官制屯田情形以規久遠一摺恭錄

諭旨咨行到臣行營除欽遵辦理外查部咨後開現議汰畱兵勇各軍欠餉實數臣部尙難核計應截至光緒十年

各軍營  
止令該大臣等將現存兵勇實數若干歷年欠發某營某  
年餉項實數若干於光緒十一年正月間一面具奏一面  
分晰造冊送部酌量奏明辦理等因 臣惟西征軍餉嚮由  
前督 臣左宗棠按照所轄馬步實在人數需餉實數通盤  
確估奏明請

旨飭經部 臣核准指撥協濟果令報解之數各如指撥之  
數則以入償出年清年款軍需各就清釐營餉安有積欠  
無如每年牽算協餉實解之數至旺不過六七成少則四  
五成不等左宗棠前因軍餉匱乏酌量變通每年每營照  
章發給滿餉三關餘月酌發銀兩點綴鹽菜其餘欠發之

餉按名存記凱撤假旋之日由該管將領截算清楚申送  
行營照冊點驗如數滿發不折不扣在公中稍資周轉在  
兵勇藉免花銷相示以誠相要以久以故時閱十餘年師  
行萬餘里仰賴

朝廷威福繹如秩如臣於光緒六年十月間接綰兵符准  
左宗棠移交關外馬步餉需一切出項歲需銀三百七十  
餘萬兩欠發各營餉銀二百五十餘萬兩經臣與督臣等  
極力裁減每年尙需實餉二百七十餘萬兩各省如能將  
協餉按年解足則騰挪節縮酌盈劑虛所有歷年舊欠自  
可勉圖補苴不致重煩



聖朝實錄卷八  
宸廩伏查西征協餉除光緒四年以前各省關欠解銀三千一百六十餘萬兩遵照部議停緩外其五年以後應解足十成九十等年應解足八成以上疊經欽奉

諭旨飭遵在案現計此六年之間續欠甘餉又增至一千一百數十萬兩各省之款解日短此臣軍之欠餉所由日增也從前奏銷截至光緒八年止臣軍共欠發馬步各營旗存餉湘平銀二百一十五萬三百四十一兩二錢一分七釐九毫九絲七忽六微茲截至光緒十年止除支發外實欠發各營存餉湘平銀二百八十五萬五百九十兩八錢四分七釐七毫五絲七忽八微此各軍欠餉截算至光

緒十年止之實在銀數也據行營糧臺道員王久銘呈報  
前來臣覆查無異竊維臣軍遠戍邊陲如楚軍西征恪靖  
各營均由左宗棠舊部撥歸統轄老湘各軍係隨臣轉戰  
關內嗣復率同出塞閱年既久時異事殊從前裁併凱撤  
輒因餉項有限先儘疲弱假歸現查欠餉最鉅勇丁均係  
多年老卒鋒鏑餘生錙銖積累始能具有成數萬山萬水  
旅費恃茲父母妻子事畜恃茲或遣或畱已多缺望乃前  
之歸者欠餉均已全發而後之歸者欠餉忽將折發撫今  
追昔能無寒心

聖朝厚澤深仁超邁往代賦不議加餉無折扣薄海軍民

胡戴

皇仁與天無極其所由來者久矣臣原奏陳明欠餉不宜折發者此也本年甘肅新餉業經部臣通籌指撥嚴定考成當無不給之慮惟欠餉鉅款尙屬虛懸息息如堆重負上年冬間指望八成新餉旺解藉得稍資清釐經臣據實奏明欽奉

諭旨嚴催趕解祇候日久而報解之餉仍屬寥寥查上年西征協餉入款江蘇安徽解足八成河南山西約解七成湖南約解六成四川湖北僅解四成數分其餘江西山東浙江閩海等處解款僅及二三成不等蓋海防喫緊且有

代還洋款出項閩浙諸省先其所急力難兼顧西餉勢所  
必然至若四川河南等省現有本年應解協甘新餉湖北  
亦有川省抵撥之餉各省才力能否兼籌上年欠餉微臣  
無由懸揣縱令各省關恪遵

諭旨關懷大局竭力措解未必悉能如數且舊餉嚮與關  
內四六成劃分杯水車薪於臣軍欠發鉅款終鮮實濟勢  
必致如部臣所慮率將新餉填補舊欠又啟新虧愈累愈  
深伊于胡底臣原奏舊勇裁畢統改坐糧新疆每年節省  
兵餉不少然欠餉最多各營均係行糧必待專籌的餉解  
營陸續撤舊換新遞將行糧漸改坐糧俾微臣得釋重負

而餉需從此節省於

國計邊防實多裨益再四思維惟有籲懇

天恩俯允飭部專指光緒六年以後協濟西征省分欠解  
項下如數指提的餉二百八十五萬兩分年分批掃數撥  
解再無延欠臣得有所藉手及早清償舊欠改定坐糧邊  
事幸甚臣愚竊謂提各省欠解西征之餉補西征欠餉之  
軍在部臣免從新籌措之煩在各省關爲協濟應解之款  
爲期不迫爲數有限當必力籌解濟不致頻煩

聖慮臣忝邊寄時懼隕越愚慮所及是否有當敬聽

宸斷其臣軍馬步弁勇名額並駐紮地段業經照章按季

造冊送部光緒八年以前欠發營餉實數亦經照章造銷  
各在案其九十兩年欠餉實數茲已分年趕造細冊容俟  
咨由督臣會核具奏此次邀免另造細數以省煩牘關內  
欠餉應另由督臣譚鍾麟奏明辦理合併聲明所有遵  
旨查明臣軍歷年欠發軍餉實數照依部議截算至光緒  
十年止以清界限並懇

天恩飭部指提的款解甘清釐以昭大信各緣由謹會同  
督臣譚鍾麟恭摺馳陳伏乞

皇太后

皇上聖鑒訓示施行謹

奏

奏

軍機大臣奉

旨戶部議奏欽此

軍機大臣密寄光緒十一年三月初五日奉

上諭希元奏中俄疆域毗連東西橫亘萬里防務莫重於吉林至伊犁塔爾巴哈臺庫倫黑龍江各城無事自宜慎固封守有事卽須合力圖維等語所見甚是思患豫防必須未雨綢繆之計該將軍大臣等務當督率所屬於中俄交涉事件持平妥辦毋啟釁端平時整頓營伍並於邊情地勢畱心偵察隨時密陳一面互相知照設遇有警候旨擇宜進取在我則聲勢聯絡在彼則接應不遑庶足壯軍威而弭外患希元原片著鈔給文緒等閱看將此各密諭知之欽此





移營烏魯木齊日期摺

三月初六日

奏爲

微臣

移營晉駐烏魯木齊行省日期恭摺仰祈

聖鑒事竊

臣

前欽奉

恩命補授甘肅新疆巡撫比經恭摺叩謝

天恩並瀝陳下情未邀

俞允當時事孔棘之秋正犬馬圖報之日自應勉膺艱鉅  
何敢有外

生成竊維全疆地處極邊幅員遼廓行省諸務創始舉凡  
兵餉吏治屯墾起廢振興在在均關緊要而強鄰逼處整  
軍經武尤爲今日要圖臣以愚昧膺茲重任竊慮弗勝惟

有恪遵

聖訓敬畏時存庶幾勉竭駑駘少酬

高厚哈密爲南北樞紐論行軍轉饟呼吸相通本屬新疆  
要地然此時既設行省局勢迥別臣當及時晉駐烏魯木  
齊暫居行營規畫一切業於前奏陳明適據藩司魏光燾  
稟報已於本年二月二十二日由蘭州啟行西來臣準期  
三月初六日率親兵隊伍由哈密晉駐烏垣後路權畱行  
營營務處辦理哈密糧臺道員王久銘兼帶湘軍步隊中  
旗官馬隊一起合哈密協營土勇一旗分紮操防兼護饋  
運至行省應辦各事宜頭緒繁多擬俟微臣抵省後悉心

體察隨時隨事與金順譚鍾麟等和衷商酌督同魏光燾  
熟計兼籌次第奏明辦理再甘肅新疆巡撫布政使兩缺  
係屬新設應懇

天恩飭部擬篆巡撫關防模式一顆布政使印模一顆恭  
候

欽定鑄造頒發啟用以昭信守合併陳明所有

微臣

移營

晉駐烏魯木齊行省日期各緣由謹具摺馳報伏乞

皇太后

皇上聖鑒訓示施行謹

奏

軍機大臣奉

旨該部知道欽此

登覆各營應支雜支章程摺

三月初六日

奏爲關外各營旗應支月餉及一切雜支章程開單立案  
經部臣分別准駁謹逐款登覆籲懇

天恩飭部查核准銷以昭覈實恭摺仰祈

聖鑒事竊臣前將關外應支月餉及一切雜支等項開單  
奏明立案欽奉

諭旨該部知道單併發欽此嗣准戶部咨開核覆前項各  
款分別准駁鈔單知照到臣當經轉飭行營糧臺查核議  
覆去後茲據督辦行營糧臺陝西候補道王久銘詳稱遵  
查准駁各條檢對歷年支發各款成案參酌現在情形逐

一細心妥議如營餉則分別行糧坐糧勇數陸續裁併有減無增南路設官分職前設善後總分各局已從十年正月以後次第裁撤改歸地方官辦理未裁以前已支款項應請核銷其九年底止酌留之保甲十六局暫難裁撤蠶桑總分各局已擬裁撤五分局其蠶織總局蠶桑六分局未便全行裁撤均已於清摺內聲敘明晰至庫車喀喇沙爾吐魯番各處原設軍裝硝藥各局及沿途柴草局站曾經陸續分別撤留隨時詳明在案新疆南北兩路情形不同豐歉亦異光緒六年分報收各色京斗糧三十四萬七千餘石內惟南路爲最多北路自兵燹之後人民稀少由

官設法招徠籌給牛籽農具八年徵獲各色糧石無多分防各營自喀喇沙爾以東至哈密自哈密以北至精河各軍馬步營旗需用糧料皆須採運是督催糧運屯採採運各局應請暫緩議撤湘楚各軍員弁勇夫津貼米折銀兩已於九年秋季概行停支義學牛痘經費本屬地方官應辦之事除由軍需項下已支款項應請核銷外嗣後應如何就地方籌款支給及房租雜稅能否足敷義學經費之用應由各該管道妥議辦理謹遵照將關外營餉局費及一切雜支等項核明逐款登覆繕呈清摺詳請鑒核奏咨立案以便報銷等情前來 臣查餉項出入



國帑攸關不容絲毫浮濫部臣綜理度支先於奏報立案章程詳加考核以杜濫支冒銷自屬實事求是之道惟新疆僻處窮邊幅員遼闊卽南北兩路同屬新疆亦有相距至五六千里者浮沙鹼灘戈壁觸目皆是可耕地土不過十分之二所需食用各物全賴內地各省以車駝運載而來價值本異常昂貴兵燹後南路漢民及北路子遺寥寥無幾因之商賈罕到物價較承平時更增數倍臣軍員弁勇夫匠役多係東南各省之人邊荒遠役時切歸思亦人情所不免若不厚給薪糧稍加體恤斷難踴躍從事現值時事多艱餉項奇絀

宵衣旰食昕夕不遑

微臣

具有天良自應力求撙節以期

餉不虛糜數年以來與營務糧臺各員逐一講求將左宗棠所定章程酌量變通於可裁節者卽行裁節諸凡歸併馬步營旗汰裁臺局員弁擬定兵數餉數實已省之又省其礙難議裁議減之款不得不仍照舊章支發查核道員王久銘詳齎逐款聲覆清單均係新疆實在情形合無仰懇

天恩飭部照單悉予核銷自九年起有應遵照裁減者有應歸併者有因地制宜暫難循例者有按照成案辦理仍須略爲變通者仰乞

恩施飭部分別立案免予核駁邊事幸甚所有關外支發各款章程現准戶部核駁各條謹已逐一登覆除咨戶部查照外謹繕清單恭呈

御覽伏乞

皇太后

皇上聖鑒訓示施行謹

奏

軍機大臣奉

旨戶部知道單併發欽此

辦結精騎馬隊潰勇片

三月初六日

再精騎後營哨弁趙良敬戕斃營官脅眾譁潰隨經追捕撲滅首要就擒各緣由前於上年十一月二十六日經臣等奏明欽奉

諭旨覽奏已悉所有要犯史金山並在逃未獲各犯仍著飭屬嚴拏務獲究辦劉錦棠疏於防範咎有應得惟辦理尚爲迅速著加恩寬免李其森著交部從優議卹王玉林著交部議卹餘依議欽此跪聆之下感悚莫名當卽欽遵咨行辦理嗣據各屬陸續弋獲並先時陣擒緝拏送案之首要各犯趙良敬等共計七十四名其已解烏魯木齊各

犯派委署理鎮迪道英林督同迪化州知州潘效蘇研訊  
確供詳由臣升泰提訊咨照定案起解哈密各犯派委總  
理營務處道員袁垚齡督同署理哈密通判婁紹豫研訊  
確供詳由臣錦棠提訊定案以期情罪相當無枉無縱竊  
維趙良敬身充哨長竟敢逞忿造謀戕害營官脅眾拒捕  
致釀巨案實屬情浮於法罪不容誅要犯史金山王世田  
等十一名起意同謀怙惡不悛從犯劉正乾等二十名同  
惡相濟目無法紀均屬罪無可逭各據供認前情不諱自  
未便久稽顯戮當於哈密行營將該犯趙良敬凌遲處死  
並梟首傳示王世田一併斬梟史金山等十名均飭就地

斬決梟示劉正乾等二十名均各就地正法以肅紀綱而  
昭炯戒餘犯內除在監病故一名外其餘四十一名均經  
確切訊明實係臨時被脅並未抗拒官軍情有可原仍由  
臣等分別杖責鎖項遞解各該原籍交地方官管束以免  
滋生事端除在逃之馬彪一犯仍勒限嚴飭通緝外所有  
獲犯辨結緣由謹合詞附片馳陳伏乞

聖鑒訓示再此片係臣錦棠主稿合併聲明謹

奏

軍機大臣奉

旨知道了逃犯馬彪仍著嚴拏務獲懲辦欽此

卷之八

八

伊犁匪徒勾勇劫殺經防軍撲滅摺

三月初六日

奏爲伊犁匪徒勾結營勇戕官劫殺向東潰竄經防軍攔截撲滅現在趕緊緝拏餘匪籌辦大概情形恭摺仰祈

聖鑒事竊

臣

錦棠於本年二月二十二日據駐防綏來統

領親軍西甯鎮總兵譚上連稟稱據分防奎屯左營管帶官陝西漢中鎮總兵戴宏勝文稱據探報二月十三日夜間伊犁綏定城突有匪徒勾結營勇誑稱吉江馬隊官兵乘夜搶劫南關漢民鋪戶向東潰竄經伊犁將軍金順派隊追捕微有擒斬連日駛過三臺四臺合沿途裹脅共有五百餘騎十五日亥刻已抵大河沿旋據續報此起叛卒



查係強勇馬隊暨親兵營步隊夥結匪徒藉開餉爲名倉卒肇變伊犁南山游匪乘風烏合以致人數眾多等情屢據北路營縣稟報情形約略相符臣比飛飭譚上連迅率中右兩營行隊定邊一起馬隊星夜馳赴奎屯臺與戴宏勝合隊會同西路防營相機攔截一面檄調駐紮烏魯木齊等處之安遠左旗總兵王文安定邊四起馬隊總兵查春華精騎後旗提督湯詠山並定邊二起馬隊提督張復良各率行隊向奎屯疾進統歸譚上連調遣又調駐紮開展之定邊三起馬隊提督張懷玉古城之安遠中右兩營旗副將譚用賓知縣劉兆松移紮烏魯木齊統領蜀軍巴

里坤鎮總兵徐占彪移紮古城以期聯絡而便策應臣升  
泰先於二月十八日據署鎮迪道英林並各處稟報前情  
比經飛飭前途地方文武各官嚴密防範檄派查春華率  
帶該起馬隊馳往會剿咨會臣錦棠查照嗣二十八日據  
譚上連報稱現經率隊倍道馳抵三道河探得十八日該  
叛卒竄至精河口被官軍截住聲言乞降旋復闖越東奔  
經統領卓勝營提督馬玉崑統領英字營提督徐得標揮  
隊堵剿生擒匪首何偏頸等三名陣斃叛卒不少其脅從  
人眾長跪乞撫馬玉崑等悉行收畱請示辦理殘黨二百  
餘騎向西湖一路竄走馬玉崑徐得標各率騎隊尾追一

十日五更及賊於東井子一鼓撲滅僅贖數十騎向塔爾巴哈臺之臺路地方逐突遁去馬玉岷等跟蹤躡譚上連得報卽將步隊畱駐安集海隨派馬隊分向頭臺沙灣九架樓等處及南山各隘口節節搜捕等情呈報前來當經批令照辦並飭調派各營旗權就所紮地段設卡分隊搜捕餘匪沿途營汛印官一體加意嚴密緝拏務期盡絕根株不畱餘孽此<sub>臣</sub>等會籌防剿伊犁叛卒並防軍截剿撲滅之大概情形也嗣於二十九日接准金順咨開本年二月十三日晚間營務處親兵小隊向該營官萬陞索餉勢甚兇悍彈壓不止突有外來漢回百數十人勾結入營

遽然譁潰殺傷官勇數人萬陞亦被戕害蜂擁出營約有  
三百餘人當派伊犁鎮總兵劉宏發帶所部禮字各營並  
親兵衛隊馬步追剿至三工地地方陣斬百餘名奪獲馬械  
各百餘件生擒二十餘名劉宏發尙未收隊訊供咨照通  
緝臣伏查來咨係二月十七日由伊犁發驛後路傳聞異  
詞事情瞬變是以情節稍殊除一切詳晰情形應由金順  
自行陳奏外所有伊犁匪徒勾結營勇戕官劫殺向東潰  
竄業經防軍截剿捕滅現在趕緊緝拏餘匪籌辦大概情  
形各緣由謹會同烏魯木齊提督臣金運昌恭摺馳陳伏  
乞

皇太后

皇上聖鑒訓示再此摺係臣錦棠主稿合併陳明謹

奏

軍機大臣奉

旨覽奏已悉著該大臣等會同金順督飭各軍及地方文武趕緊緝拏餘匪務盡根株並隨時認真彈壓勿稍疏懈各營餉項嚴飭帶兵員弁不得稍有剋扣致釀事端欽此

譚拔萃在營病故請

卹摺

三月十四日

奏爲實缺總兵在營積勞病故懇

恩飭部從優議卹恭摺仰祈

聖鑒事竊頭品頂戴記名提督

賞穿黃馬褂甘肅甯夏鎮總兵一等輕車都尉世職嘎什

普祥巴圖魯譚拔萃上年經

臣

檄飭統領所部安遠軍移

防烏魯木齊古城暨吐魯番一帶嗣因積勞成疾牽動舊

傷屢請交卸軍事

臣

曾批准給假醫調尙未離營茲據營

官王文安等稟稱該統領病勢日增醫治罔效於本年正

月二十三日在營因病出缺等情前來查該故提督譚拔

萃初以武童投效湘軍隨臣胞叔原任廣東陸路提督劉松山勦辦髮捻等逆轉戰湖南江西安徽河南山東山西直隸陝西各省無役不從戰功卓著自逆回擾亂關隴震驚官軍自陝西北山節節掃蕩入甘直抵金積堡老巢攻勦不克臣叔陣亡軍中恟懼該故提督誓爲主將雪恥激勵士卒奮勇搏戰渠魁授首臣得藉手以竟前功至今思之猶爲泣下光緒元年該故提督在甘肅甯夏鎮總兵任內經前督辦軍務大學士左宗棠奏調統領老湘左軍當卽隨臣出關二年六月該故提督在營聞訃丁親母憂其時官軍會勦烏魯木齊古牧地各城踞賊正在得手經左

宗棠奏請改爲署任畱營帶隊該故提督凜移孝作忠之  
義墨綬將事每戰先登遂定北路各郡縣積年回逆一律  
蕩平三年移兵南路猛攻達坂城克之進復吐魯番滿漢  
兩城戰功爲一軍最是秋連復喀喇沙爾庫車阿克蘇烏  
什十一月西四城亦全行恢復計自九月初一日進師喀  
喇沙爾至十一月晦收復和闐南疆各城延袤五六千里  
僅及三月悉復版圖仰賴

朝廷威福遠震遐荒而該故提督協和袍澤倡率諸軍轉  
戰而前無堅不破其功不可泯也四年軍務稍鬆始飭率  
帶假勇入關就便回籍補行穿孝該故提督以身許



國竭力疆場南北馳驅未掃墳墓者至是蓋十有八年矣  
次年復由原籍檄調西來六年委統安遠軍駐防庫車旋  
復調防喀喇沙爾十年春又復移駐古城九月據稟染患  
噎膈疾證牽引舊傷致面浮喉腫頭暈耳鳴精力不支懇  
請交卸軍事回籍就醫臣以防務緊要一時實難其選且  
塞外天氣早寒病軀亦難就道囑其在營加意醫調並遴  
派醫生前往診治十二月間續據稟稱所患各證有加無  
瘳仍請准假臣察其情詞肫切始准給假一年俾得安心  
調理詎意該故提督自交春後病勢日甚一日竟以不起  
垂沒盥沐具衣冠恭設香案令人扶起望

闕叩頭深以未報涓埃爲憾神識堅定語不及私臣聞信之餘不禁雪涕伏念該故提督譚拔萃忠勇廉明器識宏遠有古名將風治軍紀律甚嚴待卒伍如子弟教誨撫循一出以誠臨財毫髮不苟其前在甯夏總兵任內及葉爾羌庫車喀喇沙爾古城駐防尤能深得民心聞其病沒無論軍民莫不悲戀溯該故提督自咸豐九年投效湘軍以後身經百戰勳績爛然洵保提督責任甯夏鎮總兵疊蒙賞穿黃馬褂

賞給勇號正一品封典花翎頭品頂戴一等輕車都尉從優議敘一次一等軍功從優議敘二次該故提督感荷

聖恩優渥懼無報稱益以奮力疆場自勵臣於九年曾經  
據實保薦奉

旨畱中欽遵在案意謂該故提督年力尙壯將來歷練愈  
深資望彌重可當

朝廷一面之寄不期竟以積歲勞傷遽爾病沒殊堪憫惜  
合無仰懇

天恩俯准飭部照提督軍營立功後在營病故例從優議  
卹並將其生平戰蹟

宣付國史館立傳以彰忠藎該故提督無子有胞姪三人  
遺囑以幼姪代嶽爲嗣年甫三歲業飭該軍營官王文安

等將該故提督身後一切妥爲料理其遺櫬暫厝古城交  
秋後由臣委員護送回湖南原籍並請

飭行沿途地方官妥爲照料至應否建祠

予諡出自逾格

鴻施非微臣所敢擅請所有記名提督甘肅甯夏鎮總兵

員缺應卽請

旨簡放以重職守除將該故提督履歷咨部查照外謹會

同陝甘督臣譚鍾麟恭摺具陳伏乞

皇太后

皇上聖鑒訓示施行謹

奏

奏

軍機大臣奉

旨另有旨欽此

光緒十一年四月初九日內閣奉

上諭劉錦棠奏總兵積勞病故請飭從優議卹一摺記名提督甘肅甯夏鎮總兵譚拔萃於咸豐同治年間隨同已故提督劉松山帶兵剿賊轉戰湖南江西安徽河南山東山西直隸陝西甘肅等省嗣經隨同劉錦棠出關疊克各城戰功卓著茲以積勞病故殊堪軫惜加恩著交部照提督軍營立功後在營病故例從優議卹並將生平戰績宣付國史館立傳以彰勞勩欽此



劉襄勤公奏稿卷九

起光緒十一年四月訖九月

目錄

請實授黃光達喀什噶爾道員缺摺

行抵烏魯木齊行省片

請加鎮迪道按察使銜摺

檄委藩司總理營務片

遣犯到配安插詳細章程摺

巴烏滿營移併古城並請改設城守尉摺

擬設城守尉請於領隊協領內簡放片

請將折平銀兩撥歸古城片



請 卹王鎮墉方希林片

伊犁禮字後營勇丁譚變戕官摺

劉文和新招勇丁譚濱片

新疆建省請改設添設各官摺

巡撫布政使廉俸應照江蘇例支給片

譚上連生母年逾八旬籲懇 恩施摺

和闐于闐驛站經費照變通章程支給片

提臣金運昌請開缺摺

會商揀員署理烏垣提缺片

哈密通判劃歸鎮迪道管轄並添設書役片

刊按察使關防啟用片

伊塔各大臣分別應裁應留摺

酌議新疆補署各缺留省補用人員章程摺

籍隸甘肅人員准按序班毋庸迴避片

薩凌阿交卸回京片

查明新疆防營臺局十年分實在數目摺

裁撤糧員改設同知巡檢等缺摺

委譚上連署理烏提篆務片

請旌烈婦譚金氏摺



請實授黃光達喀什噶爾道員缺摺

四月十日

奏為新設邊疆道員要缺揀員試署著有成效懇請實授以資治理恭摺仰祈

聖鑒事竊臣前奏設新疆南路道廳州縣各缺請照吉林

新章由外揀補一次當經部臣覆准由臣先後委員試署

在案茲查喀什噶爾兵備道員缺轄境遼遠緊接俄疆所

屬水利屯墾錢糧刑名暨通商事件政務殷繁應作為衝

繁疲難最要缺南疆設官伊始百廢待興道員率屬綏民

尤關緊要非得廉明幹濟之員久於其任不足以資治理

查現署喀什噶爾道二品頂戴鹽運使銜甘肅遇缺儘先

刑部力人高

題奏道黃光達現年四十二歲湖南湘鄉縣人由文章童投  
効軍營於收復江西崇仁東鄉宜黃南豐雩都各縣城案  
內保奏同治四年閏五月初四日奉

上諭著以從九品遇缺卽選欽此是年截剿江閩一帶竄  
匪並克復嘉應州城案內保獎經吏部議奏應俟選缺後  
以應升之缺升用准戴藍翎六年三月十七日奉

旨依議欽此是年陝西同朝剿捻獲勝案內保奏九月十  
六日奉

上諭著免選本班以縣丞不論雙單月遇缺儘先卽選欽  
此克復陝西綏德州城暨直隸剿賊案內保奏七年六月

初六日奉

上諭著免選本班以知縣不論雙單月儘先卽選欽此是年肅清直東捻逆案內保奏八月初六日奉

上諭著賞加同知銜賞換花翎欽此肅清陝北並克復甘肅靈州城池兩案併保九年閏十月二十五日奉

上諭著以本班畱於陝西歸軍功候補班前先用補缺後以同知直隸州知州歸候補班前先用並賞五品封典欽此經吏部議奏該員所敘在後之請給五品

封典已逾准獎層數應毋庸議十二月初十日奉

旨依議欽此蕩平金積堡賊巢甯靈肅清案內保奏十年

十月初三日奉

上諭著俟補同知直隸州後以知府用先換頂戴並賞給四品封典欽此經吏部議奏該員所請先換頂戴係本管上司銜應毋庸議所請四品

封典亦與定章不符十二月初一日奉

旨依議欽此解西甯府城重圍並克復大通縣城案內保奏十三年七月二十八日奉

上諭著以同知直隸州知州仍畱原省補用欽此克復肅州關內一律肅清案內保奏光緒二年二月初四日奉

上諭著免補同知直隸州知州以知府仍畱原省歸候補

班前補用欽此是年攻拔新疆古牧地堅巢並克復迪化州城案內保奏八月十六日奉

上諭著免補本班以道員仍畱原省儘先補用欽此攻克達坂城托克遜吐魯番案內保奏四年正月二十五日奉上諭著賞加鹽運使銜欽此新疆南北兩路一舉蕩平案內保奏六年正月三十日奉

上諭著仍以道員改畱甘肅遇缺儘先題奏並加二品頂戴欽此該員才識練達操守謹嚴從事戎行二十餘年懋著勤勞光緒二年隨臣出關深資臂助歷辦庫車葉爾羌和闐善後各局於邊地情形極爲熟悉上年委署斯缺措



各員...  
置裕如均無貽誤該員試署已久銜缺相當擬請補授實  
缺俾得從容展布以收駕輕就熟之效合無仰懇

天恩俯念邊缺緊要准以二品頂戴鹽運使銜甘肅遇缺  
儘先題奏道黃光達補授喀什噶爾兵備道員缺實於邊  
遠地方有裨如蒙

俞允俟接准部覆卽行給咨送部引

見以符定制是否有當謹會同陝甘督臣譚鍾麟恭摺具  
陳伏乞

皇太后

皇上聖鑒訓示施行謹

奏

軍機大臣奉

旨吏部議奏欽此

卷之八

四

行抵烏魯木齊行省片四月十日

再臣前由哈密移營晉駐烏魯木齊行省業將起程日期具摺

奏報在案旋即率帶親軍隊伍按期前進比因天山雪深數尺車輛動爲所限遲滯四日始克逾山而北四月初二日行抵烏魯木齊沿途經過巴里坤奇臺阜康等處隨加察看地方尙稱安靜居民亦皆及時耕作查北路村莊水地係山頭積雪消融引導灌溉旱地則專賴雨澤滋潤現在冬麥將及含穗春麥亦嫩綠本鋪惟旱地待澤孔殷正擬設壇祈禱幸迪化州屬已於初六日得雨透土三寸有

餘其餘各屬已否得雨刻未據稟報前來尙望普沛甘霖  
庶克均占豐稔至沿途分防各營除酌畱操防外或派役  
城工或整理渠道土勇標營或就近興屯因地試辦尙能  
認真操作雖地方甫經兵燹蕃庶難以驟期而耕種相安  
實亦漸有起色足以上慰

宸廑臣抵省後卽飭於新建滿城之東擇地築造行營暫  
行駐紮以便規畫一切次第舉行其滿兵移駐事宜容俟  
與署烏魯木齊都統臣升泰妥慎籌商再行陳明辦理所  
有微臣行抵烏魯木齊行省及察看沿途地方情形各緣  
由理合附片具陳伏乞

聖鑒謹

奏

軍機大臣奉

旨知道了欽此

卷之八

八

軍機大臣字寄光緒十一年四月二十八日奉

上諭前據都察院代遞從九品李昌振奏大臣漠視邊疆請派員查究一摺當諭令譚鍾麟查明具奏茲據奏稱原參各營虛額蝕餉各節查無實據惟營官優劣不齊曠缺侵欺之弊難保必無宜稽查整頓等語邊防各軍關係緊要亟應整飭營規力除積習著劉錦棠金順悉心籌商認真整頓隨時嚴密稽查毋任滋生事端以重營務原摺均著鈔給閱看將此由四百里各諭令知之欽此



皇朝通志卷之九十一

名

請加鎮迪道按察使銜摺五月十日

奏爲鎮迪巡道擬懇

天恩允照微臣原奏兼按察使銜兼管全疆刑名驛傳以

專責成而資治理恭摺仰祈

聖鑒事竊新疆刑名前經臣奏奉

諭旨准其變通辦理按季摘由彙報以歸簡易南路設官  
以後所有各屬命盜重案經臣飭由該管道州層遞覈轉  
再由臣悉心察覈定讞歷經辦理在案然獄者民之大命  
法者

國之大經如情罪或失其平其閒出入等差關係匪淺必

賴有專管之官始能殫精研究胥歸允當臣於光緒八年七月初三日奏請添設甘肅新疆巡撫布政使摺內聲明鎮迪道員請仍照福建臺灣道成例

准加按察使銜兼管全疆刑名驛傳事務嗣經部議須俟南路八城建置事宜辦有頭緒再行酌量具奏奉

旨依議欽此欽遵在案伏查南路建置諸務隨時舉辦漸有規模臣與藩司魏光燾業於本年四月初二二十六等日先後晉駐烏魯木齊省垣籌商部署頭緒繁多而刑名尤在所重若仍漫無總匯辦理恐涉紛歧合無仰懇

天恩俯准將鎮迪巡道加按察使銜所有全疆刑名統歸

該道員總覈詳轉仍兼管驛傳事務俾整綱飭紀得專責成實於邊徼刑政深有裨益再例載距省寫遠之府州所屬各州縣承審案件罪應斬絞及命案內量減軍流人犯解省勘轉其尋常遣軍流徒各犯均歸該管巡道就近審轉等語新疆情形核與內地迥別南路極邊州縣距省五六千里之遙若斬絞及命案內量減軍流人犯照例解省勘轉匪特罪犯人證拖累難堪且恐長途戈壁易滋疏脫然刑貴詳慎全不層遞勘轉又不足以示慎重臣謹體皇上矜恤庶獄之意擬再量爲變通距省寫遠所屬一切案件均由該管巡道核轉設案情不確卽由該管巡道提

審問擬統咨鎮迪道兼按察使銜衙門詳加核定以期周  
妥如蒙

俞允應懇

聖恩飭部換頒關防俾昭信守其餘未盡事宜容臣與將  
軍督臣等隨時商酌奏明請

旨施行所有鎮迪巡道擬懇

准加按察使銜緣由是否有當謹會同伊犁將軍臣金順  
陝甘總督臣譚鍾麟署烏魯木齊都統臣升泰恭摺具陳  
伏乞

皇太后

皇上聖鑒訓示謹

奏

軍機大臣奉

旨著照所請該部知道欽此



檄委藩司總理營務片

五月十三日

再藩司魏光燾以道員統兵轉戰關隴懋著戰功尤能盡心屯墾嗣在甘肅藩司任內經督臣委綜關內防軍營務治軍轉饒悉協機宜於邊地情形亦極熟悉該藩司現抵新任應卽檄委總理臣軍營務以資臂助除檄飭遵照外謹附片具陳伏乞

聖鑒謹

奏

軍機大臣奉

旨知道了欽此





遣犯到配安插詳細章程摺

五月二十五日

奏爲遵議改發秋審免死人犯到配安插詳細章程恭摺  
仰祈

聖鑒事前准刑部咨議覆新疆遣犯奏請酌量變通一摺  
內稱嗣後遇有秋審減等之犯卽簽同妻室子女發配車  
輛口糧一併由沿途地方官撥護資送並請

飭下撫臣飭屬妥議章程同戶部前議各條奏明辦理等  
因嗣准欽奉

恩旨查辦減等條款到營復慮人犯太多沿途支應不易  
新疆急難安插議將陝甘山西四川直隸山東河南七省

人犯先行起解餘仍照例定地發配俾得從容就理尤見  
思深慮遠體貼入微當經先後飭議去後查南路各屬相  
距較遠若待展轉議覆尙需時日且荒地無多部臣亦謂  
無須在此數處安置罪犯北路鎮迪道屬疊據查報遺荒  
甚多臣昨開拔赴省沿途察勘情形屬實應請將七省人  
犯陸續

飭令起解先儘迪化州境安置次及阜康奇臺昌吉綏來  
鎮西哈密等廳縣前奏請交屯官兵日管束係指種地當  
差遣犯而言此項秋審減等非軍遣以上罪名可比投之  
遠徼無非爲興屯起見現值諸務艱始提臣移防未定撫

標兵制未設兵屯考察刻難就緒且地段大小畝數多寡  
渠水衰旺均難一律應請俟各犯到配擇其年力精壯有  
室家者由地方官酌量多少隨處安插交鄉約領保分撥  
荒地與平民櫛戶錯壤犬牙相接出入守望同茲作息使  
其有所糾察仍飭地方官按季查驗以昭慎密其隻身人  
犯及不能種地之人卽交配所衙門役使或酌令小貿易屆  
時察看辦理俾資鈐束農具牛籽房屋食糧等項應請照  
新疆墾地戶民例從優借給分年繳還並酌量年限准其  
入籍爲民仍按甘肅屯墾啟征章程量爲展緩年限俾知  
格外從寬官犯有能督辦開墾地多穫廣應卽遵照部議

隨時奏請減釋惟本年恭逢

恩詔減等之犯較多查甘肅一省已不下八九十名若直隸山東四川更不止此合計七省當在千名內外無論由何省起解出關甘肅係總匯之路此項人犯隨帶家室口糧車輛等費需款尤鉅甘省及關外州縣均屬瘠苦不但難以賠累卽籌墊車糧銀兩亦不易易應請准照實在墊發數目作正開報以示體恤又查烏魯木齊伊犁遣犯向有鐵廠捐銀及鉛廠幫捐衣物例酌定年限准其分別爲民回籍此等官犯可否做照辦理令其幫捐屯田經費或援照軍臺廢員贖罪章程按日月之淺深定捐輸之成數

准予回籍免遣統將銀兩解交藩庫存儲以備屯墾撥用之處非臣下所敢擅請再部臣謂宜時加安輯無苛剝欺凌俾人盡力樂生洵屬確論臣自應嚴飭各屬諭令各該鄉約戶民一體遵照第各省差役護解人犯需索誅求在所不免哀此羈縲何敢申訴今許簽配妻子攜帶財物之犯必多應請

旨飭下各省督撫嚴飭所屬先行出示曉諭准於點驗起解時當堂呈明財物填註解牌以杜搜索儻有前項情弊許各該犯臨時喊稟一經審實立予痛懲其餘未盡事宜容再隨時奏咨辦理至戶部前議各條應俟兵制一律設

妥撥地墾種已有頭緒再行另案詳細奏報所有遵議安  
插七省秋審免死人犯緣由是否有當謹會同陝甘總督  
臣譚鍾麟伊犁將軍臣金順署烏魯木齊都統臣升泰恭  
摺具

奏伏乞

皇太后

皇上聖鑒訓示謹

奏

軍機大臣奉

旨該部議奏欽此

巴烏滿營移併古城並請改設城守尉摺

五月二十五日

奏爲改議巴里坤烏魯木齊滿營移併古城並請改設城守尉一員以專責成而規久遠恭摺具陳仰祈

聖鑒事竊臣錦棠前遵部議請將舊有之烏魯木齊巴里坤古城等處旗丁歸併伊犁旗營於光緒十年四月二十八日具奏奉

旨九准欽遵在案旋准伊犁將軍臣金順咨到奏稿內稱伊犁各營現存官兵及丁口共六萬七千八百餘員名擬就各營原有官兵挑補五千人訓練下餘兵丁足敷額數若再將烏魯木齊各城旗營官兵歸併伊犁更屬無可位



置塔爾巴哈臺爲北路邊要向無駐防之兵承平時係各處撥兵換防現擬將換防之例停止該城僅恃客兵終非久計請將烏魯木齊各城旗營官兵遷歸塔城作爲塔城永遠駐防等因亦經部議允准茲准護巴里坤領隊大臣金貴咨據各旗馬步兵丁等稟稱兵丁等邊城駐守世受國恩憶自逆回蠢動疊被圍攻力守危城外援俱絕壯丁迎敵婦女登陴幸獲無恙旋遇古城阜康之變千里赴援繼復東剿哈密叛回冒雪衝鋒傷亡尤眾其存者又頻遭荒歉餬口維艱全疆底定以來賴歷任各領隊加意拊循少能蘇息而積困之後生計仍屬拮据現聞議令遷駐塔

城該處毗連俄界竊恐凋敝之餘難資禦侮且地隔巴城近三千里先人墳墓祭掃尤難稟請咨轉核辦前來臣等伏查新疆自乾隆年間設立巴里坤古城吐魯番庫爾喀喇烏蘇烏魯木齊五處領隊以都統轄之而悉歸伊犁將軍總統節制提綱挈領成法昭然及同治初年逆回不靖除庫爾喀喇烏蘇專管蒙古游牧向無滿營不計外其吐魯番烏魯木齊古城各處滿營額設兵丁散失殆盡惟巴里坤防營歷更艱險僅僅得存平定以來吐魯番滿營未經復設其餘各營招集散亡人數終屬無幾此次新疆設立行省裁併營旗所有巴里坤等處滿營自應歸併伊犁

庶符體例惟既經金順奏明伊犁兵數過多無從安插則  
遷徙伊犁之議自難強以必行至欲移駐塔城實多未便  
該處既非沃壤又處極邊向來俱係換防不使邊兵久戍  
今則與俄偪處防兵尤貴於精雖議停止換防變通營制  
自應由錫綸量爲部署若巴里坤各處之喘息僅存貧不  
中徙亦係實情若欲強以必行又非

朝廷所以軫恤邊兵之意臣等思維再四亟宜改圖未便  
以成議在先少事遷就案查臣升泰接管卷內光緒九年  
五月前都統臣恭鏜具奏巴里坤著名寒瘠餉運艱難請  
將該處滿營移駐烏魯木齊其所遺戶地官屯可悉數畱

給鎮標綠營管理又古城爲北路咽喉重地該旗人數過少不敷分防請由歸化城滿營開散挑選若干准其攜眷移駐古城以資扼要奏奉

諭旨准行欽遵在案竊維恭鏗所奏其時新疆行省議尙未定烏魯木齊新築鞏甯城廓其有容移駐旗營自無不可今烏魯木齊定爲省治設官分職情事頓殊舊有旗營尙須遷徙自未便更從增置至古城地當衝要東接巴里坤西達烏魯木齊南並天山北至科布多東北通烏里雅蘇臺西南爲出吐魯番閒道形勢便利亟應增設重兵以資控馭誠有如恭鏗所奏者

臣錦棠前請將奇臺縣治移

建古城亦誠以地利所存不容坐廢也今巴里坤等處滿營遷塔遷伊既無成見而古城一處尙待增防以應遷之兵置應防之地其便一毋庸更向歸化城滿營挑選閒散節勞省費其便二相距不遠遷徙不難既遷之後卽遇有請假省墓之事往返不過旬日其便三上年奏

准於古城度地修造新城以便奇臺移治現在城工告竣既議移駐滿營則奇臺可暫仍舊治異日滿營居止卽可因其已成祇須添蓋營房毋庸更議城工經費其便四巴里坤現有鎮標綠營足資鎮守可無須滿營駐防古城土膏沃衍素係產糧之區非若巴里坤地氣苦寒歲多不熟

生養休息精足易期其便五謹案乾隆三十九年因巴里坤糧運不給始定分駐古城是該處移防本有成案各營旗遷併於此需用糧石就地取給無煩由他處採運所省實多此時既未便遷併伊犁則舍此實無善策也臣錦棠始謀未豫殊切悚惶現經反覆熟商意見相合伏乞聖明采擇其一切遷徙應辦事宜容再妥籌具

奏現在各該旗既議歸併領隊協領各員缺並經奉旨裁撤查烏魯木齊古城現存員弁兵丁共二百九十五員名巴里坤現存員弁兵丁七百七十九員名擬做照河南山西及甘肅莊浪滿營之例改設城守尉一員如蒙

俞允應請

旨迅賜簡放以重職守其佐領防禦以下官應否各仍其舊容俟城守尉

簡放有員再行會商核辦又查城守尉山西二員一歸巡撫兼轄一歸綏遠城將軍管轄河南一員歸巡撫兼轄莊浪城守尉歸涼州副都統管轄此次議設古城城守尉應否由新疆巡撫兼轄或由伊犁將軍管轄之處恭候

欽定 臣等未敢擅擬所有改議巴里坤烏魯木齊滿營歸併古城並請改設城守尉一員以資統率各緣由謹會同伊犁將軍 臣金順陝甘總督 臣譚鍾麟合詞具

奏愚昧之見是否有當伏祈

皇太后

皇上聖鑒訓示施行再此摺係臣錦棠主稿合併聲明謹  
奏

軍機大臣奉

旨該部議奏片併發欽此





擬設城守尉請於領隊協領內簡放片

五月二十五日

再頭品頂戴副都統銜古城領隊大臣訥恩登額巴圖魯  
魁福頭品頂戴副都統銜古城協領署烏魯木齊領隊大  
臣堅勇巴圖魯富勒銘額護理巴里坤領隊大臣副都統  
銜右翼協領金貴副都統銜巴里坤左翼協領英魁等久  
經戰陣洞曉戎機履任以來於各該處駐防事宜措理裕  
如悉臻妥善現經裁撤領隊協領各員缺擬請設古城城  
守尉一員如蒙

俞允將來旗營歸併遷徙安置事極繁難必得熟習之員  
爲之經理庶期周密可否卽於各該員內

准予簡放以資熟手而專責成其餘各員均屬善有成勞  
應如何擢用俾人人得以自效出自

鴻慈臣等未敢擅請謹合詞附奏伏乞

聖鑒訓示再此片係臣錦棠主稿合併聲明謹  
奏

軍機大臣知會奉

旨畱中欽此

請將折平銀兩撥歸古城片

五月二十五日

再前准戶部咨光緒十年九月二十九日附

奏烏魯木齊巴里坤等處旗丁已經議准歸併伊犁在在需款除金順錫綸共應分用兵餉等項銀一百二十萬兩外查臣部此次撥定西餉共銀四百八十萬兩各省應按庫平庫色起解而甘省近年支放勇餉均係以湘平動支以每兩扣銀四分升平覈算此項扣平約近二十萬兩應令每年由譚鍾麟將此項扣出銀二十萬兩以十萬兩解交金順專作為伊犁滿營經費三年後即行停止等因奏奉

諭旨允准欽遵在案伏查烏魯木齊等處旗丁原議歸併伊犁此項銀兩自應撥歸伊犁動用現因金順奏稱伊犁兵數過多不便安插改議歸併古城駐紮如蒙

允准卽應遷移地雖不同而需用則一前遵部議本年正二兩月各該旗未到伊犁之先所有俸餉每月約需銀萬兩由臣錦棠及譚鍾麟就近墊發現因移防之地尙須更議未卽遣赴伊犁其二月以後俸餉應由何處支放亦不便久懸合無仰懇

天恩俯准將此項扣平銀十萬兩撥歸古城作爲各該旗俸餉及遷徙一切經費至三年停止後各該旗若仍由伊

犁將軍管轄則所需俸餉自應由伊犁將軍於分用兵餉等項銀一百二十萬兩內照章供支若不由伊犁將軍管轄則各該旗所需俸餉應如何劃款支放之處並乞飭部核覆遵行謹合詞附片具陳伏乞

聖鑒訓示再此片係由臣錦棠主稿合併聲明謹奏

軍機大臣奉

旨覽欽此

以迄聖學之基科

五

請 卹王鎮墉方希林片

六月十九日

再花翎三品銜畱甘肅遇缺儘先題奏道王鎮墉於同治  
初年投效前大學士臣曾國藩軍營疊著勞績嗣臣在甘  
肅接統湘軍稔知該員才識過人稟商曾國藩檄飭西來  
委辦營務隨攻西甯等處遇事贊畫悉中機宜旋經陝甘  
督臣左宗棠委署靈州狄道州秦州直隸州知州各員缺  
允洽輿情士民愛戴嗣交卸到省適值臣營需員復咨商  
督臣譚鍾麟札調出關仍飭辦理營務該員竭慮殫精昕  
宵無閒洵營中最爲得力之員惟在營積勞日久致心脾  
兩虧染患痰喘之證時發時止猶復力疾趨公不肯稍自



暇逸上年入冬以後病勢增劇醫藥罔效於十一月初九日在營病故又臣行營支應委員補用知府直隸州知州准補昌吉縣知縣方希林由陝西候補縣丞於同治二年經前西安將軍臣多隆阿調營差遣嗣投效前陝甘督臣左宗棠軍營卓著勞績以知縣畱甘補用洵保俟補缺後以知府直隸州知州遞補光緒二年經陝甘督臣左宗棠委署成縣知縣勤政愛民廉潔自矢嗣交卸進省奉委管解新疆軍餉臣以方希林爲守俱優畱營總理支應事務該員會計精詳深資臂助光緒九年九月請補昌吉縣知縣因經手事件驟難交替未及檄飭赴任該員綜核一切

用心過度致有自汗不寐等證上年冬感冒風寒觸發舊  
疾病勢遽增於十二月二十一日在營病故查王鎮墉從  
事行間勦勤卓著方希林馳驅戎馬備歷艱辛茲因積勞  
先後病故悼惜殊深合無仰懇

天恩俯准飭部將已故花翎三品銜甘肅遇缺儘先題奏  
道王鎮墉補用知府直隸州知州准補昌吉縣知縣方希  
林均照軍營積勞病故例從優議卹以彰勞績出自  
逾格鴻慈是否有當謹附片陳明伏乞

聖鑒訓示施行謹

奏

軍機大臣奉

旨王鎮塘方希林均著交部照軍營積勞病故例從優議卹欽此

伊犁禮字後營勇丁譚變戕官摺

六月二日

奏爲伊犁禮字後營勇丁譚變戕官匪徒趁勢滋擾先將  
大概情形恭摺馳陳仰祈

聖鑒事竊

臣等前

奏伊犁匪徒勾結營勇戕官劫殺向東潰竄經防軍攔截  
撲滅並趕緊緝拏餘匪籌辦情形本年四月二十三日奉  
旨覽奏已悉著該大臣等會同金順督飭各軍及地方文  
武趕緊緝拏餘匪務盡根株並隨時認真彈壓勿稍疎懈  
各營餉項嚴飭帶兵員弁不得稍有剋扣致釀事端欽此  
欽遵在案茲據駐防綏來統領親軍西甯鎮總兵譚上連

稟准分防奎屯陝西漢中鎮總兵戴宏勝報稱五月初一日伊犁綏定鎮總兵劉宏發所部駐防清水河之禮字後營因鬧餉滋事是夜二更將營官段雲陽戕害經劉宏發督隊剿捕斬殺數十名餘均向果子溝逃竄劉宏發亦受槍傷等情又據前充綏定營差弁洪隆廷面稟五月十六日由伊犁起身次日行至果子溝聞大西溝游匪突出因駐紮四臺之詹營官率隊護餉未回乘勢劫營殺傷數人而去途值駐紮大河沿之營官張長安督帶馬隊護餉回轉時交五鼓在南山頭相遇未及防備被此起游匪將馬隊衝散傷斃哨長孫姓及勇丁六名擄去數名其餘逃散

之勇隨後零星回營大西溝毗連果子溝路徑叢雜松林盤繞附近並無居民地與俄羅斯交界匪首李皮帽糾合漢回游勇盤踞其間聞有千餘人出沒無常逢人搶劫來往官商受害者不少又於六月初十日有商民陳作英等由伊犁來富餉傳問據稱五月初一日禮字後營譚變潰勇均向大西溝逃竄大西溝及霍爾果斯一帶盤踞匪黨甚多勢極猖獗商民等經過四臺該處原有馬隊一營駐紮前數日間營官帶了幾成隊護送餉車到綏定城去其守營隊伍多被賊匪裹去並將營盤燒毀賊匪向西竄去各等情據此臣維伊犁爲新疆要地大西溝在伊犁西北

緊與俄鄰又爲伊犁要地賊匪之負隅其地者隱以俄爲  
奧援營勇之變亂相尋者又顯與賊爲淵藪若不將營務  
認真整頓則禍患將無底止況強鄰偪處時欲肆其狡謀  
遇事刁難不一而足設一旦蹈瑕抵隙撓我藩籬又將何  
以爲計以上各節臣等早有所聞特未見前途牘報不敢  
冒昧上陳茲據稟報前情又疊據自伊犁來者事經目擊  
所述大略相同自屬彰彰可信上年臣錦棠所部精騎馬  
隊潰變蒙

恩寬貸愧悚實深詎伊犁營勇又相尋潰變匪徒復如此  
披猖金順身在事中自應隨時咨會以憑商辦乃迄未咨

報到 臣事關邊防重要似此諱疾忌醫竊恐有誤大局除  
通飭各防營嚴密巡防相機截剿並飛咨金順查詢確情  
會商辦理再行具

奏外所有伊犁營勇譁變匪徒滋擾大概情形謹合詞恭  
摺具

奏再此摺係 臣錦棠主稿合併聲明伏乞

皇太后

皇上聖鑒訓示謹

奏

軍機大臣奉



旨另有旨欽此

222

劉文和新招勇丁譚漬片六月二日

再臣據駐防綏來統領親軍西甯鎮總兵譚上連呈報本年五月有塔爾巴哈臺統領綏來營副將劉文和前至綏來招募補勇適聞伊犁一帶近多不靖催其作速回防該副將卽於六月初一日率所募勇丁二百名起程返塔詎初八日准分防奎屯漢中鎮總兵戴宏勝報稱宏勝查察防境便道由舊城到西湖與伊犁分防各營一會忽據綏來營車夫馳報劉文和於初七日帶隊行抵庫爾喀喇烏蘇之頭臺三更時該新募勇丁突然譚漬焚燒驛店殺傷數人搶劫馬匹服物相率西竄劉文和幸未遇害已派隊

分途查拏等情又疊據各處稟報或稱因川資缺乏譁變或稱有游匪潛來勾結現已由沙拉烏蘇驛北竄渡河畏官兵跟蹤追捕將該處渡船沈毀復向車排子一帶聲言往大西溝與匪首李皮帽合夥等語臣查大西溝緊接俄境時有匪徒出沒行旅戒嚴現在咨商伊犁將軍臣金順查復辦理此起新募潰勇亟應嚴密查拏毋任蔓延滋患除仍飛咨金順暨塔爾巴哈臺參贊臣錫綸迅速查辦並分飭各防營一體嚴防截剿外所有劉文和新募補勇譁潰緣由謹附片馳陳再此片係臣錦棠主稿合併聲明伏乞

聖鑒訓示謹

奏

軍機大臣奉

旨另有旨欽此

白雲山志卷之四

三

軍機大臣字寄光緒十一年七月二十一日奉

上諭劉錦棠等奏伊犁營勇譚變匪徒滋擾情形及副將劉文和新募勇丁譚潰各摺片據稱五月初一日總兵劉宏發所部禮字後營勇丁因鬧餉滋事戕害營官劉宏發督隊剿捕亦受槍傷該勇丁向大西溝一帶逃竄其大西溝等處向有匪首李皮帽盤踞糾黨搶劫並有傷斃哨長燒毀營盤等情前據劉錦棠等奏伊犁營勇滋事當諭令金順等緝拏餘匪並嚴飭帶兵員弁不得剋扣餉項何以該處營勇復有鬧餉戕官之事且事逾兩月金順何以尙未奏到殊屬玩泄著傳旨申飭卽著該將軍派

撥隊伍迅將此股潰勇悉數查拏從重懲辦一面查明該營帶兵各官如有剋扣餉項情事卽著嚴行參奏至匪首李皮帽聚眾滋擾尤應迅速緝捕並著金順飭軍剿辦盡殲醜類毋任日久滋蔓其劉文和新募勇丁行抵庫爾喀喇烏蘇之頭臺譁潰西竄尤恐勾結游匪爲患地方著金順錫綸認真查辦分飭各營一體截剿以杜紛竄並著劉錦棠等派隊會同辦理不得稍分畛域至新疆軍餉已有旨飭催迅解矣將此由五百里各諭令知之欽此

新疆建省請改設添設各官摺七月十六日

奏為新疆建立省會應請改設添設各官以專責成而資治理恭摺仰祈

聖鑒事竊照新疆改建行省治迪化州城所有省會應設各官自應分別添改除臬司仍照原議無庸專設經臣奏請

加鎮迪道按察使銜兼管全疆刑名驛傳事務外惟省會應有首府附府應有首縣以期指臂相使大小相維臣前奏設甘肅新疆巡撫布政使摺內請改設迪化府縣等官嗣經部議應俟南路八城建置事宜辦有頭緒再行酌量



具奏奉

旨依議欽此欽遵在案伏查南路建置諸務隨時舉辦漸有規模臣與藩司魏光燾業經先後抵任籌辦一切需員臂助省會各官未可再緩應請升迪化直隸州爲迪化府設知府一員治迪化城增置迪化縣知縣一員爲附郭首縣與迪化州原屬之昌吉綏來阜康奇臺共五縣均隸迪化府屬遇事由該府核轉其迪化州原管之戶籍田賦驛刑考試及地方一切事宜概歸迪化縣經理此外藩司衙門首領各有職司擬請設布政司經歷一員又庫大使一員專司庫務庫擬請名新裕至鎮迪道既兼刑名應請設

道庫大使兼按司獄一員迪化府首領應設府經歷兼司  
 獄一員查迪化城舊有巡檢一員爲稽查彈壓而設現既  
 建置省會情形不同擬請卽裁該巡檢缺改設府經歷迪  
 化縣應設縣典史一員專司監獄督捕擬請卽改迪化州  
 吏目爲縣典史學官則迪化州原設學正一員兼管所屬  
 各縣學務今升州爲府擬請升學正爲府教授照舊兼管  
 各縣學事一俟將來學校大興再議添設以省糜費以上  
 各缺應定爲何項缺分俟設定後再行擬議辦理仍懇照  
 吉林新設各缺酌補一次成案由外揀補一次庶於地方  
 有裨據藩司魏光燾詳請具奏前來臣覆查無異合無仰

懇

天恩俯准飭部核覆以便遵循除未盡事宜容俟查明陸續陳奏外所有省會各官擬請改設添設各緣由是否有當謹會同陝甘督臣譚鍾麟恭摺具陳伏乞

皇太后

皇上聖鑒訓示施行謹

奏

軍機大臣奉

旨吏部議奏欽此

巡撫布政使廉俸應照江蘇例支給片

七月十六日

再新疆初建行省南路添設阿克蘇喀什噶爾兩道屬正  
佐各官應支廉項等銀均經部臣先後比照鎮迪道成例  
奏奉

恩准行令欽遵辦理各在案臣查鎮迪道廳州縣均於應  
領廉俸外各酌加公費銀兩推原立法之初蓋以新疆遠  
繫絕域一官赴任車馬服物幕賓僕從以及歲時一切不  
可知之費較之關內不啻倍蓰特予從寬酌定此次南疆  
各官部臣比照辦理亦猶古者議增吏俸之意臣與藩司  
魏光燾業於本年四月初二二十六等日先後抵任一切

事宜均須釐定廉俸亦其一端查臣前奏設甘肅新疆巡撫布政使員缺係倣照江蘇建置大略辦理所有撫臣藩司歲支廉俸應否比照江蘇巡撫布政使成例支給以符原奏仍照關外各官章程酌加公費以資辦公應請

旨飭部核覆以便遵辦是否有當謹會同陝甘督臣譚鍾麟附片具陳伏乞

聖鑒訓示謹

奏

軍機大臣奉

旨戶部議奏欽此

譚上連生母年逾八旬籲懇 恩施摺 七月十六日

奏爲統兵大員生母年逾八旬籲懇

恩施恭摺仰祈

聖鑒事竊查光緒十年九月二十六日內閣奉

上諭本年十月初十日恭遇

慈禧端佑康頤昭豫莊誠皇太后五旬萬壽候旨施恩等  
因欽此仰見

聖慈錫類

闔澤旁敷中外臣工同深欽感茲據頭品頂戴題奏提督  
統領親軍等營甘肅西甯鎮總兵官譚上連文稱生母姚

氏現年八十一歲有子五人孫七人曾孫一人曾沐一品  
封典上連駐防邊圉遠隔庭闈奉養久疏倍情殷於愛日  
承歡有自幸躬際夫

昌期倘邀

雨露之殊恩庶慰門閭之屬望懇請代

奏前來臣查一品命婦譚姚氏淑慎持躬忠勤助子晉八  
旬而開秩逢吉康強合四世以同堂增庥蕃衍似此慈祥  
召福允宜

綸綍推恩該提督係實任二品武職大員其生母姚氏應  
否

特加賞賚出自

鴻慈除將籍貫年歲姓氏另單咨送軍機處查照外謹會  
同陝甘總督臣譚鍾麟恭摺具

奏伏乞

皇太后

皇上聖鑒訓示施行謹

奏

軍機大臣奉

旨另有旨欽此



卷之三十一 考和

三十一

光緒十一年八月十五日內閣奉

上諭上年恭遇

慈禧端佑康頤昭豫莊誠皇太后五旬萬壽慶經降旨覃  
敷闡澤茲據劉錦棠奏總兵譚上連老親年逾八秩祿養  
承歡允宜一體施恩甘肅西甯鎮總兵譚上連之母姚氏  
著賞給御書匾額一面紫檀三鑲玉如意一柄小卷江綢  
袍褂料二件小卷八絲緞袍褂料二件用示錫類推恩至  
意欽此



和闐于闐驛站經費照變通章程支給片

七月十六日

再臣前奏新疆南路改設驛站並請酌量變通支給各驛經費銀兩等因業奉

諭旨允准欽遵在案茲查葉城縣治前於擬設南路佐雜捐內奏明移建哈哈里克該處原設驛站應請改爲葉城底驛其原在葉爾羌回城擬設之葉城底驛應卽毋庸安設于闐縣治奏明移建克里雅該處距和闐州城四百五十餘里應請在於多羅白石頭渠勒罕蘭及于闐本城各設一驛以資郵遞所有該五驛現設書夫馬匹經費銀兩應飭悉照奏定變通章程支給以歸畫一除將馬匹里數

開單咨送戶兵二部查照外謹會同陝甘督臣譚鍾麟附  
片具陳伏乞

聖鑒飭部立案謹

奏

軍機大臣奉

旨該部知道欽此

提臣金運昌請開缺摺

七月十六日

奏爲提臣舊疾復發懇請開缺回籍就醫據情代

奏仰祈

聖鑒事竊臣前於光緒九年十月具奏烏魯木齊提督臣

金運昌懇請開缺回籍就醫等情奉

旨金運昌向來辦事得力現在籌復兵制正資整理著劉  
錦棠傳知該提督勉圖報稱以副委任毋庸開缺欽此欽  
遵在案該提督欽奉

溫諭感激圖報仍復力疾從公未敢稍存諉卸茲准咨稱  
運昌轉戰東南與賊對壘輒多露宿致兩骹受寒酸痛洎

圍攻金積堡老巢逆匪決水灌營運昌晝夜防守行走泥  
淖寢饋沮洳潮溼浸入骨髓其後移軍河套駐防烏垣均  
係極寒之區舊疾時常感發數年以來膝胯疼楚有如芒  
刺跬步皆須扶掖且寒氣深入心血過虧微聞聲響心卽  
下悸日飲薄粥一甌夜無片刻成寐日前嘔血數碗神識  
昏憤得藥灌救良久乃蘇現當整頓邊防規復兵制在在  
悉關緊要恐病軀戀棧貽誤事機展轉思維惟有再申前  
請懇

恩開缺回籍就醫一俟醫治就痊卽當泥首  
宮門求

賞差使斷不敢稍圖安逸有負

生成咨請代

奏並准將日行公事暫委中軍參將代拆代行等情咨行  
前來臣維金運昌久歷戎行不辭勞苦自膺

簡畀益矢精勤訓練操防悉臻周妥惟以積勞過甚致抱  
沈疴上年十一月間又以乞假就醫爲請當囑安心調養  
冀其春暖卽痊詎病證至今未曾稍減其不能接見賓客  
已五六月矣臣往視疾見其沈綿臥榻轉側需人感念同  
袍爲之心惻關外旣苦無良醫察其病勢又非旦夕所能  
奏效未便再四慰畱合無仰懇



天恩准其開缺回籍就醫以示體恤如蒙  
俞允所遺烏魯木齊提督員缺緊要應請

旨迅賜簡放以重職守所有提臣金運昌懇請開缺回籍  
就醫各緣由理合據情代奏謹會同陝甘總督臣譚鍾麟  
署烏魯木齊都統臣升泰恭摺由驛馳陳伏乞

皇太后

皇上聖鑒訓示謹

奏

軍機大臣奉

旨另有旨欽此

光緒十一年八月十五日內閣奉

上諭劉錦棠奏提臣金運昌舊疾復發懇請開缺回籍就醫據情代奏一摺烏魯木齊提督金運昌著准其開缺欽此

古今圖書集成

四

會商揀員署理烏垣提缺片

七月十六日

再新疆既設行省

臣上年

奏准將烏魯木齊提督移駐喀什噶爾自應按照原議妥籌辦理且提臣統轄防營日有應行事件亦未便少有延擱金運昌臥病日久不能視事現在懇

恩開缺如蒙

俞允簡放實缺人員竊恐道途遼遠到任尙需時日可否由臣會商督臣暫行委員署理以免貽誤之處恭候

諭旨遵行謹會同陝甘總督臣譚鍾麟署烏魯木齊都統臣升泰附片陳明伏乞

奏

軍機大臣奉

旨金運昌已有旨准其開缺烏魯木齊提督著該撫會商譚鍾麟派委妥員暫行署理欽此

哈密通判劃歸鎮迪道管轄並添設書役片

七月十六日

再查哈密通判一缺向隸甘肅安肅道管轄光緒六年

臣

接續

欽符經前陝甘督臣左宗棠奏稱將來議設行省必以哈密劃隸新疆形勢始合請將哈密及鎮迪道屬歸臣統轄臣嗣臣奏設甘肅新疆巡撫布政使員缺亦曾聲明巡撫一員駐烏魯木齊管轄哈密以西南北兩路各道廳州縣現在行省設定臣與藩司魏光燾均經抵任哈密辦事幫辦大臣奉

旨裁撤該地方回務前左宗棠

奏准照吐魯番例由哈密通判兼管辦理數年漢回稱便  
通判一缺應請劃歸鎮迪道管轄遇事由該道核轉以專  
責成惟查賦役全書該廳向無額設書辦而兼理回務命  
盜詞訟概歸經理辦事需人歷任不無賠累茲既劃歸鎮  
迪道屬擬請做照前烏魯木齊理事通判例添設書辦二  
名並原設各役四十二名工食銀兩及本官廉俸公費等  
項均請照理事通判章程支給以資辦公其哈密巡檢一  
缺亦請照闡展巡檢開支俾歸一律據藩司魏光燾詳請  
具

奏前來臣覆核無異相應請

旨飭部議覆以憑遵辦是否有當謹會同陝甘督臣譚鍾麟附片具陳伏祈

聖鑒訓示謹

奏

軍機大臣奉

旨該部議奏欽此



列國通志卷之八

三

軍機大臣字寄光緒十一年八月初四日奉

上諭譚鍾麟密奏稱伊犁現在情形據陳弭亂之策一在籌款以清欠餉一在擇人以整營規金順所部各營欠餉約計三十萬兩可以了結等語本日已明降諭旨令金順來京陛見並派錫綸署理伊犁將軍其塔爾巴哈臺參贊大臣已派明春馳往署理俾錫綸迅速起程矣伊犁兵勇屢次譁變朝廷瞻顧西陲正深慮系茲據該督所奏各節亟應將該處將弁兵勇極力整頓並先清理欠餉俾該勇等無所藉口著戶部撥銀三十萬兩解交甘省未到以前譚鍾麟無論何款先行籌措實銀三十萬兩迅解劉錦棠

軍營該大臣俟餉銀到後酌帶隊伍馳赴伊犁會同錫綸將金順所部各營覈實查點分別入營久暫欠餉多少分成勻給並將勇丁應去應留確切查明歸併嚴定營規其貪劣素著之營哨官嚴辦一二以儆其餘錫綸到任後與劉錦棠和衷商辦務將各該營積習悉力湔除毋稍彌縫致貽後患亦不得操之過蹙別滋事端譚鍾麟摺著鈔給劉錦棠錫綸閱看將此由六百里各諭令知之欽此

刊按察使關防啟用片

八月十一日

再甘肅新疆鎮迪巡道前經臣

奏請加按察使銜兼管全疆刑名驛傳事務並懇

飭部頒換關防業奉

諭旨允准在案惟由部頒換關防尙需時日亟應先行刊  
給關防以昭信守茲刊就木質關防一顆文曰甘肅新疆  
鎮迪道兼按察使銜管理全省刑名驛傳事務關防除由  
臣飭發祇領取用外謹會同陝甘總督臣譚鍾麟附片陳  
明伏乞

聖鑒謹

聖朝重道公考和

名

四三

奏

軍機大臣奉

旨知道了欽此

伊塔各大臣分別應裁應留摺

八月十二日

奏爲遵

旨酌議伊犁參贊大臣塔爾巴哈臺領隊大臣各員缺分別應裁應留恭摺覆陳仰祈

聖鑒事竊臣等前准戶部咨開光緒十年九月三十日內閣奉

上諭戶兵等部會奏議覆劉錦棠奏統籌新疆全局一摺著照所議添設甘肅新疆巡撫布政使各一員其應裁之辦事幫辦領隊參贊各大臣及烏魯木齊都統等缺除未經簡放有人外所有實缺及署任各員著俟新設巡撫布

政使到任後再行交卸候旨簡用至伊犁參贊大臣一缺塔爾巴哈臺領隊大臣二缺應裁應留著劉錦棠等酌定具奏等因欽此跪聆之下仰見

聖慮周詳芻蕘並採臣等莫名欽感伏查內地駐防營制將軍以次率置左右翼副都統二員或與同城或分防要地規模不盡從同要在因地制宜歸於允協伊犁將軍所轄向有領隊大臣五員分領滿洲錫伯索倫察哈爾額魯特各營該處地當邊要事務殷繁各領隊職有專司分任則有餘兼資則不足以故舊制於將軍之次更設參贊大臣同寅協恭遇事得有商推裨益實多亦猶建牧立監設

參傳伍法制相維至爲周備今若照內地駐防營制量設左右翼副都統則參贊大臣一缺自可裁撤如暫時不設副都統則參贊大臣一缺未可遽裁其應否改設副都統抑或仍畱參贊大臣員缺伏乞

聖明裁奪至塔爾巴哈臺領隊大臣二缺一爲滿洲領隊舊制換防滿兵專歸管轄新疆底定以來烏魯木齊及伊犁滿營兵數寥寥無從徵調故滿洲領隊大臣一缺迄未請

旨簡放有員該處現已增設副將統帶勇兵其滿洲領隊大臣一缺應請裁撤一爲額魯特領隊專管該蒙部游牧



同治初年回匪叛亂該蒙古官兵隨棍噶札拉參呼圖克圖戰斃歷年傷亡甚眾餘多轉徙流離靡有定所迨後該營總管巴彥特古斯署理領隊大臣招集散亡漸能保舉復經前參贊臣英廉奏請

簡放實缺人員到任並奏明將該蒙部人眾遷回塔城仍飭在額依賓山巴爾魯克一帶舊地住牧光緒五年臣錫綸奉

旨選募邊人招徠蕃屬因勇隊較單遵卽挑練蒙兵成隊定爲選鋒五營奏交領隊大臣圖瓦強阿統帶塔城西北兩路緊與俄鄰尙賴訓練蒙兵隨時戒備應請仍畱額魯

特領隊大臣一缺以固邊防臣等往復函商意見相合應請

旨飭部議覆以便遵行所有遵

旨酌議各情形謹會同陝甘總督臣譚鍾麟合詞具

奏是否有當伏乞

皇太后

皇上聖鑒訓示再此摺係臣錦棠主稿署烏魯木齊都統

臣升泰因伊犁參贊大臣是其本缺故未列銜合併陳明

謹

奏

軍機大臣奉

旨該部議奏欽此

軍機大臣字寄光緒十一年八月二十二日欽奉

慈禧端佑康頤昭豫莊誠皇太后懿旨前據侍郎薛允升奏請飭裁減勇營將中外各旗營加餉訓練一摺當經諭令軍機大臣會同戶部妥議並令醇親王奕訢一併與議茲據會議具奏據稱核計各省現年兵餉需銀一千四百萬兩其養勇之費每歲約需銀三千四百餘萬兩加以京外旗兵又需額餉一千餘萬兩歲入之款約共應收銀七八千萬是竭天下十分之物力八分以養兵勇斷非經久之道今欲酌加旗營餉需卽就在京各營應領餉項計之現在支給銀六百餘萬如議加復成數約須增銀三百

萬兩部庫實難另籌惟有將各省營勇裁減浮濫每省每年各裁節銀二三十萬兩分批解部以供加餉練兵之用其各省設立善後各局名目繁多重見復出尤應大加裁併等語各省招募勇丁向多糜費上年辦理海防又復紛紛添募現當軍事敕定本應認真裁減汰弱存強各疆吏往往因伏莽未除畱爲彈壓防守之用甚至統帶營官藉詞肥己均所難免八旗向稱勁旅亟應加餉精練果能裁無用之營勇爲有益之要需實屬根本至計著各直省將軍督撫破除成見迅將各該省現有勇營切實核減查照該部所指虛伍空額老羸幼稚雜費冗弁及無事長夫各

節逐一確查認真裁汰不得任聽營哨各員弁飾詞朦混  
並將存留各營按日訓練無事常如有事庶幾緩急可恃  
其裁勇所節之餉從光緒十二年起每省每年可得若干  
先行奏明專款存儲分批解部備用不准以斟酌情形無  
可裁撤等詞一奏塞責至各省紛紛設立各局如軍需則  
既有善後總局又有善後分局報銷籌防支應製辦軍械  
轉運等局地方事宜則有清查藩庫營田招墾官荒交代  
清源發審候審清訟課吏保甲刊刻書籍採訪忠義等局  
種種名目濫支濫應無非瞻徇情面爲位置間員地步各  
防營奏調咨調候補人員開支公費諸多冒濫均堪痛恨

尤應一併大加裁汰並著於本年十一月內定議迅速覆奏當此時事艱難餉需支絀裕國必先理財而耗財莫如冗濫刪一分浮費即可多一分正用各將軍督撫等務當通盤籌畫掃除積習總以覈實二字爲主毋稍觀望推遷原摺均著鈔給閱看至在京王公文武百官俸銀久經減成給發自應一律加增以示體恤統俟該將軍督撫等覆奏到日再行降旨將此由五百里各諭令知之欽此

酌議新疆補署各缺畱省補用人員章程摺

九月初五日

奏爲酌議新疆補署各缺畱省補用人員章程懇

恩俯准飭部立案恭摺仰祈

聖鑒事竊維爲政之要重在得人立法之初貴乎因地新疆著名荒瘠自經兵燹彫劫尤甚整頓撫綏悉關緊要而漢回雜處言語文字隔閼不通非習知其情無從求治故從前各項差委皆以隨營辦事人員擇能而任現值設省之始亦應酌立定章新疆北路實缺人員向由關內調補以後甘肅人員應准於新疆酌量委用擬請凡甘肅候補曾經引



見驗看領照到省以及實缺人員如熟悉邊務調赴新疆  
差遣遇有人地相宜缺出准於分別請補請調無庸先行  
奏畱若畱甘尙未引

見驗看先經隨營當差擬卽查取履歷分咨部籍無論正  
雜亦擇人地相宜之缺准其酌補其現在隨營人員內有  
分省候選並他省候補各員從事有年於邊務亦多熟悉  
擬請照依變通章程分別奏咨無論曾否委署地方均准  
畱於甘肅新疆照章補署若向未在營當差仍不得概援  
此章以示限制至請補各項員缺除南路經臣奏准倣照  
吉林章程由外揀補一次外北路添改各缺事同一律亦

應先行由外揀補一次均請於外揀一次之後與北路舊  
有各缺一體援照雲貴甘肅變通章程請補統俟地方事  
大定再照向章辦理以歸畫一惟新疆各缺例准俸滿調  
升內地原以鼓勵人才於邊缺特示優異現在新設各廳  
州縣有距甘省在七八千里以外者各該員捧檄馳驅不  
辭勞瘁若僅恃此二十餘屬以爲升調竊恐鼓勵之道有  
時而窮且此二十餘屬又多瘠苦尤不足以廣激勸查新  
疆北路各缺例限三年五年分別俸滿南路程途更遠應  
請比照辦事文員三年期滿例均作爲三年俸滿屆期由  
藩司察其在任實心任事出具考語詳由撫臣驗看咨送

甘省照例升用再實缺人員例准保送卓異甘肅州縣以上定例六員教佐二員烏魯木齊都統所屬同通雜職果有實係出色亦准保薦一員每屆計典新疆向由甘省辦理茲既改置行省增設郡縣可否從寬酌定額數分別覈辦應請

飭部併議示覆以便將來擇尤保薦如不得其人任缺毋濫倘有庸劣不職仍隨時查明參劾如此分別定章庶於變通之中仍寓慎重之意據藩司魏光燾詳請具

奏前來

臣

覆核無異合無仰懇

天恩飭部核准立案以憑遵辦所有酌擬新疆補署各缺

畱省補用人員章程各緣由是否有當謹會同陝甘督臣  
譚鍾麟恭摺具奏伏乞

皇太后

皇上聖鑒訓示施行謹

奏

軍機大臣奉

旨該部議奏片併發欽此

卷之四十一

十一

籍隸甘肅人員准按序班毋庸迴避片

九月初五日

再查定例各省文職官員除教職外俱迴避本省又例載鄰省距本籍五百里以內之缺應行迴避新疆雖向歸甘肅管轄而相距甚遠卽哈密最近之區亦離甘省三千餘里其南北兩路各城遠至四五千或七八千里不等車馬馳驅極多繁費與東南各省舟航四達朝發夕至情形迥不相同且甘肅與新疆人民居處既遠亦無姻親族黨之嫌現在新疆改建行省添設道員以下各缺可否仰求天恩飭部核議凡原籍甘肅人員准其分發新疆差委與籍隸他省人員一律按班序補毋庸迴避俸滿後仍由司

詳撫臣驗看如果任事實心循良有績准予加具考語送部引

見由內升調他省與籍隸他省人員俸滿調升甘肅者略示變通似可並行不悖該員等距家稍近民情較易諳習卽到省盤費亦可稍從節省如此一轉移間於邊外吏治不無裨益是否有當謹會同陝甘總督臣譚鍾麟附片具奏伏乞

聖鑒訓示謹

奏

軍機大臣奉

旨覽欽此

刑部  
刑部  
刑部



金聖歎公集卷之九

九

薩凌阿交卸回京片

九月初五日

再臣准伊犁將軍臣金順咨稱新疆南北兩路辦事幫辦領隊各大臣員缺奉

旨裁撤所有實缺及署任各員俱應欽遵交卸候

旨簡用茲准統領吉江馬隊烏魯木齊領隊大臣薩凌阿牘稱遵將所統各起隊伍交卸清楚由伊犁赴省擬照例馳驛回京懇轉咨代

奏前來臣維薩凌阿自同治初年由吉林奉派出征繼隨金順出關統領吉江馬隊防守西湖伊犁等處邊要光緒五年蒙

恩補授烏魯木齊領隊大臣員缺因值防務喫緊經金順奏請畱營仍令統領兵勇以資得力該領隊從征數省前後二十餘載久經戰陣卓著勤勤昨抵烏魯木齊晤談數次老成練達洞曉戎機自以身受

國恩亦欲及詩圖報烏魯木齊領隊大臣是其本缺未及到任卽經奉

旨裁缺所統兵勇亦已交卸並無經手未完事件現在回京應如何

擢用之處出自

鴻慈除咨部查照外謹會同伊犁將軍臣金順署烏魯木

齊都統 臣升泰附片代陳伏乞  
聖鑒謹

奏

軍機大臣奉

旨知道了欽此

欽定皇朝通志  
卷之十

五十一

查明新疆防營臺局十年分實在數目摺

九月初五日

奏爲查明新疆防營弁勇光緒十年四月起至十二月底止及各臺局十年分實在各數目分別繕具清單

奏明立案恭摺仰祈

聖鑒事竊臣所部馬步諸軍暨烏魯木齊提標土勇截至光緒十年三月底止共存五十四營旗開花礮隊三哨小馬隊四哨業經遵照部議

奏明立案茲據行營糧臺詳稱光緒十年九月以後添募湘軍中旗行營步隊一旗旌善左右漢回坐糧馬隊二旗挑雷嵩武軍假勇編爲董字前旗坐糧步隊一旗董字前

旗坐糧馬隊一旗原有哈密協標步兵二百七十一員名酌添數十人改爲土勇一旗又十年五月起先後裁併恪靖精騎兩營改爲行糧馬隊各一旗通截至十年十二月底止共存六十營旗開花礮隊三哨小馬隊四哨合計共額設弁勇二萬三百九十八員名額外營哨官一百五員額外火夫長夫馬夫九千八百四十一名此馬步各軍員弁勇夫之實數也關外向設各臺局除陸續裁併截至九年底止曾經

奏報有案查十年分先後共裁撤善後十五局蠶桑六局征糧七局採運四局柴草兩局增設牛痘四局截至十年

十二月底止下存各局之實數以及各營局新收開除起止日期均於單內分別開明詳請

奏咨等情前來臣覆核無異竊維新疆地方遼闊又居極邊上年張曜一軍奉

旨開拔入關臣於十月十六日將遴員替防并酌添營伍填紮情形馳奏在案祇以餉項不繼添補馬步勇丁僅此數旗勉爲分布兵力較單臣惟有督飭各將領隨時整頓加意巡防以固邊圉至南北兩路所存各局除萬難裁併之處仍照常安設外其餘或量爲裁撤或歸併地方官經理故十年分各項局員比較九年大加裁減所有關外各



營局十年分實在數目除咨部查照外謹繕清單恭呈  
御覽伏乞

皇太后

皇上聖鑒飭部立案施行謹

奏

軍機大臣奉

旨該部知道單一併發欽此

軍機大臣字寄光緒十一年九月初五日奉

上諭譚鍾麟奏遵旨趕籌伊犁餉銀解赴劉錦棠軍營請  
飭將金順所部勇丁覈明在營久暫欠餉多少分成勻給  
並稱錫綸在塔城經手營餉款目繁多到任遲速未能豫  
定請飭劉錦棠先到伊犁速行辦理等語劉錦棠著俟餉  
銀到日迅卽馳赴伊犁將整頓營勇清理欠餉各事宜妥  
速籌辦毋稍遲延將此由六百里諭令知之欽此



裁撤糧員改設同知巡檢等缺摺

九月二十日

奏爲邊疆員缺緊要糧員難資鎮撫亟宜量爲裁改以期整頓而重地方恭摺仰祈

聖鑒事竊查庫爾喀喇烏蘇舊設領隊大臣一員管理庫城精河土爾扈特遊牧及屯田事宜竝設庫城糧員一員精河糧員一員由部揀派司理戶民糧務軍興以來糧員暫行由外委署查庫城爲西路衝衢東距迪化城六百九十里距綏來城三百五十里西達伊犁至精河界二百五十里北通塔城至塔城界三百三十里幅員廣闊地方扼要軍務初定游民商旅雜出其途兼有土爾扈特游牧民

人稽查彈壓悉關緊要現在領隊員缺裁撤糧員既無地方之責竊恐難資鎮撫臣前

奏設南北兩路驛站請將庫城精河兩處改臺爲驛歸該糧員經管嗣奉部咨覆准地方情形體制均與曩昔迥殊自應變通籌辦改設官員以期有裨但欲隸歸綏來則相距較遠鞭長莫及因查庫城舊設縣丞後改同知於乾隆四十八年裁改糧員擬請仿照舊制裁汰糧員仍改設庫爾喀喇烏蘇撫民直隸同知一員兼理事銜管理地方戶籍田賦刑案兼管土爾扈特游牧諸事宜並轄精河屬境精河西與伊犁接界相距二百二十里東接庫城界一百

七十五里舊設典史後改糧員所管四驛轄境亦廣擬請  
裁糧員缺設分防驛糧巡檢一員管理戶糧驛站緝捕等  
事仍隸同知管轄遇事由同知核轉其同知仍隸道屬以  
專責成又鎮迪道舊轄喀喇巴爾噶遜糧員一員地在迪  
化南一百八十里原管戶民本由迪化分撥兵燹後員缺  
久懸戶民均係由州經管臣前奏請升迪化直隸州爲迪  
化府增迪化縣爲附郭首縣該處距城較近一切事宜縣  
中自能兼顧其原設糧員一缺亦應裁汰庫城精河原額  
戶民屯兵及征納額糧房租園租等項均歷有成案可考  
現在戶口凋零兵屯未復一切征收雖屬寥寥然爲撫綏

彈壓起見似因時制宜莫要於此官制既定得人而理數年之後自必日有起色其改設各官應定爲何項缺分俟設定後再行擬議辦理仍懇照吉林新設各缺酌補一次成案由外先行揀補一次據藩司魏光燾詳請具

奏前來臣覆查無異合無仰懇

天恩俯念邊疆員缺緊要量爲變更以資整頓實於地方大有裨益如蒙

俞允應請

飭部核覆示遵所有擬請裁撤庫爾喀喇烏蘇精河喀喇巴爾噶遜三糧員改設同知巡檢各缺緣由是否有當謹

會同伊犁將軍臣金順陝甘總督臣譚鍾麟署烏魯木齊

都統臣升泰恭摺具陳伏乞

皇太后

皇上聖鑒訓示謹

奏

軍機大臣奉

旨該部議奏欽此

刑部

卷八



聖朝聖訓  
卷之二

三

518

委譚上連署理烏提篆務片九月二十八日

再臣前

奏烏魯木齊提督金運昌患病日久懇

恩開缺可否暫行委員署理等情奉

旨金運昌已有旨准其開缺烏魯木齊提督著該撫會商  
譚鍾麟派委安員暫行署理欽此欽遵在案查有頭品頂  
戴題奏提督甘肅西甯鎮總兵譚上連智勇深沈廉能樸  
實久經戰陣洞悉邊情該員現在統領親軍駐防北路瑪  
納斯一帶距省不遠堪以就近暫行署理烏魯木齊提督  
篆務臣與督臣譚鍾麟會商意見相同除咨委外謹會同

卷九

三

陝甘總督臣譚鍾麟署理烏魯木齊都統臣升泰合詞附片具陳伏乞

聖鑒謹

奏

軍機大臣奉

旨兵部知道欽此

請 旌烈婦譚金氏摺

九月二十八日

奏爲烈婦殉夫籲懇

旌表以維風化恭摺仰祈

聖鑒事竊

臣

據陝西遇缺儘先題奏道王久銘記名提督

湯彥和鄧政升記名總兵譚用賓甘肅迪化直隸州知州

潘效蘇遇缺儘先卽選知州袁運鴻等呈稱已故記名提

督甘肅甯夏鎮總兵譚拔萃之妾金氏係浙江鄞縣民女

隨父流寓蘭州譚拔萃征勦歷年旋赴官甯夏正妻湯氏

在湖南湘潭縣原籍未以自隨似續缺然因於同治十三

年納該氏爲妾光緒二年譚拔萃奉調督隊出關畱該氏

肅州居住本年正月二十三日譚拔萃在古城防營積勞病故未沒之先用賓以族姪孫隨營在側見其病勢沈重爲謀僦屋迎氏出關及該氏兼程馳至而譚拔萃已卒未得一見爲訣呼號隕絕誓不獨生僕婦聞知晝夜爲備卒於二十七日乘閒仰藥以殉職等見聞既確不忍湮沒勿彰齋具冊結呈懇具

奏前來臣維已故記名提督甘肅甯夏鎮總兵譚拔萃久從征戰

國爾忘家本年正月在古城防營因病出缺經臣奏奉諭旨交部照提督軍營立功後在營病故例從優議卹並

將平生戰績宣付國史館立傳等因欽此其妾金氏痛夫  
病沒義不獨生矢以身殉卒遂其志庸行奇節洵屬可風  
據報前情臣覆核無異相應請

旨旌表以慰貞魂而維風化除冊結咨部查核外謹會同

陝甘總督臣譚鍾麟甘肅學政臣陸廷黻合詞恭摺具

奏伏乞

皇太后

皇上聖鑒訓示施行謹

奏

軍機大臣奉

旨譚金氏著准其旌表禮部知道欽此

劉襄勤公奏稿卷十

起光緒十一年十月  
訖光緒十二年四月

目錄

揀補王鳳鳴等副將員缺摺

顧得喜勾結匪類謀變事聞登時撲滅片

酌裁回官懇 賞回日頂戴摺

報馳赴伊犁會辦起程日期及布置情形摺

辦結伊犁殺斃俄屬陝回命案摺

懇 恩豁免被旱奇臺縣額糧摺

緩征迪化各屬被旱額糧片

馳抵伊犁日期片



各省應解工程銀兩懇 飭掃數解清片

報都統升泰丁憂日期摺

都統員缺應否派員護理片

請將袁奎齡補授阿克蘇道員缺摺

開源節流就新疆情形逐條分晰覆陳摺

欠餉未清懇 飭部指提有著實餉分限解甘摺

關外營餉雜支章程再按部議登覆摺

懇發奇臺縣屬春賑摺

新設古城城守尉擬由撫臣兼轄請 簡放摺

代奏哈密回子親王謝年終 恩賞摺

估修新疆省城垣及撫藩衙署等工摺

古城修理完竣哈密將次完工請立案片

伊犁營勇查明裁併分成發給存餉摺

報由伊犁回省日期并陳吉江馬隊由將軍妥籌遣  
撤摺

南路建置已定請令署提督移防摺

請將董福祥署阿克蘇鎮總兵片

報由伊犁抵省日期及照常辦事片

覆陳伊犁屯務防務擬辦大概情形摺



揀補王鳳鳴等副將員缺摺

十月二十七日

奏爲揀員調補借補副將要缺以重邊防恭摺具陳仰祈  
聖鑒事竊臣前奏哈密協副將郝永剛因病懇請開缺並  
聲明遺缺扣畱外補奉

旨允准在案查哈密係新疆南北要衝該處副將員缺非  
熟諳邊情練習營伍之員弗克勝任查有頭品頂戴題奏  
提督借補瑪納斯協副將王鳳鳴練達廉明有爲有守堪  
以調補所遺瑪納斯副將員缺查有現署該協副將記名  
提督張清和樸誠勇敢勤慎耐勞自署任以來於邊防屯  
務均能實力講求以之借補斯缺洵堪勝任合無仰懇

天恩俯准以王鳳鳴調補哈密協副將員缺張清和借補  
瑪納斯協副將員缺以期得力如蒙

俞允應請

敕部分別給劄一俟防務大定卽行給咨赴部引

見以符定制除飭取該員等履歷至日另咨送部外謹會

同陝甘總督臣譚鍾麟暫署烏魯木齊提督臣譚上連合

詞恭摺具陳伏乞

皇太后

皇上聖鑒訓示謹

奏

軍機大臣奉

旨兵部議奏欽此



顧得喜勾結匪類謀變事聞登時撲滅片

十月二  
十七日

再臣據總統西四城馬步各軍提督董福祥呈稱九月二十三日據喀什噶爾稽查委員報稱聞有游勇張姓勾結定遠左旗勇丁顧姓約定今夜三更脅眾滋事等語當卽分飭各營官嚴密查拏定遠左旗駐紮處所距城稍遠及密信至旗官胡登花已先有所聞於初更時候正在點名忽有營勇二十餘人奔至營外胡登花隨率親兵出營追捕不半里許聞前面人聲嘈雜卽飭開槍轟擊該匪初猶開槍抗拒胡登花被飛子中傷右額仍飭隊上前擒捕該匪不支始各逃竄董左旗旗官杜錫斌得報亦率親兵前



來探視途遇逃匪擊斃七名連日據各營卡拏獲首犯張大發顧得喜及餘匪共二十九名訊據張大發供稱係安徽蒙城縣人原在嵩武軍喫糧上年隊伍入關未曾隨行流落在此屢與相識之營勇顧得喜敘說苦情遂潛與結會商約數十人搶劫買賣街店鋪冀得盤川便可入關本擬二十三日夜間起事是日初更時分率帶同夥二十餘人伏於定遠左旗營外適顧得喜被人告知旗官點名事已敗露不能久待隨見顧得喜帶同二十餘人飛奔營外旗官跟追犯人等倉皇無計開了幾槍就逃走了據顧得喜亦供認前情不諱經提督會同地方官訊明將首犯張

大發顧得喜等十六名分別斬梟此外李春成等十三名  
訊係被其煽誘情有可原量爲懲治其未獲各犯尙有六  
名俟緝獲再行訊辦等情具報前來臣維提督董福祥平  
日治軍尙稱嚴整祇以近年裁併營勇間有遊手之徒遠  
羈萬里謀生無自欲歸未能遂藉會匪名色煽惑顛蒙此  
次匪徒張大發勾結營勇顧得喜等起意同謀希圖搶劫  
經董福祥先時覺察分飭各營預爲防範旗官胡登花於  
該匪等起事之時卽行追捕登時撲散首要各犯旋亦就  
擒不至擾害地方辦理尙爲迅速可否邀  
恩均免置議出自

逾格鴻慈除飭將在逃餘匪嚴密查拏務獲究辦外謹附片具陳伏乞

聖鑒訓示謹

奏

軍機大臣奉

旨知道了董福祥等均著免其置議仍飭將在逃餘匪嚴密查拏按名弋獲毋任漏網欽此

酌裁回官懇

賞回目頂戴摺

十月二  
十七日

奏爲酌裁新疆各城回官並懇

恩賞給出力回目頂戴以省煩苛而昭激勸恭摺具陳仰  
祈

聖鑒事竊 臣於光緒八年七月間奏請將阿奇木等伯克  
裁去仍准戴用翎頂經理藩院遵

旨議覆各城裁去伯克體制是否合宜未敢率行議准請  
飭再行體察情形悉心妥議覆奏嗣 臣於委署新設南路

道廳州縣各官摺內聲明擬將伯克分撥爲吏戶禮兵刑  
工各書復經部議係爲隨時變通期於兩有裨益起見似

應准如所請惟伯克各有專責從未議及更張一旦驟加  
增改回民能否相安似難遙計請

飭酌度情形妥議核辦等因先後奏奉

諭旨依議欽此欽遵各在案竊維回疆民事從前委之阿  
奇木伯克等官原以約束部眾乃該回目等往往倚權藉  
勢魚肉鄉民爲所欲爲毫無顧忌纏回語言文字隔閡不  
通民怨沸騰而下情無由上達繼遭安夷之變該回目等  
苛酷尤甚橫征暴斂肢削靡遺民命不絕如縷幸賴

皇威遐暢

天戈所指莫不聞風披靡舉二萬餘里之疆土還隸版圖

使邊民重覩天日臣曩年規復南疆每於進克一城卽咨商前督臣左宗棠揀員設局辦理善後招集流亡籌給牛籽農具疏濬溝渠使之盡力耕作輕徭薄賦與民休息數年以來荒蕪漸闢戶口日增地方漸有起色其大小伯克額缺雖亦揀委署理究竟地方應辦事宜均責成各該局員察看情形稟承遵辦但藉回日傳頒教令初未嘗假以事權現在南路新設道廳州縣各官委署已歷年餘規模漸具不乘此時量爲變通則過此以往又必有積重難返之勢況阿奇木等承充伯克多係三品四品州縣官階尙居其下鄉愚無知恐啟玩狎之漸而與州縣儼然並立於

體制亦不相宜在部院諸臣以事屬更張自應長思熟慮而微臣見聞既確計非裁去回官實無以蘇民困而言治理上年通飭南路各廳州縣傳集各該城關阿奇木等伯克剴切開導諭以在所必裁之故准其各畱原品頂戴仍視城關事務繁簡分設鄉約專司稽查卽於裁缺之回目選令承充並視品級之崇卑分送道廳州縣衙門充當書吏鄉約酌給租糧書吏酌給口食以資養贍不願者聽其鄉莊地遠驟難戶曉舊有之伯克暫仍不裁遇有缺額亦不另補以期漸照城關一律改設鄉約現據各屬稟報自試裁城關伯克後經年以來甚覺相安毫無缺望回民去

其壅蔽意亦漸與官親若更需以時日言語相通則疾苦  
可以自陳而弊竇可期永絕矣容再由臣督飭各該地方  
官隨時察看務令措置得宜不敢稍涉因循憚於改易亦  
不敢過於操切致啟事端以仰副

朝廷瞻顧西陲至意惟各城出力回目前以軍務方殷正  
資驅使或派令鄉導或委辦軍糧頗能不辭勞瘁若不立  
予獎勵無以作其急公向義之心當經臣與前督臣左宗  
棠前幫辦軍務臣張曜隨時核酌與以擬保翎頂行知俟  
彙案奏請

獎敘現在歷年既久未便沒其前勞合無仰懇



天恩俯念該回目等効力疆場

允照臣等擬保行知

賞給翎頂以昭激勸出自

逾格鴻慈謹將擬保各回目翎頂繕具清單恭呈

御覽所有酌裁回官並懇

恩賞給回目翎頂各緣由謹繕摺具陳伏乞

皇太后

皇上聖鑒訓示施行謹

奏

軍機大臣奉

旨著照所請該衙門知道單併發欽此

列金一果其... 易和... 卷一

八

報馳赴伊犁會辦起程日期及布置情形摺

十月二十七日

奏爲遵

旨馳赴伊犁會辦事務謹將起程日期及布置大概情形  
恭摺具奏仰祈

聖鑒事竊

臣

於八月二十八日承准軍機大臣字寄光緒

十一年八月初四日奉

上諭譚鍾麟奏密陳伊犁現在情形據稱弭亂之策一在  
籌款以清欠餉一在擇人以整營規金順所部各營欠餉  
約計三十萬兩可以了結等語本日已明降諭旨令金順  
來京陛見並派錫綸署理伊犁將軍其塔爾巴哈臺參贊

大臣已派明春馳往署理俾錫綸迅速起程矣伊犁兵勇屢次譁變朝廷睠顧西陲正深厘係茲據該督所奏各節亟應將該處將弁兵勇極力整頓並先清理欠餉俾該勇等無所藉口著戶部撥銀三十萬兩解交甘省未到以前譚鍾麟無論何款先行籌措實銀三十萬兩迅解劉錦棠軍營該大臣俟餉銀到後酌帶隊伍馳赴伊犁會同錫綸將金順所部各營覈實查點分別入營久暫欠餉多少分成勻給並將勇丁應去應留確切查明歸併嚴定營規其貪劣素著之營哨官嚴辦一二以儆其餘錫綸到任後與劉錦棠和衷商辦務將各該營積習悉力湔除毋稍彌縫

致貽後患亦不得操之過蹙別滋事端等因欽此正在與錫綸函商料理一切復於九月三十日奉

上諭譚鍾麟奏遵旨趕籌伊犁餉銀解赴劉錦棠軍營請飭將金順所部勇丁覈明在營久暫欠餉多少分成勻給並稱錫綸在塔城經手營餉款目繁多到任遲速未能豫定請飭劉錦棠先到伊犁速行辦理等語劉錦棠著俟餉銀到日迅卽馳赴伊犁將整頓營勇清理欠餉各事宜妥速籌辦毋稍遲延欽此跪聆之下仰見

聖慈塵念邊防莫名欽服臣本應早日啟行惟北路天氣嚴寒近日地凍雪深車行遲滯督臣譚鍾麟措解銀三十

萬兩一時未能解到臣飛飭沿途嚴加催趲始於本月二十五日晚間解到臣謹定於二十七日啟程商令署烏魯木齊提督譚上連由綏來防所酌率隊伍進駐庫爾喀喇烏蘇以資防護另選親軍馬步一千五百人交陝西漢中鎮總兵戴宏勝統帶隨臣前進省中日行事件委由藩司魏光燾代拆代行遇有緊要公務仍隨時遞臣行營辦理以昭妥慎現接錫綸來信擬將參贊篆務交領隊暫行護理準於二十六日起身除伊犁應辦事宜到時與錫綸妥細籌商再行陳奏外所有微臣遵旨馳赴伊犁啟程日期及布置大概情形理合恭摺具奏

再署塔爾巴哈臺參贊大臣明春於二十一日行抵省城  
與臣面商壹是定於二十八日由省起程赴任合併陳明  
伏乞

皇太后

皇上聖鑒訓示謹  
奏

軍機大臣奉

旨知道了欽此





辦結伊犁殺斃俄屬陝回命案片十月二日

再臣於光緒十年八月初二日承准總理各國事務衙門咨開光緒十年七月初九日具奏伊犁清汙河殺斃俄屬陝回二名一事請

旨飭交督辦新疆軍務大臣劉錦棠派員會同俄領事公平迅速議結一片本日奉

旨依議欽此欽遵知照並將與俄使兩次來往照會抄咨到臣復查伊犁將軍臣金順前與俄商魏哩糧價轉轄經年未結由總理衙門商知領事函囑臣派員前往辦理當委甘肅候補道員丁鶚前赴伊犁三面議結嗣准前咨臣

復加委該員承辦去後旋據該員稟稱到伊面晤領事與  
議命案則以先清糧價爲詞與議糧價則又再三狡展必  
併兩案清釐未免稍需時日經臣疊次劄催迅圖了結在  
案現准金順咨稱據道員丁鶚詳稱竊查光緒八年統領  
伊犁禮字等營提督劉宏發報稱新附俄屬之陝回馬六  
魏滿娃二名被殺一案屢與俄領事辯駁情願議結惟面  
稱二陝回被殺在中國地面請撫恤其家屬等語職道念  
兩國和好酌給銀一千四百兩以示體恤該領事商允了  
案取具完案回文詳請轉咨等因前來臣查殺斃俄屬陝  
回一案詳閱領事照會始稱違約私殺請辦在事官員繼

復藉故生端希索償命銀兩遷延既久枝節橫生現經就案了結無任藉口卽糧價亦已一律算清毫無轉轄除糧價由臣另文咨覆總理衙門查照外所有辦結伊犁殺斃俄屬陝回命案各緣由理合附片具奏伏乞

聖鑒謹

奏

軍機大臣奉

旨該衙門知道欽此

五言集卷之八

三

懇 恩豁免被旱奇臺縣額糧摺

十二月初二日

奏爲新疆奇臺縣屬被旱成災地畝本年應徵額糧籲懇  
天恩概予豁免以紓民困恭摺仰祈

聖鑒事竊查本年春夏以來新疆北路雨澤稀少奇臺一  
縣自播種之後夏秋二麥多未發生卽間茁萌芽亦半多  
黃萎嗣得微雨二次潤土未深禾苗旋復枯槁該縣屬之  
大板河東灣頭二三畦永豐渠中葛根紅大渠東吉爾西  
吉爾隆舊渠上開墾董子溝白楊河牛王宮半截溝小堡  
西葛根碧流溝鶯格布拉興平渠下開墾平定渠新戶梁  
木壘河平頂山等處戶民種地五萬九百七十八畝二分

二釐所種禾苗全無收穫卽闢有收穫籽粒亦多屬秕稈磨不成麪委員勘驗實係被旱成災伏查關外兵燹之後民鮮蓋藏每屆春耕必由官籌給籽糧始能有事東作今年歲遭此大祲秋成失望匪特額糧無出抑且日食維艱待哺嗷嗷情殊可憫核計前項被災地畝本年應徵京斗額糧二千四十二石二斗二升六合五勺委屬無力完繳擬懇概予豁免其十年分各該戶欠完額糧及本年借領籽種請一併緩至來年秋收後分別帶徵以紓民困業經司檄飭該署縣楊敏先行出示停徵使胥役無從舞弊仍一面查明極貧次貧各戶分別給賑由該縣督查監放俾令

實惠均沾母任一夫失所其賑糧卽由倉儲項下動支事竣核實造報至來春應否接濟屆時熟察情形再行斟酌核辦據藩司魏光燾詳請具

奏前來臣覆核無異合無仰懇

天恩俯念邊民困苦准將奇臺縣屬本年被旱成災地畝應繳額徵糧石概予豁免其十年分欠完額糧及本年所借籽種一律緩徵如蒙

俞允俟欽奉

諭旨後卽飭司將被災各戶蠲免額糧並緩徵糧石分別詳細開載敬刊謄黃徧行曉諭俾令周知以廣



皇仁而彰實惠是否有當謹會同陝甘總督臣譚鍾麟恭摺具陳伏乞

皇太后

皇上聖鑒訓示謹

奏

軍機大臣奉

旨著照所請戶部知道片併發欽此

緩徵迪化各屬被旱額糧片

十二月初二日

再本年新疆北路雨澤稀少除奇臺一縣被旱成災地畝  
專摺

奏報外其餘迪化州及所屬各縣戶民地畝亦間被災稔  
查迪化州屬之上下頭屯安南夷戶軍戶宣仁中夷鐵廠  
西工頭二三坪沙門新渠亂山渠邵陽渠頭二七工渠水  
西溝板房溝等處被旱夏禾地七千五百三十二畝昌吉  
縣屬之上元莊下元莊利莊亨莊等處被旱夏禾地一萬  
二千八百三十畝阜康縣屬之頭工二道河兵戶東五運  
五工梁西五六八九運七十東八運等處被旱夏禾地四

千四百七十九畝綏來縣屬之甘溝石廠牛圈博洛同古  
新戶廟塔西河等處被旱夏禾地一萬一千三百七十三  
畝呼圖壁巡檢所屬之芳草湖莊下岌岌梁破口渠單板  
五戶地等處被旱夏禾地二千二百六十六畝四分先後  
據各該管地方官詳報飭司委員勘驗或因泉流涸竭灌  
蔭失時或因雨澤愆期霑潤不足以致受旱輕重不同各  
以閭境計之尙未全災惟收成實屬歉薄核計各屬被旱  
地畝迪化州應徵京斗額糧二百九十一石六斗一升八  
合四勺昌吉縣應徵糧五百四十四石三斗四升七合六  
勺阜康縣應徵糧二百七十九石九升綏來縣應徵糧三

百九十六石四斗五升一合呼圖壁應徵糧九十二石一斗三升八合民情困苦實屬無力輸將擬懇將本年應徵前項額糧緩至來年秋收後再行帶徵由司檄飭各該州縣先行出示曉諭毋使胥役從中舞弊仍查明被災輕重酌量撫恤毋任失所據藩司魏光燾詳請附

奏前來

臣覆核無異合無仰懇

天恩俯准將各屬被旱地畝本年應繳額糧一律緩徵以紓民力出自

逾格鴻慈是否有當謹會同陝甘總督臣譚鍾麟附片具陳伏乞

奏

軍機大臣奉

旨覽欽此

馳抵伊犁日期片

十二月初二日

再臣於十月二十七日遵

旨馳赴伊犁當將起程日期恭摺具

奏在案途中積雪過深步隊跋涉維艱不無遲滯前月十九日始抵伊犁因地凍不能築營所帶隊伍卽就塔勒奇城支帳居住錫綸前於大河沿地方與臣會商早一日進發是日清晨先到二十二日錫綸接印視事查此間勇營較多吉江馬隊祇一千六百餘人清理餉事應先從勇營著手當會飭各統領營官造具勇丁實在清冊開明入伍日期以憑核辦並出示曉諭勇丁告以此次清理之後卽

當裁併營旗務求精實畱營者按月發餉悉照定章裁撤者酌給川資遣歸原籍其有已經裁撤而願在此落業者卽飭地方官查照屯墾章程一律妥爲安插現在兵勇尙皆安靜沿途經過地方民情亦均安堵堪以上慰

宸廑除俟應辦各事宜清理就緒再行詳細

奏陳外所有微臣馳抵伊犁日期理合附片具陳伏乞

聖鑒訓示謹

奏

軍機大臣奉

旨知道了欽此

各省應解工程銀兩懇

飭掃數解清片

十二月初二日

再新疆南路應需工程經費前經部議指撥銀三十六萬六千七百八十四兩上年因報解無幾興修各工製辦一切物料工匠口食需款甚急經臣奏請

飭催各省關將應解銀兩限本年春季掃數解清奉

旨令各將軍督撫等迅解等因欽此欽遵在案茲查各省關承撥工程經費除山西省江漢閩海江海粵海等關及山西河東道共應解銀六萬兩均已全數解清山東省應解銀二萬兩已解銀一萬兩仍應解銀一萬兩其餘四川應解銀五萬兩湖南湖北各應解銀四萬兩江西應解銀



三萬兩河南應解銀二萬兩又胡光墉應繳西征借款行用補水等銀十萬六千七百八十四兩應由浙江撫臣於該革員備抵產業內變價解交共銀二十九萬六千七百八十四兩迄今均未報解此項經費奉撥已歷二年合計收數不及十成之二各處工程正報興修均需現款而餉項異常支絀萬分無可騰挪不得不停工以待若再遷延時日則未竣之工風雨漂搖不免坍塌從新修補又增耗費據行營糧臺詳請奏催前來臣維新疆初設行省地處極邊城垣礮臺衙署倉庫監獄各工在在均關緊要合無仰懇

天恩飭下各該省迅將應解前項銀兩埽數解清無再延宕俾臣得以分發各處勒限完工以固邊圉而昭妥慎謹附片具陳伏乞

聖鑒訓示謹

奏

軍機大臣奉

旨著戶部咨催各督撫迅速籌解以濟要需毋再延宕欽此



報都統升泰丁憂日期摺

十二月十四日

奏爲具報署都統臣奉文丁憂日期恭摺仰祈

聖鑒事竊據藩司魏光燾詳稱署烏魯木齊都統升泰遣家丁報稱光緒十一年十一月初八日准兵部咨開准正黃蒙古旗分咨稱本旗恩傑佐領下革職畱任副都統銜內閣學士兼禮部侍郎銜伊犁參贊大臣署烏魯木齊都統升泰之親母愛新覺羅氏於本年九月初十日在京病故等因升泰係屬親子例應丁憂交卸回旗守制當將都統印信封存其應行事件暫委領隊衙門代拆代行報由迪化州申轉詳請具

奏並據署烏魯木齊領隊大臣富勒銘額報同前情臣等覆核無異所有署烏魯木齊都統臣升泰奉文丁憂日期除分咨旗部存查外謹會同陝甘總督臣譚鍾麟合詞具奏再此摺係臣錦棠主稿合併陳明伏乞

皇太后

皇上聖鑒謹

奏

軍機大臣奉

旨知道了欽此

都統員缺應否派員護理片十二月十四日

再烏魯木齊都統員缺前經奉

旨裁撤惟正議歸併旗營之際尙多應行事件升泰現在  
丁憂應否派員暫行護理印務俾升泰得以迅速交卸回  
旗伏候

諭旨遵行謹會同陝甘總督臣譚鍾麟合詞附

奏再此片係臣錦棠主稿合併陳明伏乞

聖鑒訓示謹

奏

軍機大臣奉

旨卽著富勒銘額暫行護理欽此

請將袁珪齡補授阿克蘇道員缺摺

十二月十四日

奏爲新設邊疆巡道要缺遵照新章揀員請補以資整飭  
恭摺仰祈

聖鑒事竊新疆南路新設道廳州縣各缺臣前奏請照吉  
林新章由外揀補一次業經奉准部覆在案茲查阿克蘇  
兵備道員缺撫馭蒙部彈壓布魯特稽察卡倫督飭所屬  
水利屯墾錢糧刑名事件政務殷繁應作爲衝繁疲三項  
要缺現值建官伊始該道以守兼巡率屬綏民在在均關  
緊要非得廉明素著熟悉邊情之員不足以資整飭查有  
總理臣營營務處二品頂戴鹽運使銜浙江儘先題奏道



那爾琿巴圖魯袁珪齡現年五十二歲安徽泗州直隸州人咸豐十一年由文章童投効吉字營幫辦營務於水陸官軍迭復江岸各城隘六案件保案內保奏同治元年六月初一日奉

上諭著以從九品遇缺儘先卽選欽此嗣於金陵雨花臺解圍案內保奏二年五月初六日奉

上諭著免選本班以縣丞不論雙單月遇缺卽選欽此又於克復金陵省城案內保奏三年八月二十一日奉

上諭著免選本班以知縣畱於浙江遇缺儘先卽補並賞戴藍翎欽此五年八月經前湖北撫臣曾國荃奏調赴鄂

幫辦營務六年水陸各軍防剿捻逆迭次猛戰並克復雲  
夢應城天門等縣案內保奏是年八月二十三日軍機大  
臣奉

旨該部核議具奏欽此旋經吏部覆奏查藍翎浙江遇缺  
儘先卽補知縣袁垚齡係奏調到營此次迭斬賊目並克  
復縣城所請加同知銜並換花翎與例案相符應請照准  
奉

旨依議欽此十年調赴臣軍辦理營務攻破小峽要隘堅  
壘數十座徑薄西甯府城立解重圍案內隨摺保奏十一  
年十一月二十日奉

各省疆域  
卷一  
上諭著俟補缺後以同知歸軍功候補班前  
先補用欽此又於邊平西甯府屬回逆立解府城重圍克復大通縣城  
肅清邊境安輯回番案內保奏十三年七月二十九日奉  
上諭著賞給四品頂戴欽此旋經吏部議覆查該員所請  
已逾加銜限制應改爲五品頂戴是年十月二十八日具  
奏奉

旨依議欽此關隴肅清案內保奏光緒二年二月初四日  
奉

上諭著免補知縣以同知直隸州知州仍畱原省歸候補  
班前補用俟補缺後以知府用先換頂戴欽此官軍攻拔

古牧地堅巢克復烏魯木齊等城案內隨摺保奏是年八月十六日奉

上諭著免補本班以知府仍畱原省歸軍功候補班前補用並賞加鹽運使銜欽此旋署迪化直隸州知州事次年因規復南疆復經臣檄調交卸回營辦理營務於勦辦安集延布魯特陝回金山股逆獲勝案內出力隨摺保奏又經左宗棠奏明勦辦安夷各案隨摺保獎員弁內有前次克復西四城南疆肅清案內已經擬保官階請作爲底銜等因奉

旨允准五年十月十四日奉

上諭花翎鹽運使銜浙江補用知府擬保二品頂戴雷原  
省儘先題奏道袁垚齡著賞給那爾琿巴圖魯名號並賞  
給二品封典欽此新疆六年邊防案內保奏十年十月初  
五日奉

上諭著交部照頭等軍功從優議敘欽此查該員前在曾  
國荃行營涉歷有年深資得力及臣督師關隴需人襄理  
與曾國荃函商再四始聽臣檄調來營自是無役不從備  
嘗艱苦每遇疑難所在得該員一言剖斷悉合機宜才識  
閎通而處事務求實際前署迪化州事爲日無多而招集  
流亡來者日眾設法安撫條理秩然至今該處人民猶相

稱道察其體用兼備實近時不可多得之員臣前於遵

旨保奏人才切實覆陳摺內籲懇

恩施破格錄用期於時局有裨奉

旨畱中今擬請補授阿克蘇道員缺銜缺相當合無仰懇  
天恩俯念邊疆員缺緊要准以二品頂戴鹽運使銜浙江  
儘先題奏道那爾琿巴圖魯袁垚齡補授阿克蘇兵備道  
員缺於地方實有裨益是否有當謹會同陝甘總督臣譚  
鍾麟恭摺具陳伏乞

皇太后

皇上聖鑒訓示施行謹

卷之二十一

三

奏

軍機大臣奉

旨吏部議奏欽此

開源節流就新疆情形逐條分晰覆陳摺十二月十九日

奏為遵照部議開源節流二十四條就新疆現在情形逐條分晰覆陳謹繕清單恭摺具

奏仰祈

聖鑒事竊臣於光緒十一年正月初八日接准部咨會議

開源節流二十四條令即認真舉辦等因准此竊維時勢

艱難餉糈奇絀部臣統籌全局規畫不厭周詳而微臣忝

任封圻利弊尤須熟慮查新疆屯軍設戍百有餘年供意

繁多悉皆取之協濟誠以地居邊遠瘠苦異常

朝廷撫馭要荒非有利於其地也現雖改設行省以規久

列聖勳公奏稿



遠然諸凡創始亦與內地各省事有不同數月以來就部議各條督同司道地方官熟察情形悉心籌畫其中有亟應照辦者有限於地勢實難舉行者有可收效於將來而不能期之旦夕者茲據藩司魏光燾逐條擬議具詳前來臣仍當率同僚屬遇事講求以期有益民生而漸紓餉力所有議覆各情形除咨部查照外謹分晰繕具清單恭呈御覽是否有當伏乞

皇太后

皇上聖鑒訓示謹

奏

謹將部議籌辦開源節流二十四條就新疆情形逐條議  
覆繕具清單恭呈

御覽

計開

一領票行鹽酌定捐輸查新疆地處極邊土瘠人稀從前  
竝無額設引鹽征收鹽課及開辦鹽法之案現飭據各屬  
查覆南路纏民多就地取鹽浸以爲鹽飲食所需咄嗟立  
辨到處有鹽卽到處皆鹽色味不佳而本地習食已慣不  
煩購買應用有餘北路迪化州之土墩南湖鎮西廳之東  
西鹽池綏來之海沿子及精河等處向均產鹽又蒙地西

西康向亦產鹽承平時尙有商人販運亂後商販絕跡間有腳戶攜以易換糧食者然貧民煮鹹爲鹽與南路大率相等故來者取值雖廉行銷亦滯現在南北兩路實無從招商領票酌定捐輸

一 整頓鹺務查新疆向無額設鹽引及各屬產鹽情形已於前條陳明前准部咨新疆既建行省所有鹽法茶務關稅錢法庫儲各事宜均須次第講求圖經久遠等因當經通飭認真查辦應俟各屬產鹽之區查明能否行銷暢旺再行試辦征收稅課

一 就出茶處所征收茶課查新疆向來行銷官茶係歸甘

肅額引分運發售課銀亦歸甘肅照章征收自兵燹後甘肅茶務改引行票除每引完課釐銀四兩四錢四分外復由肅州釐局完納出口釐金一道現在哈密設立稅局征收東來貨稅將來肅州出口茶釐改由哈密帶收每百觔征銀二兩其晉商由歸綏道衙門呈請部票販運千兩百兩等茶在北路銷售者前已議定每引照甘肅完納課釐銀四兩四錢四分茲仍加抽落地稅銀二兩由古城稅局征收仍不准其侵佔南路引地惟晉商原領部票本係定限一年繳銷現已逾限應令遵章呈繳以杜回環冒運有礙甘引如該商情願辦茶卽令來甘請票採辦以符定章

至種茶一節前准部咨飭屬查覆僉稱南北兩路從未種  
過茶樹緣茶性喜暖關外雪地冰天寒冷倍於關內種植  
本不相宜然亦有察其地氣較暖請購茶籽試種之處應  
俟購買茶籽到日發屬試種有無成效隨時查明辦理又  
部咨內稱伊犁地方出產茶飭官爲設局抽稅等語飭據  
前署伊犁同知上官振勳查明伊犁所屬大西溝阿敦蓋  
兩處向有一種野樹土人取以充茶葉大枝麤味亦遠出  
南茶之下亂後無人採用如果將來利有可興再行酌辦  
一推廣洋藥捐輸查新疆向無洋藥入境行銷本地所銷  
祇有土藥一項現飭哈密古城兩局按照甘肅土藥章程

征收稅課此物久爲民害自未便招商領運而來者又皆零星小販亦無從議及捐輸惟有飭令各該局認真稽查嚴防偷漏以期於稅課稍有裨益

一推廣沙田牙帖捐輸查新疆向無沙田名目無從推廣捐輸至牙帖一項新疆向無埠頭牙行自來並未領帖蓋以地處極邊無多出產民間日用所需不過麤布棉花零星各物北路多係小鋪地攤南路每逢八棚之期手提肩負互相交易無所謂行臣現飭委員會同地方官查明各該處出產貨物酌令照章納稅俟試辦數年後果有成效再當飭令繳捐領帖以符定例

一煙酒行店入資給帖查新疆並無煙酒行店無從取資給帖已於推廣沙田牙帖捐輸條內縷晰陳明

一匯兌商號入資給帖查新疆初設行省尙無匯兌商號無從取資給帖

一劃定各項減平核減查新疆初設藩司一切文武例款均查照定例及現時章程分別覈實支發內文職各官廉俸公費役食各款查照部議按十成給發武職養廉一項亦照甘肅章程以十成支發其餘俸薪蔬紅馬乾糧料草折各項則按甘肅定章分別核減以上凡應扣六分減平者仍扣平支發向不扣平者照依部章扣除四分支發應

飭司將一切支發章程專案詳由<sub>臣</sub>咨部立案備查

一嚴提交代徵存未解銀兩竝嚴定交代限期查北路各廳州縣從前交代悉由甘藩司詳由陝甘督<sub>臣</sub>咨部核辦現既改設行省應自光緒十一年起由新疆藩司詳由<sub>臣</sub>覈咨遇有交代應照舊例定限辦理徵存銀兩飭令隨時解清不准開報存庫名目至南路皆係新設之區尙未舉辦交代且因賦額未定而收支一切又多與善後軍需各款互相牽涉藩司到任後正在飭查各款釐定賦額應俟一切款項釐定章程再行照例起限辦理

一嚴催虧空應繳應賠各款查新疆尙無應追虧賠案件



此後遇有應繳應賠之案自當照例分別認真查追以重帑項

一入官產業勒限變價解部查新疆並無入官產業變價解部之案

一酌提漕糧鹽務鹽規餘款查新疆並無漕糧鹽務鹽規餘款無從酌提此外牲畜貨物一切稅務正在籌辦均令儘收儘解並無格外餘款

一裁減釐局經費查新疆本年四月於哈密古城兩處設立稅局抽收百貨入境稅銀能否抽收暢旺此時尙不可必另設分卡數處以便稽查偷漏事經創始經費未能盡

一應俟辦有成效再按收數多寡將應需經費酌定章程咨部查核此外竝無釐局合併陳明

一核減各關經費查新疆竝無關稅從未開支經費

一核定各省局員額數銀數查新疆現設糧臺軍裝採運柴草保甲稽查蠶桑牛痘各局前已於關外勇餉雜支章程案內逐層奏咨立案其有隨時增減者竝飭糧臺按季造冊詳由臣咨部在案現時無庸另行核定

一隨營文武分別裁減及酌定額數銀數查新疆隨營文武各員弁除七八兩年員數銀數已於前次報銷單內分別註明有案外現經隨時裁減仍於銷案內分別造報

一酌減內地防軍長夫

一酌減內地防軍口糧

一覈定內地各省兵勇餉數

以上三款查部文係指內地而言其關外防軍口糧均經臣歷次奏咨有案現在尙難遽減至餉數自光緒十一年起連善後經費每年指撥二百二十萬兩已奉部議指撥長夫一項擬酌量裁減以資節省

一防軍有營房者不准再領帳棚折價查新疆防軍築有營防者均不領發帳棚亦無折價之事如係行營並無營房自應發給帳棚日久或有破損繳舊換新不准遺失

一確估各項軍餉按年指撥一次查新疆軍餉及善後經費自十一年起業經部議按年指撥至十三年爲止此兩年中應請毋庸另估請撥

一停止不急工程查新疆北路各廳州縣兵燹之後舊制蕩然一切應修應補工程甚多雖歷年擇要舉辦究以餉絀諸從缺略南路新設各廳州縣應修城垣衙署各工勢不能緩前經請定工程經費而各省報解寥寥今尙停工以待現在新設省會亦係擇要興工俟餉項稍裕隨時酌量修理此外不急之工並未舉辦

一各項欠發勒限清釐各項預支分別核辦查新疆自本

年藩司到任後由司核發各項均經按季給領尙無欠發  
款目其十一年以前欠發之款應由甘藩司核辦至於欠  
發勇餉前經臣奏請專餉以資補發業經部議指撥不在  
此列若預支之項則新疆餉項支絀從來無此名目

一另定各省起運存畱查新疆賦稅各屬征收祇有糧石  
竝無丁銀所有各屬支款承平時由估撥經費項下開支  
無起運存畱名目現在初設行省一切賦額係全省入款  
大宗自應釐定報部立案現在飭司清查一俟定案卽行  
咨部查核

軍機大臣奉

旨戶部知道單併發欽此



軍機大臣字寄光緒十一年十二月二十五日奉

上諭譚鍾麟奏伊犁舉辦屯田應派員督辦一摺據稱近年伊犁防營陸續舉行屯田而立法未善流弊滋多擬請遴員督辦墾務並將精河及庫爾哈喇烏蘇舊設糧員兩缺改爲撫民同知兼管屯田水利伊犁理事同知亦可加屯田水利字樣均歸督辦之員管轄等語邊塞屯田本屬善策惟須經理得宜方於兵民兩有裨益分疏渠道得資水利尤爲耕種要術現在伊犁舉行屯田是否必須派員督辦著劉錦棠錫綸籌度情形會商定議舊設糧員及伊犁理事同知應否改設變通著一併妥籌具奏原摺均著



鈔給閱看將此各諭令知之欽此

欠餉未清懇一飭部指提有著實餉分限解甘摺

光緒十二年正月

月二十一日

奏爲臣軍欠餉未清就地艱於設法仍乞

天恩飭部指提有著實餉分限解甘以慰軍心而資清理

恭摺仰祈

聖鑒事竊臣前奏遵將臣軍欠餉截算至光緒十年止請

旨飭部於光緒六年以後各省積欠西征協餉內指提銀二百八十五萬兩分年解濟以資清理經部臣議准指撥浙江省銀一百八十五萬兩福建省銀三十八萬兩廣東省銀五十六萬兩閩海關銀六萬兩勻分三年報解截至

光緒十四年年底止作爲限滿並條舉變通辦理三法咨  
行到臣茲復准部咨開議覆陝甘督臣譚鍾麟奏請將前  
項撥款改由江蘇籌解一摺江蘇物力並非有餘仍應查  
照前奏變通辦法切實籌畫以求自立等因奉

旨依議欽此臣維餉者師徒之大命非此卽無以行軍餉

者將帥之微權非此亦無以示信此次臣軍欠餉經部臣

指撥的款臣何容置議卽難照督臣之請而仍就原定各

省關指撥的款臣亦何容置議惟變通三法有難期速效

者臣敢不縷晰陳之臣自督師出關迄今十有餘載仰賴

朝廷威福南北兩路次第盪平申畫郊圻以爲郡縣而臣

軍將士半皆募自湖湘風土異宜好尙異俗故雖全疆底  
定勞逸迥殊而展轉懷歸不能禁止前次酌裁老勇臣卽  
擬由甘肅另募防軍誠念甘肅之與新疆本爲一省以甘  
肅之民充新疆之勇譬猶使一家之父子自衛其門庭其  
俗易安其情常順由是漸裁行餉改發坐糧舊有各軍願  
去者遂其歸思願畱者編爲新伍轉移於不覺操縱於無  
形節餉籌邊莫便於此然非發清欠餉實未能遽改坐糧  
部臣謂旣改坐糧卽可以後此節省之餉銀補發前此之  
積欠是欲使未清舊欠先改坐糧不知臣所部各軍思歸  
久矣照常發餉尙難安其心一改坐糧勢必紛紛求去欲

去而發清存餉聽其去可也欲去而無銀可發勢必留之  
勉强留之而不能得力又將何以爲計部臣謂從來欠餉  
不必專在勇丁宜令統領營官報捐改獎查臣軍欠餉在  
勇丁者恆多在統領營官者恆少卽統領營官隨臣有素  
不難曉以大義酌令捐輸然非籌發實銀臣亦何由提勸  
銀歸實發則捐自易行譬如獻斲者必先使私有其縱人  
各遂其私則公爾之心自出也部臣又謂新疆幅員萬里  
物產豐盈宜就地取資以期彌補查上年接准部咨發到  
籌餉章程二十四條當經臣督同司道悉心查核逐款陳  
明大抵新疆患不在貧而在於寡誠使從容不迫招徠日

多庶幾樂事勸功官收其利譬如種樹灌溉於數年之間而得蔭常在數年之後

聖明在上何取近功是三法者將來自可取資而未可以爲事前之張本也臣誠知各省之餉力已殫部臣之籌畫已盡然以新疆目下情形而論譬如嬰兒學步骨殖猶未堅強若非保抱攜持勢必立見傾仆臣無論矣如大局何再四思維惟有仰懇

天恩飭部仍就應撥欠餉各省關靠實指提分限解甘俾臣得及早清釐以便陸續改照坐糧妥爲布置邊事幸甚所有臣軍欠餉急待清釐就近艱於設法各情形謹會同

陝甘總督臣譚鍾麟恭摺具

奏伏乞

皇太后

皇上聖鑒訓示施行謹

奏

軍機大臣奉

旨戶部速議具奏欽此

關外營餉雜支章程再按部議登覆摺

正月二十一日

奏爲甘肅關外營餉雜支各項章程謹再按部議逐款據實登覆顛懇

天恩飭部立案准銷以昭覈實恭摺仰祈

聖鑒事竊臣准戶部咨覆覈甘肅關外防營口糧及雜支章程一摺光緒十一年六月初二日具

奏奉

旨依議欽此欽遵鈔單知照到臣伏查部臣原奏有曰在未定章程之先已支者分別准銷既定章程之後應支者自當照辦是部臣期於撙節而未嘗刻以相繩綜覈一秉



至公臣亦何容更計惟其中窒礙難行之處尙有數端利弊所關實難遷就臣與糧臺司道再四籌商思之至熟敢不據實再敬陳之部議步隊行糧副哨長日支銀兩及馬隊行糧月支銀兩均與楚軍舊制不符飭仍照舊辦理查西征楚軍馬步營制經原任陝甘督臣左宗棠覈定內步隊副哨長日支銀二錢六分六釐六毫六絲六忽外加私夫一名覈比舊制名雖多銀六分有奇實則少夫一名通盤合算原與舊制支銀有減無增今私夫業經遵照裁減所有該副哨長口糧銀兩應懇照舊支銷以昭平允其步隊公長夫子藥夫之外每隊各有棚夫馬隊則每勇各准

馬夫一名外無棚夫牧養裹帶均資其力立法原至周詳  
歷經遵辦奏銷在案至馬隊坐糧章程經臣改爲兩馬一  
夫實已省而又省其每馬照章月支雜費銀六錢專爲添  
補鞍屨羈縶鐵掌各項之用如關外長途戈壁物價昂貴  
馬掌每副需銀三四錢不等月換一次斷不能少其餘鞍  
屨各物添新補舊之費無月不有馬勇口糧有限難任賠  
墊若坐糧馬隊雜費業經臣覈減一半爲數更屬無幾今  
部議飭照舊制則馬夫雜費二項概應刪除度理揆情實  
多不便所有馬隊行糧每大建月支銀三千一百餘兩應  
懇

天恩飭部覈准照舊支銷其餘覈駁之夫銀薪公雜支等項均遵部議截至光緒十年十二月底止以前已支之款無從追繳應懇

天恩准予照舊開銷以後自十一年正月起概照新章辦理其義學牛痘經費分別在於善後項下動支添給請免專案造銷據辦理糧臺藩司魏光燾等具詳前來臣覆核無異謹按款繕具清單恭呈

御覽除咨部查照外謹恭摺具奏是否有當伏乞

皇太后

皇上聖鑒訓示謹

奏

軍機大臣奉

旨戶部議奏單併發欽此



懇發奇臺縣屬春賑摺二月十日

奏爲新疆奇臺縣屬上年被旱成災各戶擬懇續發春賑以資接濟恭摺仰祈

聖鑒事竊奇臺縣屬上年被旱成災地畝應徵額糧業經臣奏懇

天恩概予豁免並聲明極貧次貧分別給賑今春應否接濟屆時熟察情形斟酌核辦在案茲查該縣災民上冬所謂次貧者入春以來亦轉爲極貧其原係極貧各戶至今尤無生計待哺嗷嗷情堪憫惻若不妥爲撫恤勢必陸續逃亡伏讀上年十月初三日

上諭各省有無被災地方應行調濟撫恤之處著該將軍督撫等一併查奏候旨施恩等因欽此仰見

皇上軫念災黎至意欽感莫名茲奇臺縣被災戶民情形實屬困苦自應仰體

皇仁妥籌接濟擬自本年正月初一日起按大小丁口通賑三箇月食糧飭由該縣督察監放嚴杜冒濫侵蝕等弊務期實惠及民此項賑糧仍由倉儲項下動支事竣核實造報據藩司魏光燾詳請具

奏前來

臣

覆核無異合無仰懇

天恩俯念該縣災民困苦准予通賑三箇月食糧俾資接

濟出自

逾格鴻慈所有查明奇臺縣屬被災戶民擬懇續發春賑緣由是否<sub>臣</sub>有當謹會同陝甘督<sub>臣</sub>譚鍾麟恭摺具陳伏乞皇太后

皇上聖鑒訓示謹

奏

軍機大臣奉

旨著照所請續發春賑該大臣務當督飭地方官核實散給毋稍弊混欽此





新設古城城守尉擬由撫臣兼轄請 簡放摺

二月十日

奏爲新設古城城守尉遵照部議會商擬由撫 臣兼轄並請

旨迅賜簡放以專責成恭摺仰祈

聖鑒事竊照光緒十一年十一月二十八日准兵部咨遵旨議覆劉錦棠等奏請將巴里坤等處滿營歸併古城並添設城守尉一摺古城地當衝要旗營歸併於此自不可無專員鈐束以重責成該處本有領隊等官業已奉

旨裁撤應如該撫等所請准其添設城守尉一員其佐領防禦以下應否仍舊及新設城守尉歸於何處管轄應請

旨飭下伊犁將軍新疆巡撫體察道里形勢會商奏明辦理等因奉

旨依議欽此欽遵咨行前來竊維設官分職

國家自有常經臣等何容置議惟新疆事經創始無可率循此次議設城守尉尙未酌定由何處管轄經部臣議令臣等會商具

奏敢不悉心以熟籌之查古城爲新疆東路距省四百餘里聲息相通伊犁在其西二千餘里山川綿亘中隔數城文報往來動需時日以道里形勢而論遠近判然不同臣等往復函商意見相合擬請將新設古城城守尉援照河

南及山西太原城守尉之例歸於新疆巡撫臣兼轄是否  
有當伏候

聖明采擇現在領隊等官既已奉

旨裁撤各旗營兵丁誠不可無專員鈐束且歸併古城之  
議發已經年各旗營計日待遷亦不容再緩新設城守尉  
員缺蒙

恩俞允應請

旨迅賜簡放以便各旗營得以從速遷移至佐領防禦等  
官應否仍舊應俟城守尉到任再行會商核辦其各旗營  
兵丁花名清冊現飭分別造報俟造齊到日再當送部備

查所有新設古城城守尉遵議會商擬由撫臣兼轄各緣  
由謹會同陝甘總督臣譚鍾麟合詞具陳伏祈

皇太后

皇上聖鑒訓示再此摺係臣錦棠主稿署烏魯木齊都統  
臣升泰現在丁憂故未列銜合併聲明謹

奏

軍機大臣奉

旨著照所請兵部知道欽此

代奏哈密回子親王謝年終

恩賞摺

二月十日

奏爲據情代奏恭謝

天恩仰祈

聖鑒事竊

臣

據哈密札薩克回子親王沙木胡索特呈到

滿文飭據譯稱光緒十二年正月初十日接奉軍機處咨到滿文內開年終

恩賞荷包銀鏢銀錢食物等件交兵部由驛遞到當卽望闕碰頭敬謹承領伏以微生多幸

大造無私備萬里之藩封荷

九重之珍賜益慚僻陋未報涓埃所有感激榮幸下忱呈

請代

奏前來臣查此案向由哈密辦事大臣代奏現在辦事大臣員缺奉

旨裁撤

臣

理合據情代奏恭謝

天恩伏乞

皇太后

皇上聖鑒謹

奏

估修新疆省城垣及撫藩衙署等工摺

二月二十一日

奏爲估修新疆省城城垣及撫藩衙署等工請

旨飭部立案恭摺奏明仰祈

聖鑒事竊

臣

據藩司魏光燾詳稱迪化州城前經定爲新

疆省治該處原建滿漢兩城祇西北隅向有垣牆迤邐相接其東南一帶勢若箕張不相聯屬且城身低薄於省城要地亦不相宜現飭印委各員會同履勘擬將漢城東北之便門及滿城之南右門一律剗平卽於滿城之東南隅起接至漢城南門止展築城基使兩城合而爲一並於舊城三面增高培厚使與新築城身一律完固估計應用銀



六萬三千二百餘兩又創建撫臣衙署估銀二萬九千餘兩藩司衙署估銀二萬五千餘兩以上各工俱擬照向章派營勇輪流應役詳請核辦前來臣查南路城垣及衙署等工前經臣奏請撥款擇要興修奉

旨允准欽遵在案迪化係新疆北路舊有兩城形勢悉皆狹隘今既定爲省治自應量加修葺擴而充之庶地宜民居參相得也至撫藩衙署體制攸關非度地興工亦不足以示等威而定民志除飭樽節動用不得稍有浮濫以重餉需仍俟各項工竣核實具報以憑咨部核銷外所有估修新疆省城城垣及撫藩衙署等工理合先行陳明請

旨飭部立案是否有當謹會同陝甘總督臣譚鍾麟恭摺具

奏伏乞

皇太后

皇上聖鑒訓示謹

奏

軍機大臣奉

旨該部知道片併發欽此

五全夏草ノ一ヲ示ス

五

古城修理完竣哈密將次完工請立案片

二月二十一日

再新疆南路城垣等工既經擇要次第興修北路除省城專摺奏明辦理外其餘廳縣有無要工自應一體查明酌量舉辦古城毗連外部東通歸化包頭商賈所趨人煙輻輳原議以奇臺縣治移設於此當就市廛之外建築城垣樓堞池隍悉皆備具現議歸併旗營添設城守尉一員駐防其地自可因其已成無煩更置又哈密爲南北通衢設戍屯糧悉關緊要舊有城垣規模狹小當由印委各員會勘興工擴充舊式查兩處工程悉藉各防營勇丁之力輪流合作十日犒賞一次省費實多惟木石工料皆由遠道

搬運而來腳價未能過少古城計用銀二萬九千餘兩哈密估用銀二萬六千餘兩現在古城工已告竣哈密亦將次完工據糧臺司道彙詳前來臣覆核無異除飭俟工竣併案報銷外謹會同陝甘總督臣譚鍾麟附片陳明伏乞聖鑒訓示飭部立案施行謹

奏

軍機大臣奉

旨覽欽此

伊犁營勇查明裁併分成發給存餉摺

三月初六日

奏爲遵

旨將伊犁營勇查明裁併分成發給存餉恭摺馳陳仰  
祈

聖鑒事竊臣錦棠前將遵

旨馳赴伊犁日期并與臣錫綸商辦各事擬先從勇營著  
手大概情形於上年十二月初二日附

奏陳明在案旋准將軍臣金順咨送冊開伊犁防勇馬步  
二十八營旗員弁勇丁共一萬五百餘名其中多有上年  
八月以後新募入伍者此項新勇又多招之市井并非無

業可歸者然已入營數月各有應得口糧不能一概不發當經臣等商定於伊犁應分月餉內酌發滿餉一關飭各統領營官將新勇概行裁去以免多侵存餉再將實存勇丁開具花名清冊聽候點驗續據開呈多不如法一再駁詰另開於本年正月及二月初間始陸續詳開具報計開除新勇二千餘名實存七千餘名當飭挑畱精壯改爲馬隊九旗步隊十三旗委提督馬玉崑李考祥綬定鎮總兵鄧增等分起統帶其餘裁撤勇丁遣歸原籍內有情願在於伊犁落業屯墾者准其報明撥地安插此歸併各營之實在情形也各營每月向照七天半發給餉銀外有發過

食糧及衣履包巾均未曾扣價爲日既多無從查核臣等復經商議定以入營在一年之內者發存餉銀四兩一年之外每歲酌加銀二兩按年遞加積至十年者發銀二十二兩其有入營在十年以上者遠無可考未便更加率以十年爲斷哨官每員發銀六十兩統領營官稽其久暫酌發薪公銀兩幫辦及幕友薪水等項卽由各該統領營官自行清理不另開支其裁撤回籍之弁勇視畱營之所應領數各倍之惟道里遠近不同此次發給存餉祇能按年遞加不能再分道里俟至烏魯木齊察其歸程較遠而所領不敷盤費者尙應酌量增加此項約須銀一萬餘兩其



不能在此遽加者緣畱營之勇所領無多恐不免因之計較也其情願寄居落業者照回籍弁勇酌減四分之一日內派員按名核發各營勇始猶申訴展轉求加當飭統領營官再三開導始各無詞以退以上約共銀二十一萬五六千兩下存八萬餘兩擬以爲吉江馬隊遣撤回旗盤費各勇營每年領餉旣無細數可稽每人應存若干卽問之勇丁亦不能自悉此次蒙

恩飭撥部款爲之清理舊欠得銀多寡視日淺深臣等奉命以行幸得帖然無事隨諭各統領旗官將從前欠餉一概截止以後月餉自本年二月另行起支此又清理勇營

欠餉之實在情形也查伊犁營勇臣錦棠前  
奏請以四千人爲率經部議核准自應照辦惟現在境內  
盜風猶未盡戢居民商旅時有戒心禁暴詰姦不容疏忽  
且裁去新勇二千餘人又裁去老弱二千餘人按原冊一  
萬五百餘人之數裁撤已將及半現在軍心甫定亦未便  
再事裁減當飭各統領營官將挑畱勇丁俱照楚軍營制  
訓練操防并照楚軍行糧章程按月關餉不得少有剋扣  
營旗存數應由臣錫綸遵照部章按季查明開單具報至  
伊犁東路接至西湖向由金順派所部分屯其地現在伊  
犁各營既經裁併地遠不敷分布其從伊犁至大河沿由

臣錫綸派隊駐紮精河以東接至西湖中間四站由臣錦棠抽調所部馬步六營旗委陝西漢中鎮總兵戴宏勝統帶逐段填防以期周密所有欽遵

諭旨會商辦理各情形謹會同陝甘總督臣譚鍾麟合詞具陳伏乞

皇太后

皇上聖鑒訓示再此摺係臣錦棠主稿合併聲明謹奏

軍機大臣奉

旨該部知道欽此

報由伊犁回省日期并陳吉江馬隊由將軍安籌遣撤摺

三月初

六日

奏爲恭報微臣由伊犁回省日期并陳明吉江馬隊由署

將軍臣安籌遣撤恭摺仰祈

聖鑒事竊臣前奉

諭旨著俟餉銀到日迅卽馳赴伊犁將整頓營勇清理欠餉各事宜妥速籌辦等因欽此現在勇營欠餉一律清理就緒并裁併成旗責成各統領旗官認真訓練事局大端已定惟吉江馬隊久役思歸稽其應調出征遠者將二十稔昔年精銳強半凋零若不及早遣歸亦非

朝廷所以軫恤邊軍之意上年臣與錫綸清理勇營之際卽飭各該旗官一併造具口糧清冊前月二十日外始據陸續送齊款目紛繁臣旣不能深悉且前後事更多手輓輻尤多卽欲清釐亦非急切所能蒞事而省城公務積至數月皆待躬爲料理臣亦未便久畱竊維旗營兵丁本屬將軍專責此起吉江馬隊一千六百餘名相率求歸自應由署將軍臣錫綸妥籌遣撤查督臣譚鍾麟原奏請以三十萬兩了伊犁營勇欠款現除發清勇營欠款外當將餘款銀八萬兩交由錫綸湊發各該起馬隊遣撤回旗盤費臣謹定於三月初七日由伊犁起程回省所有微臣回省

日期并吉江馬隊應由署將軍臣安籌遣撤各緣由理合  
會同署伊犁將軍臣錫綸陝甘總督臣譚鍾麟恭摺具  
奏伏乞

皇太后

皇上聖鑒訓示謹

奏

軍機大臣奉

旨知道了欽此



南路建置已定請令署提督移防摺

四月初四日

奏爲新疆南路建置已定仰懇

天恩准令署提督臣迅卽移防以資整理恭摺馳陳仰祈  
聖鑒事竊臣錦棠前奏請將烏魯木齊提督移紮喀什噶  
爾並移喀什噶爾換防總兵於阿克蘇經部議稱應如所  
請其烏魯木齊提標原設副參游都守千把外委等官是  
否全行移撥喀什噶爾駐紮應由該大臣奏明辦理等因  
於光緒十年九月二十九日具奏奉  
旨允准欽遵在案伏查喀什噶爾爲南疆要地緊與俄鄰  
亟應安設重兵以資扼守提督有統轄全省制兵之責必



提督移赴南路籌設制兵其原駐營勇始可次第裁改必  
提標營制既定其餘各標應如何增設始可次第議行上  
年臣錦棠初到烏魯木齊值提臣金運昌患病懇請開缺  
經臣等奏蒙

恩准以西甯鎮總兵譚上連暫署烏魯木齊提督篆務該  
署提臣原統親軍駐防北路瑪納斯地方一時未得替人  
又值臣錦棠奉有馳赴伊犁清理勇營之

命奏派該署提督酌帶隊伍駐紮庫爾喀喇烏蘇故未便  
遽申前請現在伊犁勇營清理就緒北路精河一帶經臣  
錦棠派令陝西漢中鎮總兵戴宏勝統領馬步六營旗分

段填防譚上連毋庸兼顧且南路道廳州縣建置已及三年設險屯兵不容再緩譚上連謀勇兼備聲望素孚移駐南疆於邊防實有裨益合無仰懇

天恩准令署提督臣譚上連迅卽起程馳赴喀什噶爾將任內應辦事宜妥籌布置伏候

諭旨遵行其烏魯木齊提標原設副參游以下等官應畱俟改爲撫標及分防各營毋庸移駐喀什噶爾至提督印文原刊烏魯木齊字樣現經議准移駐喀什噶爾應請旨飭部換給提督喀什噶爾總兵官印其移駐阿克蘇總兵應請照巴里坤及綏定鎮總兵之例作爲掛印總兵如

蒙

俞允並請

旨飭部頒發鎮守阿克蘇等處總兵官之印以昭信守

臣

等爲慎重邊防起見是否有當謹合詞恭摺具陳伏乞

皇太后

皇上聖鑒訓示施行再此摺係

臣

錦棠主稿合併聲明謹

奏

軍機大臣奉

旨著照所請該部知道欽此

請將董福祥署阿克蘇鎮總兵片

四月初四日

再光緒十年前幫辦軍務

臣張曜奉

命入關經

臣

錦棠

奏委提督董福祥總統西四城馬步各軍駐紮喀什噶爾  
該員久經戰陣果決廉明實爲邊才之選

臣

錦棠前於光緒八年九年兩次

奏懇

天恩量予擢用均奉

旨畱中該員到防以來兵民相安諸務悉臻妥協現在烏魯木齊提督移駐喀什噶爾擬令董福祥酌帶馬步隊伍

移赴阿克蘇駐紮查阿克蘇地居衝要距俄亦近前議移  
喀什噶爾換防總兵於此經部議准尙未請

旨簡放有員可否卽以提督董福祥署理阿克蘇總兵事  
務俾將該處標營早爲措置出自

鴻慈 臣等未敢擅便謹合詞附陳伏乞

聖鑒訓示再此片係 臣錦棠主稿合併聲明謹

奏

軍機大臣奉

旨著照所請兵部知道欽此

報由伊犁抵省日期及照常辦事片

四月初四日

再 臣 錦棠前月初七日由伊犁回省當將啟程日期恭摺奏明在案旋取道固爾札馬行入山出登努斯口以達精河茲於二十六日到省照常辦事沿途經過地方積雪初融渠流暢旺軍民亦均安堵堪以上慰

宸廑所有 微臣 到省日期理合附

奏陳明伏乞

聖鑒謹

奏

軍機大臣奉

旨知道了欽此

覆陳伊犁屯務防務擬辦大概情形摺

四月二十一日

奏為伊犁地方屯務防務均關緊要謹將擬辦大概情形據實陳明恭摺仰祈

聖鑒事竊臣承准軍機大臣字寄光緒十一年十二月二

十五日奉

上諭譚鍾麟奏伊犁辦理屯田應派員督辦一摺邊塞屯田本屬善策惟須經理得宜方於兵民兩有裨益分疏渠道得資水利尤為耕種要術現在伊犁舉行屯田是否必須派員督辦著劉錦棠錫綸籌度情形會商定議等因欽此伏查伊犁為北路輿區土膏沃衍泉源溝洫處處可通



承平時於九城之地分置旗屯兵屯民屯回屯以資耕種  
邊氓相勸利莫厚焉亂後地畝荒蕪耕者不及十分之二  
且聽兵民自占舊時經界無可遵循現經錫綸派員三品  
銜分省補用知府王者彥按畝稽查以期集事惟委員之  
與印官其勢不相統屬譚鍾麟原奏請將各處同知均歸  
督辦之員管轄究係權宜之計臣愚以爲欲厚民生須由  
郡縣欲增郡縣須設監司況新疆北路向設有道廳州縣  
現在全疆改設行省南路經營建置亦已三年各該地方  
官奉法順流與民更始其效較然可覩伊犁及塔爾巴哈  
臺等處原係新疆北路輔車相依不容膜視擬請仿照鎮

迪道之制增置伊塔道一員駐劄伊犁兼管塔城事務改伊犁撫民廳爲府改塔城通判爲撫民同知加理事銜兼管屯田水利庶幾官事有聯而屯政亦因之具舉當與錫綸計議並函商明春均以爲然可否施行伏候

聖明採擇如蒙

俞允其道府以下等官應如何增設容臣與譚鍾麟錫綸明春等籌度情形詳細具

奏抑臣更有陳者伊犁幅員遼廓地處極邊屯墾在所當行而防守尤爲要務謹按嘉慶九年該處增置旗兵屯地當時

諭旨有謂新疆重地武備最爲緊要此項地畝祇可專交  
閒散餘丁代爲耕種不當令官兵親身力作有妨操練等  
因仰見

聖謨廣運惟懷永圖實百世不易之至計今則與俄偪處  
邊事日多附近哈薩克又時有勾結游匪搶劫殺人之案  
若不從嚴懲辦加意操防竊恐民不聊生而屯務亦將終  
廢是欲興屯以足食必先設險以衛民否則利少害多民  
將不至也該處營勇現經臣與錫綸會商裁併汰弱畱強  
餉項照章發給誠使各統領營官激發天良認真訓練自  
可漸成勁旅前奉

諭旨錫綸到任後與劉錦棠和衷商辦務將各該營積習  
悉力湔除毋稍彌縫致貽後患亦不得操之過蹙別滋事  
端

聖訓周詳無微弗至此後宜如何策勵俾免疏虞是在錫  
綸隨時體察慎以行之者矣臣忝任封圻自不容置身事  
外愚見所及理合恭摺具陳伏乞

皇太后

皇上聖鑒訓示謹

奏

軍機大臣奉

列聖勅諭高宗

卷一

旨覽奏均悉伊犁營勇現經劉錦棠會商錫綸汰弱留強  
照章給餉自應隨時訓練俾成勁旅卽著該大臣會同該  
將軍督飭各該營官激發天良認真操練以免疏虞所請  
增改道廳各官係爲因時制宜起見著該部妥議具奏欽  
此

劉襄勤公奏稿卷十一

起光緒十二年六月訖十一月

目錄

地方瘠苦擬請酌加公費摺

聲復道員袁圭齡保案並請 准補缺片

請將新疆南路各官初任交代寬免起限片

恭報十二年正月分糧價得雪情形摺

代奏回王展緩期滿呈懇按班朝 覲摺

恭報啟用關防日期並請繳回 欽差大臣關防摺

新疆需才治理照章揀員畱省摺

估修吐魯番廳綏來縣兩城需用數目立案片

揀員署理塔爾巴哈臺參贊大臣員缺摺

發給伊犁營勇存餉逐款陳明請 飭核銷摺

請將潘效蘇補和闐直隸州知州員缺摺

魁福交卸回京片

訊明不法鄉約正法片

擬將義塾學童另行酌獎備取僧生摺

新疆新設佐雜並添設正佐各官請 飭鑄印頒發

摺

阜康縣需用祭祀山神祭品由司庫支發片

鎮迪二屬歲科兩考改歸撫臣辦理摺

登覆七八兩年關外報銷部駁摺

臚陳已故大臣賢勞事實懇 宣付史館摺

請 卹張恩濬等片

烏魯木齊四次查明陣亡殉難官紳兵民請 卹摺

新疆人命重案懇暫 准變通辦理摺

恭繳 欽差大臣關防摺

庫爾喀喇烏蘇同知請添設照磨兼司獄員缺摺

新疆應設撫標及城守等營員缺擬辦情形摺

查明新疆用款無可刪減存儲報部摺

新疆 大計鉅典懇緩至下屆辦理摺





地方瘠苦擬請酌加公費摺

六月初二日

奏爲新疆地方異常瘠苦擬仿照內地加增養廉之額於各官例定養廉公費外酌加公費以資辦公而示體恤恭摺仰祈

聖鑒事竊

臣

前奏請升迪化直隸州爲府增設知府以下

等官及藩臬兩司首領官經部議核准並議定每歲應支俸銀及養廉公費銀兩令於新疆征收地糧銀內動支仍照光緒十年奏准成案除扣六分減平外毋庸減成等因於光緒十二年二月初八日具奏奉

旨依議欽此欽遵咨行在案查

臣

前奏請將鎮迪一道兼

按察使銜管理通省刑名驛傳經部議核准尙未議定養廉公費該道例定每年養廉銀三千兩辦公銀七百兩現既兼管通省刑名驛傳公事較前倍增擬請每年除照例支給按察使俸銀外加給公費銀二千兩毋庸另給按察使養廉此外各官尙有養廉公費卽此次省會添設各官亦經部議比照向章支給養廉公費本可毋庸更議惟新疆地處極邊商賈罕到日用之艱難百物之昂貴較之內地何止倍蓰各員竭蹶從公實屬入不敷出臣前奏請加給各官津貼銀兩部議以爲多立名目轉涉紛歧不如酌將俸廉公費概照十成發給等因於光緒九年十二月二

十五日覆

奏奉

旨允准欽遵在案查養廉一項自甘肅軍興以來已經督  
臣奏明關內外一體發給實銀惟公費俸銀仍照章七成  
折減現經部議准發十成以每員例定公費銀七百兩計  
之每歲所增二百餘兩在內地宜無不足而新疆地方既  
屬異常瘠苦核其所入仍有不敷使各員以自顧弗遑之  
故而至因此誤公亦非

朝廷所以綏靖邊疆之意也伏查甘肅皋蘭一縣及東西  
大路各繁缺州縣向來均有加增養廉之例公費亦較他

屬爲多擬請仿照辦理於例定養廉公費外酌加公費庶名目不至紛歧而公事可收實效南路兩道除各舊有公費銀每歲請各加銀一千兩新設迪化府及迪化縣除各例定公費銀每歲請各加銀八百兩鎮西哈密喀喇沙爾瑪喇巴什阜康昌吉拜城七廳縣除各舊有公費每歲請各加銀六百兩迪化州學正向有准支公費銀八十兩現請改爲府教授經部議照鎮西府教授例歲給公費銀六十兩除此項例定公費外每歲請加銀一百二十兩鎮西廳訓導除例定公費外每歲請加銀一百兩其餘雜職新疆向無公費惟該員等均以末秩遠塞從公擬請仿照正

印人員一體酌給公費布政司經歷一員庫大使一員每歲請各給公費銀一百六十兩道庫大使兼按察司司獄一員迪化府經歷一員鎮西廳照磨一員迪化阜康昌吉縣典史三員哈密廳巡檢一員每歲請各給公費銀一百二十兩以上歲共加銀一萬一千一百八十兩均請遵照部章概以十成實銀發給仍請在於新疆征收地糧銀內動支分年彙總報部據藩司魏光燾詳請具奏前來臣覆加查核自兼臬司以下均係擇其員缺尤爲瘠苦酌量請加非此實無以辦公合無仰懇天恩俯念新疆各該員缺實屬異常瘠苦

飭部核准於例定養廉公費外照數酌加公費以資辦公  
而示體恤出自

逾格鴻施是否有當謹會同陝甘總督臣譚鍾麟恭摺具

陳伏乞

皇太后

皇上聖鑒訓示施行謹

奏

軍機大臣奉

旨該部議奏欽此

聲復道員袁珪齡保案並請

准補缺片

六月初二日

再臣前奏遵照新章請以二品頂戴鹽運使銜浙江儘先題奏道那爾琿巴圖魯袁珪齡補授阿克蘇兵備道員缺奉

旨吏部議奏欽此經部議稱該員保二品頂戴畱原省儘先題奏道之案查光緒四年二月十二日左宗棠等奏克復南路西四城回疆一律肅清案內並無袁珪齡之名是否另案保獎係在何處出力於何年月日奉

旨應令將該員保案聲覆具奏再行核辦等因於光緒十二年二月二十四日具奏奉



旨依議欽此欽遵咨行到臣查該員袁珪齡於剿辦陝回金山股逆及兩次剿辦安集延布魯特賊匪尤爲出力員弁隨摺開單請獎案內經左宗棠奏保單開花翎鹽運使銜浙江補用知府擬保二品頂戴畱原省儘先題奏道袁珪齡請

賞給清字勇號並請

賞給二品封典等因於光緒五年十月初一日具奏並附奏此案請獎各員有於前次克復西四城南疆肅清案內已經擬保官階者均於單內聲明作爲各員底銜加保懇恩飭部一併註冊臣於克復西四城南疆肅清案內即便

查照開除不致重複等因奉

旨著照所請該部知道欽此旋奉是年十月十四日

上諭擬保二品頂戴畱原省儘先題奏道袁垚齡著賞給  
那爾琿巴圖魯名號並賞給二品封典欽此均准部覆行  
知在案 臣維克復南路西四城在事出力各員隨摺請獎  
在勦辦安集延各匪之前而彙案請獎在勦辦安集延各  
匪隨摺保獎之後凡於勦辦安集延各匪隨摺保獎之員  
其克復南路西四城彙保案內悉皆查照開除該員袁垚  
齡於克復南路西四城回疆一律肅清彙保案內擬保官  
階實已於勦辦安集延等匪隨摺保獎案內經左宗棠奏

明作爲底銜奉

旨允准欽遵有案該員從役有年深資得力於邊地情形尤爲熟悉合無仰懇

天恩飭部核准以該員袁垚齡補授阿克蘇兵備道員缺於地方實有裨益茲奉前因相應聲覆謹會同陝甘總督臣譚鍾麟附片具陳伏乞

聖鑒訓示謹

奏

軍機大臣奉

旨吏部知道欽此

請將新疆南路各官初任交代寬免起限片

六月初二日

再據藩司魏光燾詳稱查定例各廳州縣經手倉庫錢糧交卸後限兩箇月移交後任接收結報歷經遵辦在案惟查新疆初設行省除北路各屬交代尙承甘肅向例照舊辦理外南路各廳州縣皆屬新設交代係屬創案從前設局辦理善後收款無論採買征糧支款無論軍需善後概係統收統支遇有交卸造報款目紛歧與例定交代情形迥別現經該司分別釐定截至未設郡縣以前所有善後征糧各局收支動存銀糧概行提出飭令造冊報由糧臺核辦其自設官到任日起分別軍需善後例支爲三大宗

以例款作爲常年定額歸入交代照例造冊結報其善後軍需各項仍分款報由糧臺彙案核銷以清界限而免牽混第初任交代既屬創辦一切章程未定一案到司必須會同糧臺分別清釐始能飭行遵辦展轉更造有需時日實難依限結報等情詳請具

奏前來

臣

覆查無異合無仰懇

天恩俯念設省之初未能驟照定例

准予飭部將南路各屬凡係設官初任交代概行寬免起限一俟次任再行循例辦理除咨部查照外謹會同陝甘總督臣譚鍾麟附片具陳伏乞

聖鑒訓示謹

奏

軍機大臣奉

旨戶部知道欽此



恭報十二年正月分糧價得雪情形摺

六月十日

奏爲恭報光緒十二年正月分糧價並得雪情形謹繕摺具陳仰祈

聖鑒事竊照內地各直省米糧時估及雨水陰晴向係按月

奏報新疆初設行省所有雨水糧價情形應從本年正月分起遵例核報查新疆向來雨水稀少各地屯墾專賴冬春積雪融化入渠以資灌溉本年正月分迪化等州廳屬具報得雪五寸有餘及三四寸不等惟吐魯番哈密兩廳平地未曾得雪各處民情尙稱安謐至通省糧價亦參差



不一據藩司魏光燾彙詳請

奏前來理合恭摺具陳並繕糧價清單敬呈

御覽伏乞

皇太后

皇上聖鑒再新省地方遼闊此案開辦伊始各屬摺報不齊且未能一律遵式由藩司分別行催飭查是以辦理稍遲合併陳明謹

奏

軍機大臣奉

旨知道了欽此

代奏回王展緩期滿呈懇按班朝

覲摺

六月十日

奏爲據情代奏哈密回子親王展緩期滿呈懇按班朝  
覲恭摺仰祈

聖鑒事竊據哈密札薩克回子親王沙木胡索特呈稱前  
呈經哈密辦事大臣明春等於光緒十年十一月二十一  
日代奏籲懇

天恩准予暫緩二年俟軍差稍減回民安輯再行呈請按  
班朝

覲一摺嗣奉飭知光緒十年十二月二十日軍機大臣奉  
旨該回王著准其暫緩入覲欽此欽遵在案現屆展緩期

滿諸務稍鬆湖自蒙

恩承襲以來尙未入覲

天顏供差

廷闕惶悚實深未便再行延誤呈請代

奏前來臣覆查無異相應據情代奏懇

恩准予該回王按班朝

覲以符定制如蒙

俞允恭候

命下卽行轉飭遵照所有代陳哈密回子親王懇請按班

朝

覲各緣由恭摺具

奏伏乞

皇太后

皇上聖鑒訓示謹

奏

軍機大臣奉

旨著准其按班朝覲該衙門知道欽此



恭報啟用關防日期並請繳回 欽差大臣關防摺初七月初四日

奏爲恭報微臣啟用關防日期並請

旨繳回

欽差大臣關防恭摺具陳仰祈

聖鑒事竊臣於光緒十二年六月十七日准禮部咨由差弁齋到光字二十六號甘肅新疆巡撫關防一顆當卽恭設香案望

闕叩頭祇領啟用伏念新疆當設官經野之初巡撫有率屬綏民之責以臣愚昧首佩

寵章敢不矢慎矢勤以期仰副

朝廷永靖邊陲之至意惟臣自光緒六年仰承

恩命接綰

欽符感荷

殊施時憂竭蹶幸賴

聖謨廣運燭照無遺總挈方隅悉從省制量設巡撫以下  
等官並特加巡撫兵部尙書銜俾節制全疆軍務日張綱  
舉因地制宜時會所乘規模漸具但冀各省關應撥協餉  
報解如期此外應辦事宜悉屬撫臣專責臣謬當斯任兢  
惕方深若復久綰

欽符尤虞隕越合無仰懇

天恩俯准繳回

欽差大臣關防俾得少安愚拙之處伏候

諭旨遵行謹恭摺具

奏伏乞

皇太后

皇上聖鑒訓示謹

奏

軍機大臣奉

旨著准其回繳所有新疆改設一切未盡事宜仍著劉錦



欽定四庫全書

欽此

新疆需才治理照章揀員畱省摺

七月十六日

奏爲新疆設省伊始需才治理擬照變通委畱補章程  
揀員畱省懇

恩飭部註冊以資差委恭摺仰祈

聖鑒事竊維新疆荒瘠之區兵燹之後地方彫敝民氣未  
紓當此建立行省新設郡縣整頓撫綏期在得人而理

臣

前於酌擬新疆補署各缺畱省補用章程案內請將隨營  
當差之分省候選並他省候補各項人員內從事有年熟  
悉邊務者照依變通章程畱於甘肅新疆補用接准部覆  
隨營之分省候選並他省候補各員自應准其畱於新疆

補用照甘肅從前變通章程分別奏咨辦理又查變通章程內開雲貴甘肅如因地方緊要遴才任使須將他省候補及候選分發各員變通委署者應准該督撫將該員畱於該省分別補用毋庸再歸候選原班及候補原省各等語茲查有三品銜分省候補班候補知府張起宇開復道銜籤掣省分遇缺奏補知府劉肇瑞知府用江西補用直隸州知州江遇璞遇缺儘先卽選知州袁運鴻四品銜儘先選用通判世襲騎都尉孫志焄提舉銜補缺後在任候補直隸州知州廣東候補班前儘先補用知縣黃袁知州用儘先選用知縣任兆觀同知銜分省補用知縣楊其澍

同知銜儘先卽選知縣李徵煦分省候補班儘先  
前遇缺卽補知縣喻先麓同知銜分省補用知縣鄧以  
潢等十一員均在營當差有年於邊情土俗熟悉諳  
練應請照章畱於甘肅新疆補用據藩司魏光燾詳請  
具奏前來臣覆查無異合無仰懇

天恩准予飭部將該員等一律註冊畱於甘肅新疆  
補用期於地方有裨除查取各該員履歷咨部外謹會  
同陝甘督臣譚鍾麟恭摺具陳伏乞

皇太后

皇上聖鑒訓示謹

奏

軍機大臣奉

旨著照所請吏部知道欽此

估修吐魯番廳綏來縣兩城需用數目立案片

七月十六日

再據藩司魏光燾詳稱鎮迪道屬吐魯番爲南北咽喉重地該處城垣歷久未修兵燹以後城門甕洞腰角城樓均經坍塌四面城身垛牆亦多傾圮亟宜修理以資保衛又綏來縣城前於光緒二年賊盤踞時官軍圍攻多被開花礮擊損頽敝難堪雖經防營將城身稍爲補葺而頻年雨雪所侵仍多裂毀該縣爲省西門戶西通伊犁北達塔城地當衝繁最關緊要前據各該廳縣稟奉飭修並撥防營幫同版築一應工料仍飭切實估計在案茲據吐魯番同知估報此項城工土作以勇丁任役經費較減惟應需木

料須採自伊拉湖山北計程七百餘里往返約須半月道  
遠運艱燒甄柴薪亦極昂貴計需銀一萬五千六百餘兩  
綏來縣城估用銀七千一百九十餘兩食糧在外查關外  
工程均經隨時奏報工竣核實報銷該兩廳縣城工事同  
一律詳請一併具

奏前來臣覆查無異謹會同陝甘總督臣譚鍾麟附片陳  
明伏乞

聖鑒訓示勅部立案施行謹  
奏

軍機大臣奉

旨該部知道欽此





揀員署理塔爾巴哈臺參贊大臣員缺摺七月十日  
奏爲遵

旨揀員署理參贊大臣員缺恭摺仰祈

聖鑒事竊臣等准兵部咨光緒十二年三月二十二日內  
閣奉

上諭署塔爾巴哈臺參贊大臣明春奏病難速痊請開署  
缺一摺明春著准開署缺回旗調理塔爾巴哈臺參贊大  
臣員缺著劉錦棠錫綸就近揀員奏派署理欽此欽遵咨  
行前來臣等竊維塔爾巴哈臺地處極邊屯墾操防及通  
商事務在在悉關緊要非熟悉邊情剛柔交濟不足以資

撫馭茲查有伊犁額魯特領隊大臣春滿辦事勤篤有守  
有爲於邊務夷情尤多諳練以之接署斯缺可期措理裕  
如臣等往復函商意見相合除咨春滿查照並由臣錫綸  
派員接署額魯特領隊大臣事務另摺

奏明辦理外謹會同陝甘總督臣譚鍾麟合詞具陳伏乞  
皇太后

皇上聖鑒訓示施行再此摺係由臣錦棠主稿合併聲明  
謹

奏

軍機大臣奉

旨知道了欽此

司馬文正公集卷之二十一

十一



發給伊犁勇營存餉逐款陳明請 飭核銷摺七月二十六日

奏爲發給伊犁勇營存餉謹逐款陳明請

旨飭部核銷以清款目恭摺仰祈

聖鑒事竊 臣等前奉

諭旨清釐伊犁勇營欠餉當由督 臣譚鍾麟委員解到墊

款銀三十萬兩 臣等悉心商議於弁勇之中分別挑留裁

撤又於裁撤之中分別回籍落戶列爲三項挑留各勇議

以入營在一年之內者發銀四兩一年之外每歲酌加二

兩按年遞加積至十年者發銀二十二兩十年以上遞無

可考未便更加率以十年爲斷哨官每員發銀六十兩統

領營官稽其久暫酌發薪公銀兩幫辦及幕友薪水在內不另開支其裁撤回籍之弁勇視畱營弁勇按年之所應領數各倍之仍按其道里較遠而所領不敷盤費者另外酌加銀兩其情願寄居落戶者照回籍弁勇約減四分之一所有會辦情形當於本年初七日據實奏明奉

旨該部知道欽此欽遵在案茲查挑畱一項發銀九萬九千一十八兩裁撤回籍一項發銀九萬四千六百九十八兩其籍隸遠省各勇丁每名加發銀十兩卽在其內落戶一項發銀一萬一千六百一十八兩統領營哨各官酌發薪公亦於三項之內分別開列又病故員弁十七員均係

在營日久各有應領薪公遺櫬未歸待此舉發內如原任  
綏定鎮總兵劉宏發前帶英禮等營尙有幫帶營官及幕  
友薪水未曾發清查該故員名下應領薪公爲數尙多自  
應酌量支給此項共發銀五千四百兩車腳照章應付共  
銀二千六百五十九兩有零以上總共發銀二十一萬三  
千三百九十三兩三錢五釐據行營銀錢所委員開報前  
來<sub>臣</sub>等覆核無異竊維此次清理各該營欠餉均係欽遵  
諭旨分成勻給與尋常發餉事有不同自應實用實銷至  
此外存餘一款<sub>臣</sub>錦棠前在伊犁移交<sub>臣</sub>錫綸銀八萬兩  
當經奏明在案茲仍存銀六千六百餘兩應一併解赴伊



聖祖聖訓 卷十一  
犁合前次移交之款共銀八萬六千六百六兩六錢九分  
五釐歸入吉江馬隊遣撤回旗盤費項下由臣錫綸另案  
報銷所有酌發伊犁勇營存餉各數目除開單咨部核銷  
外謹會同陝甘總督臣譚鍾麟合詞具陳伏乞

皇太后

皇上聖鑒飭部查照施行再此摺係臣錦棠主稿合併聲

明謹

奏

軍機大臣奉

旨該部知道欽此

請將潘效蘇補和闐直隸州知州員缺摺

七月二十六日

奏爲揀員請補新設直隸州知州員缺以重地方恭摺仰  
祈

聖鑒事竊據新疆布政使魏光燾兼按察使銜署鎮迪道  
英林詳稱新疆新設和闐直隸州知州西北有莎車州以  
當其衝東南有于闐縣以扼其要距省四千七百餘里人  
煙稠密俗敝民偷應請定爲疲難二項邊遠請調中缺該  
處係屬新設應卽揀員請補以重職守查南路新設各缺  
前請照吉林新章由外揀補一次奉部覆准在案茲查有  
知府用裁缺撤回畱新疆另補卽用直隸州知州潘效蘇

年四十八歲湖南長沙府湘鄉縣人由俊秀於咸豐十一年投効軍營歷保同知銜福建補用通判嗣於追剿直隸捻逆案內保免補本班以同知改畱陝西補用赴部引見奉

旨准其免補本班以同知改畱陝西補用欽此同治八年五月到陝繳照歷署膚施澄城等縣事復經調甘委署河州篆務經部議奏照章畱於甘肅以原官歸原班補用並免補交分發銀兩嗣丁母憂回籍服滿到甘管帶恪靖中營兼帶左路左後等營旋即交卸營務委署狄道州事蕩平新疆南北兩路案內保俟補缺後以知府用先換頂戴

調署河州知州奏補西甯府循化同知八年四月飭赴循化同知本任九年十月札調來營旋經奏補迪化直隸州知州十年三月二十二日接印視事十二年調署和闐直隸州知州於二月初一日交卸迪化州事旋奉到部文因迪化州改設知府撤回畱於新疆歸卽用直隸州知州班內另補該司等查該員潘效蘇練達有爲辦事勤幹久任邊缺熟悉民情以之請補和闐直隸州知州實堪勝任人地亦極相宜等情詳請具

奏前來臣查該員潘效蘇樸實勤能才具開展合無仰懇天恩准以該員補授和闐直隸州知州員缺實於地方有

裨如蒙

俞允該員係撤回另補直隸州知州請補直隸州知州銜  
缺相當毋庸送部引

見任內並無參罰案件謹會同陝甘督臣譚鍾麟恭摺具  
陳伏乞

皇太后

皇上聖鑒訓示謹

奏

軍機大臣奉

旨吏部議奏欽此

魁福交卸回京片

七月二十六日

再臣准古城領隊大臣魁福牘稱新疆各大臣員缺奉

旨裁撤所有實缺署任各員俱應欽遵交卸候

旨簡用現在古城改設城守尉員缺該領隊並無經手未

完事件亟應請

旨交卸回京聽候

簡用呈請代

奏前來臣查魁福曩隨前湖廣督臣官文前陝甘督臣左

宗棠前伊犁將軍臣金順轉戰鄂豫燕齊晉隴間繼復馳

驅關外會剿烏魯木齊等處所向克捷勤勞卓著自光緒

七年署理古城領隊大臣八年蒙

恩補授實缺迄今六載於邊防要務均能認真辦理力顧大局其性情爽直持正不阿尤爲難得現在領隊員缺奉旨裁撤理合據情代

奏籲懇

天恩准其交卸回京應如何

擢用之處出自

鴻慈除咨部查照外謹會同護理烏魯木齊都統臣富勒銘額附片代陳伏乞

聖鑒訓示謹

奏

軍機大臣奉

旨魁福著准其交卸回京該部知道欽此





訊明不法鄉約正法片

七月二十六日

再臣等前據民人丁三成喊控伊犁回民鄉約馬鳳三藉公詐害等情當委道員袁奎齡訊明丁三成原領牛籽銀八十八兩馬鳳三屢向催繳強折牛車又逼令出賣兒媳實共收過丁三成銀一百九十六兩之多而馬鳳三原日承領各戶民牛籽銀共一千零十二兩至今僅呈繳一半捏報逃亾屬實檢閱伊犁撫民同知衙門案卷馬鳳三欠交牛籽數目亦皆相符旋飭解赴省城交兼臬司訊取供詞具詳前來臣錦棠復經親提審訊據供認前情不諱查馬鳳三原係甘肅狄道州叛回關內關外地方擾害殆徧

其在金積堡時尤爲獷悍前此大軍進剿新疆南路追至烏什馬鳳三始由山徑逃匿得以漏網嗣查知在伊犁充當鄉約比以爲果能革面洗心自應仰體

朝廷寬大之仁不加深究乃馬鳳三怙惡不悛冒領牛籽捏報逃亾索詐窮民至於破家鬻女自未便再事姑容況伊犁土曠人稀全賴安撫流亾漸興屯墾以實邊陲似此不法鄉約爲害閭閻若不從嚴懲辦何以安子遺而儆效尤臣錦棠於訊明後卽飭將馬鳳三正法俾昭炯戒合將訊明不法鄉約卽行正法緣由謹合詞附片具陳伏乞

聖鑒訓示再此片係

臣

錦棠主稿合併聲明謹

奏

軍機大臣奉

旨刑部知道欽此

卷之二

三

擬將義塾學童另行酌獎備取僧生摺

八月十八日

奏爲遵照部議擬將義塾學童另行酌獎備取僧生以資  
觀感恭摺仰祈

聖鑒事竊臣於光緒八年間附奏教撤各城回官請將讀  
書回童分別給予頂戴一片經部議覆回童誦習一經熟  
諳華語咨部給予生監頂戴之處核與例案不符應俟粗  
通文藝時再行酌設學額憑文取進如以該回眾等但須  
讀書認字不必責其文理應由該大臣另行酌給獎勵等  
因當經分別咨商去後旋准前甘肅學政臣陸廷黻咨稱  
查歷屆考試於取進儒童之外另案備取僧生回童中有

能誦習一經熟諳華語者既經部議准其另行酌獎可否  
倣照辦理存俟設學後充作佾舞免其府縣兩考庶於例  
案無礙亦足以示鼓勵又准督臣譚鍾麟咨稱此事難期  
速效應俟一二年後再行察看奏咨立案各等因准此竊  
維新疆地居邊塞纏回聚處謠俗異宜底定以來建置行  
省欲使殊方異族同我華風誠非澤以詩書不能爲力前  
於各城創設義學選纏回子弟入塾讀書創辦之初羣相  
疑沮非特不知向學且意讀書入塾爲使之當差迨經臣  
議定規條分飭地方官遵照辦理大概以易漢服通華語  
爲先務以讀書講解經義爲緊要法門並倣照內地書院

章程取其粗知文義者按月酌給膏火銀糧以示獎勵行之數年漸知嚮化迭據各廳州縣申齋季課卷本核閱破承起講儘多可造之資近日鄉民竟有帶領子弟懇求入塾者是風氣漸開之候擬卽按照部臣學臣原咨各節

奏請辦理然猶恐各塾課卷或有粉飾之弊因於上年八月遴委揀選知縣任兆觀卽選教諭羅霽前赴南路各城面加考試據稟各該童等多能誦習經書講解文義並齋呈課卷核與地方官所報尙屬相符當飭每塾拔取一二名以憑咨送甘肅學臣衙門註冊備作生俟設學後俾充侑舞免其府縣兩考合無仰懇



天恩俯念邊氓初知向學准其變通辦理備取脩生仍俟  
學業有成再議設學官議定學額以符定制臣爲鼓勵邊  
氓起見是否有當謹會同陝甘總督臣譚鍾麟甘肅學政  
臣秦澍春恭摺馳陳伏乞

皇太后

皇上聖鑒訓示施行謹

奏

軍機大臣奉

旨著照所請禮部知道欽此

新疆新設佐雜並添設正佐各官請 飭鑄印頒發摺月八

三十

日

奏為新疆新設佐雜並添改正佐各官應用印信關防請  
旨飭部鑄造頒發啟用以昭信守恭摺仰祈

聖鑒事竊查新疆南路八城新設巡檢照磨吏目典史又  
省城添設改設迪化府縣並首領佐雜以及庫爾喀喇烏  
蘇精河糧員改設同知巡檢各官均經先後接奉部文議  
准分別委員署理暫行刊給木質鈐記以資整頓各在案  
所有需用印信關防亟應鑄造頒發俾垂久遠又各直省  
每歲刊發時憲書例頒欽天監時憲書印存儲備用現在

新設行省所需時憲書印亦應請頒備用茲據藩司魏光燾詳請查照例章添鑄迪化府印迪化縣印布政司經歷印司庫大使印鎮迪道庫大使兼按司獄印阿克蘇喀什噶爾兩道庫大使印莎車州回城阿克蘇舊城布告爾精河四巡檢印迪化府儒學教授印迪化府經歷兼司獄印英吉沙爾烏什庫車喀喇沙爾四同知照磨印瑪喇巴什通判照磨兼司獄印各一顆欽天監時憲書印一顆庫爾喀喇烏蘇同知關防一顆開單呈請具

奏前來臣覆核無異相應請

旨飭部分別鑄造頒發啟用以昭信守除開具清單分咨

各部查照外謹會同陝甘總督臣譚鍾麟恭摺具  
奏伏乞

皇太后

皇上聖鑒訓示至吏目典史各官應用鈐記已飭藩司照  
例由外刊給合併陳明謹  
奏

軍機大臣奉

旨禮部知道欽此



阜康縣需用祭祀山神祭品由司庫支發片

八月三十日

再臣據甘肅新疆藩司魏光燾詳稱烏魯木齊博克達山在阜康縣南乾隆三十八年列入祀典每歲由太常寺頒發香帛經都統於迪化州郊外望祀例需祭品銀九兩八錢八分在於經費項下動支歷經遵辦在案嗣於光緒七年經都統臣恭鏜以

山神功德在民祈禱輒應捐廉在山麓建廟奏請

頒發匾額除都統每歲照例望祀外仍飭阜康縣於春秋二季詣廟行禮每季需用祭品銀六兩由該縣墊發開報現在改設行省一切祭祀銀兩均由司庫支領所有前項

春秋二季共需祭品銀一十二兩擬由司庫一併支發造  
報詳請具

奏前來 臣覆核無異相應請

旨飭部立案以便造銷而垂久遠除咨部外謹附片具陳  
伏乞

聖鑒訓示謹

奏

軍機大臣奉

旨戶部知道欽此

鎮迪二屬歲科兩考改歸撫臣辦理摺

八月三十日

奏爲鎮迪二屬歲科兩試擬請仿照都統局試舊章改歸

撫臣辦理恭摺仰祈

聖鑒事竊臣等准禮部咨關外鎮迪二屬生童向由烏魯  
木齊都統代爲局試現在都統已經奏撤自應改歸巡撫  
衙門辦理惟甘肅自光緒元年奏准添設學政與從前陝  
甘學政兼考兩省不同所有鎮迪二屬考試事宜或仿照  
都統局試舊章由巡撫嚴行局試抑或卽由該學政按臨  
烏魯木齊專棚考試應會同體察情形奏明辦理等因臣  
等竊惟新疆南路新設各廳州縣初令纏童入塾誦習經



書均尙未能設學北路鎮迪二屬自乾隆年間議定學額  
向由學臣於按臨肅州以前將考試生童題目封固豫行  
密送都統局試仍將試卷封固移送學臣按額取進三年  
一次科歲並行歷經辦理在案現雖改設行省而各該屬  
生童應試爲數無多仍未便專棚考試且道途遙遠往返  
需時學臣按試出關於關內考試事宜必多遲滯應仍照  
依舊制俟各屬觀摩日久文風漸盛再行體察情形照內  
地考試章程

奏明辦理惟現在烏魯木齊都統既經奉

旨裁撤各該屬生童自應改歸撫臣局試臣等往復咨商

意見相合擬請嗣後迪化各屬及鎮西廳屬生童每屆考試卽由學臣於按試肅州之前豫將題目密送撫臣仿照都統局試舊章辦理是否有當謹合詞恭摺具

奏伏祈

皇太后

皇上聖鑒訓示施行再此摺係臣澍春咨由臣錦棠主稿合併聲明謹

奏

軍機大臣奉

旨著照所請禮部知道欽此



登覆七八兩年關外報銷部駁摺

九月十八日

奏爲光緒七八兩年甘肅關外報銷遵照部駁另開詳細清單逐款登覆送部查核懇

天恩飭部照章准銷以清積案恭摺仰祈

聖鑒事竊 臣准戶部咨議覆甘肅關內外光緒七八兩年

收支餉項開具清單報銷一摺關外收支單內統計七八兩年共應支庫平銀七百六十餘萬兩內除七八兩年欠發勇餉銀一百四十餘萬兩只該銀六百二十餘萬兩再除伊犁將軍金順及嵩武軍借支並嵩武軍糧料扣合價銀另案辦理外實應請銷銀五百六十餘萬兩內除由兵

工兩部核銷九十餘萬兩臣部實應銷銀四百七十一萬  
二千二百六十一兩八錢三分六釐六毫八忽八微內除  
刪除銀二十萬一千一百二十八兩六錢五分四釐四毫  
三忽七微行查銀四萬一千七百三十八兩四錢三分一  
釐七毫五絲二忽二微實准銷銀四百四十六萬九千三  
百九十四兩七錢五分四毫五絲二忽九微分繕清單具  
奏奉

旨依議欽此欽遵咨行到臣除造報洋款關內外協餉暨  
關內收支單內行查各款由陝甘督臣譚鍾麟另行核奏  
外茲據辦理新疆糧臺司道等將部駁七八兩年關外收

支各款逐一核明分別聲覆開單詳請奏咨核銷前來  
臣查關外七八兩年報銷收支單內部議有應另行核辦者  
有應列入收再列入支者有應分晰造報者已飭遵辦至  
單開楚皖蜀各軍統領官暨湘軍營務處分統各員開支  
各項共刪除銀二萬四千四百三十餘兩行查銀二萬九  
千四十餘兩又管理官車驟駝員弁薪水共行查銀一萬  
二千六百九十餘兩除行查各款另於清單內聲覆所有  
部議刪除銀兩實屬已支之款無從著追應請照單准銷  
又議令刪除七八兩年採買糧料柴草價銀十七萬六千  
六百九十餘兩並知照兵部刪除運糧腳價銀三十六萬

一千二百八十餘兩又提運撫彝廳高臺縣採買糧石腳  
價銀九千三百九十餘兩伏查關外地多戈壁肥磽原至  
不齊北路地瘠人稀雖加意撫輯究難與南路並論當左  
宗棠出關之始以遠塞行師不扣糧價其後雖扣糧價而  
價值太昂兵勇正餉祇有此數不得不酌量收扣不敷仍  
由公中津貼以示體恤蓋時地有以限之也卽七八兩年  
以後邊陲靜謐而防勇巡防搜捕以及一切工作未嘗稍  
休駐紮尤不能盡在膏腴之鄉以故採運津貼不能驟裁  
委係因地而施並無浮濫合無仰懇

天恩飭部一併准銷以昭核實至採運價值既仍請銷所

有軍需善後臺局經貼人等支過各款應懇毋庸加銷以  
免重複除咨部查照外謹繕具清單會同陝甘總督臣譚  
鍾麟恭摺具

奏伏乞

皇太后

皇上聖鑒訓示謹

奏

軍機大臣奉

旨該部知道單併發欽此





臚陳已故大臣賢勞事實懇

宣付史館摺

九月十八日

奏爲已故大臣賢勞卓著功在西陲謹臚陳事實額懇

天恩宣付史館恭摺仰祈

聖鑒事竊原任大學士臣左宗棠上年七月在閩病故渥荷

聖慈優加

褒卹其生平戰功政績經楊昌濬據實臚陳臣亦何容煩瀆惟念臣於左宗棠有鄉子弟之誼自束髮從戎卽隨同該故大學士轉戰晉豫燕齊關隴間相從萬數千里歷事二十餘年其於左宗棠平日立心行事親炙日久相知最

深謹就見聞所及爲

皇太后

皇上敬陳之伏查左宗棠廉正果毅學問深純道光末年  
里居不仕授徒自給旋於邑中柳莊置薄田躬自稼穡澹  
泊明志嘯歌陶然鄉人士咸以漢臣諸葛亮目之會粵西  
髮逆肇變湘楚戒嚴原任湖廣督臣張亮基湖南撫臣駱  
秉章先後強起入幕左宗棠遇事持正不避嫌怨遂爲言  
者所摘荷蒙

文宗顯皇帝特達之知感激奮發以身許

國遭逢

殊遇由舉人擢升卿寺歷任疆圻襄贊

綸扉

賞延世爵

寵任倚畀蔑有以加而蹇蹇臣心確有萬變不渝者其蒞  
事也無精粗鉅細必從根本做起而要以力行如師行萬  
里沙磧之地雖酷暑嚴寒必居營帳與士卒同甘苦民房  
官舍從不少卽休止壘旁隙地悉令軍士開墾荒蕪旣闢  
招戶承種民至如歸城堡橋梁溝渠官舍每乘戰事餘暇  
修治完善官道兩旁樹株徧植迄今關隴數千里柳陰夾  
道行旅便之蠶織畜牧諸政罔不因勢利導有開必先而

襟懷浩蕩絕無凝滯公餘輒徒步出營循畦流覽或作書  
適意在蘭州督署時嘗就閣後鑿池引流同民汲飲家私  
一無所營玩好一無所嗜其歷任廉俸除置田供祀與歲  
給同懷兄嫂外餘悉以充義舉軍興日久教澤寢衰該故  
大學士身在行間講學不輟嘗手書孝經東西銘正氣歌  
之類付手民刊布每克復一城招徠撫綏興教勸學嘗以  
爲士者民之望也不作士氣無以勸民故於甘肅鄉試請  
旨分闈鼓舞振興常如不及俄官索斯諾福斯齊游歷過  
甘攜帶教師沿途闡說西教迨至蘭州該故大學士接見  
如儀飲食酬酢備極款曲與講孟子三自反之義俄官爲

之斂容臣時在坐拱默而已後語臣曰忠信篤敬蠻貊可行彼亦人也心知氣血不甚相遠但能積誠相與久將自感無他道也索斯諾福斯齊自請由齊桑淖爾代購麩糧以濟軍食訂約而去其遇事善存

國體持名教類如此素性嗜學博通經史旁及輿地掌故罔不追宗探蹟得其指歸凡有設施援古證今不泥不悖雖入官以來夙夜宣勤於著述未暇旁及然軍書旁午批荅如流章奏悉由手出連篇累牘何啻等身其所發明多出人意表治軍整嚴有制好謀而成自盪平髮逆由閩浙總督調任陝甘值逆回捻匪內外交訌該故大學士自度

生平足跡未涉關隴所部南方將士於西北風土捻回伎  
倆毫無聞見隴上殘敝尤甚彌望蒿蕪師行艱難百倍他  
省非熟審主客長短之勢饑飽勞逸之情權其輕重察其  
緩急慮善以動隨機立應莫要厥成乃定議進兵次第先  
捻後回先陝後隴分道並進勦撫兼施必清後路然後進  
駐蘭州必清河湟定肅州然後及於關外議既定猶未及  
行適捻逆張總愚全股渡河狂竄兇燄甚熾該故大學士  
遵

旨北嚮臣時隨侍臣叔原任廣東陸路提督臣劉松山率  
步隊從之常以步當馬日馳二三百里截勦騎賊左宗棠

日在行間親自督戰捻患平奉

旨陞見返旆入關專討回逆同治八年冬肅清陝北逾年  
盪平金積堡老巢肅清甯靈十一年冬克復西甯定河狄  
十二年冬肅州平傳檄玉關以西

皇威丕暢其間叛將潰弁土匪游勇以及就撫復叛之逆  
回等隨時追捕各伏其辜關隴全境肅清以時奏績皆如  
其言其奉

命進規新疆也慮糧運萬分不給乃創爲分起出師之議  
先派張曜置屯哈密金順進駐古城遠自晉邊俄境近而  
甘涼肅州四路籌策軍儲備足然後檄臣率大軍出關與



金順會師先清北路以固根本既定吐魯番闢展然後遣師南嚮勢如破竹南路八城一鼓戡定雖帕夏殘黨五次寇邊隨即撲滅不數年而全疆底定收還伊犁謀出萬全故能奏功迅速師行所至罔不仰體

皇仁切禁枉殺於關內收撫降回撥地安插所全活甚眾關內外自遭兵燹田地荒蕪無所得食左宗棠籌發籽種使兵民雜耕收穫有餘以市價官爲收買嘗自謂籌防邊地莫要於屯田然興屯必多籌經費今度支告絀安可復以此上煩

朝廷故行軍以來未嘗一言顯及於屯政其實力所能行

無一非屯田遺意也其言如此以故兵民相勸耕者日多  
民務蓋藏而軍無匱乏其與人也開誠布公取長略短獎  
勵誘掖唯恐不至於舊僚宿將與其患難者念之尤不能  
忘待降將一出以坦白以故隨從征剿均能得其死力愛  
人而不流於姑息疾惡而不傷於苛細精察明斷不爲己  
甚非獨性情之正抑亦學術有以濟之及新疆旣平乃議  
設行省以規久遠臣愚不學猥承其後所以展轉數年尙  
無遺誤者皆左宗棠先事預籌之力也其東南事蹟楊昌  
濬已陳者臣毋庸復陳其平日見於奏報者臣亦毋庸瑣  
述謹就見聞所及據實臚陳合無仰懇

天恩宣付史館以備采擇除新疆立功地方專祠告成另行奏明立案外謹恭摺具陳伏乞

皇太后

皇上聖鑒訓示謹

奏

軍機大臣奉

旨著照所請該衙門知道欽此

請 卹張恩濬等片

九月十八日

再 臣於光緒九年三月十六日具

奏請將立功後積勞病故員弁蕭傳薪等議卹一摺並聲明尚有遺漏未報員弁容俟各軍陸續查報到日另案辦理奉

旨著照所請該部知道欽此欽遵在案茲據各營陸續查報積勞病故文武員弁十二名呈懇奏請

恩卹前來 臣查已故同知銜甘肅候補知縣張恩濬湖南善化縣人鹽提舉銜前湖北崇陽縣知縣祝應燾浙江仁和人縣人選用州判柳鼎勳湖南湘陰縣人甘肅補用從九

品吳國棠湖南長沙縣人候選未入流熊需湖馮兆焜均  
係湖南湘鄉縣人記名提督李玉春四川犍爲縣人記名  
總兵許獻德甘肅固原州人記名總兵郭恆昌安徽鳳陽  
縣人總兵劉必勝湖南湘鄉縣人總兵銜儘先副將白祥  
甘肅張掖縣人瑪納斯協右營右哨經制外委王清山四  
川巴州人該故員弁等均係立功後積勞病故合無仰懇  
天恩俯准飭部一併照軍營立功後積勞病故例議卹以  
昭激勸爾慰幽魂除咨部外理合附片具陳伏乞

聖鑒訓示謹

奏

軍機大臣奉

旨張恩濬等均著照軍營立功後積勞病故例議卹該部知道欽此

皇朝通志卷之二

三

烏魯木齊四次查明陣亡殉難官紳兵民請卹摺九月十八日

日

奏為烏魯木齊等處四次查明陣亡殉難官紳兵民懇

恩飭部從優議卹恭摺仰祈

聖鑒事竊查烏魯木齊屬境陣亡殉難滿漢員弁兵丁經前任都統臣恭鏜設局採訪計三次共採一千四百餘員名先後奏蒙

恩准交部從優議卹在案迨光緒九年甘肅省城善後局裁撤烏垣採訪亦即停止臣於上年四月移駐新疆省城溯自全疆淪陷前後歷十四年凡官紳士民婦女死事慘



各事... 烈者不下數十萬人雖未能一律查明而有姓名事實可考者未便任其湮沒勿彰經臣札飭布政使魏光燾署鎮迪道兼按察使銜英林督同委員設局採訪茲據該司道等詳稱查有從前四次已採未及詳奏官紳兵民共四千二百六員名檢查卷宗核對冊案其中或力戰陣亡或轉輸遇害或被執不屈或聞變自戕大節凜然宜邀

卹典並造具花名清冊詳請具

奏前來臣覆核無異合無仰懇

天恩飭部從優議卹以彰忠義而慰幽魂除飭該司道等督飭局員再行詳加採訪由臣覆核陸續陳奏並將齊到

花名清冊咨送各部查照外所有烏魯木齊等處四次查明陣亡殉難官紳兵民懇請

恩卹緣由謹會同陝甘總督臣譚鍾麟護理烏魯木齊都統臣富勒銘額恭摺具陳伏乞

皇太后

皇上聖鑒訓示謹

奏

軍機大臣奉

旨著照所請該部知道欽此



新疆人命重案懇暫

准變通辦理摺

九月十日

奏爲新疆人命重案礙難遽復舊制仍懇

天恩暫准變通辦理恭摺具陳仰祈

聖鑒事竊

臣

准刑部咨議覆新疆辦理命盜案件一摺新

疆搶劫盜案暫准就地正法命案罪應凌遲斬絞立決及

監候各犯均由該撫等詳細核勘照例擬定罪名專摺奏

明請

旨俟奉到部覆後將罪應凌遲斬絞立決及例實入勾之  
犯再行處決等因奉

旨依議欽此仰見

朝廷欽恤民命明慎用刑之至意臣自應恪遵辦理第新疆地處極邊迥異內地其窒礙難行之處略有二端敬爲  
皇太后

皇上縷晰陳之查例載州縣承審事件定擬招解上司按律改正該督撫均於題咨內據實聲明俟刑部覈覆後係州縣官原擬錯誤者卽照部駁改正例按其罪名出入分別議處等語新疆新設州縣事屬草創襄理乏人略知例案者多不願游幕萬里之外卽由關內招募刑件大半濫竽充數驗傷填格諸多未諳臣於各屬案件只期供情確實並不責其爰書概由臣督同鎮迪道兼臬司銜詳度案

情參諸律例酌擬完結若如部議辦理必由州縣定擬如律則新疆州縣幾無一員可以自全此不能遽照舊制者一也凡罪至凌遲立決皆係決不待時卽斬絞例實入勾人犯亦屬法無可貸此等亡命死囚久稽囹圄設使痠斃憲典悻逃倘有疏失逃入鄰境爲害滋深自宜早伸

國法然不能不稍爲遲延者纏回等言語不通犯供真情頗不易得繩以照例承審限期勢必不行各屬距省寫遠詳批往返約三兩月設有駁詰申覆往返亦需時日情罪旣重核轉上司或應親提鞫問長途解犯動輒千數百里迨供情審定轉詳到省每結一案速則大半年遲則年餘

已屬遲之又久若照部議隨時具奏

京師距新疆省八千餘里奉准部覆去來程限亦須三月有奇再由臣行文犯事地方又需月餘通盤合算處一決不待時之犯總須一年以外此不能遽照舊制者又其一也恭讀嘉慶十二年四月十六日

上諭盛駐等奏拏獲圖財害命之回犯審明定擬一摺此案胡特魯克著卽處斬回疆非內地可比嗣後遇有此等案件情節較重者於訊明正兇後卽著立時懲辦毋致久稽顯戮等因欽此是回疆情形不比內地早在

聖明洞鑒之中現雖改設行省而風氣所趨究非旦夕所

能不變合無仰懇

天恩俯念新省地處極邊州縣諸凡創始暫准將命案罪  
應凌遲斬絞立決及斬絞監候例實入勾各犯仍照變通  
章程就地正法按季摘由彙報俟三數年後察看情形再  
行奏請規復舊制至斬絞監候入緩人犯卽遵部議辦理  
專案具奏聽候部覆應行減軍減流卽同尋常遣軍流徒  
等犯一體南北兩路互相調發勻撥地畝以助屯墾據藩  
司魏光燾鎮迪道兼按察使銜恩綸會詳請奏前來臣覆  
查無異所有新疆人命重案礙難遽復舊制仍請  
旨飭部暫准變通辦理各緣由謹會同陝甘總督臣譚鍾



麟署伊犁將軍臣錫綸恭摺具

奏伏乞

皇太后

皇上聖鑒訓示施行謹

奏

軍機大臣奉

旨著照所請刑部知道欽此

恭繳 欽差大臣關防摺

九月二十四日

奏爲恭繳

欽符仰祈

聖鑒事竊 臣前奏奉到巡撫關防請繳回

欽差大臣關防一摺光緒十二年九月初七日奉

旨著准其回繳所有新疆改設一切未盡事宜仍著劉錦

棠悉心妥籌辦理欽此仰見

聖慈垂察體念無遺諒其心之所未安策以職之所當任

臣自應隨時隨事勉竭愚忱以期仰答

高厚生成於萬一惟新疆建置之初與內地情形迥別內

地各謹其財賦歲用有餘新疆則地處窮邊向資協濟內地各修其政刑紀綱具在新疆則事皆創始無可率循所望後此疆臣仍按以定章毋分畛域部臣少寬於成憲量與變通此則區區之愚不得不瀝陳於

君父之前者除將咸字八十一號

欽差大臣關防一顆敬謹封固派弁齎送軍機處驗收並咨部查照外理合繕摺具陳伏乞

皇太后

皇上聖鑒謹

奏

軍機大臣奉

旨該部知道欽此

This image shows a blank ledger page with 12 vertical columns. The columns are separated by thin vertical lines, and the entire page is enclosed in a double-line border. The page is otherwise empty of any text or data.

|  |  |  |  |  |  |  |  |  |  |  |  |
|--|--|--|--|--|--|--|--|--|--|--|--|
|  |  |  |  |  |  |  |  |  |  |  |  |
|--|--|--|--|--|--|--|--|--|--|--|--|

庫爾喀喇烏蘇同知請添設照磨兼司獄員缺摺

十月十九日

奏爲庫爾喀喇烏蘇撫民同知擬請添設照磨兼司獄員缺以資佐理而裨地方恭摺仰祈

聖鑒事竊照庫爾喀喇烏蘇地方向設糧員由部揀派經臣奏請改設撫民同知一員加理事銜並於摺內聲明未盡事宜隨時

奏明辦理已奉

諭旨飭部核議覆准欽遵在案茲據新疆布政使魏光燾兼按察使銜鎮迪道恩綸會詳稱庫爾喀喇烏蘇爲通伊犁塔爾巴哈臺衝道改設同知經管地方戶口田賦刑案

事務殷繁所有緝捕監獄須有專員經理設遇同知因公  
出境或下鄉勘驗案件亦可藉資彈壓請仿照南疆各同  
知之例添設庫爾喀喇烏蘇同知照磨兼司獄一員管理  
監獄緝捕以資佐理等情前來臣查庫爾喀喇烏蘇爲入  
伊塔兩城要道緝捕彈壓誠關緊要精河雖改設驛糧巡  
檢距廳治寫遠勢難兼顧合無仰懇

天恩俯准庫爾喀喇烏蘇添設同知照磨兼司獄一員於  
地方實有裨益如蒙

俞允應需養廉俸銀並書役名數工食等項請照南疆各  
廳照磨章程支給並照吉林新設各缺酌補一次成案由

外揀補一次至應定爲何項缺分請俟設妥後由臣定擬  
所有擬添庫爾喀喇烏蘇同知照磨兼司獄員缺緣由是  
否有當謹會同伊犁將軍臣錫綸陝甘總督臣譚鍾麟合  
詞具

奏伏乞

皇太后

皇上聖鑒訓示謹

奏

軍機大臣奉

旨該部議奏欽此





新疆應設撫標及城守等營員缺擬辦情形摺十月十九日  
奏爲新疆應設撫標及城守等營各員缺謹將擬辦情形  
分別繕具清單恭摺仰祈

聖鑒事竊維兵者

國家之常制承平日久兵不可用一旦有事始改而募勇  
新疆自遭回亂迄乎底定十餘年來所恃以防衛地方者  
皆爲客勇邊疆瘠苦勇丁遠從征役餉糈難以驟減至今  
猶發行糧揆以度支有常勇非經制原應改設制兵以規  
久遠然他省之勇勢不能強使爲本地之兵再四思維惟  
有因勇設標以官帶勇先設定員缺以期漸就規模臣錦

光緒十年四月二十八日具

奏遵

旨統籌新疆全局摺內請將標營員弁參用勇營章程如副將作營旗官卽以中軍都司爲總哨千把總經制外委爲正副哨長參將游擊作營旗官卽以中軍守備爲總哨千把總經制外委爲正副哨長都司守備作營旗官卽以中軍千總爲總哨把總經制外委爲正副哨長經部

臣議

奏奉

旨允准欽遵在案茲值提臣移駐喀什噶爾擬就原隸提標各處應改定者先議及之查向章勇丁一營自營官總

哨以下至副哨長共計官弁十員標營設官若必一一牽合其數未免過多擬每營旗祇以副參游都守作營旗官而量設千把爲哨長經制外委爲巡查其總哨副哨哨長概從減省又勇丁營制步隊一營火勇占額四十餘名一旗火勇占額三十餘名馬隊火勇向在額外標營則向無火勇茲既仍照勇營之制蓄養精銳使一勇得一勇之用未便再以執爨負薪分其餘力火勇自難裁減擬改步隊以四百九十八人爲一營三百六十七人爲一旗官弁火勇一概在內馬隊以二百五十人爲一營一百二十六人爲一旗官弁在內火勇在外以符向章而議設標營則不

計火勇以足原議鎮迪道屬設兵六千四百名之數撫標擬以舊有之提標中左右三營改設內設中軍參將一員游擊二員並中軍以下等官共四十餘員勇二千餘名雖未能盡如內地各撫標之制然內地如河南撫標兩營兵額亦多至二千餘人邊省情形迥異防守不容不嚴設額自不宜過少省城重地城守尤關緊要擬合舊有之迪化鞏甯二營設省城城守協副將一員並中軍都司以下等官宜仿各直省城守協營之制而以舊有之喀喇巴爾噶遜營隸之此外瑪納斯營濟木薩庫爾喀喇烏蘇營皆依舊制略爲增減精河舊設都司其地當伊犁要衝擬設參

將一員以資控制吐魯番昔爲換防之兵其地屬鎮迪道  
今擬就鎮迪道屬設兵數內增設游擊一員駐劄其地以  
上均隸撫臣兼轄計設副將二員參將三員游擊四員都  
司四員守備十三員千總十九員把總五十二員經制外  
委三十四員共官一百三十一員步隊八營三旗馬隊十  
五旗除火勇不計外共正勇六千四百四名此擬設各標  
營制之大略也餉則照坐糧章程有應稍爲變通者新疆  
各營旗勇丁類皆招自南方各有室家各懷鄉里斷難強  
其改隸兵籍大抵隸兵籍者必以土著爲宜新疆北路人  
煙稀少南路盡係纏回土著無可招募惟有招之關內然

由甘肅至新疆近者五六千里遠或八九千里小民拋棄室家來隸營伍欲其安心用命亦當代計其身家關內制兵挑練則議練軍之餉誠以一經團紮日事操防卽不能別營生業故餉亦因之以加關外百物昂貴較關內倍蓰民間雇一小工日尙需銀二三錢不等彼此相形多願傭工而不願入伍前此提標七旗土勇照土勇章程發餉試辦之初祇期節省究之逃亡踵接其勉强應募者率皆游惰之民核其情形雖給以坐糧仍恐難資得力土勇且猶如此若由關內招募而來使僅餉其口而無絲毫餘蓄孰肯別離鄉井努力戎行惟有略籌變計較坐糧每名按月

加銀三錢長夫概行不設以坐糧章程每營每歲需餉二萬四千餘兩總數核計仍屬有減無增較之現在勇營行糧額數節省尤鉅與原奏每年關內外需餉三百數十萬之議亦屬相符至各員廉俸薪蔬馬乾草料各項悉照標營舊制惟新疆文職各官廉俸等項現均給發實銀並無減折塞上地方瘠苦文武事同一律可否仰懇

天恩准一體發給十成實銀毋庸減折以示體恤此擬定各標餉章之大略也據藩司及鎮迪道兼臬司詳請具奏前來臣等覆核無異謹分別繕具清單恭呈

御覽伏乞



飭下戶兵等部核議施行如蒙

俞允其餘提鎮各標營應請概照此章以次議設其分防  
汛地勇營既宜團紮難盡如標營舊制節節設塘分汛將  
來惟有擇要屯防使之同力合操咸成勁旅抑臣等更有  
請者新疆現撥新餉歲有定數必須裁一營客勇始能招  
一營土勇而客勇欠餉纍纍前經部臣指撥各省關欠解  
協餉銀二百八十萬兩僅福建報解二萬兩餘均至今未  
見報解舊勇不裁新勇卽難招募而欲裁一名舊勇必將  
挪一名新餉是徒設標營究無實效轉使舊欠未清新虧  
又起況各勇等鋒鏑餘生久羈絕域日惟盼此餘資得以

早還鄉里伏乞

天恩飭部嚴催報解俾得陸續裁舊改新庶標營早定一日餉精早紓一分邊防幸甚時局幸甚所有擬設撫標及城守等營各情形謹會同署提督臣譚上連合詞具陳伏乞

皇太后

皇上聖鑒訓示再此摺係臣錦棠主稿合併聲明謹奏

軍機大臣奉

旨該部議奏單三件併發其各省關欠解餉銀著戶部嚴

催報解母任延緩欽此

查明新疆用款無可刪減存儲報部摺

十一月二十八日

奏爲遵

旨查明新疆各項用款無可刪減存儲報部恭摺具陳仰

祈

聖鑒事竊臣疊次欽奉

寄諭令各直省覈實刪減用款存儲報部等因仰見

皇太后

皇上經國理財實事求是之至意當經先後恭錄飭查去後茲據藩司魏光燾會同糧臺司道詳稱查新疆出款除滿營俸餉及現議遷徙各費以奉撥平餘銀兩抵支不計

外其文職廉費俸工驛站夫馬工食草料並標營官兵俸  
餉共歲需銀三十一萬餘兩現經奏准之加增公費並一  
切祭祀雜款及提標土勇口糧向由軍需項下開支均不  
在內而每歲入款額糧稅課各項共合銀二十三萬餘兩  
以入抵出不敷尙鉅此司庫出入之大較也防營陸續裁  
併現存步隊十五營二十四旗馬隊九營十六旗開花礮  
隊三哨小馬隊五哨周迴萬數千里之地兵力已形單薄  
歲定協餉二百二十萬兩上年各省關報解僅及九成內  
應劃撥製辦善後經費銀三十萬兩又南北兩路城垣衙  
署等工因指撥專款解不足數墊發尤多餘亦不敷支放

此糧臺收發之大較也至各路臺局原設一百四十餘處近來裁撤除牛痘局外祇存二十餘處體察各項用款實係萬難議減詳請覆

奏前來臣維新疆地處邊荒向資協濟迥非內地各直省能於就地取資可比近年裁併營旗力求節省現復擬就防勇改設標營以便徐改坐糧漸裁行餉而各省關指撥欠餉銀二百八十五萬兩祇閩海關解到二萬兩餘均未聞報解日復一日新欠又加此臣所日夜悚惶而不能自己者即使各項用款實有可裁亦當以羨餘彌補積欠其不能提存解部已在

聖明洞鑒之中臣惟有率同僚屬認真經理以期厚一分民生即可紓一分餉力所有查明各項用款無可刪減存儲解部各情形除咨部查照外理合恭摺具陳伏乞

皇太后

皇上聖鑒訓示再伊犁塔爾巴哈臺等處有無款項可裁應由署伊犁將軍臣錫綸等查核覆陳合併聲明謹奏

軍機大臣奉

旨戶部知道欽此

新疆 大計鉅典懇緩至下屆辦理摺十一月二十八日

奏爲新疆初設行省各員歷俸未滿三年本年

大計鉅典礙難舉辦籲懇

恩准展至下屆辦理以昭慎重恭摺仰祈

聖鑒事竊臣准吏部咨定例各省官員

大計三年一次今自光緒九年十二月扣至本年十二月  
三年之期已屆令將

大計卓異按額薦舉有干六法之員照例參奏於光緒十  
二年十二月內具題各等因光緒十二年八月十六日題  
本月十八日奉



旨依議欽此欽遵知照到臣當經飭司遵照去後茲據新疆布政使魏光燾兼按察使銜鎮迪道恩綸會詳稱查定例道府州縣各官核計本省歷俸已滿三年任內並無正項錢糧未完其平日循聲政績該上司實係灼見眞知准其列入薦舉等因歷經遵辦在案新疆初設行省北路鎮迪道所屬各官雖係舊有之缺而署事人員較多卽有實缺人員亦歷俸未滿三年南路新設各缺委員先行署理多係十年到任其有請補實缺者亦皆於十一年始行奉准核計均無歷俸已滿三年之員與大計薦舉之例不符詳請具

奏展緩前來臣覆核無異合無仰懇

天恩准予展至下屆再行舉辦以昭慎重如有應劾人員臣仍當隨時訪察據實參

奏斷不敢稍事徇隱貽誤地方是否有當除咨部查照外謹會同陝甘總督臣譚鍾麟恭摺具

奏伏乞

皇太后

皇上聖鑒訓示謹

奏

軍機大臣奉

皇朝通志卷之六十一

旨著照所請吏部知道欽此

三

劉襄勤公奏稿卷十二

起光緒十二年十二月  
訖光緒十三年閏四月

目錄

請 旨嚴催協解西征欠餉摺

查明伊犁新設副都統二員均應與將軍同城駐紮摺

新疆司道各員循例年終密考繕單具陳摺

辦理吐魯番廳屬偏災擬分別蠲緩片

新疆助墾人犯籌款安插情形摺

興辦屯墾並安插戶口查報隱糧摺

增庫爾喀喇烏蘇同知公費片

庫車等五廳州縣交代請 寬免起限片

請開缺回籍省親就醫摺

調補莎車直隸州知州要缺摺

續查烏垣等處陣亡殉難官紳兵民請 旌卹摺

查明毛運如積勞病故並眷屬殉難情形片

西征欠餉逾期未到懇撥庫款摺

新疆田賦戶籍造冊咨部立案摺

擬設伊犁道府等官摺

古城城守尉到省日期並會商滿營遷併事宜摺

請將譚拔萃附祀片

請將王德溥並其母姚氏妻郭氏分別 旌卹片

揀員請補葉城縣知縣要缺摺

提督呈請復姓歸宗摺

新疆無秋審人犯請 飭核議冊式及截止日期摺

伊犁將軍病勢較輕毋庸馳往摺

請設撫署筆帖式摺

蒙部纏回改歸地方官管轄並改鑄關防片



請

旨嚴催協解西征欠餉摺

十二月  
初四日

奏爲部撥閩浙廣東各省關協解西征欠餉屢催周應請  
旨嚴催迅解以清積欠而固邊防恭摺仰祈

聖鑒事竊照

臣

軍餉項截算至光緒十年年底止共欠發

銀二百八十五萬兩經部

臣議

奏指撥浙江省銀一百八十五萬兩福建省銀三十八萬  
兩廣東省銀五十六萬兩閩海關銀六萬兩請

旨飭下各該省將軍督撫

臣

按照所撥數目勻分三年解

赴甘肅糧臺轉解關外所有限期截至光緒十四年年底  
止作爲限滿務須分年分批趕解毋稍延誤等因光緒十



一年四月二十一日具奏奉

旨依議欽此旋經陝甘督臣譚鍾麟奏請改撥江蘇協餉部議江蘇物力並非有餘仍應由原撥各省關按年報解又於光緒十二年三月初六日經部議奏各省關倘仍前延宕卽由該撫指名嚴參等因均奉

旨依議欽此欽遵先後咨行在案是部臣於此項撥款審度再三期在必無遲誤乃迄今已屆一年期限祇聞海關解到銀二萬兩餘悉未聞報解緘牘頻催均未見覆竊念西征兵勇自咸豐年間由江浙閩粵轉戰入關旋折而東殲除髮捻然後由關度隴踰隴益西時閱二十年行經數

萬里軍興以來惟此一軍從役最爲久遠此次存餉二百八十餘萬合之於公家則爲數甚鉅散之於兵勇則每名至多不過百餘金少或數十金而已各該兵勇少壯從軍至於暮齒不能持此爲歸休之計夫豈甘心設有不虞臣罪滋重待其譁潰然後從而收拾爲費益多況新疆地處極邊重在武備承平時籌兵裕餉以全力注於西陲旋值中原多故餉饋拮据遂致全疆淪陷迨關隴肅清仰賴宸謨廣運協餉之外發部款貸洋款多方接濟故能師行順利挈舊有之疆土還隸版圖今則經野設官比於腹地然沿邊諸境緊與俄鄰視承平之時防務尤爲喫緊臣謬

當斯任兢惕實深思所以慎守封圻惟在簡練軍實舊時士卒日夜思歸加以衰病侵尋所在多有不思更換徒耗餉需前於酌改營制摺內陳明擬由甘肅招募新勇以資挑補去弱畱強庶幾緩急足恃惟是地方瘠苦非若臺灣設省可以就地取資事待他求遂多停滯欠餉遲遲不至則老勇未可遽裁老勇未裁則新勇尚難增募措施鮮據職此之由臣前議裁行餉改發坐糧以爲節省餉需之計現在積欠未清亦未便遽裁行餉上年及本年新餉幸賴江南安徽湖廣四川河南陝西山西各疆臣之力源源解濟得以勉應急需然數米析薪已無餘贍若掛發舊欠又

啟新虧部臣申誠在先臣亦何容冒昧在部臣指提舊欠  
自非畫餅相貽在微臣勢處萬難尤望同舟共濟各省關

力能籌解安事遲迴卽或力有未能亦應早爲陳

奏若復似此稽遲置之不理又將何以爲計新疆事事仰  
給於人若必遵照部議指名

奏參又失和衷之義臣惟有仰懇

天恩俯念邊疆緊要

飭下兩廣閩浙各督臣福建浙江廣東各撫臣將此項指  
撥欠餉迅籌報解毋再遲延致滋貽誤如各該省實係力  
難全任卽當督飭藩司通盤籌畫切實聲明每年能解若

干不敷之數奏請

諭旨飭部另撥的款以便及早清釐妥爲布置邊軍幸甚大局幸甚謹會同陝甘總督臣譚鍾麟據實瀝陳伏乞

皇太后

皇上聖鑒訓示施行謹

奏

軍機大臣奉

旨戶部速議具奏欽此

查明伊犁新設副都統二員均應與將軍同城駐紮摺二十  
月十八日  
奏爲遵

旨查明伊犁新設副都統二員均應與將軍同城駐紮恭  
摺覆陳仰祈

聖鑒事竊臣承准軍機大臣字寄光緒十二年十月二十  
日奉

上諭新疆新設副都統二員前經兵部奏稱或與將軍同  
城或令分防要地應由該撫奏明請旨現已簡放長庚額  
爾慶額二員究應駐紮何處著劉錦棠迅速具奏毋稍延

緩將此由五百里諭令知之欽此伏查此案前准部咨令  
臣體察情形

奏明辦理屬當伊犁等處議設道府以下等官事在統籌  
不容偏舉故未便卽時陳奏致煩

聖慈垂問悚仄實深竊維伊犁向設參贊一員與將軍同  
城辦事所以集思廣益相輔而行立法至爲周備現經部  
議裁去參贊大臣員缺改設副都統二員自應做照參贊  
舊章均與將軍同城以便隨時得資計議且現在各營領  
隊多已分駐外處副都統亦毋庸更議分防惟查伊犁將  
軍及參贊等向均駐紮惠遠大城其後年久失修城身爲

河水所齧漸就傾圮及收還伊犁原任將軍臣金順因綏定城尙無大損遂加修葺移營駐之不過暫資休止現擬設伊犁府縣綏定城地居腹裏宜量設親民之官其惠遠大城業經金順

奏明移築於舊城十五里高敞地方丈尺加增形勢亦爲扼要各等因在案是將軍與新設之副都統揆之舊制按之今時均應駐於其地如蒙

俞允其建造衙署修葺兵房及一切遷徙經費應如何籌款伏乞

飭下伊犁將軍臣切實估計奏明請



聖鑒事 欽此 卷一 二二  
旨飭部核議遵行至各營領隊職有專司除巴彥岱山領隊  
大臣一缺經金順

奏明裁撤外其餘各領隊員缺應裁與否尙待熟商如尙  
有應裁或需副都統分防屆時應由將軍臣就近察酌情  
形再行會商具奏所有遵

旨查明伊犁新設副都統應與將軍同城各緣由謹恭摺  
覆陳是否有當伏乞

皇太后

皇上聖鑒訓示再伊犁擬設府縣各事宜現正飭司詳議  
容臣另案奏明辦理合併聲明謹

奏

硃批另有旨欽此



軍機大臣字寄光緒十三年正月十八日奉

上諭劉錦棠奏遵查伊犁新設副都統二員均應與將軍同城駐紮一摺據稱伊犁改設副都統二員應做照參贊舊章與將軍同駐惠遠大城以期集思廣益卽著照所請行其建造衙署兵房及一切遷徙經費如何籌款著該將軍切實估計請旨辦理至各領隊如尙有應裁員缺卽需副都統分防之處並著察酌情形與劉錦棠會商具奏原摺著鈔給色楞額錫綸閱看將此由四百里各諭令知之欽此



新疆司道各員循例年終密考繕單具陳摺

十二月十八日

奏爲新疆司道各員循例年終密考繕具清單恭摺仰祈  
聖鑒事竊照內地各直省鎮司道府等官例應於年終出  
具切實考語密行

奏新疆建置行省<sub>臣</sub>所關自應照章辦理<sub>臣</sub>上年到省  
諸凡創始冬間又值奉

命前赴伊犁清理餉事未及以時陳

奏茲復勤加察看於各員之才識操守皆有以觀其深全  
省員缺無多知府又祇一缺尙未補授有員實缺旣少訪  
察亦易除署事及未經到任人員例不注考外所有現任

各員理合出具切實考語密繕清單恭呈

御覽伏乞

皇太后

皇上聖鑒謹

奏

辦理吐魯番廳屬偏災擬分別蠲緩片

十二月十九日

再新疆全境本年尙稱豐稔惟吐魯番屬間有禾苗地畝  
忽生螻蟲夏禾大麥小麥均被蟲食秋禾棉花高粱亦多  
被傷其被傷之棉花高粱又續被狂風吹折小民終歲勤  
動收成難望情殊堪憫當飭該地方官將被災莊民妥爲  
安撫俟秋後查看被災輕重分別核辦蠲緩茲據印委各  
員親往托克遜伊拉湖鴉兒湖黑山頭雅爾巴什西甯工  
涼州工沙渠子二工洋沙爾東坎爾底湖勝金木頭溝二  
堡三堡洋海蘇巴什漢墩共一十九莊逐一履勘內災民  
二百二十戶所有地畝被蟲被風夏秋禾苗全無收穫卽



有收者亦不敷籽種之數核計本年應徵京斗額糧一千四百八十一石九升七合七勺委屬無力完繳造齋分別蠲緩清冊出具切結由司出示曉諭先行停徵並俟來年察看情形應否賑撫及酌借籽種再行酌辦據藩司魏光燾詳請具奏前來臣覆核無異相應奏懇

天恩俯准將吐魯番屬十九莊本年被災地畝應徵糧石蠲免八百八十八石六斗五升八合六勺緩徵糧五百九十二石四斗三升九合一勺分作三年帶徵以紓民力如蒙

俞允俟欽奉

諭旨後卽飭司將被災各戶蠲緩糧石分別詳細開載敬  
刊謄黃徧行曉諭俾令周知以廣

皇仁而彰實惠所有辦理吐魯番屬偏災擬分別蠲緩緣  
由謹會同陝甘總督

臣譚鍾麟附片具陳是否有當伏乞

聖鑒訓示謹

奏

硃批另有旨欽此

卷之二

一

光緒十三年正月二十三日內閣奉

上諭劉錦棠奏查明被災地畝請將糧石分別蠲緩等語  
新疆吐魯番屬上年被蟲被風收成歉薄若將應徵糧石  
照常徵收民力實有未逮加恩著照所請所有吐魯番屬  
托克遜伊拉湖鴉兒湖黑山頭雅爾巴什西甯工涼州沙  
渠子二工洋沙爾東坎爾底湖勝金木頭溝二堡三堡洋  
海蘇巴什漢墩十九莊應徵糧石著蠲免八百八十八石  
零緩徵糧五百九十二石零分作三年帶徵以紓民力該  
撫卽刊刻謄黃徧行曉諭務使實惠均霑毋任吏胥舞弊  
用副軫念民艱至意該部知道欽此



新疆助墾人犯籌款安插情形摺

十二月二十日

奏爲遵

旨覆陳新疆助墾人犯現時安插情形恭摺仰祈

聖鑒事竊

臣

准刑部咨議覆陝甘督

臣

譚鍾麟片奏七省

發遣新疆人犯中途恃眾逞強有毆斃營兵毆傷解役乘間脫逃之事請由前途省分量爲截畱分起遞解並知照直隸等省酌定人數間日發遣係爲酌量變通免致擁擠起見應如所奏辦理惟是七省應發人數統計共有二千七百餘名加以妻室子女至少亦在五六千人上下現在辦理已形掣肘若不預先布置妥協將來必致愈費周章

且該犯等萬里投荒倘或不咸安耕作勢必別滋事端殊於邊陲大有關係相應請

旨飭下該督再行會同新疆巡撫詳查地方實在情形務將經費如何籌畫究竟有無著落其已經發到之犯究竟如何分撥並以後七省人犯到齊能否一律安插一併妥議迅速具奏等因奉

旨依議欽此仰見

朝廷慎重邊陲實事求是之至意臣查新疆北路土曠人稀屯墾最爲要務而招民內地道遠費艱部議將各省秋審減等人犯簽同妻室子女發新助墾車輛口糧一併由

沿途地方官撥護資送原以此等人犯攜有室家於屯務  
實爲有濟迨臣奏請仿照民屯優給牛籽房具口糧而部  
臣援引遣犯種地當差之例謂未經入籍爲民不得照戶  
民辦理其實助墾之犯與實犯外遣不同非照民屯難收  
成效查現擬辦民屯章程每二人爲一戶撥上地六十畝  
給農具銀六兩修屋銀八兩耕牛二隻銀二十四兩籽種  
糧三石月給口糧麪九十觔鹽菜銀一兩八錢自春耕至  
秋穫按八箇月計算籽糧照時價扣合共需銀七十三兩  
有奇由公借發限初年繳還一半次年全還遇歉酌緩額  
糧則自第三年始初年徵半次年全徵仍防營田之制十



戶舉一屯長月給口糧銀二兩五十戶派一屯正月給口糧銀四兩亦以八箇月爲限但免扣還每屯正五名復派一委員管理以資遞相鈐束修濬渠道仍由公中給款各該犯到日臣當飭設局派員按名點驗先行酌發鹽菜口糧眷口按大小給發一經撥墾一切悉如民屯糧則動用倉儲不足則益以採買官犯捐輸一項此時尙無可籌應發現銀卽於善後及製辦軍裝款內暫飭挪移墊用此籌畫經費之實在情形也計自陸續安插以來有家之犯悉安耕作隻身人犯間不免恃強爭毆已飭印委各員嚴加管束其老弱不能力耕者於各衙門分派役使或給資本

貿易營生茲查迪化縣屬已安三百戶其餘人犯擬於奇  
 臺阜康昌吉綏來四縣各安百戶以次推及濟木薩呼圖  
 壁並鎮西庫爾喀喇烏蘇等廳及精河各處此又分撥安  
 插之實在情形也部議准如督臣之請知照直隸等省酌  
 定人數間日發遣自可免沿途擁擠恃眾逞強之患惟查  
 各省咨報起解人犯有一千五百餘名而隨帶妻室子女  
 者不過十之一二殊與部臣實邊之初意相左且詢據各  
 犯聲稱沿途州縣每名每日發給錢文恆不獲一飽勢不  
 得不向民間強求飲食解役稍稍禁束因而不服不免忿  
 爭是督臣譚鍾麟所奏各情大抵皆由於此此輩子遺一

身遠行絕域既無室家遂無顧忌聚集一隅之地誠恐滋生事端而十年生聚之謀亦終於此輩無望惟有仰懇天恩飭令直隸等七省凡發遣新疆人犯有室家者務必簽同起解仍准一體發給口糧以免該犯等萬里攜家川資不逮又查刑部咨准河南巡撫臣邊寶泉咨請於例給口糧外每名每日捐給錢四十文如簽同妻子一律按名捐給並於起解時每名捐給川資錢二千文在該州縣所費不多而該犯等均沾實惠誠能各省照辦將見發遣新疆之犯室家相保生齒日繁屯務可收實效而沿途恃強逞兇諸弊亦將不禁自除矣至各犯到後應請概照新疆

現辦民屯章程辦理均於錢糧全完之年卽准入籍爲民以廣

皇仁而實邊圉據布政使魏光燾鎮迪道兼按察使銜恩綸會詳請

奏前來 臣覆核無異所有遵議發遣新疆助墾人犯籌款安插各緣由是否有當謹會同陝甘總督 臣譚鍾麟恭摺覆陳伏乞

皇太后

皇上聖鑒飭部核議施行謹

奏

硃批該部議奏欽此

與辦屯墾並安插戶口查報隱糧摺

光緒十三年二月十二日

奏為興辦屯墾酌擬章程並查明鎮迪各屬十二年安插戶口發過經費及南北路查報隱糧各數目恭摺具陳仰祈

聖鑒事竊照新疆地方幅員寥闊戈壁之外不乏膏腴兵燹以來鞠為茂草繼經平定招集流亡加意撫綏興修屯墾南路纏民繁庶荒地尚屬無多北路鎮迪各屬已墾熟地不過十之二三田賦缺額既多閭閻亦形凋敝新招各戶率皆貧乏非由公中酌借成本不足以廣招徠臣前飭據藩司魏光燾體察情形悉心籌畫酌擬章程每戶給地

刑部力人奏高

六十畝由公中借給籽種糧三石製辦農具銀六兩修葺房屋銀八兩耕牛兩頭合價銀二十四兩或父子共作或兄弟同居或僱夥結伴均按以二人爲一戶並月給鹽菜銀一兩八錢口糧麪九十觔自春耕起按八箇月計算通計每戶銀糧牽算共需借給成本銀七十三兩一錢定限初年還半次年全繳設遇歉收查明酌展繳本之後按畝升科啟征額糧自第三年始征半次年全征仍仿營田之制十戶派一屯長如營中什長之制五十戶派一屯正如營中百長之制每屯正五名派一委員管理凡請領成本督察農工一切事宜地方官責之委員委員責之屯正屯

正責之屯長仍十戶出具連環保結互相糾察層層鈐束  
以免領本潛逃耗費曠功及滋事不法諸弊其屯正屯長  
每名仍准領地六十畝借給成本一如戶民之例惟每月  
另給屯正銀四兩屯長銀二兩仍按八箇月計算但免扣  
還以示獎勵前於覆陳安插助墾人犯摺內逐一聲明在  
案茲查迪化縣安插三百六戶奇臺縣安插一百戶昌吉  
縣安插一百四戶阜康縣安插五十三戶綏來縣安插三  
百二十戶濟木薩縣丞安插六十六戶呼圖壁巡檢安插  
七十四戶哈密通判安插四十五戶精河巡檢安插二十  
二戶總計安插土客一千九十戶除籽種口糧由倉糧項



下借發外共領過成本銀四萬九千八百餘兩另由公中籌給修渠經費銀四千八百餘兩均於善後經費項下開支其舊戶中有隱匿正賦者亦定章飭屬嚴查准各戶自行首報卽於具報到官之日按畝升科姑寬既往如不行首報查出嚴懲仍追歷年隱賦已據各屬查報隱糧一千三百四十餘石均自十二年起征此上年定章興辦屯墾並清查隱賦之各項情形也惟新疆屯地向資渠水灌溉亂後渠多壅廢開辦之初擇其易於爲力者先加疏濬經費尙屬無多以後續籌安插此款必須增鉅現值安插遣犯需費不貲卽以收回成本周轉能否招墾民戶如上年

之數應俟察看情形酌量籌辦以期戶口日增荒蕪日闢  
賦額日加漸臻富庶至南路各屬亦據報新墾地一萬九  
千餘畝分年啟征均係報明不領墾費合併聲明除咨部  
查照外謹會同陝甘總督臣譚鍾麟恭摺具陳是否有當  
伏乞

皇太后

皇上聖鑒訓示謹

奏

硃批著照所請該部知道欽此



增庫爾喀喇烏蘇同知公費片

二月十日

再臣據藩司魏光燾詳據庫爾喀喇烏蘇同知符瑞稟稱庫屬地方瘠苦人工貨物昂貴倍於各屬且路當衝繁差務頻仍供支甚鉅額領廉費不敷應用委屬異常支絀懇請援案酌加公費等情查南北路各廳州縣稍苦員缺均蒙奏准酌加辦公銀兩該廳係屬新設缺分最苦可否援照喀喇沙爾同知之例除舊有公費外按月給予加增公費銀五十兩等情詳請具

奏前來臣查新設庫爾喀喇烏蘇同知前經部議比照吐魯番同知例歲支養廉銀八百兩公費銀七百兩俸銀照

五品例歲支八十兩茲據稱該廳地方瘠苦查係實情自應量加體恤俾昭平允合無仰懇

天恩俯允飭部准照喀喇沙爾同知之例除舊有公費外按月給予加增公費銀五十兩以資辦公出自

逾格鴻施是否有當謹會同陝甘總督臣譚鍾麟附片具奏伏乞

聖鑒訓示謹

奏

硃批著照所請該部知道欽此

庫車等五廳州縣交代請寬免起限片

二月十日

再臣前准戶部咨新疆新設官員初任交代變通初參二  
參往返程途例限次任交代仍照例限辦理以符定制奏  
奉

諭旨飛咨遵照等因到臣當經飭行遵辦去後茲據藩司  
魏光燾詳稱查清釐交代例定期限原爲杜積延清倉庫  
起見前因南路新設各廳州縣初任交代皆屬創案一切  
章程未定必須分別清釐展轉更造有需時日未能驟照  
定例故詳請奏明免予起限然錢糧關重本司責無旁貸  
雖請免起限而催查結報仍未嘗稍從寬假並不敢以未

經起限遂聽各屬任意稽延茲查未經扣限者庫車同知  
莎車直隸州葉城縣喀喇沙爾同知拜城縣先後交代五  
起均在未奉部文之先應懇奏咨仍照前奏免予起限其  
以後交代凡係初任均遵此次部議加倍扣限次任交代  
概照例限辦理等情詳請具

奏前來臣覆查無異合無仰懇

天恩俯准飭部將未奉部文以前庫車等五廳州縣未經  
扣限初任交代五起仍予寬免起限一俟次任再行循例  
辦理以符定制除咨部查照外謹會同陝甘總督臣譚鍾  
麟附片具陳伏乞

聖鑒訓示謹

奏

硃批著照所請該部知道欽此



聖朝勳公奏稿

卷十二

三

請開缺回籍省親就醫摺

二月十九日

奏爲微臣病勢日增親年日邁籲懇

天恩允准開缺

賞假一年俾回籍省親兼得就醫調理恭摺仰祈

聖鑒事竊臣前因患病累疏陳情仰蒙

優給假期

錫之珍藥俾在營安心調理

溫綸疊賁

獎勵有加臣何人斯遭茲

寵遇卽糜頂踵未足云酬苟可勉自支持何敢復有所請

惟三四年來醫治迄未能收效始猶時發時止發亦不過月餘至去年夏間病泄失調數月不愈牽動舊時目眩頭暈心悸汗下諸證侵尋靡已冬間腳氣又發行步須人甚或數日不能履地臥閱文書或接見僚屬於臥榻之側又畏寒特甚重裘抱火猶不自禁苦嗽多痰動輒盈碗關外極寒之地醫藥俱無如臣福薄災生但有日積日深而已昔人有謂人勞苦則呼天疾痛則呼父母臣父昔年沒於行陣臣甫數齡賴祖母陳氏撫以成立及後臣叔原任廣東陸路提督劉松山又沒於戰陣臣祖母所恃以慰遲暮者惟臣兄弟二人臣以樸愚尤所偏愛然自從軍以後祇

同治十年送臣叔遺櫬回湘依侍兩月旋即帶隊出關迄  
今又十六年未曾歸省上年臣弟自河南乞假回籍省視  
祖母聞報以爲臣也及見後問對移時始恍然撫之而泣  
知其爲誤蓋年八十有三神識昏耄久矣臣弟書來備述  
其狀臣益無以自安伏讀光緒九年三月初三日

上諭現在伊犁交涉之事尙多枝節俄境匪類時出滋擾  
外患未靖大兵勢難遽撤邊疆緊要正賴重臣鎮攝未便  
遽易生手等因是臣犬馬力衰體羸多病早在

聖慈垂憫之中特邊事未平義難力請今則界務已定外  
匪無蹤惟欠餉未清客勇未能盡撤但使各該省應期報

解則按名遣發盡人所能臣本粗才惟知軍旅如察吏安民勸學屯田諸要政舉無所知到任以來幸賴督臣譚鍾麟啟發於前藩司魏光燾舉行於後始得稍免愆尤該藩司久在行間習於兵事歷官內地吏治尤其所長所定科條臣但能畫諾而病軀委頓猶且弗堪每一議行輒經旬月若復遲疑戀棧遺誤必多負

國忘親臣罪滋重再四思維惟有仰懇

天恩俯准開缺

賞假一年回籍省親兼得就醫調理臣受

恩深重具有天良但得到家一視稍慰臣祖母垂暮之思

臣疾醫治稍痊卽當趨叩

闕廷求

賞差使斷不敢稍耽安逸有負

生成臣今年四十有四自度病痊尙可從容效力所謂報

國之日長事親之日短也臣不勝烏烏之私謹恭摺瀝陳

伏乞

皇太后

皇上聖鑒訓示謹

奏

硃批另有旨欽此



軍機大臣字寄光緒十三年三月二十六日奉

上諭劉錦棠奏請開缺賞假一年省親就醫一摺覽奏情詞肫摯殊深廬系現在新疆地方緊要所有屯田遣勇各事宜尙須妥籌經理該撫久膺邊寄辦事認真於新疆一切情形尤爲熟悉朝廷眷顧西陲正資倚畀雖據陳情懇切惟當此時事艱難自應國爾忘家益圖報稱劉錦棠著賞假三月並加恩賞給人蔭八兩在任安心調理毋庸開缺將此諭令知之欽此





調補莎車直隸州知州要缺摺

二月二十八日

奏爲揀員調補新設要缺直隸州知州以重地方恭摺仰  
祈

聖鑒事竊據新疆布政使魏光燾兼按察使銜鎮迪道恩  
綸會詳稱新設莎車直隸州地方東南昆連葉城西北與  
英吉沙爾接壤東北界瑪喇巴什正南爲色勒庫爾城以  
達瓦罕坎巨提各回部地廣丁多商賈輻輳各外部往來  
貿易雜處其間稽查彈壓在在悉關緊要應請定爲衝繁  
難三項要缺該處知州係屬新設應卽揀員請補以重職  
守查南路新設各缺前奉部議准照吉林新章由外揀補

一次在案茲查有知府用准補英吉沙爾同知署莎車直隸州知州劉嘉德現年五十歲安徽潁州府霍邱縣人由附貢生報捐雙月選用縣丞投效甘肅軍營於克復吐魯番案內保免選本班以知縣畱於甘肅儘先補用歷署濟木薩縣丞奇臺縣知縣各篆務嗣在福建茶葉洋藥十三次案內捐加同知升銜新疆五次勦平邊寇案內保免補本班以直隸州知州仍畱原省歸候補班前先補用委署吐魯番同知烏魯木齊歷辦邊防善後案內保俟補缺後以知府用先換頂戴調署英吉沙爾同知新疆六載邊防案內保戴花翎又調署莎車直隸州知州事光緒十二年

三月十九日交卸英吉沙爾同知篆務四月初三日接印  
任事是年六月

奏補英吉沙爾同知奉部覆准在案該司等查該員劉嘉  
德有爲有守辦事實心在新疆年久熟悉邊情歷任地方  
均無貽誤現署斯缺措置咸宜輿情愛戴以之調補莎車  
直隸州知州洵於地方有裨等情詳請具

奏前來臣查該員劉嘉德廉明果決勤慎耐勞合無仰懇  
天恩准以該員調補莎車直隸州知州員缺以裨地方如  
蒙

俞允俟奉部覆卽行給咨併案送部引

見以符例章仍令試俸年滿另請銷去試字再該員各任  
內並無參罰案件合併聲明是否有當謹會同陝甘總督  
臣譚鍾麟恭摺具陳伏乞

皇太后

皇上聖鑒訓示謹

奏

硃批吏部議奏欽此

續查烏垣等處陣亡殉難官紳兵民請 旌卹摺二月二十八日  
奏爲續查烏魯木齊等處陣亡殉難官紳兵民婦女彙懇  
飭部分別從優

旌卹恭摺具奏仰祈

聖鑒事竊查前烏魯木齊都統臣恭鏜四次採訪未

奏陣亡殉難官紳兵民四千二百六員經臣於上年奏請  
飭部從優議卹並聲明已飭司道督同局員再行採訪陸  
續陳奏奉

旨允准欽遵 旨行在案茲疊據採訪局司道詳稱共採訪  
得官紳兵民暨婦女死事慘烈者計一萬九千二百一十

六員名口均屬大節凜然允宜同邀

曠典分次造具花名清冊詳請彙

奏前來臣覆核無異合無仰懇

天恩飭部分別從優

旌卹以彰忠節而慰幽魂除將齋到花名清冊咨送外謹

會同陝甘總督臣譚鍾麟護理烏魯木齊都統臣富勒銘

額恭摺具奏伏乞

皇太后

皇上聖鑒訓示謹

奏

硃批著照所請該部知道片併發欽此



醫藥雜考卷之十一

十一

查明毛運如積勞病故並眷屬殉難情形片

二月二十八日

再烏魯木齊等處殉難官紳兵民婦女現經臣續查彙

奏查內有同知銜前綏來縣知縣毛運如係湖南長沙縣人由附生中式道光甲午科本省鄉試舉人選授甘肅環縣知縣調署靖遠縣知縣嗣調補綏來縣知縣於咸豐十一年八月到任修廢習勤民情愛戴同治元年有匪徒魏大力等聚眾虜掠該故員親率民壯擣其巢穴諭以大義賊眾感悟頓首請罪乃戮渠魁而釋其脅從綏來賴以復安二年逆匪變亂該故員編查保甲督率巡防不遺餘力如是經年患喀血證三年四月十一日病故年五十八歲

其妻黃氏痛夫情切屢絕復蘇六月南城陷乃促其孤子世黼縉城逃出八月賊又將陷北城黃氏及其夫姊黃毛氏幼女新貞孫女東貞雲貞同時仰藥自盡及城陷賊入於時新貞雲貞氣猶未絕因極口罵賊賊斲割之僕婦賀王氏婢女玉全家人黃鈺任福亦同時殉難經綏來縣紳士職員晁明智廩生魏金城等稟由綏來縣知縣李原琳詳經採訪局司道等查明轉懇

奏請

旌卹前來臣覆查無異除該故員及其妻其姊與幼女孫女並僕婢家人姓名業經分別列入續查清冊奏懇

天恩飭部從優議請

旌卹外所有已故同知銜綏來縣知縣毛運如積勞病故  
及其眷屬僕婢家人殉難死事情形謹會同陝甘總督  
譚鍾麟護理烏魯木齊都統臣富勒銘額據實附陳再查  
該故員之子毛世黼現係山西儘先補用通判合併聲明  
伏乞

聖鑒飭部核覆施行謹

奏

硃批覽欽此

皇朝通志卷之八十一

三

西征欠餉逾期未到懇撥庫款摺

三月初五日

奏爲各省關奉撥西征欠餉逾期未到籲懇

天恩飭部墊撥庫款權濟急需恭摺具陳仰祈

聖鑒事竊臣於光緒十二年十二月初四日具

奏部撥閩浙廣東閩海各省關協解西征欠餉頻催罔應  
請

旨嚴催迅解一摺奉

旨戶部速議具奏欽此旋承准軍機大臣字寄光緒十三年正月十八日奉

上諭戶部奏各省關協解西征欠餉請飭嚴催迅解一摺

據稱西征欠餉前經部撥浙江省銀一百八十五萬兩福建省銀三十八萬兩廣東省銀五十六萬兩閩海關銀六萬兩勻分三年解赴甘肅轉解關外迄今已屆一年僅據閩海關解過銀二萬兩其餘各省均絲毫未解殊屬任意延宕貽誤要需現在關外擬改營制需餉情形甚爲迫切該將軍督撫等務當力顧大局將此項銀兩迅速依限籌解倘仍前遲誤卽著該撫指名奏參等因欽此仰見

朝廷眷顧西陲軫恤邊軍之至意臣自當靜候部臣嚴催

各省關報解何敢再三曉瀆惟查臣所部湘軍自平定髮逆以後轉戰出關迄今二十餘年未曾遣撤西征馬隊則

前督臣左宗棠前時勦捻募自直東董軍則同治七年募於陝北其餘各營亦皆非近時所募爲時旣久則欠餉愈多軍務旣清則歸思愈切近年各弁勇紛紛乞假亦時有遣裁然餉項未充祇能擇其存餉較少者遣之其存餉較多之勇雖年力就衰思歸尤切臣亦無由遣之使去前議酌定營制招募新軍改行糧爲坐糧以資節省今老勇不能去則新勇不能招新勇不能招則坐糧不能速改

國家歲糜數百萬新餉養此疲軍已爲非計又況遏其歸志遠或二十餘年愈積愈深勢將有不可復禁者一旦如決隄潰障其爲害豈可勝言上年臣飭由新餉項下極力



騰挪酌量裁併截至十月底止先後裁撤弁勇及額外夫  
共二千二百餘員名此外各營旗兵勇應裁併挑補者尙  
多當經派員入關田甘肅招募新勇三千人分起督帶出  
關以便改照坐糧陸續挑補爲釜底抽薪之計除新募勇  
丁應俟到日照章支給坐糧外所有裁併各營旗弁勇新  
餉按名發訖又補發各該弁勇十年前舊欠銀二十八萬  
六千餘兩內除收到閩海關欠餉銀二萬兩餘均係由新  
餉項下挪移動用明知部臣前此慮啟新虧謂不得挪新  
補舊惟欠餉遲遲不至各弁勇待已逾年非以此少安其  
心則目下已難安靜此次挪移動用出於萬不得已然新

餉支絀亦無可再挪既啟新虧又無以應各弁勇求歸之請數月之後又將奈何竊念各該省經此次

諭旨嚴催之後自當按期報解不似前此稽延惟際此時艱仍恐未能大批趕解且相距太遠非數月之久不能運解到甘由甘轉運新疆又非數月不達展轉之間即須經歲況其遲者又將不止一年是即報解如期亦已緩不濟急日復一日貽誤實多臣再四思維計無所出惟有仰懇天恩飭部墊撥庫款銀一百四十萬兩遴委妥員迅解甘肅轉解新疆俾臣得將應辦各事宜從速料理臣前奏明此項欠餉在勇丁者不能短發在統領營官者尙可提捐

如蒙

聖慈俞允飭部墊撥前項銀兩臣自當開導各該營將弁  
量力捐輸以便截清餘欠各該省奉撥臣軍欠餉卽可先  
儘部款提還餘俟臣所部各軍彙有報捐確數再當據實  
奏明請分別減撥續解如此一轉移間庶部款不至虛懸  
各該省可少畱餘力而臣軍舊勇得歸新餉亦可期節省  
矣臣不勝迫切屏營籲仰之至謹會同陝甘總督臣譚鍾  
麟恭摺瀝陳伏乞

皇太后

皇上聖鑒訓示謹

奏

硃批戶部速議具奏欽此

戶部速議具奏欽此

奏



新疆田賦戶籍遺冊咨部立案摺

三月初五日

奏爲新疆通省田賦戶籍彙造清冊咨部立案恭摺具陳  
仰祈

聖鑒事竊照新疆軍興以來地多荒廢收復之後漸次招墾不特昔年民屯兵屯園租地畝不能悉依舊地卽各屬原管地畝亦有非復舊制者如昌吉縣舊管頭屯所地畝早經撥作迪化兵屯喀喇巴爾噶遜糧員舊管地畝亦歸迪化管轄是事雖因舊不啻更新現在清理田賦只期丈量地畝按地科糧若必牽合舊章轉多窒礙經前陝甘督臣左宗棠暨臣疊次派員清丈迪化昌吉阜康綏來奇臺

吐魯番濟木薩呼圖壁各屬均按上中下地畝分別升科  
上地每畝科糧七升中地四升下地三升照章概不征耗  
其鎮西哈密庫爾喀喇烏蘇精河仍照舊章科則辦理屢  
據各屬清查科算除去兵屯荒熟並計應征糧石均與原  
額相若惟吐魯番科征糧數多於原額科征銀數少於原  
額而銀糧相抵有贏無絀此北路清查田賦情形也南路  
征糧前准部按或有地畝科則或無地數科則並有征收  
銅筋普爾錢一切章程不同且從前分駐大臣經管此時  
改設郡縣劃分疆界情形大非昔比不能不從新釐定前  
督臣左宗棠派員辦理善後征糧各局暫按什一征收嗣

臣查照各局員詳齎畝冊等則酌定試辦繼以輕重間有失平復經酌減各按地方情形上地每畝科糧五升四升不等科草五觔中地每畝科糧三升科草三觔下地每畝科糧一升五合一升不等科草二觔耗草不另加征其折征銅筋金課地畝向章無論是否業銅業金戶民但種額銅額金之地卽須交納銅金於民殊多未便臣現酌定章程委員試辦礦務凡舊日額征銅金地畝一律改征糧石所有銅金各礦聽民開採納課歸官又各城伯克向有養廉地畝自改郡縣伯克多經裁撤廉地歸官招佃承租額糧照則收納其未裁伯克廉地及撥作義學壇廟香火各



官地均科額糧歸入此次田賦案內至額征糧石以小麥  
六成包穀四成交納亦間有搭征稻穀之處其距城二百  
里以外完納本色不便者則准完折色按時估酌定每小  
麥一石折銀一兩包穀一石折銀六錢第倉儲爲兵食所  
關自又以多征本色爲是現定需糧較多之區則全征本  
色或僅折三成或准折五成或量准五成以上惟草束需  
用較少折色較多每百觔折銀五分統於此次一律核定  
作爲永額此南路清查田賦情形也綜計通省南北兩路  
三道屬共查丈各等荒熟地一千一百四十八萬一百九  
十四畝四分五釐共額征本色糧二十七萬六千五十一

石三斗一升四合一勺額征本色草一千四百九十萬二千七百一觔七兩七分額征糧草折色及地課銀五萬九千一百四十八兩四錢一分一釐四毫四絲七忽內現墾熟地每年應征本色糧二十萬三千二十九石二斗三升八合二勺應征本色草一千三百九十五萬八千二百一十六觔一十兩二錢八分應征糧草折色及地課銀五萬七千九百五十二兩一錢六釐二毫一絲七忽其荒地已經招墾者升科之年再列入熟地核算未經開墾者飭令隨時招墾照章科糧以昭核實又糧由戶出田賦既均戶口即可併計現飭造齊戶口清冊涵省漢回纏民及入籍

安民共計二十六萬六千九百五十九戶男女大小一百二十三萬八千五百八十三丁口逐加查核內以北路戶口爲最稀尙須極力招徠撫輯以期生齒日盛額賦日增等情據藩司魏光燾詳請具

奏前來 臣覆查無異除將彙齊田賦戶口各冊咨部查核立案外謹會同陝甘總督 臣譚鍾麟恭摺具奏是否有當伏乞

皇太后

皇上聖鑒訓示再新疆各屬征收銀兩皆於每年秋收後開征並無上忙應征之款以後應辦考核各案應請免造

上忙合併陳明謹

奏

硃批戶部知道欽此



擬設伊塔道府等官摺

三月十二日

奏爲遵照部議擬設伊犁塔城等處道府以下等官恭摺具陳仰祈

聖鑒事竊

臣

錦棠於光緒十二年四月二十一日具

奏請增置伊塔道一員駐劄伊犁兼管塔城事務改伊犁撫民廳爲府改塔城通判爲撫民同知加理事銜兼管屯田水利如蒙

俞允其道府以下等官應如何增設容

臣

等籌度情形詳悉具奏奉

旨所請增改道廳各官係爲因時制宜起見著該部妥議

登皇朝通志卷一百一十二  
具奏等因欽此經部議稱應令將該處道府以下州縣等  
官作何增設詳細情形具奏到日再行一併核議於光緒  
十二年八月十三日覆奏奉

旨依議欽此欽遵知照到臣當經分別咨行去後茲據新  
疆布政使魏光燾兼按察使銜鎮迪道恩綸等詳稱遵查  
伊犁列城有九其西六城曰惠遠曰綏定曰拱宸曰廣仁  
曰瞻德曰塔勒奇舊制將軍參贊駐惠遠城現因舊城頽  
廢重建新城衙署兵房缺然未備暫時駐於綏定將來應  
以惠遠新城作爲滿城仍請將軍移往駐之以倣照內地  
駐防之制其餘各城形勢以綏定爲扼要距廣仁六十里

瞻德四十里塔勒奇十里惟距拱宸城卽霍爾果斯九十  
里爲最遠擬升伊犁廳爲府裁撫民同知設知府一員治  
綏定城設附府知縣一員爲綏定縣以廣仁瞻德拱宸塔  
勒奇四城隸之東三城曰甯遠曰惠甯曰熙春以甯遠爲  
扼要舊制回屯居此設一糧員此時商賈輻輳俄領事亦  
駐於此距惠甯三十里熙春十里擬設甯遠縣知縣一員  
治甯遠城隸伊犁府而以惠甯熙春兩城隸之設伊塔道  
一員以守兼巡爲兵備道督飭所屬水利屯田錢糧刑名  
諸務稽查卡倫兼管通商事宜作爲衝繁疲難請  
旨最要缺駐劄甯遠與知縣同城府道東西分駐綏定向



駐總兵設府縣而其鎮益重甯遠爲俄商聚集領事駐劄之所駐巡道而勢不偏輕且就近經理通商各事尤爲周妥霍爾果斯緊連俄界又有索倫各旗分屯其地距縣城較遠擬裁舊設之巡檢置伊犁府分防通判一員加理事銜駐霍爾果斯管理旗務並中俄交涉及督捕彈壓諸務廣仁城爲伊犁通衢人民龐雜現以惠甯城巡檢移駐彈壓擬卽改爲廣仁城巡檢隸綏定縣越廣仁而東歷頭二三四臺至大河沿交精河界四臺之北一站卽博羅塔拉爲伊塔適中之地察哈爾游牧於此田地亦多西臨俄境形勢亦爲扼要應設雜職一員招民屯墾其地並管理督

捕彈壓諸務開通驛道以聯伊犁塔城之聲氣惟隸之綏定相距較遠查精河向設糧員上年改設巡檢隸庫爾喀喇烏蘇同知管轄該處係伊犁後路衝要西南出登努斯口直達甯遠相距甚近應請設精河直隸廳撫民同知一員隸於伊塔道而以前設之精河巡檢移駐博羅塔拉隸之精河同知則骨節靈通事機亦順此外雜職各官卽擬裁舊設之惠遠城巡檢改設伊犁府經歷兼司獄一員裁綏定城巡檢改設綏定縣典史一員裁甯遠城巡檢改設甯遠縣典史一員並增設伊塔道庫大使一員精河同知照磨兼司獄一員以資分任仍畱舊設伊犁理事同知隨

將軍駐惠遠城辦理旗務塔爾巴哈臺理事通判擬改爲塔城直隸廳撫民同知仍兼理事銜管理民屯旗務及地方一切刑名事件仍設同知照磨兼司獄一員同爲伊塔道屬所有擬設各官應需養廉公費應請悉照新疆現行章程支給仍倣照定章均准加給公費以資辦公並請倣照吉林新章由外揀補一次其自府廳以下應定爲何項缺分及畫定疆界與一切未盡事宜應俟各官到任後察看情形再行核辦至標營員缺應否酌量變通亦應俟道府各官到任後再行核辦會同擬議詳請具奏前來臣等覆核無異惟查伊犁向有旗屯兵屯民屯回

屯塔城向有兵屯民屯現擬改設道府廳縣所有民屯回屯自應由地方官分撥耕種其旗綠各營屯地兵數未能復額已耕之外餘地尙多應併由地方官酌量招民屯墾以免荒廢是否有當除咨部外謹會同署伊犁將軍臣錫綸署塔爾巴哈臺參贊大臣臣春滿合詞具陳伏乞

皇太后

皇上聖鑒飭部核覆施行再此摺係臣錦棠主稿合併聲

明謹

奏

硃批該部議奏欽此



古城城守尉到省日期並會商滿營遷併事宜摺

四月初四日

奏爲新設古城城守尉現已到省擬將滿營遷併事宜會商辦理並請

旨飭頒印信以資啟用恭摺仰祈

聖鑒事竊臣前奏滿營遷併古城應否仍設佐領防禦等官應俟城守尉到任再行會商核辦奉

旨允准欽遵在案現在古城城守尉德勝已於三月十九日抵省臣比照會到任惟古城滿營衙署兵房因匠役缺乏工艱費鉅脩造尙未及半城守尉辦公無所令暫住省垣德勝此次出關值天山雪深難行遠由南路進省於巴

里坤古城旗營一切情形未能查悉各該旗營兵丁亟應切實查明通盤籌畫以便早日酌定旗分營制可裁則裁可併則併庶幾餉不虛糜兵歸實用臣已商令德勝刻日馳赴巴里坤城並由臣加派遇缺題奏道英林會同前往核實點驗並便道察看古城地方工程情形臣仍一面飭催承修委員將衙書兵房趕緊修理俾各旗營得以及早遷移城守尉得以專意統轄現在古城工程既未告竣各處旗營尙難歸併除烏魯木齊滿營事務應由富勒銘額移交德勝接辦外巴里坤相距較遠德勝現駐省城難於兼顧該處領隊大臣應請暫緩交卸俟歸併古城之日再

行

奏請移交至城守尉一缺係屬新設未頒印信臣現刊刻木質關防一顆文曰鎮守古城城守尉之關防暫給啟用應請

飭部鑄造鎮守古城城守尉印一顆頒發應用以昭信守合併陳明所有古城城守尉到省日期並會商辦理各情形謹會同署伊犁將軍臣錫綸陝甘總督臣譚鍾麟恭摺具陳伏乞

皇太后

皇上聖鑒訓示施行謹



奏

硃批著照所請該部知道欽此

軍機大臣字寄光緒十三年四月十一日奉

上諭譚鍾麟奏錫綸患病甚重請飭色楞額速赴新任一摺本日已諭知色楞額於文碩接任後迅速馳赴新任矣該督所奏錫綸病情殊深慮系發去如意黃金散二匣譚鍾麟卽派員齎交錫綸祇領俾資醫治儻錫綸病竟不支伊犁地方不可無人統攝著劉錦棠卽行馳往暫署將軍篆務甘肅新疆巡撫著魏光燾暫行護理劉錦棠素抱公忠務當力疾從事以副倚任將此由五百里各諭令知之欽此



請將譚拔萃附祀片

四月十四日

再臣前奉光緒十一年四月初九日

上諭劉錦棠奏總兵積勞病故請飭從優議卹一摺記名提督甘肅甯夏鎮總兵譚拔萃於咸豐同治年間隨同已故提督劉松山帶兵剿賊轉戰湖南江西安徽河南山東山西直隸陝西甘肅等省嗣經隨同劉錦棠出關疊克各城戰功卓著茲以積勞病故殊堪軫惜加恩著交部照提督軍營立功後在營病故例從優議卹並將生平戰績宣付國史館立傳以彰勞勩欽此仰見

聖慈褒獎成勞之至意臣緬懷袍澤感戴同深惟查譚拔

萃始以武童投效湘軍卽隨同臣叔劉松山轉戰東南以至關隴相從最久立功亦最多可否仰懇

天恩准其附祀原任廣東陸路提督臣劉松山甘肅省城

及湖南省城專祠以妥英魂而昭激勸之處出自

鴻施謹會同陝甘總督臣譚鍾麟附片具

奏伏乞

聖鑒訓示謹

奏

硃批著照所請該部知道欽此

請將王德溥並其母姚氏妻郭氏分別

旌卹片

四月十四日

再臣據已故前署哈密協副將世襲一等子爵王德溥堂弟王惠溥稟稱王德溥係甘肅靖遠縣人前奮威將軍王進寶九世嫡孫由世襲一等子爵歷署督標後營定遠蘆塘等營游擊同治二年委署哈密協副將迎其母就養妻亦隨侍到署三年八月關外逆回倡亂圍攻哈密廳城火彈墜城中如雨王德溥時方臥病急起登陴固守歷七晝夜賊猶未退恐事不可爲乃畱書與諸弟相訣旣而乘間出師擊賊賊敗走城賴以全四年賊復至哈密失陷王德溥力戰陣亡其母姚氏妻郭氏均自焚以殉謹開具事實

並齋呈所寄家書稟懇查核具

奏請

旨旌卹等情臣當照會巴里坤鎮總兵徐占彪並飭前署哈密協副將龍在田前署哈密通判婁紹豫將該副將王德溥死事情形詳細查明去後旋據徐占彪等呈稱遵查同治四年五月二十四日南路大股逆回竄至哈密圍攻廳城王德溥督隊逆戰屢挫賊鋒賊四面縱火至二十六日酉刻南城失陷王德溥振臂大呼提兵巷戰賊至益眾力竭陣亡當城破時其母姚氏妻郭氏以硝磺實篋中皆自焚死先後查覆前來臣覆加查核與王惠溥所稟情節

相符竊維逆回倡亂時哈密孤懸徼外該副將王德溥以  
世受

國恩思圖報稱遂乃慷慨授命閤室自焚至今讀其家書  
忠義之氣猶凜然可見也可否仰懇

天恩俯准飭部將前署哈密協副將世襲一等子爵王德  
溥並其母姚氏妻郭氏分別從優議請

旌卹以慰忠魂而彰節烈出自

逾格鴻慈除咨部外謹會同陝甘總督

臣

譚鍾麟附片具

奏伏乞

聖鑒訓示謹



奏

硃批王德溥並其母姚氏妻郭氏均著分別從優旌卹該部知道欽此

揀員請補葉城縣知縣要缺摺

四月二十七日

奏爲揀員請補要缺知縣以重地方恭摺仰祈

聖鑒事竊據甘肅新疆布政使魏光燾兼按察使銜鎮迪道恩綸會詳稱新疆新設莎車直隸州屬葉城縣知縣所轄幅員寬廣東南兩面戈壁居多人民散處地土亦肥磽不一且南有卡倫爲溫都斯坦商民往來要道稽查彈壓治理匪易應請定爲衝疲難三項要缺該縣係屬新設應卽揀員請補以重職守查南路新設各缺前奉部議准照吉林新章由外揀補一次在案茲查有補缺後在任候補直隸州知州奏畱新疆委用知縣黃袁年四十五歲湖南

長沙府善化縣人由附貢生於同治十二年在湖南援防捐局報捐鹽運司經歷指分廣東加鹽課司提舉升銜並免赴部驗看是年十一月經湖南撫臣驗看給咨十三年五月十四日到省試用奉准部咨註冊前陝甘督臣左宗棠因該員前在軍營效力於克復烏魯木齊等城案內彙保光緒三年九月初五日奉

上諭黃袁著免補本班以知縣仍畱廣東歸候補班前儘先補用欽此六年復奉委赴甘肅偵探軍務於十二月十八日抵湖南原籍便道省親適於七年正月二十一日丁母憂九年四月二十一日服滿呈明咨部起復經臣札調

出關隨營差遣六載邊防案內彙保十年十月初四日奉  
上諭黃袁著俟補缺後以直隸州知州在任候補並賞戴  
花翎欽此是年委辦臣營總理文案事務十一年畱省候  
補八月十七日稟到十二年經臣奏畱新疆差遣委用十  
月二十六日奉

旨著照所請吏部知道欽此欽遵各在案該司等查該員  
黃袁處事安詳才具穩練在新疆當差有年熟習邊情以  
之請補葉城縣知縣實堪勝任人地亦極相宜且與變通  
請補章程相符等情詳請具

奏前來臣查該員黃袁通達政體辦事實心合無仰懇

天恩俯念邊疆員缺緊要准以畱新委用知縣黃袁補授  
葉城縣知縣洵於地方有裨如蒙  
俞允俟奉部覆卽行給咨送部引

見以符例章仍令試署年滿另請銷去試字是否有當謹  
會同陝甘總督臣譚鍾麟恭摺具陳伏乞

皇太后

皇上聖鑒訓示謹

奏

硃批吏部議奏欽此

提督呈請復姓歸宗摺

閏四月初四日

奏爲提督大員呈請復姓歸宗援例具陳仰祈

聖鑒事竊

臣

據總統東四城馬步各軍題奏提督署阿克

蘇鎮總兵董福祥呈稱董字中營正哨長記名提督達桑阿巴圖魯董占富甘肅固原州人本姓王氏因遭回亂全家離散福祥憐其年幼無依養爲義子遂從董姓該員隨營二十年迭著戰功累保今職上年請假進關尋訪親族始悉其父母俱故家無次丁並無期功近支之人請復姓王氏俾承宗祧取具印甘各結代請核辦前來

臣

查光緒

十一年兵部議奏提鎮大員及副參等官或已補實缺或

聖鑒事 公考和 卷一 三  
現在軍營效力如有更名復姓等項均取具印甘各結由  
統兵大臣暨各督撫奏明辦理等因奉

旨依議欽此欽遵咨行在案茲董占富係在營效力提督  
大員呈請復姓與例相符合無仰懇

天恩俯准將該員董占富復姓王氏

飭部註冊出自

鴻施除將印甘各結咨部外謹會同陝甘總督臣譚鍾麟  
合詞恭摺具陳伏乞

皇太后

皇上聖鑒訓示謹

奏

硃批該部議奏欽此





新疆無秋審人犯請

飭核議冊式及截止日期摺

閏四月初

四日

奏爲查明新疆各屬本屆新事秋審並無應辦人犯仍請旨飭部議定冊式及截止日期以便遵循恭摺仰祈

聖鑒事竊

臣

於光緒十三年四月初四日接准刑部咨催

辦理秋審等因查新疆人命案件業經

奏准隨時奏咨聽候部覆應歸秋審人犯免其解省仿照各省舊事秋審之例辦理所有上年十一月起陸續具奏人命案件僅伊犁客民胡風田毆傷陳志士身死一案奉准刑部議覆例得減流令將該犯南北互相調發勻撥

地畝以助屯政等因自應遵照辦理毋庸歸入秋審其餘所奏人命案件均未奉到部覆無從查辦至原任伊犁將軍金順前奏纏民賽斯克毆傷色斯克身死一案已經去歲秋審查辦在案應入本年舊事秋審摘敘案由造冊咨送刑部查辦此外亦無舊事秋審應辦案件再准刑部鈔單內開新疆案件嘉慶元年欽遵

諭旨改繕黃冊又查秋審截止日期各省亦有不同現在改設行省其秋審應用何項冊式及截止日期均應及時議定相應請

旨飭下刑部一併核議示覆以便遵循據鎮迪道兼按察

使銜恩綸詳請具

奏前來

臣

覆查無異所有查明本屆新事秋審並無應辦

人犯仍請

旨飭部核議冊式及截止日期各緣由理合繕摺具陳伏

乞

皇太后

皇上聖鑒施行謹

奏

硃批刑部議奏欽此



伊犁將軍病勢較輕毋庸馳往摺

閏四月十一日

奏爲查明署伊犁將軍

臣

病勢較前輕減

臣

毋庸馳往伊

犁恭摺覆陳仰祈

聖鑒事竊

臣

於閏四月初八日承准軍機大臣字寄光緒

十三年四月十一日奉

上諭譚鍾麟奏錫綸患病甚重請飭色楞額速赴新任一摺本日已諭知色楞額於文碩接任後迅速馳赴新任矣該督所奏錫綸病情殊深慮系發去如意金黃散二匣譚鍾麟卽派員齎交錫綸祇領俾資醫治儻錫綸病竟不支伊犁地方不可無人統攝著劉錦棠卽行馳往暫署將軍

篆務甘肅新疆巡撫著魏光燾暫行護理劉錦棠素抱公忠務當力疾從事以副倚任將此由五百里各諭令知之欽此仰見

朝廷眷顧西陲軫念邊

臣

之至意跪聆之下欽感莫名伏

查錫綸於上年春間額角生癰日久未散前在伊犁相見每指以示臣慮其爲患至冬間潰爛毒氣蔓延下及肩項均生瘡癩痛楚異常本年二月間勢尤沉重疊據總理伊犁營務處提督曹正興等先後呈報與譚鍾麟此次所奏情形相同臣當飭該提督等妥爲延醫用心調護三月二十日接到錫綸來信云已漸次就痊地方幸俱靜謐等

語又據各員弁稟報均稱錫綸肩項間各證皆已平復惟額角一瘡未愈現已能強起辦公並照常接見僚屬昨又有自伊犁來者詢之無異是錫綸病勢實已較前輕減譚鍾麟相距過遠此次所

奏當係據三月以前稟報言之以後情形尙未能周悉也前准譚鍾麟來咨商令道員英林前赴伊犁照料時臣已

奏派該員會同城守尉德勝前往巴里坤點驗旗營冊籍未及令其折轉現在錫綸病勢既已較前輕減且於一應公事均尙照常辦理臣亦毋庸馳往伊犁色楞額未到新任以前遇有伊犁要事臣自當與錫綸和衷商辦以期上



慰

宸廛所有查明署伊犁將軍

臣

病勢較前輕減各情形除

咨會督

臣

查照外理合繕摺由驛馳

奏伏乞

皇太后

皇上聖鑒訓示謹

奏

硃批知道了欽此

請設撫署筆帖式摺

閏四月十三日

奏爲請設新疆撫

臣

衙門筆帖式員缺以資緝譯而符定

制恭摺仰祈

聖鑒事竊照新疆初設行省官制未備所有撫

臣

衙門筆

帖式員缺尙未議設遇有滿蒙文件雖暫委員緝譯究與定制不符茲據新疆布政使魏光燾詳稱查定例各督撫衙門筆帖式由京補用六年期滿各該處註考送部以京缺補用又例載直隸雲南總督衙門筆帖式各一人陝甘四川總督衙門筆帖式各二人山西巡撫衙門筆帖式二人陝西巡撫衙門筆帖式一人各等語新疆地處極邊所

屬土爾扈特和碩特及哈密回部亦時有往來文件繙繹較多擬請倣照山西巡撫衙門筆帖式之例設新疆撫

臣

衙門筆帖式二員掌理繙譯其俸銀照品支給養廉一項查新疆道遠地瘠百物昂貴擬請從優照陝甘總督衙門筆帖式之例每員歲支銀二百五十兩並照甘肅津貼公費章程每員歲給公費銀六百兩以資辦公等情詳請具奏前來

臣

覆核無異合無仰懇

天恩俯念繙譯關重

准予添設新疆撫

臣

衙門筆帖式二員並請

飭下部院核議補放以符定制是否有當謹會同陝甘總

督臣譚鍾麟恭摺具

奏伏乞

皇太后

皇上聖鑒訓示謹

奏

硃批該衙門議奏欽此



蒙部纏回改歸地方官管轄並改鑄關防片

閏四月十三日

再查喀喇沙爾庫爾喀喇烏蘇辦事領隊大臣各員缺前經奉

旨裁撤並准設喀喇沙爾庫爾喀喇烏蘇直隸撫民同知各一員加理事銜管理地方戶籍田賦刑案兼管土爾扈特游牧事宜各在案是土爾扈特等蒙眾向隸辦事領隊管轄者自應改歸地方官管轄第事屬創始誠恐各蒙民未能戶曉遇有交涉事件辦理仍多窒礙相應請

旨飭下理藩院申明新設定制轉行各該蒙部一體遵照以資治理至哈密廳纏回亦經前督

臣

左宗棠援照吐魯

番例奏歸哈密通判兼管一切案件由官審報應請

敕部做照吐魯番同知之例改鑄哈密通判兼管理事回

民事務關防一顆頒發領用以專責成仍由臣督飭各該

地方官遇事秉公辦理俾蒙漢纏同一體相安以仰副

朝廷綏靜邊藩之至意謹會同陝甘總督臣譚鍾麟署伊

犁將軍臣錫綸附片具陳是否有當伏乞

聖鑒訓示謹

奏

硃批該衙門知道欽此

劉襄勤公奏稿卷十三

起光緒十三年五月訖十月

目錄

請頒司道傳 敕摺

請 王命旗牌片

溫宿州烏什廳被水大概情形片

節婦李歐陽氏請 旌摺

新省額設壇廟祠宇祀典請 飭立案摺

拜城縣報被水雹情形片

查明呼圖克圖徒眾無處可徙並籌哈巴河防務摺

請 賞坎巨提頭目翎頂片



11/8/1911

新省添設稅務局試辦情形摺

前烏魯木齊都統銀印及木質關防分別繳銷片

塔爾巴哈臺營勇潰變籌辦大概情形摺

查明潰勇就撫擬籌整頓摺

新屬十二年征收額糧徵信冊遵章印發摺

新疆城署各工告竣請獎摺

催解清南路工程銀兩並籌撥北路工程專款片

籌發欠餉懇請續假摺

查明司庫支絀請立案備撥摺

旗營遷併古城酌擬旗制餉章摺

臆陳戴宏勝戰績請 卹摺

調王久銘赴新疆差遣片

請 卹鄒魯彥等六員片

新疆暫難規復制錢摺

遵 旨籌辦塔爾巴哈臺事務摺

請 旌節婦張楊氏摺

鎮西廳禾稼被災情形片

綏來濟木薩秋禾被災情形片

庫爾喀喇烏蘇廳稻穀被災情形片

新疆提鎮標路員缺營制餉章倣照撫標擬議摺



請頒司道傳 敕摺 五月初九日

奏爲請

旨頒發新省司道傳

敕以資信守恭摺仰祈

聖鑒事竊 臣據新疆布政使魏光燾詳稱定例各省布按二司守巡各道給予傳

敕新疆新設布政使及鎮迪道新加按察使銜並新設阿克蘇道喀什噶爾道均應請頒

敕書以符定制具清冊詳請具

奏前來 臣覆查無異相應請

旨飭下內閣撰給新疆新設布政使鎮迪道新兼按察使  
銜並新設阿克蘇道喀什噶爾道

敕書各一道俾資信守除將清冊分咨查照外謹恭摺具  
陳伏乞

皇太后

皇上聖鑒訓示施行謹

奏

硃批該衙門知道欽此

請 主命旗牌片

五月初九日

再查各直省巡撫衙門例有應領

王命旗牌等件新疆巡撫係屬初設所有應領

王命旗牌尙未奉發相應請

旨敕部照例頒發施行謹附片具陳伏乞

聖鑒訓示謹

奏

硃批該部知道欽此



溫宿州烏什廳被水大概情形片

五月二十二日

再據溫宿直隸州知州陳名鈺稟報該州入夏以來天氣清和至閏四月十三日夜雷雨大作逾時而息十五日未刻復雨勢若傾盆直至十六日戌刻始止該州地本低窪值茲淫雨連綿山水漲溢平地成湖新城衙署營房城垣因積水難消多有坍塌損壞城關內外暨沿河一帶民房橋梁道路並附近村莊禾麥沖塌淹沒亦復不少其距新城二十五里之舊回城東門受水尤急城門民屋均被衝倒經州籌款賑恤並據調署阿克蘇道黃光達署阿克蘇鎮總兵董福祥報同前情正在飭辦聞續據署烏什直隸



廳撫彝同知左宗翰稟稱該廳閏四月十五日大風十六日大雨自子刻迄亥正始止查城鄉房屋暨各處橋梁道路均有傾圮東鄉洋海托克遜西鄉哈喇玉爾滾南鄉伯什克勒木哈哈土魯北鄉哈喇八克等莊地勢較低被水尤甚沖刷麥豆地千餘畝餘亦聞有洗壞經廳酌借籽種飭令趕種秋糧等情前來經臣先後批飭布政司魏光燾移行該管道督同該州再行親赴各處確切查明民房實係坍塌若干地畝實係淹沒若干分別輕重妥爲撫恤並查勘阿克蘇新老城垣門洞衙署營房塌損實有幾處仍分飭所屬各廳縣查明有無水患是否成災會銜由司

彙核詳辦除俟查覆至日應否分別賑濟量爲蠲緩毋令災黎失所另行

奏辦外所有溫宿州烏什廳現報被水大概情形謹附片具陳伏乞

聖鑒訓示謹

奏

硃批知道了著卽飭屬查明被災戶口妥爲撫恤毋任失所餘依議欽此



節婦李歐陽氏請

旌摺

六月初二日

奏爲節婦年例相符籲懇

天恩准予

旌表恭摺仰祈

聖鑒事竊據布政使魏光燾詳據署迪化縣知縣陳希洛等稟稱查有同鄉湖南善化縣節婦李歐陽氏係處士歐陽孝之女已故李樹本之妻現署鎮西廳照磨甘肅候補主簿李裕勳之母年十六歸樹本甫二年樹本從征閩粵間逾歲始一歸視氏奉姑謹家故貧甘旨未嘗缺乏姑沒哀毀盡禮同治元年樹本以勞瘁卒於福建軍次氏時年

二十有七旅櫬歸葬慟不欲生旋念遺孤子四長纔八齡  
幼者猶在抱迺矢志撫孤備嘗辛苦藉紡績以資誦讀而  
於親屬中之貧窶者復以時恤之或脫簪珥以助葬鄉人  
稱道勿置現年五十二歲計守節已二十六年職等或誼  
屬同寅或情關桑梓見聞既確不忍聽其湮沒勿彰造具  
事實冊結稟請

旌表由司轉詳前來臣查定例各直省節孝婦女應  
旌表者由督撫學臣會同具

奏其外省節孝婦女亦准由同鄉官出具冊結公懇奏咨  
歷經遵辦有案茲據詳前情臣覆核無異合無仰懇

恩施俯准

敕部照例

旌表以彰苦節而維風化除將冊結咨部查照外謹會同  
陝甘總督臣譚鍾麟甘肅學政臣秦澍春恭摺具陳伏乞  
皇太后

皇上聖鑒訓示謹

奏

硃批著照所請禮部知道欽此

五ノ目表書ノニテキキノ...

一ノ

新省額設壇廟祠宇祀典請 飭立案摺 六月十日

奏為新省額設

壇廟祠宇祀典請

旨敕部立案以垂久遠恭摺具陳仰祈

聖鑒事竊 臣 據新疆布政使魏光燾詳稱新疆鎮迪各屬

向隸甘肅所有祀典惟

文廟

武廟

文昌廟照例舉行其餘各

壇廟尚多闕而未備哈密一屬祇額設

廟



武廟

文昌廟吐魯番廳亦僅祀

武廟庫爾喀喇烏蘇改設同知則尙未舉行祀典南路各屬承平時額祭

關帝神廟及本境

敕祀山川改置郡縣後祀典亦未概照例章現在初建行省祭祀典禮攸關自應亟爲釐定除各屬舊有祀典不計外其未備處所應卽一律增設以昭誠敬又南路各屬暫雖未定學額而現已廣設義學取備侑生則

文廟亦應及時興建請於新疆通省各廳州縣照例額設

文廟

武廟

文昌廟

社稷壇

神祇壇

先農壇

龍神祠各一所府治及各直隸州直隸廳治並照例各設  
昭忠祠一所此外山川方鎮如迪化阜康之博克達山喀  
喇沙爾之博爾圖達坂阿克蘇之索木爾嶺悉從舊制概  
自光緒十三年爲始一體照章春秋致祭每歲其需祭祀

銀二千三百八十八兩八錢二分四釐詳請具

奏立案並另齎摺請咨前來臣覆核無異相應請

旨飭部立案以重明禋而垂久遠除將齎到細數清摺咨部外謹恭摺具陳伏乞

皇太后

皇上聖鑒訓示謹

奏

硃批該部知道欽此

拜城縣報被水雹情形片

六月十一日

再溫宿烏什兩州廳先後稟報閏四月十五六等日被水大概情形業經臣附片具

奏在案茲據署拜城縣知縣楊廷珍稟稱該縣自閏四月十六日起至二十六日止霪雨連綿山水漲發村莊禾稼暨沿河兩岸民房渠道間有損傷其達坂岐峽河土拉鵝斯堂等莊小麥正秀又被水雹災傷較重經該縣督飭戶民趕修渠道酌量補種秋糧並請員蹈勘等情前來當經臣批飭布政司魏光燾移行調署阿克蘇道黃光達派委委員迅赴該縣會同確切勘明是否成災稟由該道咨司

會銜詳辦除俟詳覆至日查明應否蠲緩並量爲賑濟再由臣彙案

奏明辦理外所有拜城縣現報被水被雹情形謹附片具陳伏乞

聖鑒訓示謹

奏

硃批知道了卽著飭屬確勘被災情形妥爲賑撫毋任失所餘依議欽此

查明呼圖克圖徒眾無處可徙並籌哈巴河防務摺六月初

四日

奏爲遵

旨查明棍噶札拉參呼圖克圖所領徒眾新疆實無餘處  
可資遷徙擬請仍在舊地居住並擬籌哈巴河一帶防務  
恭摺具陳仰祈

聖鑒事竊臣承准軍機大臣字寄光緒十三年三月二十  
四日奉

上諭棍噶札拉參呼圖克圖於上年到京瞻覲後曾據劉  
秉璋等奏請調赴西藏經總理各國事務衙門議覆請旨

當以棍噶札拉參於開導番眾議辦通商等事恐不相宜  
未經准行惟該呼圖克圖曾在塔爾巴哈臺帶兵剿賊於  
西北邊情自較熟習前在四川省城丁寶楨與之接見稱  
其胸襟闊大深明大義奏請畱備任使該呼圖克圖才略  
短長早在朝廷洞鑒之中必須安置得宜亦可儲以待用  
所領徒眾應如何收回安插前經諭令錫綸等詳晰定議  
迄今日久未據覆奏殊屬延緩著劉錦棠會同錫綸妥爲  
籌商於新疆所屬擇一距俄境較遠可以安插之地迅速  
奏明請旨辦理將此由五百里各諭令知之欽此仰見  
聖謨廣運塵念邊陲之至意當卽欽遵恭錄咨商去後適

准錫綸咨到遵議覆奏各摺片於西北情形言之詳盡臣  
愚實無以易之查棍噶札拉麥前在塔爾巴哈臺帶兵剿  
賊著有成勞此時籌度邊防自應妥籌安插惟新疆北路  
伊犁塔城距俄既近而其餘廳縣又已

奏明安插戶口興修屯務實無餘地可以安插此項僧眾  
南路向係纏民居處經教不同其勢亦難置議必欲安插  
此項僧眾自仍以蒙古諸部落爲宜而蒙古諸部落中又  
無一距俄較遠之地是與其勞費他移莫若仍居舊地且  
該處距俄雖近而人民既眾彼族亦無從生心使一旦徙  
之以行勢必爲俄屬哈薩克占踞其地如錫綸所奏烏梁



海部屬人口無多又戀寒畏熱不樂居山南之地使不能保有此土又將若何是一議遷移不獨費鉅人勞爲多窒礙也從前界務未定棍噶札拉參曾與俄人有忿爭之事今則時越數年界務亦已大定卽令還其故居亦可相安無事如慮該呼圖克圖無所管轄恐復滋生事端擬請以該呼圖克圖就近歸塔爾巴哈臺參贊大臣管轄令於無事時但率其徒眾誦經不得干預公事庶僧俗相安而與俄人亦無從生釁矣至哈巴河達承化寺一帶地方在塔城迤東布倫托海迤北阿爾泰山在其東北緊接俄國七河斜米兩省爲中俄出入要衝其南又有捷徑直通迪化

府屬之古城奇臺綏來等處長庚前奏謂一旦有事俄人由布倫托海南下古城則伊犁烏魯木齊隔絕在西新疆全局皆震是布倫托海據古城之上游地勢已爲扼要況哈巴河一帶又在布倫托海西北其爲扼要尤屬顯然光緒八年俄人駐兵其地意圖侵佔經升任參贊大臣清安等奏明有案查該處向歸科布多管轄同治年間塔城遭回逆變亂棍噶札拉參率其徒眾與柯勒依十二鄂拓克人眾借居其地耕種營生當時籌辦安插事宜曾經升任烏里雅蘇臺將軍臣額勒和布等先後議奏請就近歸塔爾巴哈臺參贊管轄並稱布倫托海雖係科布多屬然去

科西南十六臺去塔九臺等語是布倫托海去科已遠況  
哈巴河又在其西去科尤爲寫遠中間重岡疊嶺山徑崎  
嶇冬苦雪封夏又無水雖承化寺地在布倫托海東北距  
科稍近然中隔大山仍須繞由布倫托海行走是哈巴河  
至承化寺一帶地段歸科則道里隔絕隸塔則聲息相通  
哈巴河之於塔城猶門戶之於堂奧非防塔城新疆北路  
無屏蔽非防哈巴河一帶塔城東北無憑依也夫隸塔隸  
科同爲

聖朝疆土苟非關係新疆全局臣亦何容置詞特以該處  
卽爲險要所在隸科不過少資游牧蒙哈之獲利無多隸

塔卽可自固藩籬形勢之所關甚大臣與錫綸春滿等往復函商意見相合擬請將原借地段劃歸塔爾巴哈臺管轄以資防守如蒙

俞允其一切建置事宜容臣等另案

奏明辦理臣爲慎重邊防起見是否有當謹會同陝甘總

督臣譚鍾麟署伊犁將軍臣錫綸署塔爾巴哈臺參贊大

臣臣春滿恭摺具陳伏乞

皇太后

皇上聖鑒訓示施行再此案因往返籌商是以覆奏稍遲合併聲明謹

奏

硃批另有旨欽此

軍機大臣字寄光緒十三年七月二十六日奉

上諭劉錦棠奏棍噶札拉參所領徒眾擬請仍在舊地居住並籌哈巴河防務一摺覽奏均悉前因沙克都林札布等奏烏梁海蒙哈官兵偪令承化寺僧眾趕緊移挪情形急迫當於五月二十二日諭令劉錦棠錫綸迅速籌覆奏此次該撫所奏尙係議覆三月間諭旨未經奉到續諭之件所稱烏梁海部屬人口無多戀寒畏熱不樂居山南之地等語與沙克都林札布等前奏該部落急盼還歸各節大相徑庭此事頗有關係必須得一實在情形著劉錦棠錫綸懍遵前旨確切查明迅速籌議一面咨商沙克都林札

布等秉公酌度務須籌一妥善辦法奏明請旨毋得各存成見以致輾轉稽延迄無定議至所奏哈巴河以達承化寺一帶地方擬請劃歸塔爾巴哈臺管轄等語俟覆奏到日再行酌定降旨將此由五百里各諭令知之欽此

請 賞坎巨提頭目翎頂片

六月二十四日

再 臣 准署烏魯木齊提督 臣 譚上連會同喀什噶爾道員黃光達文稱色勒庫爾之南回部坎巨提頭目賽必得哎里罕專差解貢來喀以該頭目初充部長人心恐有未孚請派弁赴查以安民心當經揀派布魯特回目庫爾班前往該部傳示並察看情形去後據庫爾班回稱該處民情安靜惟頭目自以未有職銜不足以孚眾望並由該部頭目稟同前情呈請核示前來 臣 查該部落當回疆變亂之時頭目額則項以蕞爾微區不甘從逆憑險自守巋然獨存南疆克復以來旋即遣人進貢沙金詞意懇摯實屬深



明大義當經臣咨由前大學士陝甘總督臣左宗棠奏明  
有案現查該回部頻年貢獻殫竭悃忱遇各外部偶有不  
靖隨卽專差稟報此次該頭目初領部眾又復稟請查看  
洵屬恭順可嘉合無仰懇

天恩俯准賞給該頭目花翎四品頂戴以示懷柔而昭激  
勸臣爲撫綏外部起見是否有當謹據情附奏伏乞

聖鑒訓示謹

奏

硃批著照所請該部知道欽此

新省添設稅務局試辦情形摺

七月初三日

奏爲新疆省城添設稅務總分各局謹將試辦情形據實陳明恭摺仰祈

聖鑒事竊維新疆防營歲餉向賴各省關協濟而設省以來地方應辦事宜需用浩繁每歲就地籌款所入無多不敷尙鉅前准部咨議籌封儲之款此時雖未遑計及而每歲不敷旣鉅仍不能不就地力籌期其少有裨益臣前於光緒十一年委員於哈密古城兩處設局抽收百貨入稅又委員於南路各城會同地方官查明出產貨物酌令照章收納稅課曾於籌辦開源節流二十四條案內將試辦

情形

奏明在案兩年以來哈密古城兩局每歲收銀二萬餘兩南路各城土產貨稅亦屬寥寥推原其故實緣地方遼闊奸商繞越偷漏在所不免卽如哈密一局專收東路貨稅古城一局專收北路貨稅而西南兩路出入貨稅獨未開辦無論稽查難周亦不足以昭平允現在省城商賈漸集自應照章抽收貨稅以歸一律臣當飭在省城設立稅務總局委員試辦兼以稽核哈密古城各局報銷事宜並於西路之綏來縣南路之吐魯番廳各設分局抽收西路貨稅兼事稽查以免偷漏庶於通省稅務可期漸有起色抑

臣更有請者新疆開辦土稅以來俄國商民藉有暫不納稅之條一切土貨牲畜任意販買每有俄商入境勾引中國商民百計譁張肆行包庇或將原領舊票賣於商民或引商民車輛同行希圖蒙混一經分局查明照章收稅俄商卽稱不守條約捏報俄官紛紛照會查辦其爲洋貨猶可甚至土貨亦然其爲真正俄商猶可甚至久在新疆居住之安集延哈薩克亦然眞僞混淆巧詐百出所由銷貨多而收稅少也查中俄改定條約准俄民在關外天山南北各城貿易暫不納稅俟將來商務暢旺由兩國議定稅則卽將免稅之例廢棄等語屈指訂約已屆七年俄商之

運貨出入者喀什噶爾道屬每年估計成本銀約百二十萬兩阿克蘇道屬亦不下二十餘萬兩其由伊塔入中者尙不在此數新疆地方瘠苦銷貨無多似此卽爲暢旺若不乘此議定俄商稅則一律抽收竊恐俄商日逞其黷僇之心而小民之生計因之日削是不獨包攬土稅爲可慮也且一經明定稅則彼此遵行弊竇卽除爭端亦泯尤足以安邊息事實於地方有益如蒙

俞允相應請

旨飭下總理各國事務衙門照會俄國駐京公使議定稅則分飭遵辦庶商民無所藉口而稅課亦昭平允矣據藩

司魏光燾詳請奏咨前來臣覆查無異當飭該司等先將土稅妥爲籌辦總期於公家有益而下亦不致病民除一應開支局費章程與開辦洋稅設立邊關各程式俟奉到俞旨再行詳奏外所有新疆設立稅務總分各局暨擬請議辦洋稅各緣由謹會同陝甘總督臣譚鍾麟恭摺具陳伏乞

皇太后

皇上聖鑒訓示施行謹奏

硃批該衙門知道欽此



前烏魯木齊都統銀印及木質關防分別繳銷片

七月初三日

再臣准前護烏魯木齊都統臣富勒銘額咨稱光緒十三

年六月初八日由驛具

奏交卸護任日期業經鈔稿咨明在案茲將原接光字十

二號烏魯木齊都統銀印及領隊大臣木質關防各一顆

一併封固派員齎送咨請代繳等因前來除將收到銀印

一顆派弁齎繳禮部查銷並將木質關防由臣銷燬外理

合附片具陳伏乞

聖鑒謹

奏



身事... 才... 一... 二...

殊批禮部知道欽此

天

塔爾巴哈臺營勇潰變籌辦大概情形摺七月初七日

奏爲塔爾巴哈臺步隊三營勇丁潰變戕害營官謹先將籌辦大概情形恭摺馳陳仰祈

聖鑒事竊臣於本月初二日夜子刻據管帶綏靖前營馬隊營官李兆祥稟稱綏靖中左右三營步隊勇丁於六月二十七日夜同時潰變戕斃中營營官陳明德卑營駐紮南湖距該營一百六十餘里據領餉勇丁回營稟報該勇丁於路又聞得左右兩營營官同被殺害合先飛報等情查統領庫精等營總兵戴宏勝於前月病故後經臣檄委提督湯彥和接統其軍當經附

奏陳明在案該提督因在省城料理經手事務尙未起身  
臣聞報之下卽飭該提督星夜趲程馳赴西湖防所調集  
所部各營迅爲准備並加派老湘步隊二旗壽字馬隊一  
旗續往西湖統歸調遣正核辦間復准署塔爾巴哈臺參  
贊大臣春滿函開六月二十七日夜二更時分突有綏靖  
中營勇丁糾合滋鬧殺斃營官陳明德煽動左右兩營同  
時潰變逼近行臺施放槍礮損壞大門官廳值領隊圖瓦  
強阿率領索倫營官兵聞變前來接應出署同往地戶扼  
要駐紮請速派隊伍協同兜剿以防西竄等因 臣查塔爾  
巴哈臺轄境東北通科布多東南通古城奇臺阜康濟木

薩等處皆經由布倫托海西南通伊犁大路經由西湖又  
有小路通綏來等處道路紛歧在在皆宜防守而西北沿  
邊一帶近與俄鄰防守尤關緊要現在西湖等處防營齊  
集當可無虞竄越臣復由省城附近抽調馬隊數旗飭赴  
古城一帶會同蜀軍馬隊不時偵探若該潰勇竄向布倫  
托海卽由古城前進一面飛咨科布多參贊大臣預爲防  
範以免疏虞惟西北沿邊一帶該處防營不敷分布若徑  
由西湖進隊恐偪其奔竄入俄臣比飛咨署伊犁將軍臣  
錫綸速派統領一員督帶隊伍取道博羅塔拉徑抵綏靖  
城以遏其西竄入俄之路仍飭湯彥和約定日期由西湖

進隊併力擒剿以期計出萬全此起潰勇皆久役思歸之眾如能悔罪乞撫除應查明首要各犯懲辦外其餘人眾相應仰懇

天恩准其收撫以廣

皇仁而示區別署塔爾巴哈臺參贊大臣春滿平素馭軍尙稱廉謹此次變起倉猝臣相距較遠尙未能盡知其詳除俟辦理就緒並委員查明詳細情形再行據實陳

奏外理合先將塔爾巴哈臺勇營潰變現在籌辦大概情形謹會同署伊犁將軍臣錫綸陝甘總督臣譚鍾麟恭摺馳

奏伏乞

皇太后

皇上聖鑒訓示謹

奏

硃批另有旨欽此

皇朝通志卷之三十三

三十三

軍機大臣字寄光緒十三年八月初二日奉

上諭劉錦棠奏塔爾巴哈臺勇丁潰變籌辦大概情形一摺據稱本年六月二十七日夜間綏靖中左右三營步隊勇丁潰變戕斃營官陳明德偪近春滿行臺施放槍礮損壞大門官廳經劉錦棠飭提督湯彥和馳赴西湖防所並調派各旗營防範偵探一面飛咨錫綸速派隊伍遏其竄路仍飭湯彥和約期進剿等語此起勇丁究竟因何潰變春滿駐紮該城何以毫無布置任其煽亂著卽查明起衅緣由迅速具奏現在該潰勇有無竄越情形該處西連俄境恐其鋌而走險著錫綸速派得力將弁取道博羅搭拉



徑抵綏靖防其奔竄並著劉錦棠會同該大臣等督飭派出各營並力兜剿務將首要各犯嚴拏懲辦其餘人眾應剿應撫卽著妥籌辦理毋任日久蔓延是爲至要將此由六百里各諭令知之欽此

查明潰勇就撫擬籌整頓摺

七月十一日

奏爲查明塔爾巴哈臺潰勇已均就撫仍擬籌整頓以重邊防恭摺馳陳仰祈

聖鑒事竊臣前據管帶綏靖前營馬隊營官李兆祥稟稱綏靖步隊三營勇丁戕殺營官同時潰變等情當飭統領庫精等營提督湯彥和馳赴西湖防所調集所部各營相機防剿並飛飭馬步各營旗嚴防要隘於本月初七日由驛六百里專摺

奏明在案旋據塔城營務處副將陳榮光李正榮申稱潰勇於六月二十七日夜戕殺中營營官陳明德右營營官

劉春發次日日卽各自回營隨於二十九日收撫等語臣因所言未能詳晰其投遞日期亦遲延特甚又未接准春滿來函恐有未確仍飭沿途各防營飛速偵探去後茲於初九日酉刻准署塔爾巴哈臺參贊大臣春滿咨稱二十七日夜勇丁猝變戕殺營官其時索倫額魯特蒙古各營兵丁多派往屯工收穫存營無多猝難調集當飭統領副將陳榮光馳赴南湖號召兩營馬隊自帶差官人等駐紮三十里堡催調十蘇木蒙古官兵分防要隘二十八日派署通判劉鳳翔署城守營都司常畏前赴該營先行安撫並出示剴切曉諭七月初一日復親爲開導遂各帖然並未

擾害居民市肆亦均安堵現在督飭馬隊各營嚴加防範並飭陳榮光密爲查辦等因又據署塔爾巴哈臺通判劉鳳翔稟稱卑廳衙署距綏靖中營最近二十七日夜該營猝變被掠一空幸與家丁緊護關防未曾遺失因思附近街市半寓俄商又無城垣衛蔽儻有遺失所損必多至二十八日黎明查悉街市尚未焚掠當與都司常畏商議稟明參贊往各該營招撫各頭目始猶不信經卑職等再三開導始令常畏畱營於初一日隨同就撫現查戶民均無傷損惟逃避山內者甚多已諭令各歸復業稟報前來臣查塔爾巴哈臺地處極邊防守最關緊要此次各該營潰

變雖旋經收撫而積習已深其勢決不可用若聽其遷就了事誠恐爲患滋多該處選鋒五營向皆散處屯牧所恃以資防守惟綏靖馬步五營此次步隊三營旣經潰變而其餘兩營馬隊又皆遠駐南湖相去百數十里民心惶惑卽此可知除咨春滿仍嚴拏首要各犯務獲究辦以示懲儆外當飭提督湯彥和仍酌帶隊伍由西湖前進約距額牧勒河五六十里地方擇要駐紮以資鎮攝俟該提督到後察看情形再咨商春滿將此起就撫人眾一律妥籌遣撤庶積患可消而邊防可期整頓矣至此次起釁根由應俟臣確切查明另案

奏明辦理是否有當謹會同陝甘總督臣譚鍾麟恭摺馳  
奏伏乞

皇太后

皇上聖鑒訓示謹

奏

硃批另有旨欽此



軍機大臣字寄光緒十三年八月初六日奉

上諭前據劉錦棠奏塔爾巴哈臺勇丁潰變籌辦大概情形當經諭令該大臣等督飭各營併力兜剿茲復據錫綸奏塔城營勇潰變派隊馳往剿撫劉錦棠奏潰勇就撫仍籌整頓各一摺覽奏均悉此項勇丁聚眾譁潰雖據稱開導歸營尚未別滋擾害惟該三營同時煽亂並膽敢戕斃營官其平時積習甚深目無法紀已可概見倘不認真究辦何以肅軍令而重邊防卽著該大臣等懷遵前旨務將首要各犯嚴拏懲辦並將起衅緣由確切查明據實具奏毋得遷就了事其各營就撫人眾應如何一律遣撤著劉



欽定大清會典事例  
卷一百三十三  
三  
錦棠等於事竣後察看情形妥籌辦理將此由六百里各  
諭令知之欽此

新屬十二年徵收額糧徵信冊遵章印發摺

七月二十日

奏爲新疆各屬光緒十二年徵收額糧及催徵帶徵糧石各徵信冊遵照新章刷印散發恭摺具陳仰祈

聖鑒事竊臣前准部咨釐剔官吏經徵錢糧積弊並請行錢糧民欠徵信冊各摺片欽奉

諭旨行令欽遵辦理等因當經轉行遵照去後茲據藩司魏光燾詳稱新疆徵收向止額糧一項並無地丁銀兩各款歷係每年秋後開徵十二月截數本年正月飭屬照依部限將十二年經徵錢糧及催徵帶徵歷年民欠並緩徵糧石造具徵信底冊刷印分發嗣據各屬陸續申覆除鎮

迪道屬哈密庫爾喀喇烏蘇兩廳綏來縣精河巡檢及阿克蘇喀什噶爾兩道屬各廳州縣經徵十二年已墾熟地及催徵帶徵各年民欠並奇臺縣十二年額徵迪化縣十二年額徵十一年緩徵均於十二年下忙截數之前一律全完吐魯番廳除因災蠲緩係十三年二月奉到

諭旨允准應歸下屆辦理餘亦掃數全完均毋庸造具徵信冊外其餘鎮西廳昌吉阜康兩縣濟木薩縣丞呼圖壁巡檢五屬經徵十二年並催徵帶徵糧石均有未完迪化奇臺兩縣催徵九十一年民欠亦有未完據各該屬造具徵信冊底本齎司發交經歷司雇募工匠刊刻活字

印板首列部擬清釐民欠章程十條次列各項民欠數目  
一律擺印並委庫大使會同校對計刊印鎮西廳徵收十  
二年未完催徵節年民欠冊各四十本濟木縣丞徵收十  
二年未完催徵節年民欠冊各三十本昌吉阜康兩縣呼  
圖壁巡檢徵收十二年未完催徵節年民欠及帶徵十一  
年災緩冊各三十本迪化奇臺兩縣催徵節年民欠冊各  
四十本註明葉數鈐用司印內迪化府屬各縣縣丞巡檢  
徵信冊遵限於六月內發交鎮迪道一半發交迪化府一  
半鎮西廳冊則全發鎮迪道分別轉發各屬紳民散給各  
鄉民公同查閱俾令周知附齎各冊詳請

奏咨前來 臣覆查無異除將各冊咨部外所有新疆各屬  
光緒十二年徵收額糧及催徵帶徵糧石徵信冊遵章刷  
印散發緣由理合會同陝甘總督 臣譚鍾麟恭摺具陳伏  
乞

皇太后

皇上聖鑒訓示謹

奏

硃批戶部知道欽此

新疆城署各工告竣請

獎摺

七月二十六日

奏爲新疆城署各工次第告竣撫

臣

藩司均已遷入新署

擬將在事出力文武員弁遵照部章懇

恩俯准擇尤彙獎以示鼓勵恭摺仰祈

聖鑒事竊

臣

前因南疆新置郡縣城署等工勢不容緩奏

請興修城工十三起衙署十五起仰蒙

天恩准撥的款得以次第興修惟各省關未能如期報解  
不得不設法騰挪以期蒞事嗣因北路迪化新建省城城  
垣衙署尤應及時修理古城哈密吐魯番綏來各城悉屬  
扼要均經先後奏明興修在案茲據糧臺司道詳報南路

除疏附拜城于闐葉城四縣城尙待緩辦外其喀喇沙爾阿克蘇和闐庫車烏什瑪喇巴什喀什噶爾英吉沙爾葉爾羌九城北路古城哈密吐魯番綏來四城均經次第完工省城亦刻期告竣南路應修衙署十五起已修十三起撫藩衙署俱已落成 臣於本年六月十三日移入巡撫衙署藩司亦於上年十月間遷入新署新疆初設行省城垣爲屏蔽所關官廨亦體制攸繫規模麤具堪以仰慰

宸廑惟前項土工專資勇力原爲樽節經費體恤民艱起見 臣前奏事竣後懇

恩獎勵經部議准按照軍務省分勸捐督修紳董保獎章

232-4  
3A  
程擇尤獎敘奉

旨依議欽此欽遵咨行在案各防營員弁勇丁感激思奮或監程督隊或掘塹築壩以工兼防均能黽勉從公不辭勞瘁現在綜計南北兩路已用營工三百數十萬南路纏回生齒漸繁傭值稍賤北路人煙稀少民間小工日需銀二三錢不等此項營勇幫工通盤從減估計約可節省銀五十餘萬兩而頻年河渠等工奚啻倍蓰多係營勇之力尚不在此數內至於審擇要隘布置程式籌採物料協濟工賑諸要務創制之初並無成法罔不悉心籌畫俾臻妥善則地方臺局文武員弁之力居多不無微勞足錄現值



次第完竣所有在事出力人等合無仰懇

天恩俯准擇尤照章保獎以勵勤勞而昭激勸如蒙

俞允俟奉

旨後由臣開單彙案

奏保不敢稍涉浮濫除飭取銷冊分起咨部外謹會同陝  
甘總督臣譚鍾麟恭摺具陳伏乞

皇太后

皇上聖鑒訓示謹

奏

硃批著准其擇尤酌保毋許冒濫欽此

催解清南路工程銀兩並籌撥北路工程專款片七月二十六日  
 再臣奏修南路各工原請撥款三十七萬四千餘兩初次  
 部撥西征欠餉銀十八萬兩限十年五月以前解到二次  
 部撥胡光墉侵取行用補水銀十萬六千七百八十四兩  
 限十年閏五月以前解到又撥烏魯木齊軍餉銀八萬兩  
 自十年四月起至十二月底止改解甘肅糧臺以濟要工  
臣以部中指撥的款自屬可靠是以權於軍餉騰挪待款  
 彌補分飭一律動工於十年奏明有案乃截至上年十一  
 月底僅准各省關報解銀一十七萬六千七百八十四兩  
 其山東省原撥銀二萬兩僅報解銀一萬江西撥銀三萬

兩湖北撥銀四萬兩湖南撥銀四萬兩四川撥銀五萬兩河南撥銀二萬兩則全未報解尙共欠解銀一十九萬兩臣前咨由戶部轉催各該省督撫嚴飭藩司無論如何爲難卽將欠解前項工程銀兩迅速照數解清毋任延欠致誤要需等因現又截至本年七月止屈指已逾九月仍絲毫未據報解任催罔應幾成畫餅加以北路城署各工需款又在一十九萬四千兩以外旣藉營勇之力以資節省又虧營勇之餉無款籌還現值改支坐糧之時蒙恩飭撥欠餉一百萬兩俾資清理而此項工程墊款尙虛懸無著勢難復緩焦急徒深合無仰懇

天恩俯准飭催各該省督撫將欠解南路工程銀一十九萬兩限本年十月以前趕緊如數解清毋再延欠至北路工程並無專款前准戶部咨查無憑聲覆所有前項動用銀一十九萬四千九百餘兩究應如何籌撥清款之處並乞

飭部核議示遵出自

鴻施臣不勝迫切惶悚之至謹會同陝甘總督臣譚鍾麟附片具奏伏乞

聖鑒訓示謹

奏

卷之三十三

株批戶部議奏欽此

籌發欠餉懇請續假摺 八月初一日

奏為遵

旨清釐 軍欠餉辦理已有端緒仍懇

天恩續假兩月以資調理恭摺仰祈

聖鑒事竊 臣前因部撥各省關欠解西征協餉二百八十

餘萬屢催罔應奏請

飭撥部款一百四十萬兩以濟急需旋承准軍機大臣字

寄光緒十三年四月初八日奉

上諭現據戶部於省關應行解部款內指撥銀一百萬兩

著該將軍督撫監督迅速籌撥務於五月底如數解至甘

肅轉解劉錦棠應用譚鍾麟劉錦棠於此項撥款解到後  
務當從速料理儘此一百萬兩清釐該軍欠餉等因欽此  
當卽欽遵恭錄咨行去後伏查臣軍舊欠旣多而新虧亦  
復不少上年裁併湘軍挪用新餉二十八萬餘兩目下本  
難歸款而新餉需用孔急仍應由此項下如數撥還此外  
南路城署各工前經部撥專款報解未能及半而工役勢  
難中止挪用新餉十餘萬兩北路城署各工接續興辦又  
挪用十餘萬兩均經臣另案具  
奏合之十一十二兩年各省欠解三十餘萬兩又共欠新  
餉七十餘萬兩此時旣議遣裁則不但舊欠宜清並新虧

亦應補發而各省所欠新餉部議許其帶解者遠或期以五年墊發城署各工亦猝難歸款若不通融辦理窒礙實多因飭各營先儘老弱疲廢及入營最久者酌量裁遣餘悉妥爲開導仍使畱營約以十成畱六去四卽以畱者之舊欠彌補去者之新虧而畱者之舊欠新虧概從緩發然又恐其不得現銀易生缺望其有欲寄家用者亦准於存餉內酌發三四成以示體恤餘卽存記俟城工專款及各省所欠新餉撥解到日再行補發此籌發欠餉之大概情形也附省各營因應調築城尙未畢事當飭南路各營及北路之巴里坤營先行辦起原擬南路各營遣撤過省後



城工亦可告竣即便接續辦理現因塔爾巴哈臺勇丁滋事各該營隊伍又多調赴古城西湖及塔爾巴哈臺等處須稍遲調回方可一律裁改督臣譚鍾麟現已解到銀七十萬兩餘三十萬兩亦准緘稱隨後即當齊解此項撥款計除扣還新餉二十八萬餘兩外以清舊欠實有不敷容臣與譚鍾麟安速籌商再會同

奏明辦理惟臣前因患病日久奏請開缺於本年閏四月初三日欽奉

諭旨優給假期並

頒珍藥令在任安心調理撫躬循省感悚彌深當即趕緊

延醫調治旋奉清釐欠餉之

命因一面延醫一面力疾視事仍未敢稍耽安逸原期假滿卽可照常辦公無如病勢旣深非急切所能求效痰凝胸膈觸寒卽增夏間喘嗽略平又復病泄日數十起夜不成眠寒熱往來不思飲食腳氣亦時時掣發現在假期已滿而醫治未痊屢欲強自支持急求銷假而日俟一日仍苦不支腹疾雖平而疲倦特甚危坐略久卽頭暈目昏言語稍多卽汗出如瀦自維薄弱焦急徒深而各營遣發未竣又未敢遽申前請惟有籲懇

天恩再

賞假兩月俾得更醫調理其清釐欠餉改發坐糧各事宜  
臣不敢因臥病致有稽延仍當會同督臣從速料理以仰

副

朝廷綏靖邊疆之至意所有籌發欠餉及懇請續假各緣  
由謹恭摺具陳伏乞

皇太后

皇上聖鑒訓示謹

奏

硃批著再賞假兩箇月安心調理欽此

查明司庫支絀請立案備撥摺

八月初一日

奏爲查明司庫支款不敷甚鉅懇請

飭部立案備撥以便報銷恭摺仰祈

聖鑒事竊照錢糧出入各有常經惟新疆甫建行省一切

征收額款初無定則卽支發各項亦因官制營制次第議

設尙無定程藩司魏光燾到任後臣飭逐漸清理兩年以

來猶有端倪茲據詳稱新疆地方瘠苦入款無多文武一

切支款就地取資不敷甚鉅查通省田賦已墾熟地歲征

本色糧二十萬三千二十餘石本色草一千三百九十五

萬八千二百餘斤糧以上下兩色合計並本色草束約抵

銀十餘萬兩糧草折色銀五萬四千餘兩地課銀三千六百餘兩此外雜稅如磨課房租稅契牲稅等項並無定額每歲約征銀三萬六七千兩南路試辦土產貨稅及哈密古城設局抽收百貨稅每歲亦約三萬兩之譜通計歲入銀不過三十萬上下然本色糧草必須各營領用始可陸續扣價多寡尙難預定是歲入的款只一十二萬三千餘兩此司庫入款大略也每歲支款應需文職養廉銀五萬六千六百兩公費銀一萬七千九百二十兩加增公費銀一萬一千七百八十兩俸銀三千三百八十餘兩書役工食銀七萬六千五百一十餘兩驛站夫馬工料銀一十萬

五千一百九十餘兩均係奉准部覆應支額款又歲需祭祀銀二千三百八十餘兩通共歲需銀二十七萬三千七百六十餘兩零星雜支尙不在內烏魯木齊提標協路各營除兵餉現照土勇章程由糧臺支發外應需各官養廉俸薪等項照章折實銀二萬五千八百七十餘兩巴里坤鎮標協路各營應需官兵俸餉各項銀四萬五千八百三十餘兩又提鎮各標歲需公費銀二千九百七十餘兩通共歲需銀七萬四千六百七十餘兩零星雜支亦不在內其滿營遷併古城餉章尙未奏定估計亦約在六萬五千餘兩綜計歲需文武各款銀四十一萬三千四百三十餘

兩此司庫出款大略也以入抵出計不敷銀二十九萬四  
百三十餘兩除烏魯木齊提標現經改設撫標巴里坤鎮  
標暨喀什噶爾阿克蘇各防營亦須照依新章辦理滿營  
移併後餉章亦必酌定應需廉俸兵餉均應統入軍餉估  
調不計外實在文職廉俸驛站各項歲需銀二十七萬三  
千七百六十餘兩以入抵支仍不敷銀一十五萬兩有奇  
本色糧草既須各營領扣始有定數而新疆地方遼闊各  
城相距甚遠斷不能概行變賣致倉廩空虛緩急莫恃是  
有額之款祇折徵糧草地課兩項銀五萬七千餘兩其餘  
稅課增減無常而文職廉俸驛站各款雖原議於地糧項

下動支並疊奉部飭有案無如地利所限祇有此數且查  
十年原奏時鎮迪各屬廉俸尙歸甘藩司支發十一年以  
後概由新疆司庫支領又增出撫藩養廉役食及新設迪  
化府庫爾喀喇烏蘇同知並各項佐雜廉費俸工奚止四  
五萬皆當時所未計及雖不敷之款頻年由糧臺借撥墊  
支邇值三年新餉期滿亟須清釐一切並預籌應用應請  
每歲加撥驛站經費銀一十萬兩廉俸公用銀五萬兩隨  
餉撥交司庫作爲常年專款分款支發報銷仍由藩司查  
明每年入款如能多收一分卽畱抵一分其本色糧石如  
有各營領扣之價亦卽作抵減調以期核實等情詳請具



奏立案前來臣覆核無異除不敷各款咨由督臣譚鍾麟彙入十四年軍餉案內估調外相應請

旨飭部立案備撥以便報銷施行再伊犁塔爾巴哈臺現議設道府以下等官應需廉俸驛站各項經費容俟設定後再飭藩司查明該處出入款目奏明辦理合併陳明是否有當謹會同陝甘總督臣譚鍾麟恭摺具陳伏乞皇太后

皇上聖鑒訓示謹

奏

硃批戶部知道欽此

旗營遷併古城酌擬旗制餉章摺

八月初一日

奏爲烏魯木齊巴里坤旗營遷併古城酌擬旗制餉章請旨辦理恭摺仰祈

聖鑒事竊照烏魯木齊巴里坤旗營遷併古城上年准前

護都統臣富勒銘額咨稱各旗官兵世職現僅存一千四

十餘員名爲數不多分設八旗官多兵少虛耗餉項擬按

六旗分設等因並開送清冊前來臣比擬俟城守尉到任

後核實舉辦嗣城守尉德勝抵省卽令會同候補道英林

前往點驗旋據驗明擬定旗分造冊呈核臣查冊擬六旗

數目與富勒銘額原議相符當飭藩司妥議餉章去後茲

據藩司魏光燾詳稱遵查烏魯木齊巴里坤古城各滿營官兵經城守尉點驗實存官四十六員內協領三員佐領十員防禦十員驍騎校十員筆帖式二員委筆帖式三員又雲騎尉五員恩騎尉三員馬步甲匠役養育兵九百九十八名外間散幼丁六十一名按照旗制僅敷六旗之數綜計六旗共設佐領六員防禦六員驍騎校六員部缺筆帖式一員委筆帖式二員催總領催三十六名前鋒三十六名馬兵七百二十八名礮手十二名匠役十二名步甲一百一十六名養育兵六十名總共設官二十一員馬步甲礮手匠役養育兵一千名照依現存官兵數目應裁協

領三員佐領防禦驍騎校各四員部缺筆帖式委筆帖式各一員尙應補兵二名所裁各官除實缺協領二員如何委用應請部議飭遵外其餘各員擬概給馬甲錢糧畱營當差候補世職則分別已未及歲照章食俸孀婦孤女仍給津貼銀糧共設義學三堂東修照滿營現章支給官俸兵餉均照烏魯木齊巴里坤滿營承平舊制分別定支惟城守尉係屬新設新疆地尤瘠苦廉俸及家口例馬米糧料草等項擬請照莊浪城守尉舊章支領仍倣從前關外領隊大臣加增養廉之例於定額養廉二百兩外每歲加增銀一百兩俾資幫貼此外漢檔房民書工食及紙紅公

費等項一律酌定按章核算統計官兵俸餉米麥料草折各項歲需銀六萬五千九百四十九兩四錢一分二釐本色京斗米麥一萬五千九百二十九石八斗二合七勺本色京斗料二千四十八石八斗一升一合八勺銀由司庫按年隨營餉請撥糧料由奇臺縣倉供支不敷再由他縣撥運及將來滿營屯田內支發仍按定章養廉以八成支發俸銀以八成減半支發委筆帖式以下甲兵餉項統以春冬七成夏秋八成分別支放惟現在標營官弁廉俸業經奏請倣照文職廉俸概給十成滿營事同一律擬懇准照十成支放毋庸折減以免向隅而示體恤開摺詳請具

奏前來臣覆核無異謹將酌擬旗制餉章分別繕具清單  
恭呈

御覽相應請

旨飭部核議以憑遵辦惟前據德勝呈稱古城城守尉員  
缺關係緊要應請

賞加副都統銜以資鎮守並續據該城守尉轉准巴里坤  
護領隊金貴咨據各滿營兵丁稟稱歸併六旗紊亂旗籍  
懇請仍照八旗舊制等情臣維新疆遷併滿營事屬創始  
並無成案可循山西河南城守尉所管旗分無從查悉惟  
查甘肅莊浪城守尉原設兵丁八百五十名內將八旗併

作四旗又設蒙古一旗計止五旗現在烏魯木齊等處滿營擬設六旗係爲兵少節餉起見而查原冊造齎兵額其年在十二歲以下者尙有二百五十八名又報間散幼丁六十一名請補小甲尙未編入甲名之內若令刪除僅兵七百四十名揆之莊浪旗制卽設五旗尙不足數臣不敢不據實直陳第查各該營旗丁多係陣亡官兵之後軍興以來流離失所陸續歸旗類多窮困非領錢糧莫資養贍而巴里坤各旗當賊氛四起時堅守危城衝鋒陷陣率能捐軀報

國其節可嘉其孤可憫尤應優爲撫恤養成精壯捍衛邊

疆可否仰懇

恩施將前項編入馬步甲幼丁一律分別准食錢糧以足  
六旗兵額並將冊造間散幼丁六十一名准補小甲以示  
優恤其古城城守尉請加副都統銜查各省城守尉無此  
成例未敢遽請至各旗官兵應否仍照八旗安設之處伏  
乞

飭部核議飭遵除咨部外謹會同署伊犁將軍臣錫綸陝  
甘總督臣譚鍾麟恭摺具陳伏乞

皇太后

皇上聖鑒訓示謹

刑部功公奏高



奏

硃批該部議奏單一併發欽此

臚陳戴宏勝戰績請

卹摺

八月初八日

奏爲臚陳已故記名提督實缺總兵生平戰績懇

恩飭部從優議卹恭摺仰祈

聖鑒事竊照頭品頂戴記名提督

賞穿黃馬褂陝西漢中鎮總兵騎都尉世職額爾克巴圖

魯戴宏勝本年六月間因病出缺經臣檄委提督湯彥和

接統該軍並附片具陳請俟查明該故總兵生平戰績由

臣另奏請

卹在案茲據各該營旗官記名提督蘇貴興湯詠山馬心勝記名總兵易盛富查春華禹中海譚用賓許明耀造具

該故總兵履歷清冊呈請具

奏前來臣查該故總兵自咸豐六年以武童投効霆軍轉戰江西湖北安徽廣東等省當是時賊踪遍東南攻剿殆無虛日該故總兵年壯氣銳蹈厲無前由軍功洊保副將感激思奮前後百數十戰屢受重傷或礮子嵌膝骨刃入膚寸許血涔涔下猶大呼殺賊士氣爲奮同治六年以總兵由豫援楚八年凱撤回籍十年左宗棠調赴甘肅行營旋克肅州擒斬首逆關內肅清洊保提督光緒二年隨臣出關日帕首踔冰雪中戰必身先遂擣古牧地堅巢並會克烏魯木齊等處既定北路復攻克達坂城以臨南疆連

復喀喇沙爾庫車阿克蘇烏什和闐各城仰賴

天威將士用命而該故總兵慤誠勇敢口不言功實爲武弁中不可多得之員九年蒙

恩補授陝西漢中鎮總兵員缺以邊防緊要未及赴任經臣檄飭駐防奎屯上年復飭統領庫精馬步等營進駐庫爾喀喇烏蘇操演巡防屹然爲迤北捍蔽該故總兵馭軍嚴肅尤能講求邊備十一年臣奉

旨赴伊犁時過其營壘壁門之內耨鋤畢具該故總兵指揮墜隴間遇士卒一如家人課其勤惰不少貸故屯務獨爲諸軍冠又建造廬舍以處行旅橋梁道路無不完固治

平過其境者雖未覩其人皆知其能任事也該故總兵歷年臨陣身受重傷出血過多氣體大損右膝一礮子傷深入骨裏未能取出尤時時作痛本年夏間臥病數日遂以不起道路聞之皆爲流涕合無仰懇

天恩俯准飭部照提督軍營立功後在營病故例從優議卹並將其生平戰績

宣付史館仍附祀左宗棠新疆專祠以彰忠藎出自鴻施除將該故總兵履歷咨部并飭湯彥和派弁護送遺櫬回籍外謹會同陝甘總督臣譚鍾麟恭摺具陳伏乞皇太后

皇上聖鑒訓示謹

奏

硃批戴宏勝著照提督軍營立功後在營病故例從優議卹餘依議該衙門知道欽此



調王久銘赴新疆差遣片

八月初八日

再前督辦新疆糧臺陝西題奏道王久銘於光緒十一年四月間聞訃丁繼母憂經臣飭將經手事件辦理就緒於上年給咨回籍守制附片

奏明在案查該員王久銘廉幹篤實從臣日久得力最多於邊務尤爲熟悉現在新疆辦事需才計該員業已服闋合無仰懇

天恩飭下湖南撫臣轉飭該員原籍湘鄉縣傳諭王久銘迅赴新疆昇臣差遣出自

鴻慈除咨部外謹附片具陳伏乞



聖鑒訓示謹

奏

硃批知道了卽著該部咨行湖南巡撫飭令王久銘迅赴  
新疆交劉錦棠差遣欽此

請 卹鄒魯彥等六員片

八月初八日

再 臣於光緒九年三月十六日具

奏請將立功後積勞病故員弁蕭傳薪等議卹一摺並聲明尙有遺漏未報員弁容俟各軍陸續查報到日另案辦理奉

旨著照所請該部知道欽此欽遵辦理在案茲據各營陸續查報積勞病故文武各員六名呈懇

奏請

恩卹前來 臣查已故補用知府畱甘候補同知鄒魯彥湖北天門縣人五品銜畱廣東補用縣丞宇文鶴湖南甯鄉

縣人藍翎選用巡檢陳士鐸湖南湘陰縣人頭品頂戴記  
名提督王義和湖南湘鄉縣人頭品頂戴題奏提督曾楚  
勝湖南湘鄉縣人副將銜畱甘補用參將李桂馨安徽天  
長縣人該故員等均係立功後積勞病故合無仰懇

天恩俯准飭部一併照軍營立功後積勞病故例議卹以  
昭激勸而慰幽魂除咨部外理合附片具陳伏乞

聖鑒訓示謹

奏

硃批鄒魯彥等均著照軍營立功後積勞病故例議卹該  
部知道欽此

新疆暫難規復制錢摺

八月十四日

奏為新疆銅筋不敷鼓鑄暫難規復制錢恭摺具陳仰祈  
聖鑒事竊臣前准部咨本年正月間欽奉

皇太后懿旨醇親王奕等奏會議整頓錢法一摺規復

制錢必應廣籌鼓鑄福建所鑄分量稍輕嗣後每錢一文  
均以重一錢為率京局及各省一律照辦等因欽此前已

恭錄飛咨在案現在各直省停鑄已久應再飛咨甘肅新

疆巡撫嚴飭藩司籌款辦銅加卯鼓鑄除搭放行用外餘

備酌提等因咨行到臣當經轉行遵辦去後茲據藩司魏

光燾詳稱遵查新疆北路向用制錢南路向用紅錢承平

光緒二十一年

臣

時制錢於伊犁設寶伊局鼓鑄紅錢於阿克蘇設局就溫宿拜城庫車三屬額銅鼓鑄其錢沿纏俗普爾式樣枚重一錢三分以一文當制錢之四以五百文爲一掛合銀一兩自阿古柏竊踞南八城創鑄天罡形圓如餅中無方孔每圓五分沿用既久成色分量任意低減流弊滋多光緒六年前陝甘督臣左宗棠奏請改鑄銀錢每圓一錢製造新式銅模較準一律交前幫辦軍務陞任山東撫臣張曜設局試辦以防作僞因工多費鉅旋復停止北路制錢亦爲入關商民攜帶略盡市肆遂通用天罡南路仍天罡紅錢並用十一年因各屬完納額銅民多不便改徵糧石阿

克蘇局需用之銅遂招民承採由官價購然小民類多窮苦必須公家先給成本嗣擬廣籌紅錢爲禁革天罡地步復於北路南山試挖銅礦就省鼓鑄而以庫車銅益之南路則以拜城等處之銅專供阿克蘇局無如產銅之區多係童山且隔民居動輒數站負糧運炭咸苦遠涉北路人煙稀少工價更昂銅復不旺以故南山銅筋歲不滿萬溫宿拜城庫車三屬合計亦不過五萬餘觔工匠技藝未嫻每工日祇成錢一掛而北路多寒南路多熱每年又需停工三五月不等以銅炭價值折耗薪工等項通盤核計阿克蘇局之錢每掛需本銀九錢五六分以錢一掛易銀一

兩尙屬有贏省城則需本銀一兩九分有零不無賠貼若鑄制錢按新疆從前市價二千文易銀一兩賠貼將及三倍時地所限萬難如內地籌辦之易請俟礦務暢旺經費漸減再行改鑄制錢等情詳請具

奏前來 臣維規復制錢必廣籌鼓鑄欲籌鼓鑄必先辦銅如福建等省鼓鑄之銅或取資鄰省或轉購外洋新疆僻在西陲水道不通礙難照辦而紅錢五百文計重四觔一兩制錢一千文計重六觔四兩以錢合銀紅錢五百文易銀一兩制錢二千文易銀一兩兩兩相比較制錢費銅多至兩倍有奇改鑄制錢勢必益形竭蹶合無仰懇

天恩俯念新疆銅礦不旺暫難規復制錢准用沿鑄紅錢照常行使一俟工商輻輳物價日平銅筋足供鼓鑄徐圖改造制錢以歸畫一出自

聖裁除伊犁原設寶伊局能否照舊辦理應由署伊犁將軍臣錫綸就近查明奏辦外謹會同陝甘總督臣譚鍾麟恭摺具陳是否有當伏乞

皇太后

皇上聖鑒訓示謹

奏

硃批戶部知道欽此





遵 旨籌辦塔爾巴哈臺事務摺九月初十日  
奏爲遵

旨籌辦塔爾巴哈臺事務恭摺仰祈

聖鑒事竊臣前奉到八月初二日

上諭當卽欽遵恭錄咨行去後茲復承准軍機大臣字寄  
光緒十三年八月初六日奉

上諭前據劉錦棠奏塔爾巴哈臺勇丁潰變籌辦大概情  
形當經諭令該大臣等督飭各營併力兜剿茲復據錫綸  
奏塔城營勇潰變派隊馳往剿撫劉錦棠奏潰勇就撫仍  
籌整頓各一摺覽奏均悉此項勇丁聚眾譁潰雖據稱開

導歸營尙未別滋擾害惟該三營同時煽亂並膽敢戕斃  
營官其平時積習甚深目無法紀已可概見儻不認真究  
辦何以肅軍令而重邊防卽著該大臣等懷遵前旨務將  
首要各犯嚴拏懲辦並將起衅緣由確切查明據實具奏  
毋得遷就了事其各營就撫人眾應如何一律遣撤著劉  
錦棠等於事竣後察看情形妥籌辦理將此由六百里各  
諭令知之欽此伏查此起潰勇就撫之後臣飭提督湯彥  
和仍酌帶隊伍前往額勒河附近地方擇要駐紮並委  
營務處二品頂戴分省遇缺儘先題奏道袁鴻祐會同前  
往察看情形旋據該員等稟稱該處各營自光緒十一年

奏明照楚軍營制之後每年發滿餉三箇月鹽菜九箇月  
餉係照章發給鹽菜則每月按名發銀一兩或一兩二錢  
不等從無短缺惟營官轉發間有以貨物抵折者又或私  
相挪用延不發清以致眾心懷恨中營營官陳明德性情  
嚴急曾因細故鞭撻什長馬士勳至死復甦眾尤不服該  
處營規向不准給假馬士勳之黨遂暗布謠言謂不准給  
假是永無歸期又無發給存餉之望欲以此激眾爲變六  
月二十七日夜馬士勳爲首糾合勇丁王得勝等戕殺營  
官陳明德卽舉火爲號其時營中持械出應者尙無多人  
迨馬士勳等聲言營官已死有不出應者卽當搜殺眾始

紛然譁潰右營什長張玉春周國棟亦乘亂戕殺營官同時響應左營祇殺數十人竄出餘均未動由是參贊衙署及隨員私寓搶劫一空餉項軍裝亦多被劫惟未擾及街市既變之後眾思竄赴伊犁爲南湖兩馬隊所扼知事不成始行就撫經參贊查明首犯馬士勳張玉春周國棟又續獲魏生林王得勝陳萬明等一併正法該處各營本未能足額聞此次收撫之後中營存勇二百三十餘名左營一百五十餘名右營一百三十餘名而已稟報前來又准署塔爾巴哈臺參贊大臣春滿咨鈔七月十七日奏稿查與該道等所稟大略相同惟於初變之時如何搶

劫既撫之後曾否嚴追並未言及其由西湖拏獲之杜天成張玉成二犯供詞狡展現正飭查取確情俟該處查覆至日再行核辦此查明起衅根由及拏獲首要各犯分別懲辦之實在情形也臣前與錫綸面商誠恐其務爲遷就當由錫綸檄飭提督馬玉崑會同該處在事各員認真清理仍察其可畱者編列入營其不可畱者卽令概行遣撤現復經錫綸

奏委副都統額爾慶額馳往該處接辦參贊大臣印務自係爲澈底清查起見臣自應欽遵

諭旨仍會同錫綸妥籌辦理以期上慰

宸廛惟查關外防軍多由內地招募一經入伍或至十有餘年人情久役思歸非勢力之所能禁以故臣軍自新疆底定以來雖未能一律遣撤然必隨時准假或量爲募補或歸併成旗無歲不然行之亦便近因設立行省請改就標營之制而仍存其客勇之名誠以著籍爲兵勢不能聽其求去新疆既無土著可募爲兵卽不得不爲變通之計幸蒙

聖慈允准各將士歡忭同深伊犁塔爾巴哈臺等處勇營事同一律而獨不聽其乞假或雖准假而存餉轆轤不清累月經年猶須守候相沿既久習爲故常坐使姦人得有

所藉口此次杜天成到案並供稱初潰之際聞亂黨以得歸相慶異口同聲則其弊較然可覩從前伊犁營勇屢次譁潰大率皆由於此應請

旨飭下各該處將軍參贊嗣後應查明弁勇實係入營年久者卽當酌量准假並清其存餉勿使稽延著爲定章每歲以一二成爲率仍隨時募補以重操防庶張弛得宜而軍心亦定矣抑臣愚見所及有不得不並以陳明者臣前於本年三月十二日會同督臣譚鍾麟奏請增設伊塔道及府廳縣以下各官並聲明各該處標營亦應俟道府各官設定後酌量變通



奏明辦理奉

硃批該部議奏欽此現在尙未接准部覆應俟接到部覆後如經照准則伊犁塔爾巴哈臺等處除各旗營應由將軍參贊妥籌布置外其鎮協各標應如何整頓臣自應悉心籌議不敢避勞如部議各仍其舊臣即應請

旨飭下該將軍參贊督飭各將領認真經理臣即毋庸置

議否則十羊九牧其令難行轉非所以慎重邊防之道現臣軍遣裁老勇改發坐糧辦理已將就緒惟湯彥和所部各營因該提督開往前途未及同時舉辦臣比飭該提督俟額爾慶額到後即督率所部仍回西湖將應辦事宜

迅速辦理俟塔爾巴哈臺等處設官議定再定行止以順  
事機是否有當謹會同陝甘總督臣譚鍾麟恭摺具  
奏伏乞

皇太后

皇上聖鑒訓示謹

奏

硃批覽奏均悉所籌伊犁等處勇營給假清餉各節尙屬  
妥善卽著劉錦棠咨行該將軍參贊一體認真核辦以肅  
軍紀而重邊防餘依議欽此



請旌節婦張楊氏摺

九月十日

奏爲已故節婦年例相符懇

恩旌表以維風化恭摺仰祈

聖鑒事竊據三品銜遇缺題奏道陳晉蕃等稟稱查有已故同鄉湖南湘潭縣節婦張楊氏係處士楊應章之女張品光之妻理問銜分省補用縣丞張曜先之母十四歲于歸逾五年而品光病氏旦夕禱神願代夫死既而品光沒氏年十九誓以身殉一慟幾絕旋念舅姑在堂祖姑年老病風痺瘖不能語孤子未離乳哺遂矢志守節家極貧夜或燃松脂紡績達旦堂上甘旨未嘗缺乏相繼喪葬亦悉

如禮其子讀書婚配諸費皆竭力經營以迄成立而於親屬之貧者復分潤之不少吝沒年五十六歲守節三十七年職道等誼屬同鄉見聞既確未便聽其湮沒造具事實冊結聯名稟懇具

奏前來 臣查定例各省節孝婦女應

旌表者由督撫學政會同具奏其外省節孝婦女亦准同鄉官出具冊結公懇奏咨歷經遵辦在案茲據稟前情 臣覆核無異合無仰懇

天恩俯准

敕部照例

旌表以彰苦節而維風化除將事實冊結咨部外謹會同  
陝甘總督臣譚鍾麟甘肅學政臣秦澍春恭摺具  
奏伏乞

皇太后

皇上聖鑒訓示謹

奏

硃批著照所請禮部知道欽此



鎮西廳禾稼被災情形片

九月十日  
九日

再臣據藩司魏光燾詳八月初八日據鎮西廳同知甘承  
謨詳稱該廳夏間雨水調勻豆麥滋長不料入秋以後田  
鼠爲害七月初八日復降大雪甫經晴霽又霜結如冰禾  
稼迭遭凍萎據各鄉約先後稟報該廳於十九二十至二  
十四五等日親往各處履勘查東路大泉東西渠大黑溝  
小黑溝石人子拱北爾松樹塘北鄉坂坊溝樓坊溝紅旗  
溝等處遍地鼠穴早種之小麥青稞莞豆油菜均被嚼斷  
苗腳僅存并無收穫遲糧亦被凍壞約僅可收一二三分  
不等東北沙山子柳溝早糧被鼠遲糧被凍較各處尤甚



收成更無可望其武威戶暨西路花牆子西大墩或地處  
卑溼或沙磧較多雖無鼠傷疊經霜雪凝凍結穞秕瘦收  
成亦僅約二三分惟近營屯之三渠四渠大有莊淵泉敦  
煌玉門各渠居中平行損傷較少尙可收四五分之譜已  
由司飭令先行撫恤一面移道委員前往會勘等情詳請  
具

奏前來 臣查鎮西廳地本瘠苦遇此災傷情殊可憫當卽  
飭司移行覆勘清查被災戶口分別輕重妥爲撫恤一面  
確查地畝糧數實係鼠傷若干凍傷若干是否成災錢糧  
應否蠲緩卽日分晰稟覆核辦除俟查辦完竣另案再辦

外所有鎮西廳被鼠被凍大概情形謹附片具陳伏乞  
聖鑒訓示謹

奏

硃批知道了著卽飭屬查明被災戶口分別妥籌撫恤餘  
依議該部知道欽此



綏來濟木薩秋禾被災情形片

九月二十八日

再北路鎮西廳屬各莊禾稼被鼠被凍情形業經臣附片  
奏明在案茲據綏來縣知縣李原琳申稱該縣七月初九  
初十十一等夜迭降大霜皓若積雪八月二十二三等日  
據各鄉農約稟報各色秋禾自被霜後早者漿漸乾枯半  
成穞穀遲者未經結實日就萎悴經該縣下鄉逐段履勘  
查東南西北四鄉秋禾在芒種前播種者稻子約被災五  
分高粱糜穀小穀約被災七分其播種較遲者并無顆粒  
委係因霜凍壞又據署濟木薩縣丞鄧甲英申稱該屬近  
山一帶七月半間麥禾迭被霜雪雖旋經晴霽而結顆迄

難圓滿甚至苗葉焦黃據各渠農約稟報當經馳往勘驗  
其中太平長山興隆三渠被災較重全無收穫者計有五  
十餘戶餘與各渠約凍傷十之五六平地雖無凍傷之害  
而雀啄蟲傷田鼠囓食又至七八分不等先後懇請委員  
蹈勘稟報前來臣查定例夏災不出六月底秋災不出九  
月底甘肅地氣較遲夏災不出七月半秋災不出十月半  
關外北路地氣尤遲現值招徠屯墾遇此災傷亟應妥爲  
安撫當飭藩司魏光燾一面飭查被災戶口分別輕重先  
行撫恤一面移道委員分赴該兩屬會勘是否成災錢糧  
應否蠲緩據實結報詳辦除俟詳覆至日另案

奏明辦理餘仍查明有無災傷陸續陳奏外所有綏來濟  
木薩兩屬秋禾被災大概情形謹附片具陳伏乞  
聖鑒訓示謹

奏

硃批知道了著卽督飭查明被災戶口分別妥籌撫恤餘  
依議該部知道欽此



庫爾喀喇烏蘇廳稻穀被災情形片

十月十七日

再臣前於

奏報北路綏來縣濟木薩兩屬被災案內曾經聲明餘仍查明有無災傷陸續陳

奏在案茲據署庫爾喀喇烏蘇廳同知符瑞申稱該廳入秋以後迭降嚴霜稻穀均被凍傷其結實者又被鼠耗據各鄉農約會同新老戶民稟報當卽下鄉逐勘查四鄉新安之戶自本年三月報領荒地發給牛籽農具銀兩飭令疏通渠道及時墾種不料全無收穫其老戶已墾熟地亦被霜凍鼠嚙間有收割不敷籽種懇請委員勘驗並



奏請蠲免等情前來臣查該廳新安各戶甫經領墾老戶額糧歲祇六十餘石人稀地曠正在招徠遇此重災不但成本額糧無可追繳而嗷嗷待哺實堪憫惻除飭藩司魏光燾移道委員會同確切覆勘分別新老戶民蠲免額糧緩繳成本並應如何給賑及來春應否接濟據實詳報再行詳細具

奏外所有庫爾喀喇烏蘇廳被災情形謹附片具陳伏乞聖鑒訓示謹

奏

硃批知道了欽此

新疆提鎮標路員缺營制餉章倣照撫標擬議摺

十月二十七日

奏爲新疆喀什噶爾阿克蘇巴里坤提鎮標路各營員缺營制餉章倣照撫標章程分別擬設謹繕具清單恭摺仰祈

聖鑒事竊臣等前奏設立新疆撫標參用勇營章程現准部臣議覆內開提鎮各營據稱擬照此章以次議設應令該督等體察情形卽行會商興辦等因奉

旨允准欽遵在案惟查喀什噶爾阿克蘇新疆省城原駐開花礮隊三哨最利攻剿邊防要地未便因改設營制遽予遣撤擬於喀什噶爾提屬阿克蘇鎮屬各照舊設開花

礮隊一哨並於前設撫標內加設開花礮隊一哨均隸各城守營管轄咨行商辦去後茲准署提臣譚上連咨稱先後會同喀什噶爾正署巡道袁奎齡黃光達查察地勢情形擬議呈請酌辦前來查喀什噶爾地處極邊緊與俄鄰原議以烏魯木齊提督移駐俾資鎮守今擬設提標中前左右四營參將一員游擊三員守備七員千總把總經制外委四十五員步隊四營馬隊七旗城守營擬設游擊一員守備二員千總把總經制外委十員步隊一營馬隊一旗開花礮隊一哨回城駐分巡通商道員中俄交涉尤關緊要擬設副將一員都司一員守備一員千總把總經制

外委十二員步隊一營馬隊二旗英吉沙爾東連葉爾羌西南緊要奈曼布魯特卡倫最多防閑不易擬設參將一員守備一員千總把總經制外委九員步隊一營馬隊一旗莎車州卽葉爾羌西界愛烏罕南連英屬之退擺特西南山徑通英屬之克什米爾各部落防範宜嚴擬設副將一員都司一員守備二員千總把總經制外委十五員步隊一營馬隊三旗其所屬之葉城縣卽由所設馬隊內分右旗一旗駐防瑪喇巴什東接阿克蘇南通莎車州西連喀什噶爾爲往來衝衢實上下關鍵擬設游擊一員守備一員千總把總經制外委七員步隊一旗馬隊一旗和闐

州南通西藏西南緊與英鄰巡防宜密擬設參將一員守  
備一員千總把總經制外委九員步隊一營馬隊一旗其  
所屬之于闐縣卽由所設步隊內分左哨駐防再喀什噶  
爾與各外部毗連往來文報必需繙譯查烏魯木齊提標  
中左兩營原設蒙古千總各一缺茲參用勇營章程千總  
必須帶哨擬於中營另設蒙古把總二缺歸提署差遣遇  
有缺出仍由古城滿營合例人員內補放以上各營均歸  
提督管轄計設副將二員參將三員游擊五員都司二員  
守備十五員千總十九員把總五十五員經制外委三十  
五員並提督共官一百三十七員步隊九營一旗馬隊十

六旗開花礮隊一哨除火勇共設正勇六千三百九十七名並酌設提署稿書十名纏文書辦二名通事二名以資辦公此擬設喀什噶爾提標官弁勇丁之數目情形也又據署阿克蘇鎮總兵董福祥會同護阿克蘇道陳名鈺呈稱查阿克蘇居南疆適中之地非駐重兵不足以資策應擬設鎮標中左右三營游擊三員守備六員千總把總經制外委三十六員步隊三營馬隊六旗並將左營馬隊抽撥一旗分駐拜城縣治城守營擬設都司一員守備一員千總把總經制外委五員步隊一旗開花礮隊一哨烏什兼轄胡什齊奇里克各布魯特又連俄境防衛關重擬設

副將一員都司二員守備一員千總把總經制外委十六  
員步隊一營一旗馬隊二旗喀喇沙爾爲南疆門戶蒙回  
雜處南通羅布淖爾擬設參將一員守備一員千總把總  
經制外委九員步隊一營馬隊一旗庫車爲東西通衢所  
屬沙雅爾民情刁悍擬設游擊一員守備一員千總把總  
經制外委七員步隊一旗馬隊一旗並於中營另設蒙古  
把總二缺由古城滿營合例人員內補放歸鎮署差遣以  
上各營均歸總兵管轄計設副將一員參將一員游擊四  
員都司三員守備十員千總十三員把總三十九員經制  
外委二十三員並總兵共官九十五員步隊五營三旗馬

隊十旗開花礮隊一哨除火勇共設正勇四千五百三十  
三名仍酌設鎮署稿書八名纏文書辦二名通事二名此  
擬設阿克蘇鎮標官弁勇丁之數目情形也至巴里坤鎮  
標路各營原額馬步兵三千六百七十二名現止八百八  
十五名缺額已逾三倍部臣謂未改各營須酌留兵額以  
符舊制竊維現在因勇設標係出一時權宜之計而大致  
與原額相倣俟將來察看土著可募爲兵自可徐圖規復  
兵制或倣照各省練兵章程仍可隨時參酌辦理茲據巴  
里坤鎮總兵徐占彪呈稱擬設鎮標中左右三營游擊三  
員守備三員千總把總經制外委二十七員步隊三營馬



隊三旗城守營擬設都司一員千總把總經制外委四員  
步隊一旗哈密協營擬設副將一員都司一員守備一員  
千總把總經制外委十二員步隊一營馬隊二旗哈密協  
屬塔爾沁擬設守備一員把總一員步隊一哨古城營  
擬設游擊一員守備一員千總把總經制外委九員步隊  
一營馬隊一旗木壘營擬設守備一員把總經制外委三  
員馬隊一旗仍於中營另設蒙古把總二缺由古城滿營  
合例人員內補放歸鎮署差遣以上各營均歸總兵管轄  
計設副將一員游擊四員都司二員守備七員千總十一  
員把總二十九員經制外委十八員並總兵共官七十三

員步隊五營一旗一哨馬隊七旗除火勇共設正勇三千  
五百一十七名並添設鎮署稿書八名清書二名此擬設  
巴里坤鎮標官弁勇丁之數目情形也總共提鎮標路各  
營官弁俸薪蔬紅廉費馬乾料草折價及書辦通事口食  
世職世俸牧馬埽雪兵丁鹽菜鞵鞋等項歲需銀一十萬  
零三千六百九十一兩六錢四分八釐勇丁較原議人數  
有減無增餉項照依撫標章程歲需銀九十六萬一千九  
百六十五兩四錢八分例馬料草北路額征較少前設撫  
標議給半本半折巴里坤應請照舊全支折色南路額征  
料草尙多喀什噶爾阿克蘇擬概發給本色歲需京斗料

四千五百三十六石歲需草二十一萬一千六百八十束  
兩鎮標路各營均歸提督管轄提鎮各營統由撫臣節制  
飭據藩司魏光燾議覆詳請具

奏前來臣等覆核無異謹分別繕具清單恭呈

御覽仰懇

飭下戶兵等部核議並將前設撫標加設開花礮隊一哨  
併案議覆遵行其餘未盡事宜仍俟陸續察酌隨時奏明  
辦理所有倣照撫標擬設喀什噶爾提屬阿克蘇巴里坤  
鎮屬標路各營員缺營制餉章暨請添設撫標礮隊各緣  
由謹會同署提督臣譚上連合詞恭摺具

奏伏乞

皇太后

皇上聖鑒訓示再此摺係臣錦棠主稿合併聲明謹  
奏

硃批該部議奏單三件併發欽此



劉襄勤公奏稿卷十四

起光緒十三年十月  
訖光緒十四年六月

目錄

庫爾喀喇烏蘇廳稻穀被災情形片

新疆提鎮標路員缺營制餉章倣照撫標擬議摺

估修古城衙署兵房等工立案摺

病難速痊仍請開缺回籍就醫摺

查明被災各屬來春分別接濟摺

新疆十四年實需餉數並應議各條分晰覆陳摺

新疆總兵城守尉司道等官年終密考摺

已故大臣明春請建專祠摺

遵保提鎮各員摺

陳明欠餉清理就緒懇指撥以清借款摺

請 卹道員雷聲遠等片

修建南路提鎮衙署並擬續修通省武官營署摺

估修迪化府及經歷衙署監獄銀數片

查明新疆現辦稅務情形摺

已故大臣左宗棠專祠告成請 飭部立案摺

巴里坤東關捐建左大臣祠宇並附祀死事立案片

新疆省捐修湘軍忠義祠立案片

請設迪化府學額摺

酌定伊塔旗營員缺並籌辦勇營事務摺

龍神靈應請 敕加封號摺

請 旌節婦陳王氏摺

訊明潰弁就地正法片

關外七八兩年報銷覆陳部駁懇 飭准銷摺





劉襄勤公奏稿卷十四

起光緒十三年十一月  
訖光緒十四年六月

目錄

估修古城衙署兵房等工立案摺

鎮西等廳縣被災請分別蠲緩額徵摺

病難速痊仍請開缺回籍就醫摺

查明被災各屬來春分別接濟摺

新疆十四年實需餉數並應議各條分晰覆陳摺

新疆總兵城守尉司道等官年終密考摺

光緒十一年分司庫收支懇  
飭核銷摺

已故大臣明春請建專祠摺

溫宿等處被災請分別蠲緩額徵摺

遵保提鎮各員摺

陳明欠餉清理就緒懇指撥以清借款摺

請 卹道員雷聲遠等片

修建南路提鎮衙署並擬續修通省武官營署摺

估修迪化府及經歷衙署監獄銀數片

查明新疆現辦稅務情形摺

已故大臣左宗棠專祠告成請 飭部立案摺

巴里坤東關捐建左大臣祠宇並附祀死事立案片

新疆省捐修湘軍忠義祠立案片

請設迪化府學額摺

酌定伊塔旗營員缺並籌辦勇營事務摺

龍神靈應請 敕加封號摺

請 旌節婦陳王氏摺

訊明潰弁就地正法片

關外七八兩年報銷覆陳部駁懇 飭准銷摺



估修古城衙署兵房等工立案摺

十一月初一日

奏爲估修古城旗營衙署兵房等工請

旨飭部立案恭摺仰祈

聖鑒事竊照烏魯木齊巴里坤旗營遷併古城前經奏明就原建奇臺縣新城蓋造房屋以資居止當飭藩司魏光燾委員勘修去後茲據該司詳據各委員等稟稱古城旗營暫按奏設六旗旗制擬修城守尉衙署一所佐領防禦驍尉校衙署十八所兵房暫修五百所內一院三間者九十二所一院兩間者四百零八所堆房六所鼓樓一所轉角廳四所糧倉火器營步軍營總學堂各一所

萬壽宮

關帝廟各一所共估需銀八萬八千餘兩該司查所估木料係派營勇入山採伐祇按旬犒賞酒肉一次所省實多惟遠在吉布庫等處距城百數十里不等山路崎嶇不得不僱車搬運以節勇力泥木各匠暨漢纏小工並應需一切物料北路尤屬翔貴核計所估數日委係極力搏節懇請核辦前來臣覆查無異除飭俟工竣造具實數由臣咨部核銷並俟遷併時查明工程應否酌增再行陸續陳奏外所有估脩古城旗營衙署兵房等工理合先行陳明請旨飭部立案是否有當謹會同陝甘總督臣譚鍾麟恭摺

具

奏伏乞

皇太后

皇上聖鑒訓示謹

奏



皇正集卷之六十一

十一

鎮西等廳縣被災請分別蠲緩額徵摺十一月二日

奏爲新疆鎮西庫爾喀喇烏蘇拜城烏什各廳縣被災地畝本年額徵糧草分別應否蠲緩恭摺仰祈

聖鑒事竊南路溫宿烏什拜城被水被雹北路鎮西綏來濟木薩庫爾喀喇烏蘇被凍被鼠經臣先後將大概情形奏明並聲明飭司移行復勘是否成災錢糧應否蠲緩再行彙辦各在案茲據藩司魏光燾詳據各印委勘報查鎮西廳屬被災地四萬三百二十三畝四分二釐額徵糧三千七十石三斗五升二合三勺庫爾喀喇烏蘇廳新老各戶成災地四百八十畝額徵糧四十六石二斗二升四合

該兩廳地瘠民貧災傷甚重所有本年額徵糧石委係無力完繳擬請概予豁免其鎮西廳十一十二兩年民欠額糧十三年所借籽種並庫爾喀喇烏蘇廳新安各戶借領成本一併請緩至來年秋收帶徵拜城縣屬被水被雹計地一萬四十八畝一分地面雖闊災傷較輕本年額糧一百九十四石七斗六升六合四勺額草八千五百五十六斤一兩六錢應請緩至來年徵收以上三屬均經檄飭先行出示停徵並分別被災輕重酌量賑撫其烏什廳屬被水地畝尙少又經補種秋糧不至成災糧草已飭照常完納等情具詳請

奏前來臣覆核無異除飭俟溫宿綏來濟木薩等處勘覆至日再行彙詳請奏並來春應否接濟應俟屆時確察情形再行斟酌辦理外所有鎮西庫爾喀喇烏蘇拜城各廳縣被災地畝額徵糧草仰懇

天恩俯准分別蠲緩以示體恤如蒙

俞允俟欽奉

諭旨後飭司卽將各災戶蠲緩糧石分別詳細開載敬刊謄黃徧行曉諭以廣

皇仁而昭實惠是否有當謹會同陝甘總督臣譚鍾麟恭摺具

奏伏乞

皇太后

皇上聖鑒訓示謹

奏

硃批另有旨欽此

光緒十三年十二月二十五日內閣奉

上諭劉錦棠奏鎮西廳等處被災請將額徵糧草分別蠲緩一摺新疆鎮西庫爾喀喇烏蘇拜城本年被水被雹被凍被鼠致成災歉若將應徵糧草照常徵收民力實有未逮加恩著照所請所有鎮西廳屬成災地四萬三百二十三畝零本年額徵糧三千七十石零庫爾喀喇烏蘇廳新老各戶成災地四百八十畝本年額徵糧四十六石零著概予豁免其鎮西十一十二兩年民欠額糧十三年所借籽種並庫爾喀喇烏蘇廳新安各戶借領成本均著緩至來年秋成帶徵拜城縣屬被水被雹計地一萬四十八畝

零本年額糧一百九十四石零草八千五百五十六斤零  
著緩至來年徵收以紓民力餘著照所議辦理該撫卽刊  
刻謄黃徧行曉諭務使實惠均霑毋任吏胥舞弊用副體  
恤民艱至意該部知道欽此

病難速痊仍懇開缺回籍就醫摺

十二月十三日

奏爲

微臣

病難速痊仍懇

天恩允准開缺回籍就醫以資調理恭摺仰祈

聖鑒事竊臣於本年二月因病懇請開缺蒙

恩賞假三月

加賞人獲令在任安心調理旋於八月因病仍未痊而核發各營舊欠亦未告竣復經

奏請續假十月初七日兵部遞回原摺奉

硃批著再賞假兩箇月安心調理欽此屢蒙

高厚之施莫罄髮膚之報生非木石豈有不知惟臣自七



月以來病骨支離益甚初患脾泄既而閉結旋又便血醫者寒熱雜投莫衷一是終以下血不止引動肝風發於偏左肢體麻木皆在一偏卽同一舌間亦覺半非已有言語蹇澀口角喎斜連易數醫血止而偏風如故腳氣亦時時觸發發則痛入骨髓徹夜不眠狼狽不堪殆難言喻此僚友所共知 臣卽欲強自支持不可得也 臣早歲從軍習於勞苦自蒙

恩畀茲重任與民更始共沐

深仁風教日開商旅漸集視昔之兵戈擾攘奚啻天淵飽食安居於 臣已過 臣復何所容其趨避所慮者及今年力

尙可有爲若遂病廢不支將永無報效涓埃之日也臣軍  
舊欠未清前承

恩命准撥部款百萬令會同督臣迅速清理現已督飭各  
營先後截清存餉自光緒十四年起一律改發坐糧關內  
招募新勇已陸續報到即可次第按照營旗挑補足額至  
此項銀兩尙有不敷臣已與督臣會商容另案

奏明辦理此外應辦事宜非臣愚之所素習而臣於此數  
月皆在病中每對簿書不能終幅現在假期又滿而病且  
益深若不急治恐遂成偏枯之證關外旣苦無醫藥思維  
再四焦灼徒深惟有仰懇

天恩仍准開缺回籍就醫俾得趕緊調理一俟醫治就痊  
卽當趨叩

關廷求

賞差使斷不敢少耽安逸不勝迫切屏營之至謹恭摺瀝  
陳伏乞

皇太后

皇上聖鑒訓示謹

奏

硃批覽奏殊深廬系新疆地方緊要該撫辦事諸臻妥協  
朝廷正資倚任著再賞假四月安心調理毋庸開缺欽此

查明被災各屬來春分別接濟摺十二月十四日  
奏爲遵

旨查明新疆本年被災各屬來春應分別接濟恭摺具陳  
仰祈

聖鑒事竊臣於光緒十三年十一月初八日承准軍機大  
臣字寄光緒十三年十月初三日奉

上諭本年甘肅新疆溫宿等處被水經該督撫等查勘撫  
恤小民諒可不至失所惟念來春青黃不接之時民力未  
免拮据著傳諭該督撫等體察情形如有應行接濟之處  
卽查明據實覆奏務於封印以前奏到候朕於新正降旨

加恩再甘肅新疆拜城縣被水被雹均經該督撫等委員查勘卽著迅速辦理並將來春應否接濟之處一併查明於封印前奏到此外各省有無被災地方應行調劑撫恤之處著該督撫等一併查奏候旨施恩等因欽此仰見皇上軫恤災黎有加無已之至意當經欽遵轉飭查辦去後茲據藩司魏光燾詳稱新疆鎮西庫爾喀喇烏蘇拜城烏什暨溫宿綏來濟木薩等處被災各戶業經檄飭酌量賑撫並本年應完糧草成本應否蠲緩先後詳請奏明在案茲查鎮西庫爾喀喇烏蘇兩廳被災較重來春食糧籽種均無所出應請量爲接濟以資耕種其拜城烏

什溫宿綏來濟木薩被災等屬或收成歉薄或勘不成災亦已分別徵緩此外所屬各廳州縣本年夏秋麥禾收成尙稱中稔均請來春毋庸接濟等情具詳請

奏前來臣覆查無異所有遵

旨查明新疆本年被災各屬來春應分別接濟各情形謹會同陝甘總督臣譚鍾麟恭摺具陳伏乞

皇太后

皇上聖鑒訓示謹 奏

奏

硃批知道了欽此

史記卷之八十一

一

新疆十四年實需餉數並應議各條分晰覆陳摺十二月十四日  
奏爲新疆省十四年實需餉數並應議各條謹分晰開單  
覆陳恭摺仰祈

聖鑒事竊甘肅十四年新餉經戶部奏請援案指撥並繕  
具八條令臣與督臣等會商分別關內外裁省若干實需  
若干妥籌奏辦等因咨行到臣當飭藩司糧臺議覆去後  
茲據詳稱新疆省應分新餉自光緒十一年起至十三年  
止歲需勇餉銀一百九十萬兩製辦軍裝器械銀十六萬  
兩善後經費銀十四萬兩共銀二百二十萬兩又由四分  
平餘項下另撥旗營經費銀十萬兩實共歲需銀二百三



十萬兩現將防營一律裁併奏設撫提鎮標自十四年起  
官弁兵勇俸餉等項歲需銀一百五十六萬兩計減銀三  
十四萬兩添製軍裝器械歲需銀十萬兩計減銀六萬兩  
善後經費歲需銀七萬兩計減銀七萬兩旗營俸餉等項  
歲需銀六萬五千兩計減銀三萬五千兩惟前撥善後經  
費部議北路城工令於此項銀兩內取給應請仍照原撥  
銀十四萬兩旗營經費十一二三等年支發餉項並修理  
衙署等工已將罄盡遷徙費仍無出應請仍照原撥銀十  
萬兩又原估勇餉皆計口投食自設行省出款隱增如烏  
魯木齊提標巴里坤鎮標官弁俸餉歲需銀九萬餘兩向

由甘肅藩庫搭解支放自十一年以後概由新疆在於新  
餉內挪移墊發又司庫例支不敷歲需銀十五萬兩以及  
地方供應例支雜差作正開報之款皆當日原估所未計  
及無不指餉挪墊計三年中共已墊銀八十餘萬兩益以  
各省欠解南路經費銀十九萬兩並各省欠解新餉又不  
下數十萬兩新虧極鉅應請補撥補解以資清釐茲切實  
估計光緒十四年實需官弁勇丁俸餉銀一百五十六萬  
兩添製軍裝器械銀十萬兩善後經費銀十四萬兩旗營  
經費銀十萬兩司庫例支不敷銀十五萬兩糧餉軍裝運  
腳暨地方例支雜差車腳口分銀五萬兩通共需銀二百

一十萬兩繕具應議各條清摺詳請具

奏前來 臣查光緒十年 臣原奏新疆裁撤舊勇改支坐糧  
歲可省銀八十萬兩係合伊犁塔爾巴哈臺等處統籌核  
計其時省制未興諸凡未備如司庫例支及地方雜差等  
項非 臣愚所能預估茲據該司道等估詳前情查明實係  
萬無可省然歲需俸餉及軍裝器械等項已省銀四十萬  
兩核於本年四月部議 臣軍改支坐糧後歲可省銀三十  
餘萬兩一語尙無不合提鎮兩標支款本不在原撥之內  
既悉由新疆支給則出款隱增於撥款又爲隱減合之司  
庫例支等項共需銀二百一十萬兩較原撥二百三十萬

之數仍屬有減無增伊犁塔爾巴哈臺等處前經臣咨商  
辦理旋准錫綸等均以行糧不能遽改請照原撥等因先  
後咨覆臣固未便置議其關內撤勇改兵亦已由督臣力  
求節省減撥銀十萬兩另案奏明當此河患方深偏災屢  
見臣惟有與將軍督臣等共體時艱核實減省下以紓鄰  
封協濟之勞上以慰

皇上眷念邊陲之至意除伊犁塔爾巴哈臺額餉應由錫  
綸及現署塔爾巴哈臺參贊大臣額爾慶額會商奏辦外  
所有新疆省十四年實需餉數暨應議各條謹繕清單恭  
呈

御覽伏乞

皇太后

皇上聖鑒訓示謹

奏

硃批戶部知道單併發欽此

新疆總兵城守尉司道等官年終密考摺十二月十六日

奏爲新疆總兵城守尉司道等官循例年終密考繕具清單恭摺仰祈

聖鑒事竊照新疆司道等官經臣於光緒十二年年終出具切實考語密行陳

奏在案惟巴里坤鎮總兵向由督臣注考古城城守尉上年尙未到任是以武職均未舉辦茲本年又已屆期巴里坤標營兵制業已奏請改設古城城守尉亦經履任自應一併循例辦理該總兵城守尉司道等經臣詳加察看於各員操守才具一切見聞較確除署事及未經到任人員

例不注考外謹就現在實在各員分別出具切實考語密繕清單恭呈

御覽至伊犁請設道府等官尙未接准部覆伊犁鎮總兵應仍由將軍臣察看其阿克蘇鎮總兵及迪化府知府等缺尙未請補有員是以均未注考合併聲明伏乞

皇太后

皇上聖鑒謹

奏

光緒十一年分司庫收支懇

飭核銷摺

十二月十八日

奏爲造報光緒十一年分新疆司庫收支各款銀糧分繕  
總散細數清冊籲懇

天恩飭部核銷恭摺仰祈

聖鑒事竊照各直省司庫收支例有專款按年奏銷新疆  
未設行省以前一切款項向歸糧臺辦理十一年藩司到  
任始分別劃歸司庫應卽由司分別造報以符定制茲據  
藩司魏光燾詳稱查新疆三道屬每年入款如折徵糧草  
地課房租牲稅契稅土產貨稅抵發文武廉費俸工驛站  
夫馬工料各款惟喀什噶爾一道尙屬有贏阿克蘇一道



即有不足該兩道離省寫遠各屬領解維艱收支皆歸道  
庫但由司彙總報銷其鎮迪一道歲入僅稅課一項出款  
尤屬不敷一應例支由司庫就近領解欲如內地收支各  
分專款不相牽混勢有不能該司到任之初經臣飭由新  
餉項下暫行撥款支發仿照內地章程設兵餉一款經收  
新餉其各標營官弁俸餉即由兵餉內開支又設公用一  
款經收各屬解交稅課各項銀兩其文職廉費俸工驛站  
等項即由公用款內開支不敷仍由兵餉款內騰挪提用  
至建曠一款現在未辦估撥所有應扣小建等項皆於發  
銀時核除發給實銀並未另行扣儲其應由建曠項下支

發各武職署員錢糧亦卽由兵餉項下統支邀免另造建  
曠款冊應扣六分減平並新章四分減平及應行折減各  
款悉遵部章辦理又該司未經到任之先由糧臺支過文  
職廉俸各款概撥由司庫作收作付惟驛站經費係自十  
一年八月初一日起照

奏定新章起支由司造銷以前概由糧臺照依舊章支發  
仍劃歸糧臺接續造報徵收糧草於十二年始由各屬清  
查科額造冊詳請

奏咨其十一年分仍照實收之數造報支發糧草各歸各  
款分別開支仍彙總請銷各軍營旗及善後各項支領糧

草應扣價銀經糧臺扣解到司者照數作收彙報未經扣解者俟扣解之日作收歸入下屆造報稅課銀兩諸無定額儘收儘報解交司道各庫其由善後項下動用如義學經費各款概行作解糧臺由糧臺作收統支造報旗營經費滿收滿支所有細數由該各營自行造報統計光緒十一年分司庫經收各款銀四十六萬五千四百四十五兩九錢五分開除銀二十六萬九千一百八十四兩八錢五分八釐截至十一年年底止實共存銀一十九萬六千二百六十一兩九分二釐未解銀九千三百七十七兩七分一釐於十二年分解繳動用歸十二年造報又未支銀三萬

八千八百三十八兩二分四釐長支銀一千八十七兩五錢三分四釐分別補支扣還歸入下屆造報附銷又截至十年底止各屬倉儲各色京斗糧二十九萬九千九百七十七石一斗一升一合三勺十一年分共收各色京斗糧一十七萬二千三百三十石五升八合四勺開除各色京斗糧一十七萬二千九百八十二石七斗六升二合三勺實在應存各色京斗糧二十八萬七千三百六十四石九斗八升一合二勺徵收未完籽種額糧一萬三千六百九十五石一斗六升四合七勺未支料三百五十一石六斗一合八勺不敷糧一十七石九斗七升三合八勺又截至十年底止各屬

廠儲草三百五十萬七千二百八斤七兩五錢二分十一  
年分共收草一千一百三萬一千十五斤九兩三錢八分  
開除草六百二十萬三千五百一十三斤十五兩六錢實  
存草八百三十三萬四千七百一十斤一兩三錢徵收未  
完草八十萬八千九百九十二斤四兩四錢未支草二萬六千  
三百八束遵造銀糧草束四柱清單並總散報銷清冊詳  
請

奏咨核銷前來臣覆核無異理合繕具簡明清單恭呈  
御覽仰懇

天恩飭部核銷除將清冊分送部科查核外謹會同陝甘

總督臣譚鍾麟恭摺具

奏伏乞

皇太后

皇上聖鑒訓示謹

奏

硃批戶部知道單二件併發欽此



已故大臣明春請建專祠摺

十二月十九日

奏爲已故大臣邊功卓著遺愛在民籲懇

天恩宣付國史館立傳並請於立功地方建立專祠以彰勞勩而順輿情恭摺仰祈

聖鑒事竊臣前准署塔爾巴哈臺參贊大臣春滿咨開光緒十三年三月十五日奉

上諭前署塔爾巴哈臺參贊大臣明春於咸豐年間由京營出兵從征轉戰安徽河南陝西甘肅等省久歷戎行勤勞懋著前於署塔爾巴哈臺參贊任內因病請假准開署缺調理茲聞溘逝軫惜殊深加恩著照副都統例賜卹任



內一切處分悉予開復靈樞回旗時沿途地方官妥爲照料應得卹典該衙門察例具奏欽此仰見

聖慈懋獎成勞憫恤有加之至意邊陲將吏感勵同深伏查該故大臣靈樞於本年六月由塔爾巴哈臺啟行當卽欽遵轉飭所屬沿途各廳縣一體妥爲照料於七月十七日過省去訖茲據署哈密廳通判喻先麓稟稱准哈密回子親王沙木胡索特移開同治十二年爲逆回所迫盡室以行纏民數千同時被脅流離道路艱苦備嘗光緒二年大軍克復南疆始陸續得還故土而田園廬舍荒蕪殆盡賴故大臣明春之力乃得有以自存故大臣於纏民之始

至也視其飢則食之視其寒則衣之所以慰藉之者無弗至繼乃清其地畝籌給資糧計口授耕勸使復業所以安定之者又無弗至平治道路繕固屯防力所得爲無弗備舉且疏濬龍泉以修水利民尤賴之於其去也攀轅者不絕於道茲聞其溘逝追慕尤深願建立專祠以資報祀移由該廳轉稟懇請具

奏前來臣維該故大臣籍隸蒙古正紅旗由京營應調出征初歷皖豫繼隨原任荊州將軍多隆阿轉戰入秦由秦而隴屢著戰功歷保副都統銜記名副都統博奇巴圖魯同治五年因勦辦肅州踞逆分統一軍以當前敵自平番

以西節節掃蕩破賊於涼州李家東莊復擊退金塔大股  
援賊親冒矢石直抵肅州逼城爲壘與賊相持者六年大  
小數百戰善能以寡擊眾每戰輒有擒斬賊犯各鄉民堡  
輒不分兩夜馳往救援由是所全甚眾十二年四月陝回  
白彥虎率其死黨奔竄出關圍攻安西玉門敦煌等州縣  
甚急經原任伊犁將軍金順

奏派該故大臣統帶健銳等營出關援剿馳逐於三城之  
地歷時三月臥不解衣激勵飢軍人人自奮賊解圍竄去  
奉

旨以哈密幫辦大臣率所部赴援哈密鼓行而西抵哈密

賊又先竄搜剿伏莽務絕根株亂後凡百無存竭力經營  
城防賴以麤備旋以糧餉奇絀移軍就食巴里坤次年追  
剿叛回藍得全身被重傷出血過多由是得病然勇於任  
事志不少衰及光緒二年欽承

恩命爲哈密辦事大臣是時

臣

督隊出關方剿北路該故

大臣屯軍哈密以壯聲援及北路旣平進軍南路該故大  
臣仍辦理後路防務練兵之外專意興屯修濬溝渠籌撥  
牛種廣爲招徠民至如歸南路各軍得無後顧之憂者該  
故大臣力也八年

奏裁所部健銳及威儀兩軍十一年九月奉

旨署理塔爾巴哈臺參贊大臣事務上年春間因病勢日深請開署缺回旗調理八月卸任未及起身卽於本年二月病故該故大臣秉性和平宅心仁厚處僚友一以誠信尤喜扶持善類自奉儉約與士卒同甘苦故人皆樂爲之用在軍中二十餘年家無餘蓄垂沒之日語不及私惟殷殷以未報

國恩爲憾其赴塔爾巴哈臺署任也道過省城臣時亦奉旨將赴伊犁清理餉事因與偕行至西湖分道而去是時其病已深然於嚴寒風雪中猶馳馬日行百餘里勸使小休弗可蓋其堅忍耐勞出於天性者如此在塔爾巴哈臺

遣撤大同鎮換防官兵籌發口糧纖毫無缺軍士歡聲載道方意塔爾巴哈臺防務得該大臣實心經理可以日進有功不謂其止於是也臣與其事有年知之最悉其在哈密任事最久纏民之不忘報脩亦係實情合無仰懇天恩准將該故大臣戰功事蹟

宣付國史館立傳並

准於哈密地方建立專祠以彰勞勩而順輿情出自鴻慈謹恭摺具陳伏乞

皇太后

皇上聖鑒訓示謹

奏

硃批另有旨該部知道欽此

溫宿等處被災請分別蠲緩額徵摺

十二月二十九日

奏爲南路溫宿北路綏來濟木薩等處被水被凍本年應完糧草成本分別應否蠲緩恭摺仰祈

聖鑒事竊鎮西庫爾喀喇烏蘇烏什拜城等廳縣業經飭勘報被災分數

奏請蠲緩在案茲據藩司魏光燾詳據各印委結報查溫宿州屬被水成災十分地三千七百四畝四分應請蠲免十分之七糧六十五石八斗五升五合一勺草八千四百九十五斤十三兩七錢應請緩徵糧二十八石二斗二升三合六勺草三千六百四十一斤一兩三錢分作三年帶



徵又成災八分地三千六百五十七畝四分應請蠲免十分之四糧三十九石九斗五合七勺草五千一斤六兩應請緩徵糧五十九石八斗五升八合五勺草七千五百二斤一兩分作三年帶徵又成災七分地一千七百四十一畝二分八釐應請蠲免十分之二糧八石九斗五升一合七勺草一千一百九十二斤十兩二錢應請緩徵糧三十五石八斗六合五勺草四千七百七十一斤八兩八錢分作二年帶徵又成災六分地九千三百二十八畝三分五釐應請蠲免十分之一糧二十三石一斗五升七合八勺草二千九百七十五斤四兩八錢應請緩徵糧二百八石四

斗二升一合二勺草二萬六千七百七十七斤十一兩二錢分作二年帶徵又收成歉薄地一萬五百九十畝五分七釐額徵糧三百二十三石九斗四升八合九勺草三萬六千三百二十三斤應請緩至來年秋收帶徵緩來縣屬秋禾雖被凍傷查各老戶種有夏糧牽合計算尙不成災惟新戶甫經安插祇種秋禾無可牽補本年應繳成本銀兩應請緩至來年收還濟木薩屬被凍地三千三百六十四畝額徵糧二百石二斗六升三合五勺應請緩至來年秋收帶徵其餘閒有損傷情形較輕應照常徵收以上應蠲應緩各戶均經檄飭先行出示停徵並酌量被災輕重

臣等謹將公奏和  
卷一四  
三  
妥爲賑撫等情具詳請

奏前來臣覆核無異合無仰懇

天恩俯准將溫宿州綏來縣濟木薩縣丞被災地畝應完糧草成本分別蠲緩以示體恤如蒙

俞允卽飭司將蠲緩糧草各數目敬刊謄黃徧行曉諭務令實惠及民以副

皇上軫念災區之至意至來春應否接濟仍俟屆時確察情形斟酌辦理是否有當謹會同陝甘總督臣譚鍾麟恭摺具陳伏乞

皇太后

皇上聖鑒訓示謹

奏

硃批另有旨欽此



光緒十四年正月初四日內閣奉

上諭劉錦棠奏溫宿州等處被災請將額徵糧草分別蠲緩  
一摺新疆南路溫宿州北路綏來縣濟木薩縣丞所屬地  
畝被水被凍致成災歉若將應徵糧草照常徵收民力實  
有未逮加恩著照所請所有溫宿州屬被水成災十分地  
三千七百四畝零著蠲免十分之七糧六十五石零草八  
千四百九十五斤零其應緩徵糧二十八石零草三千六  
百四十一斤零著分作三年帶徵成災八分地三千六百  
五十七畝零著蠲免十分之四糧三十九石零草五千一  
斤零其應緩徵糧五十九石零草七千五百二斤零著分

作三年帶徵成災七分地一千七百四十一畝零著蠲免十分之二糧八石零草一千一百九十二斤零其應緩徵糧三十五石零草四千七百七十斤零著分作二年帶徵成災六分地九千三百二十八畝零著蠲免十分之一糧二十三石零草二千九百七十五斤零其應緩徵糧二百八石零草二萬六千七百七十七斤零分作二年帶徵收成歉薄地一萬五百九十畝零額徵糧三百二十三石零草三萬六千三百二十三斤著緩至光緒十四年秋收後帶徵緩來縣屬應繳成本銀兩著緩至光緒十四年收還濟木薩屬被凍地三千三百六十四畝額徵糧二百石零

著緩至光緒十四年秋收後帶徵以紓民力餘著照所議  
辦理該撫卽刊刻謄黃徧行曉諭務使實惠均霑毋任吏  
胥舞弊用副軫念民艱至意該部知道欽此



皇朝通志卷一百一十四

三

遵保提鎮各員摺

光緒十四年  
三月初一日

奏爲遵

旨列保提鎮各員開具清單恭摺仰祈

聖鑒事竊<sup>臣</sup>前承准軍機大臣字寄光緒十三年四月初

八日奉

上諭提鎮大員均有專闡之責必須才略素優方足以資  
整頓邇來軍務敕平尤應安不忘危物色將才用備任使  
著各直省督撫於軍營著績人員內無論實缺候補各就  
其人之才具或長於陸路或熟於水師出具切實考語分  
別保奏其曾經引見發往各省差委之提鎮各員本欲令

其練習營伍以備緩急並著隨時畱心察看如有才識出眾之員一併奏保聽候簡擢各該督撫身膺疆寄以知人爲最要務當確切考察勿採虛聲勿徇情面用副朝廷訪求人才整飭武備之至意將此各諭令知之欽此伏查關外各軍其人皆歷練有年誠多可用惟地方平定遣撤已多茲謹就現畱新疆及假歸未久各員察其才略出羣及操守尤爲可信者開具考語恭呈

御覽又查有頭品頂戴副都統銜前古城協領堅勇巴圖魯富勒銘額久經戰陣洞達邊情以非提鎮一班未敢開列然前署烏魯木齊領隊並護理都統印務與臣相處知

其實心任事洵將領中不可多得之員合併陳明伏候  
采擇其餘提鎮各員內應膺保列者尙不乏人容臣悉心  
考察隨時開列以仰副

朝廷選拔真才之至意謹恭摺具陳伏乞

皇太后

皇上聖鑒訓示謹

奏

奉

旨畱中欽此



陳明欠餉清理就緒懇指撥以清借款摺

三月初一日

奏爲臣軍欠餉現已清理就緒並擬懇

天恩飭部仍在於原撥欠餉各省關指撥銀二十萬兩以清借款恭摺仰祈

聖鑒事竊照臣軍欠餉截至光緒十年止經部指撥福

建浙江廣東閩海各省關銀二百八十五萬兩內除閩海關解到銀二萬兩餘悉未聞報解臣於上年

奏請由部墊撥銀一百四十萬兩經部議覆奏蒙

恩准撥銀一百萬兩令會同督臣從速料理當將籌辦情

形於上年八月初一日恭摺

奏明在案竊維關外各軍全資協濟各省關歷年轉饋備極勤勞欲求搏節之方當以改發坐糧爲第一義然欠餉未清則坐糧無由速改自蒙

恩准撥此款臣始得有所措施惟願此邊防不容忽視當飭由關內招募新勇四千餘人並就地挑選精壯編爲步隊一營馬隊六旗又據各營旗稟報隨時募補一千八百餘人更番抽換共假遣舊勇八千餘人挑畱舊勇六千餘人其十一年以後新募入營者不在其內仍將畱營舊勇先後截清存餉一律起支坐糧各弁勇積欠既清均無異議此項欠餉除前於十二年發過銀二十八萬六千餘兩

外仍欠銀二百五十六萬四千餘兩內應發遣撤弁勇存  
餉銀一百二十四萬七千餘兩畱營弁勇存餉銀五十二  
萬四千餘兩皆鋒鏑餘生錙銖積累所恃以爲身家之計  
者臣前已陳明不宜短發此次收到庫平銀一百萬兩又  
收到廣東續解庫平銀一萬兩共申合新湘平銀一百五  
萬二千餘兩悉數支發實有不敷譚鍾麟素抱公忠力顧  
大局前於上年春間撥解新疆司庫銀二十萬兩原約存  
儲以備緩急至是臣動用無庸歸款又由蘭州代借商  
款銀二十萬兩以資清發此項借款自應及早籌還際此  
時艱餉源支絀加以河流爲患



宵旰焦勞苟可勉力支撐臣亦何敢再三瀆請籌思無策  
惟有仰懇

天恩飭部仍在於原撥欠餉各省關指撥銀二十萬兩交  
由譚鍾麟列收以便歸款前於十二年所發銀除收到閩  
海關一款餘悉由新餉項下挪移動用本擬於此次經收  
款內勻撥歸還適已支發無餘無從扣抵而除節次發過  
現銀外尙不敷畱營舊勇存餉銀三十一萬九千餘兩查  
江西四川等省尙欠解十一年以後新餉經部臣議准分  
年帶解但使各該省按成解足毫無蒂欠臣自應極力節  
省仍在於此項新餉內酌量勻放隨時列報不敢再有所

請致涉紛歧此外病故勇丁存餉銀十一萬五千餘兩查其家屬各在一方或遲至數年始來具領擬並由以後新餉內陸續查明補給其統領營官應領薪公夫價銀六十

七萬七千餘兩已由

臣宣揚

諭旨勉以公心幸各允從概行報解所有

臣

軍欠餉現已

清釐就緒並擬請籌還借款各緣由謹會同陝甘總督

臣

譚鍾麟恭摺具陳伏乞

皇太后

皇上聖鑒訓示施行謹

奏

硃批著照所請戶部知道欽此

請 卹道員雷聲遠等片

三月初一日

再 臣 於光緒九年三月十六日具

奏請將立功後積勞病故員弁蕭傳薪等議卹一摺尙有遺漏未報員弁容俟陸續查報到日另案辦理奉

旨著照所請該部知道欽此欽遵歷經辦理在案茲查已故二品頂戴甘肅遇缺儘先題奏道前署阿克蘇道雷聲遠四川中江縣人五品頂戴儘先前選用知縣前署疏附縣知縣張介祺浙江餘姚縣人總兵銜畱甘補用副將馬正國甘肅化平廳人該員等均隨征關外有年積勞已久茲或在任病故或在營病故均係軍營立功後積勞病故

合無仰懇

天恩俯准飭部一併照軍營立功後積勞病故例議卹以昭激勸而慰幽魂除咨部外理合附片具陳伏乞

聖鑒訓示謹

奏

硃批雷聲遠等均著交部照軍營立功後積勞病故例議卹欽此

修建南路提鎮衙署並擬續修通省武官營署摺三月二十八日  
奏爲南路提鎮各衙署現擬分別修建並擬陸續籌修通  
省副參游都守等官營署請

旨飭部立案恭摺仰祈

聖鑒事竊南路新設道廳州縣等官臣前奏請興修城工  
十三起衙署十五起所有已竣各工曾於上年恭摺

奏明並飭趕造銷冊在案惟查喀什噶爾提督阿克蘇總  
兵均職在守邊責任綦重而設標既定衙署未修恐外無  
以觀示遠人內無以輯綏眾志當經咨行估辦去後茲據  
會勘估報喀什噶爾地處極邊一切工料均較他處爲貴

木料雖派勇砍伐用費略省而深山窮谷之中車路不通實難搬運及昇至平地僱車轉運尙離城二三百里或四五百里不等運腳極多通盤估計共需銀二萬二千四百餘兩需糧九萬六百餘斤阿克蘇應修鎮署查該處道署尙爲寬敞現擬將道署改作鎮署州署改作道署另修溫宿州署以資節省鎮署計原用銀一萬三千二百餘兩道署計原用銀八千九百餘兩食糧在外新修州署並吏目衙署以及監獄計需銀五千六百餘兩需糧六萬六千六百餘斤據藩司魏光燾詳請具

奏前來臣查所估各工均尙核實分飭趕緊興修工竣造

冊具報至通省撫提鎮各標雖參用勇營章程仍居營壘  
然既各有官守亦須略具規模際此時艱未便率請撥款  
現擬各營所需兵房及哨長巡查應需公廨諸從簡樸均  
令自行修造派勇赴工其副參游都守等官或帶步隊一  
營或帶馬隊一旗概令於營中蓋造營署一所取足辦公  
不求美備惟需用匠工木料等項需費頗鉅應由臣另行  
籌款各營副將及撫標中軍擬各給銀二千兩參將游擊  
擬各給銀一千二百兩都司守備擬各給銀八百兩略資  
津貼邀免造報如此變通辦理庶餉力既紓而辦公亦便  
是否有當謹會同陝甘總督臣譚鍾麟恭摺具



奏伏乞

皇太后

皇上聖鑒訓示飭部立案施行謹

奏

硃批該部知道欽此

估修迪化府及經歷衙署監獄銀數片

三月二十八日

再新疆省城及撫藩衙署各工次第告竣上年曾經

奏明在案惟迪化向係州治自設行省改升爲府並添迪化縣爲附府首縣其舊有州署業經改爲縣署府署暨經歷衙署監獄均須另建當經行司轉飭迪化府知府會同省城工程局委員勘估去後茲據藩司魏光燾詳稱照依例制切實估計共需工料銀九千二百餘兩委屬極力核減懇請與修等情前來

臣

查核屬實除飭一面興修工竣

造冊請銷外謹會同陝甘總督

臣

譚鍾麟附片具陳伏乞

聖鑒飭部立案謹

奏

硃批該部知道欽此

查明新疆現辦稅務情形摺

四月二十五日

奏爲遵照部咨查明新疆現辦稅務各情形恭摺具陳仰  
祈

聖鑒事竊 臣 上年具

奏新疆添設稅務總分各局並請辦洋稅一摺旋准部咨  
所徵貨稅是否往來商稅抑係落地稅銀稅則按值百抽  
稅若干局費應需若干應俟詳細奏明再行核辦等因 臣  
查光緒十一年新設東路哈密北路古城兩局均徵百貨  
入稅一稅之後不復重收上年春間復於西路綏來縣南  
路吐魯番廳添設分局以收兼查並於省城設立總局徵

收落稅以歸畫一大率新疆貨物自東北兩路來者皆陝  
甘山西歸化包頭等處商民販運內地各貨爲數較少自  
西南兩路來者係本地漢回纏商販運一切土貨爲數較  
多現定稅則均值百兩稅銀三兩較值百抽五之例量爲  
核減所需局費查內地抽釐章程准按一成支銷新疆百  
物騰昂創辦艱苦行令實支實銷但不得逾二成之數至  
稱所稅貨物係土人所販土貨抑土人所販洋貨或俄人  
所販土貨等語查洋稅未定先收土稅俄商包庇勢所不  
免已於前奏陳明在案惟現在不能因未辦洋稅並廢土  
稅亦未便獨抽土稅遂棄洋稅設法補救惟有於華商洋

貨稅於入境落地之時俄商洋貨稅於轉售華商之後華商土貨稅收於販戶俄商土貨稅收於賣主徵商人之稅而不經俄商之手彼卽無從置喙辦理亦覺持平然此究屬一時權宜若欲稅務暢興仍非開辦洋稅不可據該總局司道查明詳請

奏咨前來臣覆核無異除洋稅一節仍俟總理衙門核覆再行辦理外所有查明新疆現辦稅務情形謹會同陝甘總督臣譚鍾麟恭摺具陳伏乞

皇太后

皇上聖鑒訓示飭部查核施行謹

奏

殊批該衙門知道欽此

已故大臣左宗棠專祠告成請 飭部立案摺 四月二十五日  
奏爲遵

旨建立已故大臣專祠懇請

敕部立案恭摺仰祈

聖鑒事竊前大學士二等恪靖侯左宗棠光緒十一年因病出缺奉

旨於湖南原籍及立功省分建立專祠等因當飭布政使魏光燾鎮迪道兼按察使銜恩綸道員陳晉蕃王久銘等籌款興修去後旋據各文武員弁捐集款項詳委前署哈密協副將龍在田候補知縣羅正湘會同署迪化縣知縣



陳希洛在於新疆省城南隅擇地建修上年十月祠宇落成當經安位致祭詳請

奏咨立案前來 臣查左宗棠自奉

命進規新疆蕩平南北兩路議設行省允宜隆以享祀上

副

朝廷褒嘉之典下慰軍民酬報之心茲專祠告成除祭祀歲修等項飭由藩司轉飭迪化府縣妥議章程另案咨部外謹恭摺具陳伏乞

皇太后

皇上聖鑒訓示謹

奏

硃批該部知道欽此

臣等謹將此項

奏



巴里坤東關捐建左大臣祠宇並附祀死事立案片四月二十

五  
日

再據巴里坤鎮總兵徐占彪呈稱前大學士左宗棠已於  
省城建立專祠惟查巴里坤城自遭回逆之變滿漢官兵  
士民陣亡傷故甚多經左大臣遣師平定功德昭著令人  
思慕不忘現與護領隊大臣金貴並地方文武於巴里坤  
城東關捐建左大臣祠宇一所查明當日死事官兵士民  
計共一千九百餘名附祀祠內以肅明禮而勵殊俗懇請  
奏咨立案前來臣覆查無異相應請

旨俯准將巴里坤東關捐建前大學士左宗棠祠宇並附

川書力八  
卷一百一十九

祀官兵士民

敕部立案除花名清冊容俟查明另案咨部外謹附片具  
陳伏乞

聖鑒訓示謹

奏

硃批著照所請該部知道欽此

新疆省捐修湘軍忠義祠立案片

四月二十五日

再查烏魯木齊地方自光緒二年克復後經臣在迪化城內擇地捐修湘軍忠義祠一所入祀陣亡傷故文武員弁勇丁並捐置房屋園地水磨作爲香火歲修祭祀等項經費惟時軍務喫緊臣率隊進剿未及入

奏現在烏魯木齊建設新疆行省所有從前捐修湘軍忠義祠相應請

旨飭部立案歲時由地方官致祭以垂久遠而昭激勸除各員弁勇丁姓名並房屋園地水磨租課銀兩飭由藩司轉飭迪化府縣分別查造清單至日另案送部外謹附片

具陳伏乞

聖鑒訓示謹

奏

硃批著照所請該部知道欽此

請設迪化府學額摺

五月十七日

奏爲援案請設新疆迪化府學額以符定制而資鼓勵恭摺仰祈

聖鑒事竊照新疆改建行省經

臣錦棠

奏升迪化州爲迪化府增置迪化縣爲附府首縣以原設州學正爲府教授照舊兼管各縣學事其歲科兩試復經

臣等

奏明仿照都統局試舊章改歸撫

臣辦理各在案上年歲

科並行由

臣錦棠照章局試密封試卷咨由

臣澍春按額

取進因迪化州原管戶籍考試各事宜奏歸迪化縣經理



將原設州學進額改爲迪化縣學額惟府學進額尙未議及據在籍紳士高廷選等稟由前署迪化府知府蔣誥轉詳藩司魏光燾詳請添設前來臣等查甘肅八府府學進額均由所屬各廳州縣額進之外照文風高下酌取撥入迪化等屬自經兵燹學校廢弛底定以來學者漸眾上屆入場人數已較前屆加多旣經設府自應於各縣額進之外酌取府學以符定制惟各屬府學額數多少不一臣錦棠查新疆舊設鎮西府知府管轄兩縣定額府學三名廩生二名增生二名六年一貢嗣改府爲廳府學遂廢今迪化府管轄五縣內迪化昌吉阜康綏來四縣歲科均各取

進四名奇臺一縣歲科各取進五名應設府學學額擬請  
援照鎮西舊案酌量添設迪化爲省會之地文風較盛擬  
於縣學額進之外酌取三名昌吉阜康綏來奇臺文風不  
相上下各於縣學額進之外酌取一名五屬共取七名撥  
入府學歲科兩試一體照辦比較鎮西兩屬撥府三名額  
數尙無加增並請照鎮西府設廩增之例俟府學生員已  
足三十名添設廩生五名增生五名以歲科試優等生員  
充補卽以補廩之日爲始六年一貢以廣  
聖朝作人之化合無仰懇  
天恩飭部議覆如蒙

俞允卽自下屆歲科試起遵照辦理是否有當謹合詞恭摺具

奏伏乞

皇太后

皇上聖鑒訓示施行再此摺係臣錦棠主稿合併聲明謹奏

硃批禮部議奏欽此

酌定伊犁塔旗營員缺並籌辦勇營事務摺

五月二十八日

奏爲查照部議酌定伊犁塔爾巴哈臺各旗營員缺並擬籌辦各勇營事務恭摺仰祈

聖鑒事竊 臣鍾麟前奏請裁撤塔爾巴哈臺參贊大臣員缺以伊犁副都統一員移駐其地其索倫錫伯察哈爾額魯特等部落宜各擇其人派爲總管兼設千戶百戶以相拊制伊犁塔爾巴哈臺旣設道府防營月餉應責成新疆藩司按月解交道府分支各營自行採辦食糧糧局糧員均可裁撤等因經部議覆准裁撤伊犁糧員餘仍令由 臣等詳晰會商奏明辦理於光緒十三年八月初八日具

奏奉

旨依議欽此欽遵咨行到臣現在臣色楞額業已到任伊犁塔爾巴哈臺等處添設道府以下等官亦經部議允准自應會同妥籌辦理伏查伊犁塔爾巴哈臺事同一律伊犁參贊大臣員缺前經部議裁撤改設副都統二員以仿照內地駐防之制塔爾巴哈臺屬境向例亦將軍所轄該處參贊大臣員缺自無須獨畱應請一併裁撤以免歧異伊犁新設副都統二員以一員與將軍同城辦事尙屬裕如應請照臣鍾麟原奏以一員移駐塔爾巴哈臺駐紮該處旗隊向由伊犁換防平定以來大率由本地挑補編列

成營無復換防之事前經臣錦棠奏准額設旗隊千人究應如何改照駐防之處俟此次奉

旨後再由該副都統體察情形會同臣色楞額妥爲定擬其索倫錫伯察哈爾額魯特各部落言語不同性情亦異非各有所屬無以資彈壓而專責成所有伊犁現存之領隊大臣四缺應請毋庸裁撤其塔爾巴哈臺領隊大臣一缺應否裁撤亦應俟副都統移定後再行定擬各該領隊大臣及新設之副都統均歸將軍統轄伊犁將軍仍節制伊犁鎮道如此酌量變通庶幾法制相維而事機亦順矣伊犁糧員既經部議裁撤以後各該處月餉均應按照部

議由新疆藩司按月撥解分支各營應領食糧由各營自行採買伊犁月餉解由該道收支塔爾巴哈臺既改定同知員缺該處月餉亦應解由該同知收支以歸畫一其各該處額設之糧餉章京應否裁撤應俟各旗營事定再由臣色楞額察酌具

奏至各該處防營均應及時整頓前經臣錦棠於上年九月

奏明俟設官議定後除各旗營應由將軍參贊妥籌布置外其鎮協各標臣自應悉心籌議奉

旨允准欽遵在案現在臣色楞額到任正在接收交代而

錫綸病故比飭經手各員將錫綸任內一切應交案件迅速清理並由臣錦棠咨明俟接收交代後按照原議將勇營事務截清起止交由臣錦棠會商辦理仍一面檄飭各統領營官核清存餉趕造清冊以便及時裁併按照原奏額設四千人之數改定標營塔爾巴哈臺事務應俟伊犁諸務辦理就緒再行接辦其餘一切未盡事宜容臣等隨時會商陸續

奏明辦理所有查照部議先行定擬各情形是否有當謹合詞恭摺具

奏伏乞



皇太后

皇上聖鑒訓示施行再此摺係由臣錦棠主稿合併聲明

謹

奏

硃批該部議奏欽此

龍神靈應請 敕加封號摺

六月十二日

奏爲廟祀正神靈應顯著懇

恩敕加封號以答

神庥恭摺仰祈

聖鑒事竊據護迪化府知府迪化縣知縣陳希洛詳據紳民高廷選等稟稱迪化城西關向建有

龍神祠靈應素著已歷年所今歲夏間雨澤愆期經官紳戶民虔誠祈禱立沛甘霖禦災無形不致旱魃爲虐洵屬效靈助順允宜

曠典崇封聯名稟懇由府轉詳請

奏前來臣查廟祀正神實能禦灾捍患有功德於民者例得請加

封號前迪化府

城隍神靈顯應經臣於上年奏准

敕封靈感欽遵在案茲迪化城西關

龍神靈應屢著功德及民合無仰懇

天恩敕加封號以答

神庥而順輿情謹會同陝甘總督臣譚鍾麟恭摺具陳是

否有當伏乞

皇太后

皇上聖鑒訓示施行謹

奏

硃批禮部議奏欽此



請 旌節婦陳王氏摺 六月十日

奏爲已故節婦年例相符懇

恩旌表以維風化恭摺仰祈

聖鑒事竊據新疆布政使魏光燾詳據鎮西廳同知甘承  
謨詳准署鎮西廳訓導劉柱南牒轉在籍新選甘肅秦安  
縣訓導常九齡等呈稱查有已故節婦陳王氏係里民王  
林之女

馳贈昭武都尉陳萬選之妻陳吉之母遊擊銜儘先都司  
借補呼圖壁守備陳登魁補用守備借補巴里坤鎮標千  
總陳發魁之祖母年十六于歸事姑孝姑沒哀毀盡禮嘉

慶二十五年萬選病故氏年二十九歲慟不欲生旋以子吉纔數齡矢志撫孤因強起營祭葬繼爲吉擇配生兩孫家貧恆藉紡績市薪米嗣遭吉入伍吉夫婦復先後病歿氏又撫二孫成立仍效力行間同治初逆回構亂廳城瀕於危者屢氏輒以奮勇殺賊爲二孫勗城卒無恙登魁等亦遂以軍功累保今職氏歿於同治三年冬計守節四十四年光緒七年恭逢

覃恩蒙

賞給四品

封典職等誼屬同鄉見聞較確未便聽其湮沒勿彰造具

事實冊結聯名呈懇由學及廳依次加結詳司核轉前來  
臣查定例直省節孝婦女應

旌表者由該督撫學政會同具

題並取具冊結送部核議題准後令地方官給銀三十兩  
聽本家建坊等因歷經遵奉在案茲據詳前情臣覆核無  
異合無仰懇

天恩俯准

敕部核議照例

旌表以彰苦節而維風化除將事實冊結咨部外謹會同  
陝甘總督臣譚鍾麟甘肅學政臣秦澍春恭摺具陳伏乞



皇太后

皇上聖鑒訓示再上年禮部奏請通行各省嗣後貞孝節烈婦女應照舊具題如再有違例奏請者應將該督撫隨本附參送交吏部議處等因新疆初設行省一切例案均係改題爲奏未能照例辦理邀免議處合併聲明謹

奏

硃批著照所請禮部知道欽此

訊明潰弁就地正法片

六月十二日

再查上年六月二十七日夜塔爾巴哈臺綏靖中營勇丁潰變該營哨官杜天成張玉成於潰勇戕殺營官後均私取營官馬匹槍礮帶同潰勇搶掠參贊衙署並攻撲開花礮隊事後同逃經庫爾喀喇烏蘇防營盤獲送廳錄供詳由臣批飭提省發審因供詞狡展飭候咨查於上年九月間

奏明俟查取確情再行核辦在案茲准署塔爾巴哈臺參贊大臣額爾慶額咨覆詢據前綏靖左營幫辦陳芝廷並各勇丁等僉稱是晚確見該犯帶領潰勇攻逼營壘搶掠

衙署等情咨請從嚴懲辦前來臣飭營務處道員袁鴻祐  
提案覆鞫該二犯供認前情不諱臣查杜天成張玉成身  
充哨弁膽敢帶領潰勇攻打礮隊搶劫衙署實屬罪大惡  
極當於訊明後綁赴市曹就地正法並梟首示眾以昭炯  
戒所有訊明潰弁杜天成張玉成就地正法緣由謹附片  
具

奏伏乞

聖鑒訓示謹

奏

硃批刑部知道欽此

關外七八兩年報銷覆陳部駁懇  
飭准銷摺

六月二十一日

奏爲甘肅關外光緒七八兩年報銷三次部駁謹再開具  
詳細清單逐款覆陳籲懇

天恩飭部准銷恭摺仰祈

聖鑒事竊臣准戶部咨三次核駁甘肅關外登覆七八兩  
年開單報銷一摺計鈔單一紙等因當經轉行遵辦去後  
茲據糧臺司道遵照部駁各節詳細核明於單內逐一登  
覆詳請具

奏前來臣查支發楚皖蜀各軍統費長夫口糧暨湘軍各  
營旗分統營務處公費照章核算除准銷外有著之款已

遵照追繳歸入十一年銷案內列收造報惟已故烏魯木  
齊提督金運昌已故甯夏鎮總兵譚拔萃按照部章核計  
溢支之款本應刪除第該二員從征日久積勞病故查已  
故道員羅長祐可否免其著追既經部議請

旨該二員事同一律應懇一併邀

恩免追以示體恤至採買一節遵查同治五年二月欽奉  
上諭從前南省勇丁以甘肅地方瘠苦多不願往若將調  
赴甘肅勇丁酌增餉銀若干當可樂於從事益加奮勉等  
因欽此前督臣左宗棠入關度隴仰體

皇仁奏明軍行寒苦荒瘠之區復當兵燹之後物產既絀

陸運又極艱難於正餉外分途設局採運糧料柴草以資  
津貼光緒四五六等年支發採買軍糧米麩草料價值除  
轉發各營扣回價銀外實銷津貼糧價銀五十三萬餘兩  
腳價等項銀一百六十餘萬兩 臣接綰

欽符駐師哈密適值大亂初平元氣未復非得糧價平減  
災黎尤難度日因照舊章辦理酌畱本地之糧以養孑遺  
委員分途採運以供軍食道理之遠運費之艱不暇計也  
雖源源轉饋尙慮不支偶遇糧運稍遲市價驟增倍蓰若  
概就地採買荒苦之區不難搜括殆盡民旣無以爲食軍  
糧仍屬不敷饑潰堪虞軍民交病何敢不先事預籌此辦

理採運之實在情形也臣查光緒十二年四月戶部覆核新疆各營支款章程單內第十三條謂運費雖不便一概議裁採運似可稍從節省是關外情形不同部臣早已曲爲體諒現在新疆防營漸次規復標營兵制如果年穀順成採運自可停止各軍駐紮之所有徵糧者卽由徵糧項下估撥其無徵糧與有徵糧而不敷估撥者亦應由各營自行採買以圖節省惟從前已支之款當此時局艱難在部臣一再議刪固爲慎重度支起見臣受恩深重如果非實用實銷亦曷敢自蹈欺飾之罪且查關內七八兩年採糧價銀七萬餘兩遵照部議刪除係由欠

餉劃抵徵臣賦性愚戇十年以前欠餉除發過現銀及不敷畱營存餉三十一萬餘兩萬難短發外實已報繳銀六十七萬餘兩抵無可抵銷不准銷中夜徬徨莫知所措所有七八兩年分支發採買糧料柴草價銀一十七萬六千六百九十餘兩運糧腳價銀三十六萬一千二百八十餘兩又由關內造報提運撫彝高臺採買糧石腳價銀九千三百餘兩委係核實辦公毫無冒濫合無仰懇天恩特允所請

飭下戶兵等部一併照單准銷以清積案出自  
逾格鴻慈臣不勝悚惶迫切待



命之至除咨部外謹會同陝甘總督臣譚鍾麟繕單恭摺具陳伏乞

皇太后

皇上聖鑒訓示謹

奏

硃批著照所請該部知道單併發欽此

劉襄勤公奏稿卷十五 起光緒十四年七月訖十二月

目錄

烏垣滿營官兵遷併古城到防日期摺

請將提督董福祥等十四員畱甘肅新疆補用片

清欠不敷動用司庫商借銀兩分別抵銷歸還摺

假期已滿病難速痊懇准開缺回籍就醫藉遂烏

私摺

哈密吐魯番庫車回子王等年班懇分年分班赴京

摺

新疆撫標城守各營添改副參游都守等缺均作題

劉襄勤公奏稿卷十五 目錄

缺摺

伊犁營勇亟宜裁汰整頓摺

布政司魏光燾暫緩 陛見摺

烏魯木齊提標參游以下一律開缺分別咨補摺

請 旌烈婦周羅氏摺

新疆助墾人犯在配脫逃請 飭部議罪名摺

援案估計光緒十五年新疆餉銀懇 飭部核撥彙

入關內新餉統收分支摺

新疆第一次遵辦鄭工新例捐輸懇 飭分別獎敘

摺

代奏回子親王懇請暫緩進京 朝賀摺

請將提督黃萬鵬等二十二員名畱於甘肅新疆儘先補用片

籌議移併古城滿營官兵隨缺地畝並懇暫緩屯墾摺

遵 旨整頓伊犁勇營先將擬辦情形陳明摺

甬路已修城署經費懇 飭部核銷並請 飭催各

省關欠解銀兩以清墊款摺

請 旌節婦王劉氏摺

覆陳光緒九十兩年報銷部議刪除行查各款懇

飭核銷摺

懇 恩展假數月回籍省親摺

請 簡放新疆提督總兵各員缺摺

陳喀什提督阿克蘇總兵可否以譚上連董福祥補授片

遵 旨清結中俄積案並陳交涉情形摺

光緒十一年分防軍善後收支懇 飭核銷摺

光緒十二年分司庫收支懇 飭核銷摺

巴里坤鎮標原補副游都守一律開缺另行請補摺

伊犁新設正佐各官關防印信請 飭鑄造頒發摺

光緒十二年分防軍善後收支懇 飭核銷摺

別製功公奏稿 卷下五目錄

三



烏垣滿營官兵遷併古城到防日期摺

七月初一日

奏爲恭報烏魯木齊滿營官兵遷併古城到防日期謹繕摺具陳仰祈

聖鑒事竊照旗營遷併古城定議已久本年春間據該工程局委員呈報古城衙署兵房各工漸次完竣請飭趕緊遷徙以資照料當經飭據藩司議給盤費車輛鹽菜等項並借支俸餉以便清理刻期就道去後茲據古城城守尉德勝呈稱飭派署左翼佐領德克吉本帶領烏魯木齊滿營頭起兵眷署右翼防禦伊克精額帶領烏魯木齊滿營二起兵眷並軍裝車輛暨該城守尉率帶書吏戈什人等



先後起程於六月初四初七初九十一等日均到古城防  
所各按旗色方向安置等情呈報前來臣覆查無異所有  
烏魯木齊滿營官兵遷併古城到防日期謹會同伊犁將  
軍臣色楞額陝甘總督臣譚鍾麟恭摺具陳伏乞  
皇太后

皇上聖鑒謹

奏

硃批該部知道欽此

請將提督董福祥等十四員畱於甘肅新疆補用片

七月初一日

再投效新疆及隨臣征剿各武員多由軍營立功堪資差遣除曾經奏畱改畱甘肅補用者均毋庸議外其有未經奏改者亟應照章

奏明改畱甘肅新疆補用以資得力而符定制茲查有現署理阿克蘇鎮總兵頭品頂戴題奏提督雲騎尉世職阿爾杭阿巴圖魯董福祥頭品頂戴題奏提督倭欣巴圖魯張俊頭品頂戴記名提督訥齊欣巴圖魯杜錫斌頭品頂戴記名提督奇臣巴圖魯張宗本記名提督年常阿巴圖

魯楊先勝記名提督訥恩登額巴圖魯趙奉樂記名提督  
利勇巴圖魯牛允誠提督銜記名總兵年常阿巴圖魯禹  
中海題奏總兵博卿額巴圖魯查春華儘先補用副將張  
天有副將銜儘先補用參將育勇巴圖魯張宗文參將銜  
儘先補用游擊藍德清二品頂戴儘先補用游擊武勇巴  
圖魯廖克明儘先補用都司張鴻疇等十四員均在新疆  
帶隊屢著戰功熟習邊防營伍若以原官原銜畱於甘肅  
新疆儘先補用於營伍邊防實有裨益合無仰懇  
天恩俯准將董福祥等十四員一併畱於甘肅新疆補用

出自

鴻慈除飭取該員等履歷清冊另咨送部並俟續查尙有  
堪畱差遣之員再行陳奏外謹會同陝甘總督臣譚鍾麟  
附片具陳伏乞

聖鑒訓示謹

奏

硃批著照所請兵部知道欽此



清欠不敷動用司庫商借銀兩應分別抵銷歸還摺七月初七日

奏爲臣軍清欠不敷動用甘肅撥存司庫銀兩及由商號代借銀兩實應分別抵銷歸還恭摺具陳仰祈

聖鑒事竊臣准戶部咨議覆新疆欠餉清理就緒一摺內稱撥解代借各款案據兩歧請

旨飭令詳細查明報部核辦等因臣正擬覆奏間適准督臣譚鍾麟咨到查明新疆借款摺稿逐加查核前項撥存代借之四十萬兩不在部撥百萬之內譚鍾麟已詳細聲覆臣可毋庸復贅惟查譚鍾麟所奏各節有不能不陳於

君父之前者臣前奏清理欠餉原請撥部款一百四十萬兩已屬減而又減未敢以爲此數卽能敷用嗣譚鍾麟奏請

飭部借撥庫銀七十萬兩由甘庫四分平餘項下撥銀十餘萬飭司挪移銀十餘萬挪撥之款勢須劃還幸蒙

聖慈明察已先飭部指撥的款一百萬款歸有著臣始得有所藉手既因假遣甚眾實在不敷復向函商乃稱去冬所解二十萬不妨動用若百二十萬外尙不敷銀十餘萬兩當極力設法籌辦等語臣是以復將撥存司庫銀二十萬兩動用支發並乞代挪商款以了此事其撥存司庫之

款原係十二年冬間由甘肅起解十三年春間始行解到其時譚鍾麟實有來信謂不扣還後又有信囑將此款由臣奏明臣是以前奏有毋庸歸款之語其由蘭州代借之款譚鍾麟上年奏催江西四川欠解十一二年新餉內稱新疆撫臣應分三十八九萬如果兩省如數解到自應先其所急儘發欠餉而咨報起解商款文內則又謂擬在十四年應分關外新餉內劃扣臣以江西四川欠解之款尙待支發畱營舊勇存餉本年新餉亦指濟本年之用其不可扣畱之故亦疊次專函告明是未具奏之先實已商之再四現在疊准咨稱已於江西四川補解十一二年關外



應分欠餉內扣去庫平銀九萬二千八百餘兩又由本年關外應分新餉內先後扣去銀四萬兩餉由關內分支自難阻其不扣惟光緒七年以後歲餉經前督臣左宗棠奏定以六成劃分新疆四成劃留甘肅查前伊犁將軍金順七年分需餉甚殷經前護督臣楊昌濬商由關內外分借以濟眉急嗣據甘肅總糧臺齎到分餉清摺關內借撥之八萬兩係歸十成公用截算關外借撥之十四萬二千兩悉於新疆六成協餉內劃除計應由關內補解銀五萬六千八百兩烏魯木齊制兵額餉例由甘藩庫支發譚鍾麟商臣改勇爲兵仍束以防營之制團紮訓練俾復步兵舊

額之半名曰土勇餉章謂較甘兵爲優庫支恐干部詰因  
囑臣改由營發計從八年七月初一日起應由關內補解  
銀二十四萬五千四百三十八兩二錢哈密巴里坤等處  
軍塘經費亦係司庫例支前護督臣楊昌濬商請做照司  
庫向糧臺撥款成案於行營糧臺撥發銀兩作爲司中借  
款計從七年支發起應由關內補解銀五萬九百一兩一  
錢六分五釐七毫四絲四忽以上七八九十等年共欠解  
關外湘平銀三十五萬三千一百三十九兩三錢六分五  
釐七毫四絲四忽譚鍾麟撥解新疆司庫銀二十萬兩卽  
悉數抵欠尙不敷銀一十五萬餘兩此外有無別項尙未

逐細勾稽臣初亦以關外爲督臣所轄協餉賴其轉輸是以每自思維苟於公用無虧亦從不敢與之計較關外分餉雖倍半於關內關外防軍亦倍半於關內餉歸正用似不得謂之揮霍但舉關外應得之餉畀之關外何敢於關內所有格外取求臣前摺已奉

硃批著照所請譚鍾麟若必指由蘭州代借之款於關外新餉內取償是臣部畱營舊勇存餉終歸無著本年之餉必至又啟新虧清欠之局仍不能一了百了惟有仰懇天恩飭部仍遵前

旨在於原撥欠餉各省關指撥的款銀二十萬兩速清此

款俾免虛懸譚鍾麟所扣之銀仍令照數補解各歸各款以符原案而免歧異其七八九十等年欠解關外銀兩除以撥存司庫二十萬飭臺列收抵解外其餘下欠一十五萬餘兩如何著落應由譚鍾麟據實奏明至新疆支款臣自當督飭藩司如能節省一分卽封存一分隨時奏咨立案不得指爲甘肅撥存之款臣忝膺疆寄幕友固所必需然一應公事究無不由臣自主合併聲明所有關外清欠不敷動用甘肅撥存司庫及由商號代借各銀兩分別抵銷歸還緣由謹據實恭摺具奏伏乞

皇太后

皇上聖鑒訓示謹

奏

硃批戶部議奏欽此

假期已滿病難速痊懇 准開缺回籍就醫藉遂烏私摺

七月十

九日

奏爲 微臣 假期已滿病難速痊仍懇

天恩允准開缺回籍就醫藉遂烏私恭摺仰祈

聖鑒事竊 臣 前奏懇請開缺回籍就醫於光緒十四年三  
月十五日差弁齎回原摺奉

硃批覽奏殊深塵系新疆地方緊要該撫辦事諸臻妥協  
朝廷正資倚任著再賞假四月安心調理毋庸開缺欽此  
跪聆之下感激涕零伏念 臣 自臥病以來已逾一稔初蒙  
恩賞假三月繼又蒙

恩賞假兩月未能自力已懼曠官茲復仰荷殊施有逾常格以

朝廷之宵旰寬臣子之職司聞

命悚惶罔知所措急欲醫治就愈以期上慰

宸廑無如積病已深急難求效現在假期又已屆滿而手足麻木如故或與僚屬接見坐未數語而腳筋抽轉其緊若弦雖使數人按之不能少止如此數四其苦異常下久血虛昏倦特甚臣所以刻難再緩者亦誠以邊方緊要未可稍有疏虞而臣以久病之身肩此重任日復一日遺誤必多且臣祖母年高望臣最苦臣前以

諭旨有國爾忘家之

訓未敢再四陳情然烏烏之私實難自己向使邊隅未靖  
臣不敢以此爲辭今仰賴

宸謨邊陲無事如臣久病復何所施惟有仍懇

天恩允准開缺

迅賜簡放人員俾臣得回籍就醫兼伸定省親心少慰臣  
病略痊卽當趨叩

闕廷求

賞差使斷不敢少耽安逸有負

生成臣不勝迫切屏營之至謹恭摺瀝陳伏乞



皇太后

皇上聖鑒訓示施行謹

奏

硃批據奏病久未痊殊深系念新疆地處邊陲責任綦重該撫威望素著倚畀正殷著再賞假六箇月安心調理毋庸開缺並賞給人蔭八兩俾資調攝欽此

哈密吐魯番庫車回子王等年班懇分年分班赴京摺月七

二十  
六日

奏爲哈密吐魯番庫車回子王等

年班擬懇援案分年分班赴京朝

覲以示懷柔而加體恤恭摺仰祈

聖鑒事竊 臣准理藩院咨奏回子王等應行來京

年班班次一片於光緒十四年五月二十三日具

奏本日奉

旨依議欽此欽遵咨行前來查原奏內稱回子王等

年班例載本未明晰應另定班次將哈密吐魯番庫車回

鑒事 卷一 五  
子王等三人定爲三班均令其間二年來京該班一次總  
期每年有回子王一人來京其本年

年班應令其次之吐魯番回子王瑪木特來京該班等因  
當經欽遵轉行去後旋據瑪木特呈稱世爵自承襲以來  
未得瞻仰

天顏稍抒忱悃自應赴京該班以崇

盛典惟兵燹之後拮据異常前蒙借支歷年廉俸早經修  
理衙署墳墓動用無存目下負債纍纍新疆距京甚遙往  
返旅費無從籌措懇請再行展限三年以紓困苦等情臣  
查嘉慶十六年奉

上諭鐵保等奏阿奇木伯克入覲年班懇恩展限一摺阿奇木伯克等年班瞻覲之例向係分爲六班六年一輪爲期旣速其程途迂遠往返旅費亦未免拮据著照鐵保等所請所有八城回子阿奇木伯克等年班加恩改爲九班俾三品阿奇木俱得一律領班而四品以下伯克亦得稍爲寬假以昭體制而示優恤等因欽此又道光十年正月二十六日內閣奉

上諭向來回子伯克每年朝覲九班輪流惟念萬里馳驅載途雨雪朕俯懷況瘁爲期未免過勤著加恩自道光十九年起回子伯克年班改爲間二年朝覲仍照舊九班輪

流第一班著於道光二十一年來京第二班著於二十四  
年來京此後俱照此辦理用示朕懷柔遠服體恤優加至  
意等因欽此現在新疆改設行省阿奇木伯克業已裁撤  
僅存哈密吐魯番庫車回子王等三人內哈密回子親王  
所部回眾尙多差堪自立其吐魯番庫車回子郡王自前  
遭兵燹家產蕩盡雖承襲世爵無阿奇木伯克可兼而廉  
俸無幾卯糧寅支負債旣深拮据萬狀茲瑪木特呈稱旅  
費無從籌措懇展限三年亦係實在情形合無仰懇  
天恩飭下理藩院核議准援照道光十年間二年朝  
覲成案將該回子王等仍分三班哈密札薩克回子親王

沙木胡索特已於光緒十二年進京該班一次應卽作爲  
第一班其吐魯番札薩克回子郡王瑪木特請作爲第二  
班於十五年進京該班一次庫車回子郡王阿密特請作  
爲第三班於十八年進京該班一次以後照此遞推辦理  
爲期旣不過迫其力自可稍紓該回子王等自當各效悃  
忱不敢再有違誤實足以存體制而示優恤所有哈密吐  
魯番庫車回子王等

年班擬請援案分年分班朝

覲緣由是否有當謹會同陝甘總督臣譚鍾麟恭摺具陳  
伏乞

皇太后

皇上聖鑒訓示謹

奏

硃批該衙門議奏欽此

皇太后

三

新疆撫標城守各營添改副參游都守等缺均作題缺摺

七月二

十九日

奏爲新疆撫標暨城守各營添設副參游都守等缺均請  
作爲題缺由外揀員請補以重邊防恭摺仰祈

聖鑒事竊臣等准兵部咨稱應將新疆改設撫標中左右  
三營省城城守營喀喇巴爾噶遜營瑪納斯協營濟木薩  
營庫爾喀喇烏蘇營精河營及添設之吐魯番營副參游  
都守等缺均應作何項之缺體察情形迅卽奏明辦理至  
現設各缺並令查明堪勝改缺之任者分別奏咨報部以  
憑換劄註冊人地未宜者奏明開缺另補以符定制等因



堂經行司妥議去後茲據藩司魏光燾鎮迪道兼按察使  
銜恩綸會詳稱新疆撫標及城守各營副參游都守等官  
員缺係以烏魯木齊提標所部各營員缺體察情形分別  
改設添設計改設撫標中營參將一員守備二員左營游  
擊一員守備二員右營游擊一員守備二員省城城守營  
副將一員都司二員守備一員喀喇巴爾噶遜營守備一  
員瑪納斯協營副將一員都司二員守備一員濟木薩營  
參將一員守備一員庫爾喀喇烏蘇營游擊一員守備一  
員精河營參將一員守備一員添設吐魯番營游擊一員  
守備一員其各該員缺從前均定由外揀選題補誠以地

處極邊界連外部兵政極關緊要非洞悉邊情練習營務之員難期勝任現雖建置行省而情形今昔則同所有改設添設撫標中左右三營省城城守營喀喇巴爾噶遜營瑪納斯協營濟木薩營庫爾喀喇烏蘇營精河營及添設之吐魯番營副參游都守等缺應請均作爲題缺由外揀員請補詳請具

奏前來 臣等查新疆設立行省營制參用勇章係屬因地制宜其副將以下員缺必得熟悉地方情形明幹有爲之員方足以資治理合無仰懇

天恩俯准將新疆撫標並城守等營副參游都守等缺均

作爲題缺由外揀員請補如蒙

俞允臣等卽遵照部議將堪勝改缺之任者分別奏咨報部換劄註冊人地未宜者奏明開缺另行揀員請補以重邊防而資得力所有新疆撫標並城守等營員缺均請作爲題缺由外揀補緣由謹合詞恭摺具陳伏乞

皇太后

皇上聖鑒訓示施行再此摺係臣錦棠主稿合併聲明謹奏

硃批兵部議奏欽此

伊犁營勇亟宜裁汰整頓摺

八月十二日

奏為伊犁營勇積習太深亟宜大加裁汰查照原議改定標營以資整頓而重邊圉恭摺仰祈

聖鑒事竊臣准伊犁將軍臣色楞額咨奏酌遣伊犁勇隊款項無出顛懇

特恩飭撥銀十五萬兩以維危局一摺臣維伊犁營勇積習之深已非一日從前藉索餉為名屢次滋事至於戕害營官逃回大西溝勾結匪徒乘機滋擾幸蒙

天恩飭撥部款三十萬兩交臣會同前署將軍臣錫綸核實查點分別入營久暫欠餉多少分成勻給並將勇丁應

副漢勛公奏高

卷五十五

五

去應畱查明歸併臣與錫綸等欽遵辦理數年以來大西溝一帶匪徒幸已斂戢惟營勇闡餉幾成慣技臣前於回省後請設立伊塔道府等官並擬改定標營力祛積弊尙未舉行而錫綸於上年冬間有裁遣惠遠等旗之議各該旗弁勇遂請於截算存餉外加給資費錫綸亦無可如何飭令暫緩勿裁得以無事至本年將軍臣色楞額到任臣比咨商將伊犁各勇定期交割以便假遣另補漸改標營旋准咨覆察看各營旗勇數尙浮於原額似可無須另行募補及動用經費有無存儲未准前任移交等語臣時已接准設官部覆卽委候補道陳晉蕃署理伊塔道篆以期

先辦地方之事詎料該道行至大河沿一帶前途函牘紛來謂此後防營月餉按月解由該道分支各營俟其到後定索取從前餉項其實防營並未交割餉仍由將軍照舊派員領解而營勇不知也及抵綏定果譎言四起羣情洶洶軍標衛隊綏定各勇丁藉索存餉攔輿遞稟來者麇集該道見其人數眾多逼近俄界儻有意外之變必致貽笑俄人又未攜帶卷宗無從查悉而人言紛紛深懼釀成事變不得已批准代懇補給具稟前來臣查光緒十一年冬間奉

旨清理伊犁欠餉其時前將軍臣金順移交案卷於各該

營勇祇有入伍日期並無存餉實數卽問之各營某人應得若干亦皆不能自舉再四思維不得不就部撥之實銀爲按年勻給之公議查明畱營勇丁入伍在一年之內者發存餉銀四兩一年之外每歲酌加銀二兩按年遞加積至十年發銀二十二兩以十年爲斷其裁撤回籍者酌加一倍寄居落業者酌加半倍約共用去銀二十一萬五六千兩一律發給清楚下存之銀移交錫綸作爲吉江馬隊遣撤盤費以後月餉自十二年二月起照楚軍行糧章程按月關發不得少有剋扣原以當日部撥之款祇有此數不能不盡此了結其遣撤回籍加倍給領者則以年分較

淺之勇所得無幾一旦裁假不但不能回籍且不能出伊犁境地因酌其盈虛務期均一其實數雖略加終不若畱營勇丁新餉毫無短欠當經臣與錫綸會商各統領營旗官傳諭各弁勇僉稱辦理持平毫無異議並無畱營勇丁尙有應領加項存俟准假找給之事乃伊犁防軍驕蹇成習不思該道赴任本係辦理地方之事與防營絕無干涉輒敢虛聲恫喝聚眾攔索誠如色楞額前奏所云動以欠餉挾制官司且防營未准造冊移交應由將軍主政不獨該道不能干預臣亦不得與聞該道不應批覆當經臣嚴切批斥並分別咨行查照仍將該道撤任各在案色楞



額旋以眾議紛紛復經批准並請

旨撥款以定軍心

臣

維當日清理欠餉是否舊營勇丁尙

有加項存畱未發奏案具在無容深辯且該處營勇積習  
既深每有裁遣卽相聚而譁其意不專在索餉加以遊手  
無賴之徒雜處城廂內外幸災樂禍與營勇聯絡一氣幾  
成牢不可破之勢若不大加裁汰改定標營一洗從前惡  
習縱敷衍目前苟安無事如治疾不抉其根觸邪卽發終  
非邊陲之福此次色楞額

奏請撥款如蒙

聖慈允准自應由色楞額妥爲清理

臣

於事前既未嘗許

之以此此時色楞額准其發給臣卽未便與聞惟於清理之後應請

旨飭下伊犁將軍核實挑畱餘悉妥爲遣撤臣現因伊犁新設甯遠縣一帶防務空虚已檄飭提督張懷玉督帶馬步三營旗前往駐紮如該處各營旗遣撤之後不敷原奏四千人之額再由臣調派營旗進駐防守以資抽換庶兵制易復餉力亦紓而邊境亦可期安靜矣臣爲整頓邊防起見是否有當謹恭摺具陳伏乞

皇太后

皇上聖鑒訓示施行謹

奏

奏

殊批另有旨欽此

布政司魏光燾暫緩

陛見片

八月十二日

再據甘肅新疆布政使魏光燾詳稱光緒六年在平慶涇固道任內因

大計保薦卓異及本任俸滿併案請咨赴部引

見蒙

恩召見一次領照回甘旋署甘肅按察使七年正月補授甘肅按察使九年三月補授甘肅布政使十年十月調補新疆布政使均於叩謝

天恩摺內籲懇

陛見奉

旨著毋庸來見欽此遵於十一年四月二十八日到新疆  
藩司任扣至十四年四月任滿計自六年同甘以後迄今  
已閱八載應請

陛見以伸犬馬依戀之忱等情詳請代

奏前來臣查藩司魏光燾器識閎通當新疆改設行省之

初事務極繁創始匪易該司在任三載於用人理財諸要  
政殫竭盡惻因地制宜罔不措置裕如悉臻妥善且素嫻  
軍旅洞達邊情臣派兼管營務兵制餉章力求整頓深資  
臂助臣自膺疆寄病苦侵尋現復陳情開缺回籍醫治藩  
司責任綦重未便遽易生手可否仰懇

天恩准藩司魏光燾暫緩

陛見之處恭候

命下遵行謹附片具陳伏乞

聖鑒訓示謹

奏

硃批著照所請欽此

各縣軍實公考和

三

烏魯木齊提標參游以下一律開缺分別咨補摺

八月二十二日

奏爲烏魯木齊提標原設參游以下等官擬請先行一律開去實缺再分別奏咨改補另補以收實效而裨營伍恭摺仰祈

聖鑒事竊新疆撫標並城守等營添設副參游都守等官均請作爲題缺由外揀補業經具

奏在案惟查提標原設各缺前准部議所有裁撤各員弁應卽畱於該省遇缺另補其現設各缺應令查明堪勝改缺之任者卽行分別奏咨報部換割註冊令其赴任人地未宜者亦卽奏明開缺另揀熟悉地方情形明幹有爲之



員請補等因 臣等查新疆議設撫標等營原係因勇設標以官帶勇或就原設之營量爲移改或按新立營標分別添設營制既別別餉章各殊所設原缺揆諸舊制大缺改小者有之小缺改大者有之情形本自不一而舊有實缺員弁有現充別營旗哨等官者有畱他軍差遣者有署事關內者有請假回籍者且有查無下落者而新設馬步營旗需員訓練不能懸缺以待若拘泥牽合殊多窒礙卽應領廉俸薪蔬等項不先截清起止新舊互異支發亦涉紛歧相應請

旨飭部將烏魯木齊提標中左右營迪化城守營喀喇巴

爾噶遜營瑪納斯協營濟木薩營庫爾喀喇烏蘇營精河  
營舊有參游以下等官先行一律開去實缺截至奉到此  
次部文之日止俾清界限仍由臣等細心察看查明堪勝  
改缺之任者分別奏咨報銷註冊人地未宜者揀員另補  
以收實效核與部章亦屬相符於營伍不無裨益除節取  
各該員弁原領劄付另案咨繳并將干把經制外委等缺  
咨部辦理外所有請開烏魯木齊提標參游都守等實缺  
緣由謹繕清單恭摺具

奏伏乞

皇太后

皇上聖鑒訓示施行再此摺係臣錦棠主稿合併聲明謹  
奏

請 旌烈婦周羅氏摺

九月十三日

奏爲烈婦夫亡殉節懇

恩旌表以維風化恭摺仰祈

聖鑒事竊據新疆布政使魏光燾詳據喀什噶爾道袁堯  
齡咨據莎車直隸州劉嘉德稟稱代理葉城縣知縣陳啟  
豐轉據候選訓導顧傳誥等呈稱署葉城縣知縣周發鏞  
係湖南湘陰縣人其妾羅氏係甘肅張掖縣民羅國望之  
女性端靜言笑不苟光緒九年該令納爲窻室經理家政  
井井有條踰年舉一男十一年隨赴任所嫡室顧氏旋由  
籍來署氏奉事維謹未幾其子以驚風夭而該令亦病氏

雖傷切於心猶設詞寬解既而該令疾日增劇氏侍湯藥衣不解帶者累月十四年二月初七日該令身故氏痛不欲生語其嫡曰扶襯回籍撫子承祧主母任之妾將侍主人於地下矣次日該故令殯畢遂仰藥以殉年二十有二歲職等誼屬同鄉見聞真確不忍聽其湮沒造具事實冊結稟懇轉詳具

奏前來 臣查官員身故其妻妾有殉節者由同鄉官於服官省分呈乞奏請

旌表今已故署葉城縣知縣周發鏞之妻羅氏捐軀殉節義烈可嘉合無仰懇

天恩俯准飭部照例

旌表以彰節烈而闡幽光除將冊結咨部外謹會同陝甘

總督臣譚鍾麟甘肅學政臣秦澍春恭摺具陳伏乞

皇太后

皇上聖鑒訓示再此案例應具題惟新疆初設行省一切  
例案均係改題爲奏合併聲明謹

奏

硃批著照所請禮部知道欽此

考系  
卷一  
五

三

新疆助墾人犯在配脫逃請 飭部議罪名摺

九月十三日

奏爲新疆助墾人犯在配脫逃請

旨飭部酌議罪名恭摺仰祈

聖鑒事竊查新疆兵燹之後戶口稀少前於光緒十一年經部議將直隸山東山西河南陝西四川甘肅七省絞罪減流人犯發往新疆助屯以實邊徼嗣因七省一併起解中途擁擠並有恃眾逞強情事又經

臣於十二年奏懇

天恩飭令直隸等七省凡有室家者務必簽同起解並聲明各省報解人犯隨帶妻室子女者不過十之一二殊與部

臣實邊之意相左旋准部議查免死減等各犯簽同妻



子改發新疆原期室家相聚既可盡力農耕生齒日繁並可漸臻富庶若令隻身前往於興屯實邊仍屬毫無裨益應令有室家者概行簽同起解不得任其藉詞支飾率免簽發其實係隻身人犯在途既易滋事端到配亦難安耕作毋庸再發新疆以免煩擾等因在部臣專意實邊固已力防流弊無如以前發來隻身各犯始猶小貿營生之犯乘間逃走繼則屯墾之戶亦有逃走者矣夫以不能力耕之人小貿營生或往鄰近販運或赴四鄉趕集因此潛逃向於屯政無損而以安插屯墾之犯公家不惜成本發給牛具籽種撥以地畝庇以室廬繳本完糧寬其歲月而亦

不免脫逃則實非意料所及推求其故無非此輩游惰性  
成孑然一身無所繫戀不肯盡力農畝由是脫逃亟應酌  
量整頓以裨屯政除據各屬具報業經隨時查拏外查免  
死減等發往新疆遣犯辦理原有專條惟此等發新助屯  
人犯究與實犯外遣不同徧查律例並無逃走治罪恰  
專條此項逃犯如尙在新疆拏獲可否由臣酌量改發充  
當折磨差使其逃入關內被獲人犯應如何定擬罪名相  
應請

旨飭部核議以便遵照辦理所有新疆助墾人犯在配脫  
逃請酌議罪名緣由是否有當謹恭摺具陳伏乞

皇太后

皇上聖鑒訓示謹

奏

硃批該部議奏欽此

援案估計光緒十五年新疆餉銀懇 飭部核撥彙入關

內新餉統收分支摺

九月十五日

奏爲援案估計光緒十五年新疆餉數懇

恩飭部指撥仍彙入關內新餉統收分支以資接濟恭摺

仰祈

聖鑒事竊照甘肅關內外十三年以後新餉迭准部咨每  
年秋季將來年餉數專案奏明指撥一次查十四年新餉  
經部臣奏准仍照十一二三年共撥銀四百八十萬兩  
上年臣開單覆陳新疆仍請劃分銀二百三十萬兩如有  
餘存畱抵十五年新餉惟各省關現在尙未解齊應俟年

終再行核算所有十五年餉數前經臣飭司詳覆咨請陝甘總督臣譚鍾麟彙入甘肅新餉內一併奏請指撥茲准譚鍾麟咨關內新餉業經奏請撥銀一百三十萬兩新疆餉數尙未接准咨報應由臣自行奏明辦理等因臣查新疆十五年撫提鎮標俸餉需銀一百五十六萬兩添製軍裝器械需銀十萬兩司庫例支不敷需銀十五萬兩糧餉軍裝運腳地方例支雜差車腳口分需銀五萬兩善後經費上年原請撥銀七萬兩因北路城工部議令於此項銀兩內取給仍請照十三年以前撥銀十四萬兩現查城工動用經費尙待十五年善後餘款彌補應請仍撥銀十四

萬兩俟十六年察看情形酌請減撥旗營經費本年仍由甘肅統撥四百八十萬兩內提銀十萬兩原以該營遷併必得此數方可敷衍自十五年起應照臣奏定餉章歲撥銀六萬五千兩定爲常額統計十五年實共需銀二百六萬五千兩均係確切估計萬難議減合無仰懇

天恩俯念餉需關緊

飭部指撥的款彙入關內新餉分限解由甘肅藩庫照舊批解以資支放除伊犁塔爾巴哈臺餉數應由將軍臣色楞額參贊大臣臣額爾慶額會商奏辦外所有援案請撥新疆十五年新餉緣由理合恭摺由驛馳

奏伏乞

皇太后

皇上聖鑒訓示謹

奏

硃批戶部議奏欽此

新疆第一次遵辦鄭工新例捐輸懇 飭分別獎敘摺月九

十五

日

奏爲新疆第一次遵辦鄭工新例捐輸懇

恩飭部分別獎敘以資鼓勵恭摺仰祈

聖鑒事竊 臣於光緒十三年十一月二十五日准戶部咨

開會奏鄭工新例銓補章程一摺奉

旨依議欽此相應刊錄原奏清單飛咨查照此次奏案外省以接到部文之日起作爲收捐日期予限一年所收各捐生應由各該省造具清冊按月分次咨部請獎並將副實收及隨收部飯照費銀兩一併隨同獎冊解部交納又



准國子監咨此次開辦鄭工捐輸貢監兩項應收監照飯銀仿照海防章程批解各等因先後到臣當經行司移道飭屬一體遵辦去後茲據新疆布政使魏光燾詳稱新疆地處極邊異常瘠苦歷未開辦捐輸茲值河工需款遵例開捐間有捐生多係寄寓爲數無幾查自本年三月十三日開辦起截至七月底止據各捐生報捐實官職銜各項均經照章減成收捐並填實收給予收執一俟領換執照卽行收銷以杜假冒計捐生四十名填發實收四十張共繳正項庫平銀九千八百一十一兩五錢四分專款存儲聽候部撥隨收部飯銀一百四十七兩一錢七分三釐一

毫照費銀八兩監飯銀四十兩四錢六釐均如數解繳並  
造齋各捐生報捐銀數三代年籍各清冊及填過副實收  
詳請具

奏並請咨部填發執照以便換給等情前來臣覆核無異  
除正項銀兩飭存候撥其副實收照飯費銀隨冊分別咨  
解外所有新疆第一次遵辦鄭工新例捐輸懇  
恩飭部核獎緣由謹恭摺具陳伏乞

皇太后

皇上聖鑒訓示謹

奏

硃批該部議奏欽此

代奏回子親王懇請暫緩進京

朝賀摺

九月二十六日

奏為哈密回子親王懇請暫緩進京

朝賀恭摺代

奏仰祈

聖鑒事竊

臣據

御前行行走哈密札薩克回子親王沙木胡索特呈稱案准

甘肅提督

臣

周達武行知承准理藩院咨具奏

皇上下婚屆期查照成案蒙古王公及回子等分別來京

朝賀一摺奉

旨依議欽此相應鈔錄原奏飛咨查照迅飭依限於本年

劉美勤公奏高

三

年內來京恭候

朝賀等因竊維世爵仰沐

皇恩至優極渥恭值

大婚盛典宜伸慶

賀微忱曷敢稽延致滋咎戾惟世爵於光緒十二年進京朝覲十三年回至哈密正逢天氣炎蒸沿途復冒風雨溼熱兼感兩足酸疼現在醫治未痊步履仍難如故擬俟醫就痊可再行趨詣

闕廷恭伸叩

賀等情呈請代

奏前來 臣 查沙木胡索特感受足疾係屬實情可否暫緩  
進京

朝賀以示體恤出自

鴻慈除咨理藩院查照外謹恭摺據情代

奏伏乞

皇太后

皇上聖鑒訓示施行謹

奏

硃批著照所請該衙門知道欽此

古今圖書集成  
人事典  
卷一百一十一

三十一

請將提督黃萬鵬等二十二員名畱於甘肅新疆儘先補

用片

九月二十六日

再臣前將投效新疆及隨從征剿各武員

奏畱甘肅新疆補用奉

旨允准欽遵在案茲查有頭品頂戴記名提督二等輕車  
都尉伯奇巴圖魯黃萬鵬頭品頂戴題奏提督額騰額巴  
圖魯曾松明頭品頂戴記名提督騎都尉巴克坦巴圖魯  
蕭元亨頭品頂戴記名提督阿爾杭阿巴圖魯喻先達頭  
品頂戴記名提督額爾德蒙額巴圖魯趙寶林題奏提督  
講阿巴圖魯萬勝常記名提督綳僧額巴圖魯宋賢聲記



名提督色拉謹巴圖魯張復良記名提督芬臣巴圖魯周  
添才記名提督訥奇欣巴圖魯顏昌燦記名提督西吉爾  
琿巴圖魯周大美記名提督烏拉星額巴圖魯戴富臣提  
督銜記名總兵爽勇巴圖魯朱德和記名總兵最勇巴圖  
魯谷振傑總兵銜雷湖南儘先補用副將誠勇巴圖魯譚  
其祥儘先補用總兵勗勇巴圖魯周惟翔記名總兵長勇  
巴圖魯楊鶴皋儘先補用副將徐廣學降補副將那斯洪  
阿巴圖魯蕭拱照儘先補用副將超勇巴圖魯許明耀副  
將銜儘先補用參將便勇巴圖魯徐春先副將用浙江提  
標儘先補用游擊恆勇巴圖魯陳文英等二十二員均在

新疆帶隊疊著戰功營伍邊防尤爲熟悉合無仰懇

天恩俯准將頭品頂戴記名提督黃萬鵬等二十二員一併以原官原銜畱於甘肅新疆儘先補用實於戎政大有裨益除飭取該員等履歷清冊咨部查核並俟續查尙有應行畱省之員再行陳

奏外謹會同陝甘總督臣譚鍾麟附片具陳伏乞

聖鑒訓示謹

奏

硃批著照所請兵部知道欽此



籌議移併古城滿營官兵隨缺地畝並懇暫緩屯墾摺  
月初八日

奏爲滿營移併古城遵

旨籌撥官兵隨缺地畝並懇暫緩屯墾恭摺仰祈

聖鑒事竊臣於光緒十三年二月十六日承准軍機大臣

字寄光緒十三年正月十七日奉

上諭富勒銘額奏烏魯木齊滿營官兵議遷古城請援案  
撥還隨缺地畝一摺據稱烏魯木齊古城巴里坤三營旗  
兵前經撥給迪化州屬熟荒地二萬一千餘畝藉資生計  
現遵部議將該三營官兵一千餘名併遷古城查有古城

地方頭二三屯地約計一萬一千餘畝向爲綠營屯耕之  
所目前綠營屯兵無多堪以撥歸滿營經理并將古城迤  
東吉布庫地方官屯撥爲綠營屯地等語烏魯木齊等處  
滿營遷併古城官兵隨缺地畝自應預爲籌撥以資養贍  
所請以頭二三屯地撥給滿營以吉布庫官屯撥給綠營  
之處著劉錦棠悉心酌覈奏明請旨辦理原奏著鈔給劉  
錦棠閱看欽此遵

旨寄信前來等因到臣當經欽遵飭查吉布庫地畝現係  
歸綠營耕種其頭二三等屯向爲綠營屯地自遭變亂地  
畝盡荒光緒三年經前陝甘總督臣左宗棠招集流亡給

資承墾迄今陸續增添已安插百數十戶共男婦一千數百口耕稼婚娶漸成土著若以此項地畝撥歸滿營不但遷移改撥徒滋勞費且甫經招集忽議遷徙亦甚非

朝廷勞來還定之意

臣

查古城東灣中渠地屬上中接引

山水澆灌得地一萬餘畝撥歸各滿營耕種不敷由附近之大板河西岔撥給查大板河約地三四千畝西岔約地四五千畝該各處雖有戶民耕種爲數尙少遷徙較易毋庸將頭二三屯地撥歸滿營如此辦理似屬兵民兩便并經行司飭縣估計修渠經費檄行城守尉德勝委勘覆辦去後茲據德勝呈查巴里坤滿營現未遷齊烏魯木齊滿

營雖經遷併安插尙未就緒所撥東灣中渠等處地畝修理各渠又非急切所能蒧事擬請展緩三年再行屯墾藉紓兵力等情前來臣覆加查核自係實情惟事關旗屯未敢擅便除飭司查取迪化縣接收滿營原撥地畝招民承種應完額糧清冊另案

奏咨外所有遵撥滿營官兵隨缺地畝並暫緩屯墾各緣由理合恭摺具陳伏乞

皇太后

皇上聖鑒訓示施行謹

奏

硃批戶部知道欽此

劉美勛公家高

三三





遵 旨整頓伊犁勇營先將擬辦情形陳明摺十月二日  
奏爲遵

旨整頓伊犁勇營先將擬辦情形據實陳明仰祈

聖鑒事竊臣准戶部咨議覆伊犁將軍請撥款十五萬兩

酌遣伊犁勇隊等因一摺於本年八月十八日具奏奉

旨依議欽此欽遵咨行到臣正籌辦聞復承准軍機大臣

字寄光緒十四年九月十三日奉

上諭前據色楞額奏遣撤伊犁勇隊酌發餉項川資請飭  
撥解銀十五萬兩應用當令戶部速議具奏旋據該部奏  
准由譚鍾麟先行如數墊發解交劉錦棠設法妥辦迅速

清結茲據劉錦棠奏該處營勇驕蹇成習此次發款清理後請核實挑畱餘悉妥爲遣撤等語伊犁防軍動輒藉餉滋鬧實屬不成事體亟應妥籌整理以靖邊陲著譚鍾麟遵照部議毋論何款迅卽墊撥銀十五萬兩解交應用毋稍延緩並著劉錦棠會同色楞額妥速清釐將該處勇丁核實挑畱其餘妥爲裁遣並將營制餉章認真整頓務期邊軍日久相安是爲至要此次滋事勇丁並著色楞額查明爲首之人照例懲辦以肅軍律餘著照所議辦理將此由五百里各諭令知之欽此伏查光緒十一年冬間臣與前署將軍臣錫綸欽奉

諭旨會同清理伊犁勇營舊欠其時議定自十二年二月以後按照楚軍行糧章程按月發餉不得少有剋扣從前欠餉概行截止並無畱營勇丁尙有應領加項存俟准假找給之事當經

奏報有案亦爲眾所共知本年七月色楞額奏請撥款以資遣撤臣不得不申明其事茲蒙

天恩准撥銀十五萬兩臣自應欽遵會同色楞額妥爲清理以仰副

朝廷慎重邊防之至意惟查前此清理之時分別挑畱遣撤其挑畱一項共銀九萬九千餘兩內除酌發統領營官

及哨長各項其在勇丁者實共銀七萬四千餘兩此當時  
報部之實數也其後錫綸任內又續有假汰逃亡今欲按  
名補發則錫綸任內所已經假汰及逃亡病故者亦應刪  
除且加發一項原祇遣撤者有之以其存餉無多非此不  
足以示體恤而遣撤之內又有回籍與落戶之分亦不能  
概歸一律色楞額前奏請將加發銀兩無分去畱先行算  
明概予清結不知當時原議既有回籍落戶之分若不先  
定去畱何從區別若無區別又何以得事理之平臣再四  
思維惟有仍照舊章辦理前此挑畱弁勇花名清冊原飭  
造具二分各註明籍貫箕斗入伍日期並發過銀兩數目

一存伊犁一由臣攜帶回省底案具在不難覆按而知擬俟譚鍾麟解到此款卽遵照部議存儲司庫一面咨商色楞額將應撤勇丁安速遣撤除新餉應由色楞額核發外其加發此款卽由色楞額查明飭令各營分別回籍落戶照前造具花名清冊齎送省城以憑核對其情願寄居落戶者卽解由伊犁按名發給其實係報明回籍者卽給票持赴省城由臣飭司委員按名發給並將前存底冊發司已經給領卽由司於冊內注明畱營勇丁仍存俟准假之日照此查明分別發給現在各該營於未定議之先已有遣撤應令補造清冊其墊發此項銀兩俟前款解到如數

撥還以清款目下存若干由司隨後查明詳請報部立案似此辦理庶覺持平統領營哨各官身受

國恩自不肯與勇丁一同再領至營制餉章現如巴里坤及阿克蘇等處均已經臣

奏定伊犁事同一律自可照行惟該處各營向由將軍統轄未准色楞額造冊移交臣亦無由過問色楞額前奏擬

先儘入營年久及不勝差操者酌量准假發清存餉資遣回籍願畱勇丁歸併綠營改支坐糧以符原議四千人之數臣愚實無以易此現在蒙

恩准發此款正可及時舉辦各統領營官有約束勇丁之

責亦當激發天良共求整頓。臣比咨商色楞額經此次奉旨之後如各該營弁勇再有滋鬧卽惟各統領營官是問。容臣與色楞額指名嚴參以示懲儆除俟辦理就緒再行會同詳細具

奏外所有擬辦情形理合恭摺具陳伏乞

皇太后

皇上聖鑒訓示謹

奏

硃批該部知道欽此





南路已修城署經費懇 飭部核銷並請 飭催各省關

欠解銀兩以清墊款摺

十月二十三日

奏爲南路已修城署經費懇

恩飭部核銷並請

飭催各省關欠解銀兩以清墊款而期歲事恭摺具陳仰  
祈

聖鑒事竊 臣於光緒九年奏修南路城工十三起衙署十  
五起土工由各營派勇幫作所需鐵木輒石陶瓦物料及  
工役薪糧犒賞各款從減估銀三十七萬四千餘兩蒙  
恩飭部指撥各省關銀三十六萬六千七百餘兩次第興

辦上年復經臣將已竣各工並北路興修城署各工

奏明在案茲據各印委陸續造齎工料銀兩丈尺做法細數圖說保固印結由糧臺司道彙造圖冊並委勘阿克蘇喀喇沙爾庫車烏什喀什噶爾瑪喇巴什英吉沙爾葉爾羌和闐城工九起阿克蘇喀什噶爾道署喀喇沙爾庫車烏什瑪喇巴什英吉沙爾廳署溫宿疏勒莎車和闐州署疏附于闐縣署十三起附修阿克蘇喀什噶爾道庫大使英吉沙爾照磨溫宿疏勒莎車吏目疏附典史衙署七起各屬倉廩監禁亦經次第修造均屬工堅料實並無草率等情轉詳前來臣查前項工程大小二十餘起前後數年

派撥勇丁幫同興作計工二百餘萬十日犒賞酒肉一次  
按照南路雇工除給食糧日需銀一錢有奇計算實省銀  
三十餘萬兩其應需工匠物料多有內地雇辦價值既昂  
採運木料腳價尤屬不貲綜計實用銀三十二萬五千餘  
兩動支各省關解到銀一十七萬餘兩收回平餘銀二千  
六百餘兩不敷之數無可騰挪先後共由軍需項下墊用  
銀一十四萬八千餘兩委係撙節動支核實開報並無浮  
濫相應繕呈清單請

旨飭將前項用過經費一併核銷以清款項其北路城署  
各工容俟彙造齊全另案具

奏至指撥各省關銀三十六萬六千餘兩已報解一十七萬餘兩尙欠解一十九萬兩現在挪用軍餉急須劃還清款拜城疏附葉城于闐四縣城拜城葉城兩縣署尙待修建應請

旨飭下各省關趕將下欠銀兩悉數提解俾得清還墊款一律蕪事出自

鴻施除將圖說冊結咨部外所有南路已修城署工程用過經費並懇催解銀兩各緣由謹會同陝甘總督臣譚鍾麟恭摺具陳伏乞

皇太后

皇上聖鑒訓示施行謹  
奏

硃批該部知道單併發所有各省關欠解銀兩卽著分咨  
催解以清款目欽此



請旌節婦王劉氏摺十一月  
初六日

奏為節婦年例相符懇

恩旌表以維風化恭摺仰祈

聖鑒事竊臣據新疆布政使魏光燾詳准鎮迪道兼按察

使銜恩綸咨據署迪化府知府陳名鈺詳據署奇臺縣知

縣劉澄清詳轉紳民馮積興等稟稱節婦王劉氏係該縣

民人劉生魁之女王林之妻附生王承鈞王承銓之祖母

年十七于歸至道光二十三年王林病故氏年二十九歲

慟不欲生親族以姑老子幼勸勉始節哀強起維時遺孤

子三長者纔七齡幼者猶在抱家甚貧姑又以病瞽氏藉

勸力公奏稿



錫爵之資以奉甘旨朝夕扶持未嘗稱懈既而姑歿葬祭皆如禮撫諸孤成立其孫承鈞等相繼入學皆氏教也現年七十四歲計守節已四十五年紳民等誼屬戚族見聞較確不忍聽其湮沒造具事實冊結聯名稟懇由縣加結依次轉詳前來 臣查定例直省守節孝婦女應

旌表者由該督撫學政會同具

題並取具冊結送部核議題准後令地方官給銀三十兩聽本家建坊等因歷經遵辦在案茲節婦王劉氏年例均屬相符合無仰懇

天恩敕部核議照例

旌表以彰節孝而維風化除將事實冊結咨部外謹會同  
陝甘總督臣譚鍾麟甘肅學政臣秦澍春恭摺具陳伏祈  
皇太后

皇上聖鑒訓示再此案係改題爲奏合併聲明謹  
奏

硃批著照所請禮部知道欽此



覆陳光緒九十兩年報銷部議刪除行查各款懇 飭核

銷摺

十一月十四日

奏爲併案覆陳甘肅關外光緒九十兩年報銷部議刪除行查各款懇

恩飭部核銷恭摺仰祈

聖鑒事竊准戶部咨議奏甘肅關外九年分軍需善後收支報銷摺稿清單並准咨議十年分軍需善後收支報銷一摺清單一紙先後咨行到 臣當經轉行遵辦去後茲據糧臺司道遵照部議分年分款詳細核明繕具清單詳請併案

奏咨前來臣查九年分報收支軍營扣回七八兩年採糧價銀部議不准列收查七八兩年支發採買糧價及運腳銀兩前於聲覆三次部駁案內請銷業奉

諭旨著照所請則九年分扣回糧價自應列收至九十兩年支發各軍統領公費照章核算除准銷外應刪之款已遵照刪除歸入十二年報銷內列收精騎後營馬隊查係十年十月十五日夜濇潰計潰弁勇一百四十九名九年以前存餉業於十年分冊內列收自十年正月初一日起截至十月底止應繳餉銀歸入十一年分冊內報繳其餘部議各款均經逐一登覆委係實用實銷並無浮冒謹分

別繕呈清單併案懇請

飭銷以清款目除咨部查照外謹會同陝甘總督臣譚鍾麟恭摺覆

奏伏乞

皇太后

皇上聖鑒訓示謹

奏

硃批戶部知道單併發欽此

上野書局考和

三

懇 恩展假數月回籍省親摺 十一月二十二日

奏爲籲懇

天恩展假數月回籍省親恭摺瀝陳仰祈

聖鑒事竊 臣 前以久病疊荷

聖慈憫給假期

寵頒珍藥現復蒙

恩賞假六月並

賞給人蔘八兩俾資調攝 臣 自應恪遵

批旨加意醫調以期上慰

宸廑亦何敢復有所請惟 臣 少遭家難賴祖母陳氏辛勤



鞠育得以有成其後從役四方相依之日恆少今又十八年未嘗歸省上年臣弟自河南回籍省視臣未得歸臣祖母望之尤切每遇鄉人來者必對之泣曰安得吾孫使我一見也臣祖母素明大義非年衰病迫亦不至以念思之意形於語言臣是以疊次陳情冀蒙

允許近得臣子來信臣祖母於七月初間傾仆不語有類中風數日醫治未痊家人皆輪流坐夜此信係七月初十日發今又數月未得來書蓋路遠則聞信亦難臣晝夜徬徨罔知所措伏念臣祖母年已八十有四臣受恩深重卽不敢援例自陳而貪祿忘親亦何以仰承

孝治且臣祖母平生艱苦所出祇臣父兄弟二人臣父咸  
豐四年歿於岳州臣叔原任廣東陸路提督劉松山於同  
治九年歿於金積堡皆效命疆場義不旋踵臣叔無後以  
臣弟嗣之其在諸孫又祇臣兄弟二人而已臣祖母之念  
臣最苦亦有由然臣所以竊竊上陳者亦以爲宜邀

矜憫也臣誠知甫經

賞假不應遽有所陳然臣祖母老病侵尋危在旦夕若不  
及今陳請誠恐永無見期再四思維惟有仰懇

天恩展假數月俾臣得回籍一伸省視現在邊陲無事藩  
司魏光燾於應辦一切均能措理裕如臣到家後一俟假

湖卽當星夜馳回本任於邊防亦不廢事如蒙

恩允准可否卽以藩司魏光燾署理巡撫事務俾臣迅速

啟程臣不勝迫切屏營待

命之至謹恭摺瀝陳伏乞

皇太后

皇上聖鑒訓示施行謹

奏

硃批另有旨欽此

光緒十四年十二月二十八日內閣奉

上諭劉錦棠奏懇恩展假回籍省視祖母一摺覽奏情詞懇切自應勉如所請劉錦棠著再賞假六箇月准其回籍省視假滿卽行回任以資倚畀甘肅新疆巡撫著魏光燾暫行護理欽此

古今圖書集成

目錄

請簡放新疆提督總兵各員缺摺

十一月二十八日

奏爲新疆改定喀什噶爾提督阿克蘇鎮總兵各員缺請旨簡放以重職守恭摺仰祈

聖鑒事竊臣前於光緒十年奏請以烏魯木齊提督移駐喀什噶爾移喀什噶爾換防總兵於阿克蘇又於十一年會同督臣譚鍾麟奏請以頭品頂戴題奏提督甘肅西甯鎮總兵騎都尉世職伯奇巴圖魯譚上連署理烏魯木齊提督至十二年復會同具奏請令譚上連移赴喀什噶爾並聲明阿克蘇鎮總兵一缺請照巴里坤鎮及綏定鎮之例作爲掛印總兵仍附奏請以頭品頂戴題奏提督雲騎

尉世職阿爾杭阿巴圖魯董福祥署理均經先後奉  
旨允准欽遵在案該員等久經戰陣洞悉邊情自蒙

恩委以來均能措理裕如毫無遺誤惟邊缺緊要未便久  
懸所有喀什噶爾提督阿克蘇鎮總兵各員缺相應請  
旨迅賜簡放以重職守除咨部查照外謹會同陝甘總督  
臣譚鍾麟恭摺具陳伏乞

皇太后

皇上聖鑒訓示施行謹

奏

硃批另有旨欽此

陳喀什提督阿克蘇總兵可否以譚上連董福祥補授片

十一月二

十八日

再新疆初定標營規制尙無土著可募爲兵前經

臣

奏准暫以勇丁填補現在填補喀什噶爾提標者卽譚上連所部湘楚各軍填補阿克蘇鎮標者卽董福祥所部董定各軍是皆調習有年似未便遽更生手伏查提鎮大員補授實缺非臣下所敢擅請惟邊防緊要務在人地相宜臣不敢不據實陳明伏候

聖明采擇謹會同陝甘總督

臣譚鍾麟附片具

奏伏乞



聖鑒訓示謹

奏

硃批另有旨欽此

光緒十五年正月初七日內閣奉

上諭喀什噶爾提督著譚上連補授阿克蘇鎮總兵著董  
福祥補授欽此



遵 旨清結中俄積案並陳交涉情形摺十一月二十九日  
奏爲遵

旨清結中俄歷年積案並具陳交涉情形恭摺仰祈  
聖鑒事竊 臣於光緒十四年八月初九日承准總理各國  
事務衙門咨奏新疆與俄境歷年積案應迅爲清理一摺  
奉

硃批依議欽此欽遵鈔錄奏稿並譯錄俄外部來文節略  
與歷年未結各案鈔單咨行到 臣當查內有伊犁塔爾巴  
哈臺事件係在未設伊塔道以前 臣處無案可稽業經分  
別咨由將軍 臣色楞額署參贊 臣額爾慶額飭屬清結逕

咨呈總理衙門查照其餘新疆未結各案由臣分飭各地  
方官遵辦去後茲據各屬先後具覆前來臣查俄文內稱  
鎮迪虐待俄人兵勇強劫等語鎮迪各屬並無其事惟南  
路入籍安回貿易各城娶妻置產一經犯事地方官不得  
不按法訊究以示懲儆而領事輒認爲俄民被官凌虐又  
喀什噶爾兵丁赴市買馬與俄商口角領事遂指爲兵勇  
搶劫種種不實情形前已縷晰咨呈總理衙門各在案至  
囚禁商人一節大約指哈密監禁米爾開里木及其子米  
爾烏巴二犯查該犯係在喀什噶爾生長居住有年安逆  
帕夏牙胡普擾亂南疆該犯相從爲逆充當首領殘殺多

人纏民飲恨極深官兵恢復各城該犯逃匿光緒十年經布魯特拏獲解送前幫辦軍務臣張曜轉解前來當飭哈密廳監禁訊辦並咨呈總理衙門在案上年俄國使臣庫滿堅請開釋疊經據理照覆彼亦無詞或因計不得逞遂向俄外部捏詞聳聽殆未可知又稱中國違約取稅查上年俄使由總理衙門鈔送綏來縣等處稅票七張核計稅銀僅一百八十餘兩票內並未註有俄商字樣且無中俄執照臣查俄商每年出入貨物約值二百餘萬兩如果違約征收則所收之稅不應祇此百數十兩果係俄商何以無中俄執照顯有包庇影射情弊卽如此次來文欲於新

疆各城販賣土貨其故違約章尤可概見臣維新疆表延  
萬里緊與俄鄰交涉事繁動形輻輳應請

旨飭下總理各國事務衙門照會該國公使轉飭各領事  
嗣後務須遵照約章辦理臣亦當督飭各屬遇事持平不  
敢以委靡誤公亦不敢以矯激生事除將清理各案彙單  
咨呈總理各國事務衙門外理合恭摺覆陳伏乞

皇太后

皇上聖鑒訓示謹

奏

硃批該衙門知道欽此

光緒十一年分防軍善後收支懇

飭核銷摺

十二月初三日

奏爲造報甘肅新疆光緒十一年分防軍善後收支各款分繕細數清冊籲懇

天恩飭部核銷恭摺仰祈

聖鑒事竊照甘肅新疆防軍善後用款光緒十年以前業經按年造銷至十一年分甘肅關內外餉項係統籌全局案內經部臣於光緒十年奏准指撥各省的款銀四百八十萬兩統名曰甘肅新餉新疆應分二百二十萬兩由甘藩庫統收扣除四分減平分支在案茲據糧臺司道詳稱光緒十一年分新疆收支各款舊管存報銷案內銀一萬



七千七百九十兩六錢二分三釐按一零三三申合湘平  
銀一萬八千三百七十七兩七錢一分三釐上案截至十  
年十二月底止欠發關外各軍營旗九年以前並十年餉  
銀二百七十五萬九千五百二十六兩四錢七分七釐仍  
按一零三三申合湘平銀二百八十五萬五百九十兩八  
錢五分新收甘藩庫分解新餉暨甘肅總糧臺分解十年  
分餉銀閩海關補解舊餉遵照刪除七八兩年分報銷案  
內統領公費及各軍營旗報繳截曠糧價精騎後營報繳  
潰勇餉銀採買製辦運腳扣回平餘等項通計十一年分  
共收銀二百一十四萬六千一百九十四兩一錢九分九

毫此新疆收款之總數也開除十一年分關餉統費夫價  
倒馬價值共銀一百三十二萬八千六百五十餘兩隨營  
及臺局薪糧口食運腳採買製辦各項雜款共銀二十六  
萬九千一百七十餘兩塘臺驛站義學保甲蠶桑牛痘等  
項共銀一十一萬九千九百八十餘兩撥給嵩武軍烏魯  
木齊都統塔爾巴哈臺參贊及新疆藩庫共銀二十五萬  
六千四百三十一兩五錢五分八釐通計十一年分共開  
除銀一百九十七萬四千二百五十九兩九錢三釐此新疆  
支銷撥發之總數也實在存銀一十九萬三百二十一兩  
九毫欠發各軍營旗九年以前並十年餉銀二百八十五

萬五百九十兩八錢五分又欠發各軍營旗哨十一年分  
新餉銀二十二萬一千三百八兩二錢一分此項欠款應  
俟江西省補解十一年欠餉再行清給計截至十一年底  
止共欠發新舊餉銀三百七萬一千八百九十九兩六分  
此新疆防軍善後實存並欠發之實數也造具支用各款  
總散細數清冊詳請

奏銷前來 臣查該司道等所開新疆防軍善後收支細數  
皆係實用實銷並無浮冒理合繕具簡明清單恭呈

御覽仰懇

天恩飭部核銷以清款目除將清冊分送各部查核外謹

會同陝甘總督臣譚鍾麟恭摺具

奏伏乞

皇太后

皇上聖鑒訓示再關外十二三等年防軍善後銷案已  
飭司道等依次趕辦應俟造報到日再行分案辦理合併  
聲明謹

奏

硃批該部議奏單併發欽此



光緒十二年分司庫收支懇 飭核銷摺

十二月初三日

奏爲造報甘肅新疆光緒十二年分司庫收支銀糧草束  
分繕總散清冊懇

恩飭部核銷恭摺仰祈

聖鑒事竊照新疆光緒十一年分司庫收支各屬正雜銀  
糧草束業經

奏請核銷在案茲據藩司魏光燾詳稱光緒十二年分各  
屬征收本折糧草地課雜稅等項支發文武廉費俸工驛  
站夫馬工料各款仍分司庫道庫實收實支數目分別造  
冊彙總請銷至十一十二兩年分各軍營旗以及善後各

項臺驛各站支領糧料應扣價銀已經糧臺扣收解司各屬徵收稅課銀兩其有善後項下動用者亦經糧臺解還司庫照數作收彙報又于闡課金局自十一年十一月試辦起至十二年底止征收金沙變價銀兩亦應於冊內列收造報統計光緒十二年分舊管存銀一十九萬六千二百六十一兩九分二釐新收各款銀五十一萬八千八百六十五兩八錢九分六釐開除銀三十九萬三百三十四兩七錢一分七釐實在截至十二年底止共存銀三十二萬四千七百九十二兩二錢七分一釐又未支銀一萬六千四百四十四兩八錢六分又仍未支十一年分銀一千四百

一十六兩五錢八分又長支銀六百二十九兩七錢一分  
一釐舊管存各屬倉儲各色京斗糧二十八萬七千三百  
六十四石九斗八升一合二勺新收各色京斗糧二十二  
萬四千一百三十石一斗九升四合三勺開除各色京斗  
糧一十五萬八千七百九十八石七合實在截至十二年  
底止共存各色京斗糧三十五萬二千八百三十七石二  
斗六升一合九勺又各屬征收未完籽種額糧一萬二千  
一百一十六石三斗三升五合六勺又未支料七十七石  
八斗二升五合六勺又仍未支十一年分料一百五十八  
石三斗六升六合四勺又長支料八升三合九勺又不敷



十一十二兩年分糧一百五十八石六升七合二勺舊管  
各屬廠儲草八百三十三萬四千七百一十斤一兩三錢  
新收草一千五百五十三萬三千三百八斤三兩三錢二  
分開除草一千一百九萬五千八百三十三斤一十兩五  
錢八分實在截至十二年底止各屬共存草一千二百七  
十七萬二千一百八十四斤一十兩四分又未支草二萬  
八千六束又仍未支十一年分草二萬八千九百六十四  
束其長支未支銀糧草束俟找發扣還後歸入下屆附銷  
造具銀糧草束四柱清單並總散報銷清冊詳請

奏咨核銷前來 臣覆核無異理合繕具簡明清單恭呈

御覽仰懇

天恩飭部核銷除將清冊分送部科查核外謹會同陝甘  
總督臣譚鍾麟恭摺具

奏伏乞

皇太后

皇上聖鑒訓示謹

奏

硃批戶部議奏單併發欽此

1994

1994

巴里坤鎮標原補副游都守一律開缺另行請補摺月十二

日十

奏爲巴里坤鎮標原補副游都守各員擬懇一律開缺另行請補恭摺仰祈

聖鑒事竊烏魯木齊提標改爲撫標前經臣等

奏請將舊設參游等官開缺另補在案查上年奏設喀什噶爾提標阿克蘇巴里坤鎮標經部議准分別裁改添設所裁員弁畱於該省另補惟現設各缺立營方始操練巡防均關緊要務當遴選人材毋稍瞻徇其員缺又未便久懸應卽分別奏咨報部以憑換劄註冊等因咨行到臣伏

查喀什噶爾提標阿克蘇鎮標均屬新設副將以下應由  
臣等陸續奏咨請補至巴里坤鎮標向係綠營規制

奏定新章則係以官帶勇參用勇營章程員缺既經添改  
營制亦與曩殊若將舊補各員強爲遷就竊恐人地不盡  
相宜防務難期得力相應請

旨將巴里坤鎮標中左右三營城守營哈密協營木壘營  
副游都守各實缺一律開去以奉到部文之日作爲該各  
員開缺日期俾清界限容臣等細心察看或以原官或另  
揀員從新請補給劄註冊以期整飭戎行上副

朝廷慎重邊陲之意除飭取該各員原領劄付另案繳銷

並千把外委各弁咨部開缺外所有請開巴里坤鎮標副  
游都守實缺緣由謹繕清單合詞恭摺具陳伏乞

皇太后

皇上聖鑒訓示再此摺係臣錦棠主稿合併聲明謹

奏



伊犁新設正佐各官關防印信請 飭鑄造頒發摺月十二

日五

奏爲伊犁新設正佐各官應用關防印信請

旨飭部鑄造頒發以昭信守恭摺仰祈

聖鑒事竊查伊犁新設伊塔道伊犁府知府綏定縣知縣甯遠縣知縣並伊塔道庫大使伊犁府經歷廣仁城巡檢業經接准部咨分別委員署理暫刊木質關防鈐記給領啟用亟應循例頒發關防印信俾垂久遠茲據新疆布政使魏光燾開單請鑄分巡伊塔兵備道關防一顆伊犁府知府綏定縣知縣甯遠縣知縣伊塔道庫大使伊犁府經



歷兼司獄綏定縣屬廣仁城巡檢印各一顆詳請具

奏前來 臣覆核無異相應請

旨飭部分別鑄造頒發啟用以昭信守除將清單咨部查  
照外謹會同陝甘總督 臣譚鍾麟恭摺具陳伏祈

皇太后

皇上聖鑒訓示至綏定甯遠兩縣典史鈐記例由藩司刊  
給合併聲明謹

奏

光緒十二年分防軍善後收支懇 飭核銷摺

十二月十八日

奏爲造報甘肅新疆光緒十二年分防軍善後收支各款分繕細數清冊籲懇

天恩飭部核銷恭摺仰祈

聖鑒事竊照甘肅新疆十一二三年防軍善後用款於統籌全局案內經部臣於光緒十年奏准每年指撥各省的款銀四百八十萬兩統名曰甘肅新餉新疆應分銀二百二十萬兩由甘藩庫統收扣除四分減平分支業將十年分新疆防軍善後用款造報請銷在案茲據糧臺司道詳稱光緒十二年分新疆收支各款舊管報銷案內存

銀一十九萬三百二十一兩九毫上案截至十一年十二  
月底止欠發關外各軍營旗哨十年以前並十一年分新  
舊餉銀三百七萬一千八百九十九兩六分新收甘藩庫  
分解新餉暨閩海關勻還西征軍餉遵照刪除九年分報  
銷案內統領公費及各軍營旗報繳截曠採買製辦運腳  
扣回平餘等項通計十二年分共收銀二百一十萬一千  
三百一十二兩九錢一分八釐此新疆收款之總數也開  
除新疆十二年分關餉統費夫價倒馬價值共銀一百四  
十萬九千七百六十餘兩又十年以前舊餉銀二十八萬  
六千四百六十餘兩又十一年分新餉銀二萬四百七十

餘兩隨營及各臺局薪糧口食運腳採買製辦各項雜款  
共銀一十八萬九千六百四兩八錢義學保甲牛痘經費  
遣犯車輛口分等項共銀五萬一千九百四十餘兩撥給  
前哈密辦事大臣借支餉項新疆南路城工衙署經費共  
銀一十六萬六千六百九十八兩七錢八分四釐此新疆  
支撥之總數也實在存銀一十六萬六千六百八十一兩  
九毫欠發各軍營旗哨十年以前並十一年新舊餉銀二  
百七十六萬四千九百五十九兩九錢一分因四川省欠  
解十二年分新餉甚鉅又欠發各軍營旗哨十二年分新  
餉銀十五萬一千一百七兩七錢八分九釐計截至十二

年  
底  
止  
共  
欠  
發  
新  
舊  
餉  
銀  
二  
百  
九  
十  
一  
萬  
六  
千  
六  
十  
七  
兩  
六  
錢  
九  
分  
九  
釐  
此  
新  
疆  
防  
軍  
餉  
項  
善  
後  
實  
存  
並  
欠  
發  
之  
總  
數  
也  
造  
具  
收  
支  
各  
款  
總  
散  
細  
數  
清  
冊  
詳  
請

奏  
銷  
前  
來  
臣  
查  
該  
司  
道  
等  
所  
開  
新  
疆  
防  
軍  
善  
後  
收  
支  
細  
數  
皆  
係  
實  
用  
實  
銷  
並  
無  
浮  
冒  
理  
合  
繕  
具  
簡  
明  
清  
單  
恭  
呈

御覽仰懇

天  
恩  
飭  
部  
核  
銷  
以  
清  
款  
目  
除  
將  
清  
冊  
分  
送  
各  
部  
查  
核  
外  
謹  
會  
同  
陝  
甘  
總  
督  
臣  
譚  
鍾  
麟  
恭  
摺  
具  
陳  
伏  
乞

皇太后

皇  
上  
聖  
鑒  
訓  
示  
再  
關  
外  
十  
三  
年  
分  
防  
軍  
善  
後  
銷  
案  
已  
飭  
司

奏  
道等接續趕辦應俟造報至日再行辦理合併聲明謹



軍機大臣字寄光緒十四年十二月二十九日奉

上諭色楞額奏清釐伊犁勇餉撫臣請照舊章礙難照辦一摺所有伊犁遣撤勇隊酌發餉項川資各事宜卽著責成色楞額就近一手經理前由譚鍾麟撥解銀十五萬兩著劉錦棠派員轉解伊犁應用此事該將軍所奏爲難棘手之處固係實在情形但摺內往復瀆陳語多負氣殊失和衷共濟之道著傳旨申飭該將軍接奉此旨務當妥速清釐將應裁營勇早日遣撤覈實報銷並將善後諸務妥爲籌辦以肅營伍而靖邊陲將此由四百里各諭令知之欽此



2008

10/1

劉襄勤公奏稿卷十六 起光緒十五年正月訖光緒二十年三月附相撫代奏各摺片

### 目錄

籌議承化寺僧眾遷徙事宜摺

伊犁及塔爾巴哈臺等處事權不一請旨定奪摺

關外七八兩年徵收釐金支發薪糧局費報銷摺

巴里坤八旗官兵及古城滿營遷併到防摺

代繳巴里坤領隊大臣銀印及左右翼協領銅質關

防片

委黃萬鵬等署喀什噶爾提屬並阿克蘇鎮屬各副

將員缺片

請 卹故員趙奉樂等八員片

懇將畱營軍犯張得太釋回片

報交卸起程日期摺

轉解伊犁勇餉日期片

抵籍日期片

以下湘撫代奏

請俟祖母病勢稍痊卽行起程回任片

祖母病勢增劇懇開缺終養摺

謝年終 恩賞摺

恩賞祖母陳氏緞疋謝 恩摺

祖母病勢增劇懇暫行開缺摺

懇辭 賞加太子太保銜片

賞加太子太保銜謝 恩摺

陳請開缺終養摺

請俟假滿後起程赴京摺

賞祖母匾額綢緞謝 恩摺

謝年終 恩賞摺

丁祖母承重憂例應開缺片

服闋後俟病體稍痊卽行遵 旨赴京摺

晉封一等男謝 恩並請詣 闕祝 嘏摺



籌議承化寺僧眾遷徙事宜摺

光緒十五年正月二十四日

奏爲遵

旨籌議承化寺僧眾遷徙事宜恭摺仰祈

聖鑒事竊臣錦棠前承准軍機大臣字寄光緒十三年七

月二十六日奉

上諭劉錦棠奏棍噶札拉參所領徒眾擬請仍在舊地居住並籌哈巴河防務一摺覽奏均悉前因沙克都林札布等奏烏梁海蒙哈官兵逼令承化寺僧眾趕緊移挪情形急迫當於五月二十二日諭令劉錦棠錫綸迅籌覆奏此次該撫所奏尙係議覆三月間諭旨未經奉到續諭之件

此事頗有關係必須得一實在情形著劉錦棠錫綸懍遵前旨確切查明迅速籌議一面咨商沙克都林札布等秉公酌度務須籌一妥善辦法奏明請旨至所奏哈巴河以達承化寺一帶地方擬請劃歸塔爾巴哈臺管轄等語俟覆奏到日再行酌定降旨等因欽此又承准軍機大臣字寄光緒十三年十二月初一日奉

上諭錫綸奏遵議棍噶札拉參所領僧眾請仍照劉錦棠前奏辦理一摺該大臣所奏仍與前奏大略相同著劉錦棠會同沙克都林札布等妥速籌商並應否委員確勘再行定議務各破除成見詳審酌度奏明辦理等因欽此伏

查此案疊奉

諭旨訓示周詳無微不至臣等不能及時定議惶悚實深前署將軍臣錫綸未及再議旋即交卸臣色楞額到任後復會同籌商沙克都林札布仍持前議催令交還借地是卽令委員會勘亦終無益且臣額爾慶額曾在科布多任事於該處情形知之甚悉上年復派員往查亦毋庸再行會勘該處原屬烏梁海蒙部前歲該部落僱人種地意在遷回繼因賠累難堪毫無所獲上年已無人再至沙克都林札布原奏請遷去承法寺僧眾收還借地以便安插蒙哈此起哈薩克其始亦祇係借地游牧非科布多所有且



多於承化寺僧眾約數十倍烏梁海蒙部能聽其安插則無爭於此土蓋可知矣惟其地緊與俄鄰棍噶札拉參曾與俄人構釁久居其地誠恐不能相安前奉

諭旨令於新疆所屬擇一距俄境較遠之地奏明安插臣等自應恪遵惟擇地甚難非急切所能指定正籌議間適臣色楞額據舊吐爾扈特東部落盟長畢西勒爾圖郡王巴雅爾呈稱棍噶札拉參前在庫爾喀喇烏蘇地方該部落賴其保護今聞會議欲令其遷回新疆讓還科布多借地部眾皆願其復來等語復咨由臣錦棠飭據庫爾喀喇烏蘇廳查明廳屬八英溝一名察汗烏素在西南山中距

城一百六十餘里原係該蒙古牧場附近並無官地中有寺院一所原係棍噶札拉參建造現住喇嘛二百餘人皆其舊日徒眾復詢據該處蒙民僉稱願得棍噶札拉參復來屬實上年十一月間承化寺僧眾人有省視棍噶札拉參回寺者道過省城臣錦棠復親加詢問據稱該寺僧眾有招之近地者有來自遠方者其招之近地者現存約三百餘人其來自遠方者自棍噶札拉參去日多已從行其後又或遊化十方所存不過數十人而已臣等公同商議棍噶札拉參既應遷徙而入英溝一帶距俄實遠以遷於此洵屬相宜該蒙部又望之甚殷自可從其所請但其徒

聖朝勅諭 卷一六 三  
眾既多係招之近地各安其土各有布施恐遷地弗良徒  
多耗費且承化寺名由

敕賜工在不資亦未便聽其毀棄近年棍噶札拉參遠去  
該徒眾恂恂自守亦尙相安擬就其中量爲區別其原係  
來自遠方者前與俱來今卽應與之俱往其原係招之近  
地者卽聽其畱居該寺概免遷移仍擇大喇嘛一人領之  
有願隨同遷徙亦聽以後該處若歸塔爾巴哈臺管轄則  
所畱僧眾亦仍歸塔爾巴哈臺參贊大臣管轄以專責成  
如此則舉動不勞而事機亦順如蒙  
允准應請

旨飭下理藩院催令該呼圖克圖速來新疆其未盡事宜  
應俟該呼圖克圖至日面商再行詳晰具

奏至哈巴河一帶地方緊與俄鄰俄人窺伺已久塔爾巴  
哈臺自借地以來卽已派兵駐守以故數年尙稱安靜若  
一旦委之以去使俄人乘虛而入得以南下古城則新疆  
隔絕在西全局將爲之俱震非小失也科布多遠隔大山  
勢必不能爲之固守應否啟隸塔爾巴哈臺管轄自應恭  
候

諭旨遵行所有 臣等會同擬議緣由謹合詞恭摺具陳伏  
乞

皇太后

皇上聖鑒訓示施行再此摺係由臣錦棠主稿因往返熟商有需時日是以覆奏稽遲合併聲明謹

奏

硃批著照所請該衙門知道欽此

伊犁及塔爾巴哈臺等處事權不一請 旨定奪摺二月初二日

奏爲伊犁及塔爾巴哈臺等處事權不一請

旨定奪以重邊防恭摺仰祈

聖鑒事竊臣承准軍機大臣字寄光緒十四年十二月初五日奉

上諭色楞額奏俄人毆斃中國兵民一案幾肇釁端並陳時局窒礙情形一摺甯遠一案前經總理各國事務衙門照會俄使確查妥辦並知照洪鈞轉電該將軍彈壓兵民勿任滋事此事近在伊犁色楞額責無旁貸總在就地確

與該領事持平商辦該處密邇鄰疆此等交涉事所常有  
必須持以鎮靜斷不可急遽張皇致滋貽誤至所籌邊防  
要務各條新疆建設行省全局已定該將軍甫經到任豈  
宜輕議更張至善後未盡事宜及有應行變通之處應隨  
時與劉錦棠和衷商榷會同妥辦慎勿各持意見致誤事  
機色楞額原摺著鈔給劉錦棠閱看將此由五百里各諭  
令知之等因欽此跪聆之下仰見

朝廷燭照無遺訓示周詳之至意欽服莫名伏查色楞額  
前過省城與<sub>臣</sub>相見意氣極爲浹洽語及伊犁塔爾巴哈  
臺等處設官情事卽云風會所趨自無疑義惟邊防事勢

與內地究有不同若鎮道不歸節制恐呼應不能靈通所慮者祇此而已臣是以會同有伊犁將軍節制鎮道之奏及色楞額到任後遇事漸有參差部覆議准設官臣是以委員往署色楞額以爲不合甯遠地連俄境向未置營防守及闡餉事起欲商令調營扼守而近地無營可調臣是以派隊前往色楞額又以爲不合其見於原奏者皆聖明所知臣無庸復辨臣初疑其不應與前歧異由今思之新疆本應將軍所轄謂之總統體制最崇一旦改移以爲行省色楞額卽不以爲忤亦必有喜事者爲之造言如原奏所陳已可概見其實行省之議自左宗棠發之譚鍾



麟繼言於其後臣乃言之且皆斷自

宸衷非臣下一人之私智色楞額初至蓋未之知也現在  
蒙

恩准撥銀十五萬兩爲遣撤伊犁營勇之費臣自應欽遵  
會同辦理色楞額前奏係援臣十二年清餉原案臣所奏  
亦請照原案辦理並無歧異及拜摺後錄稿咨商請轉飭  
各該營造冊而色楞額至今不覆誠恐遷延日久各營勇  
又從而生心發餉既如此其難則營制更無能望其速改  
查伊犁自收還以後已及數年而應辦事宜毫未就緒非  
盡督催不力正由承行者視非已事故不肯盡心譚鍾麟

前奏請專派大員辦理屯政臣與錫綸皆知其無益是以具奏請改設道府及以下等官今既已設官自無容更議惟事無專屬實應明定章程若因此紛爭尙復成何事體竊念設官分職

國家自有常經若伊犁鎮道等官應歸撫臣統轄則地方一切及勇營冊籍卽應由色楞額悉數移交以符體制或以將軍兼管伊犁塔爾巴哈臺等處巡撫事務自伊犁原管大河沿以西以及塔爾巴哈臺等處仍劃歸將軍管轄該鎮道以下亦悉由將軍統轄臣卽毋庸過問其應分協餉仍可由新疆統收分解以利轉輸臣與唇齒相依亦斷

無漠不相關之理但事權一定則彼此心無芥蒂遇有應商之事仍可會商事有合之而見其疏分之而見其親者此類是也臣不敢隱忍不言致滋遺誤應請

旨迅賜定奪以便遵行再查伊犁將軍舊時總統伊犁等處其所統轄兼及南路各城自新疆設省以來臣與將軍已各有專責近復經部議裁撤伊犁參贊設副都統二員以改照駐防之制是職司已定卽不應復有總統之名其所領

敕書及原頒印信似均應更換以昭劃一臣爲慎重邊防起見是否有當謹恭摺陳明伏乞

皇太后

皇上聖鑒訓示施行謹

奏

硃批所奏不爲無見前據色楞額等奏伊塔地方請歸將  
軍專轄已諭令該撫等妥商會奏著俟覆奏到日再降諭  
旨欽此

古今圖書集成  
卷之二

關外七八兩年徵收釐金支發薪糧局費報銷摺二月初十日  
奏爲甘肅關外光緒七八兩年徵收釐金支發薪糧局費  
繕具清單懇

恩飭銷恭摺仰祈

聖鑒事竊臣前准戶部咨議光緒七八兩年防軍善後報  
銷案內列收釐金支發委員薪糧局費係照何章支銀若  
干應令專案冊報以憑查核等因當經轉行遵辦並於奏  
復報銷案內聲明按照奏定各臺局薪糧局費章程委員  
各按官階局費分別繁簡支給在案茲據糧臺司道開單  
詳請

奏咨前來 臣查關外釐金前督 臣左宗棠於光緒四年議  
行開辦八年五月二十三日奉

旨停收截至六月底一律撤局光緒六年以前徵收之款  
業經前督 臣左宗棠開單報銷光緒七年分實徵稅釐庫  
平銀二十四萬八千二百五十五兩四錢六分九釐四毫  
六忽一微八年正月起至六月底撤局停收止實徵稅釐  
庫平銀一十六萬九千四百一十兩七錢三分四釐一毫  
八絲九忽一微共銀四十一萬七千六百六十六兩二錢  
三釐五毫九絲五忽二微內除防軍善後報銷七年分列  
收銀二十萬四千五百五兩二錢二分九釐四毫六忽一

徵八年分列收銀一十四萬九千二百三十八兩一錢三分二釐一毫八絲九忽一微外下餘銀六萬三千九百二十二兩八錢四分二釐計七年分開支薪糧等項銀四萬三千七百五十兩二錢四分八年分開支薪糧等項銀二萬一百七十二兩六錢二釐均係照章毫無冒濫除咨部外謹繕清單會同陝甘總督臣譚鍾麟恭摺具陳伏乞  
皇上聖鑒

飭部核銷以清款項再查光緒八年以前報銷均係奉准開單釐金薪糧局費應仍開單請銷以歸一律合併聲明  
謹



奏

硃批戶部議奏單併發欽此

巴里坤八旗官兵及古城滿營遷併到防摺

二月二十四日

奏爲恭報巴里坤八旗官兵遷徙到防古城滿營一律遷併就緒恭摺仰祈

聖鑒事竊照烏魯木齊巴里坤滿營前經奏准遷併古城

上年

臣

飭據藩司議給盤費車輛等項並分別借支俸餉

咨行護理巴里坤領隊大臣金貴古城城守尉德勝分起遷徙以符原奏業將烏魯木齊滿營官兵到防日期具

奏在案旋據德勝呈報護理領隊大臣金貴督飭原設八旗官兵眷口及軍械文卷於十月初一日至十二月二十四日先後到古城防所撥給衙署兵房分別居住並據金

貴將領隊印信兩翼協領關防呈繳前來臣查兵部議奏  
烏魯木齊巴里坤滿營舊制向設八旗現在遷併古城今  
昔情形不同應准暫按六旗安設一俟兵丁敷額餉項充  
足隨時酌定規復舊制奏明辦理等因奉

旨允准欽遵咨行在案茲據呈報前情當飭德勝迅將一  
切接收具報並將烏魯木齊巴里坤遷併各旗及古城舊  
有各官兵查照奏定章程作爲六旗安設分晰造齎旗佐  
年貌清冊另案

奏咨巴里坤滿營報銷應由金貴截至十四年底止趕造  
咨部俾清界限至烏魯木齊古城舊設協領防禦驍騎校

筆帖式等官均係委署巴里坤舊補各員應由德勝查開銜名呈請咨部開缺佐領以下由德勝按現設六旗員數或以原官或另行揀員呈請奏補以資得力其裁撤各員擬給馬甲錢糧畱營當差候補所裁協領二員查副都統銜左翼協領英魁年力衰邁應請以原品休致副都統銜右翼協領金貴於光緒二年准補斯缺屢護領隊篆務邊防戎政均能措置裕如上年遷併各旗尤能妥爲調度一體安謐洵屬不可多得應如何  
擢用以示鼓勵出自

天恩所有巴里坤官兵到防古城滿營一律遷併就緒各

情形除咨部外謹會同伊犁將軍臣色楞額陝甘總督臣譚鍾麟恭摺具陳伏乞

皇上聖鑒訓示謹

奏

硃批英魁著以原品休致金貴著交軍機處存記該部知道欽此

代繳巴里坤領隊大臣銀印及左右翼協領銅質關防片  
二月二十四日

再巴里坤領隊大臣暨左右兩翼協領各缺業經奉

旨裁撤在案茲准護領隊臣金貴齋送原頒乾字五百三

十六號巴里坤領隊大臣銀印一顆又乾字一萬四千七  
百七號左翼協領銅質關防一顆乾字一萬四千七百八  
號右翼協領銅質關防一顆呈請代繳等因前來除將印  
信關防鐫刻繳字咨送禮部查銷外理合附片具陳伏乞

聖鑒謹

奏

卷之三十一

硃批禮部知道欽此

三

委黃萬鵬等署喀什噶爾提屬並阿克蘇鎮屬各副將員

缺片

二月二十四日

再新設喀什噶爾提屬並阿克蘇鎮屬各副將員缺亟應  
委員署理以重職守喀什噶爾回城協營副將員缺查有  
頭品頂戴記名提督黃萬鵬久經戰陣曉暢戎機堪以委  
署莎車協營副將員缺查有題奏提督陶生林精勤勇敢  
歷練老成堪以委署烏什協營副將員缺查有頭品頂戴  
題奏提督張俊深明大略洞達邊情堪以委署除分行遵  
照飭司先行刊給木質關防暫資啟用並咨部查照外謹  
會同陝甘總督

臣譚鍾麟喀什噶爾提督

臣譚上連附片



卷之三十一

十一

具陳伏乞

聖鑒謹

奏

硃批兵部知道欽此

請 卹故員趙奉樂等八員片

二月二十四日

再新疆立功後積勞病故文武各員迭經

臣

奏蒙

恩准照例議卹各在案茲續查有記名提督訥恩登額巴圖魯趙奉樂甘肅平遠縣人提督銜記名總兵甘肅永昌協屬新城營都司龍在田湖南湘鄉縣人總兵銜陝甘儘先推補副將岳正南湖南武陵縣人副將銜雷甘補用遊擊賀茂棠湖南湘鄉縣人參將銜雷閩補用遊擊戴海廷湖南甯鄉縣人儘先補用都司賴國安湖南湘鄉縣人理問銜分省補用縣丞張曜先分省補用通判張光綬該員

等從征關外有年先後在營病故殊堪憫惻合無仰懇  
天恩俯准將該故員趙奉樂等八員一併

飭部照軍營立功後積勞病故例議卹以昭激勸而慰幽  
魂出自

逾格鴻慈除咨部外謹附片具陳伏乞

聖鑒訓示再龍在田係借補甘肅新城營都司所遺員缺

臣已咨明陝甘總督臣譚鍾麟奏請開缺另補合併聲明

謹

奏

硃批著照所請該部知道欽此

懇將留營軍犯張得太釋回片

二月二十四日

再已革外委張得太原犯誣良案內發配靖遠縣安置光緒六年到配臣因關外積寒侵骨從軍士卒往往墮指裂膚乏術診視聞張得太精於鍼灸推捺之術於光緒九年商調來營醫治勇夫著有成效該犯籍隸天津前聞順直水災願將歷年所積醫資銀五百兩捐助賑需臣於光緒十年六月二十七日附片

奏請留營在案查例載發遣新疆等處效力官犯若原犯軍流從前加重改發者定限十年期滿遵例奏

聞如蒙

允准卽令各回旗籍又發遣新疆廢員派令管理鉛鐵等廠如果妥協其原犯軍流例應十年奏請准其於十年之內酌減三年奏

聞如蒙

允准卽令各回旗等語該犯張得太原係足四千里發甘肅省靖遠縣安置迨調新疆幾至萬里不啻加重改發在營將屆七年合之到靖遠縣配所共計十年且係奏請雷營醫治兵勇與原犯發遣新疆效力者實有不同醫術旣精保全甚眾勞勩實不可沒又曾捐貲助賑勇於悔過可否仰懇

天恩准將畱營軍犯張得太釋回之處出自  
鴻慈謹會同陝甘總督臣譚鍾麟附片具陳伏乞  
聖鑒訓示施行謹

奏

硃批准其釋回欽此

五言集卷之八

七

報交卸起程日期摺

二月二十五日

奏爲恭報

微臣

交卸起程日期仰祈

聖鑒事

臣欽奉

諭旨允准展假回籍省視祖母當卽具摺叩謝

天恩茲於本年二月二十五日派委署撫標中軍參將郝忠裔代理迪化府知府潘時策將甘肅新疆巡撫關防一

顆暨

王命旗牌並文卷等件齎送護撫

臣

魏光燾接收任事

臣

卽於是日卸事起程新疆改設標營規制已定護撫臣在事日久洞達無遺必能廣益集思和衷共濟臣一俟假滿



即當馳回本任勉竭愚忱以仰副

聖主曲賜矜全之至意所有

微臣

交卸起程日期謹恭摺

具陳伏乞

皇上聖鑒謹

奏

硃批知道了欽此

轉解伊犁勇餉日期片

二月二十五日

再臣於本年二月初四日承准軍機大臣字寄光緒十四年十二月二十九日奉

上諭色楞額奏清釐伊犁勇餉撫臣請照舊章礙難照辦一摺所有伊犁遣撤勇隊酌發餉項川資各事宜卽著色楞額就近一手經理前由譚鍾麟撥解銀十五萬兩著劉錦棠派員轉解伊犁應用等因欽此欽遵咨行在案茲據藩司詳稱前項銀十五萬兩遵於本月十三日委員管解去訖並准色楞額咨鈔原摺知照前來臣查此項銀兩由色楞額批准給發臣本不便與聞部議令臣專辦臣正擬

具奏復奉

旨飭令臣與色楞額會同辦理臣始不敢過辭色楞額援前案請款又不能照前案發餉意實兩歧前此臣與錫綸會同發餉實奉有

諭旨飭令分別入營久暫分成勻給色楞額蓋未周知伊犁勇營舊章每月發餉七天半其餘糧料及衣履包巾等項隨時作價各營勇應存餉數實不自知以故當時按年勻給各營勇並無異說其後錫綸遣撤吉江馬隊因有存餉可稽核發至六十餘萬兩如各營勇存有餉冊乃藏而不出豈非至愚不然又豈臣所能強抑此次色楞額請撥

款十五萬兩部議如無須此數自應存儲藩庫不得濫支  
臣恐色楞額意有未安故告以有餘仍當具

奏以濟伊犁之用不謂乃以此更生異論也  
臣現在請假

回籍已蒙

恩允准色楞額當信其無他  
臣長於兵間深知甘苦從不

敢過於嚴切惟伊犁營勇積習太深非嚴恐無以整頓  
臣

欲嚴而色楞額以寬則色楞額之所處自易惟望速清此

款早定營規使邊圉之民相安無事則伊犁之幸亦新疆

全局之幸矣所有轉解前項銀兩日期謹附片陳明伏乞

聖鑒訓示謹

奏

硃批戶部知道欽此

抵籍日期片

光緒十五年八月二十四日湘撫王文韶代奏

再臣於八月初一日承准軍機大臣字寄光緒十五年七月十五日奉

上諭甘肅新疆巡撫劉錦棠前經賞假六箇月回籍省親嗣據該撫奏報於二月二十五日起程現在計已行抵湖南新疆地方緊要邊防諸務關係重大朝廷廑念甚殷著王文韶傳知該撫不必拘定假期迅速回任將此由四百里諭令知之欽此遵

旨寄信前來

臣

查新疆撫

臣

劉錦棠蒙

恩准假省親於七月二十七日行抵湖南省城彼此往還

小住三日旋卽遄回湘鄉縣本籍欽奉前因遵卽恭錄  
諭旨備文知照去後茲據呈稱錦棠前蒙

恩准展假六箇月回籍省視祖母當卽恭摺叩謝

天恩並將交卸起程日期專摺

奏明在案嗣因沿途感受暑溼觸動舊時便血及手足麻  
木諸證隨時醫治略有耽延茲於八月初六日行抵湖南  
湘鄉縣本籍錦棠祖母病勢雖較前輕減然終日昏瞶不  
能辨識家人其眠食步履一切需人錦棠惟有加意醫治  
以期速愈合將到籍日期呈請

據情代

奏等情核其發行月日所有欽奉

寄諭轉行之件自係尙未接到理合先將該撫到籍日期  
附片代

奏伏乞

聖鑒謹

奏

硃批知道了欽此





請俟祖母病勢稍痊卽行起程回任片

八月二十九日湘撫王文韶代奏

再臣於八月初一日欽奉

寄諭以新疆地方緊要飭卽傳知劉錦棠不必拘定假期迅速回任等因欽此當卽恭錄轉行並附片

奏報在案茲於八月二十日接據新疆撫臣劉錦棠文稱

錦棠前蒙

恩准賞假六箇月回籍省視祖母業將到籍日期呈請代奏現在將近一月祖母病勢諸未輕減錦棠雖日侍醫藥祖母總不識錦棠爲何人口中時念孫歸目中不知孫歸是錦棠雖歸究與未歸無異傷心愴目泣下潸然五內徬

惶莫知所措茲奉

天語煌煌跪讀之下莫名惶悚計惟有趕延名醫多方調理俟祖母病稍痊可卽當不拘假期迅速回任以期上慰宸廑等因呈請轉

奏前來理合據情附片代

奏伏乞

聖鑒謹

奏

硃批仍著傳諭劉錦棠新疆事務緊要俟伊祖母病勢稍輕卽行回任以重邊防欽此

祖母病勢增劇懇開缺終養摺

十二月十三日湘撫邵友濂代奏

奏爲據情恭摺代

奏仰祈

聖鑒事竊准甘肅新疆撫臣劉錦棠文稱錦棠前蒙

恩准賞假六箇月回籍省視祖母到籍後復奉

諭旨飭令不拘假期迅速回任當將祖母病未輕減一俟稍愈卽行起程各節呈經升任雲貴總督前湖南巡撫王文韶附片代奏光緒十五年十一月十二日承准咨開十月二十九日在常德府途次接回原片奉

硃批仍著傳諭劉錦棠新疆事務緊要俟伊祖母病勢稍

輕卽行回任以重邊防欽此跪聆之下感悚莫名錦棠一介庸儒受

恩深重此身豈尙復爲己有且邊防喫重久曠厥職尤爲寢饋難安到籍以來初不意祖母之暮景頽唐至斯極也名醫訪徧祈禱多方病且有增無減向雖不能辨識家人視聽猶見精神今則家人至其前而不知其至矣向雖飲食減少猶有索食之時今則竟日不自索食必俟人扶掖而食徐啗之乃得進以少許矣向雖精神恍惚猶間有清醒語言今則無非顛倒之詞家人環聽而細測之莫知其意之所在矣向雖起處維艱每當便溺猶或示人以意今

則侍疾者略不經心而溷穢在身矣錦棠日侍牀蓐昕夕所見無非可悲可泣之狀醫者謂尺脈細弱虛不受補藥方屢易病證亦復屢變所以久不見效錦棠聞之肝腸寸裂憂懼之餘公私兩念交迫於中亦遂神魂莫定夜不能寐致成驚悸之疾伏思錦棠髫齡孤苦賴祖母鞠育教誨以有今日歷溯祖母生平艱苦之境多不忍言祖母所出祇錦棠之父與叔兩人咸豐四年錦棠之父戰歿岳州同治九年叔父劉松山殉節金積堡皆祖母傷痛之事錦棠又離家十有八載久疏定省此次仰荷逾格鴻施獲覩慈顏方深慶幸以謂今始得博老人一笑

乃事不從心若此此時若遂不顧而行棄絕恩義

聖朝以孝治天下亦安用此忘親不孝之人錦棠未嘗學問惟一片血誠秉諸天性二十餘年效力疆場夫豈不知公爾忘私之義邊防爲重祖母爲輕然錦棠於無可如何之中作強自寬解之想則亦有二說焉現在邊疆安謐屢接關外來函兼詢南歸員弁皆言魏光燾措置裕如軍民悅服可以上慰

宸厯是此時之邊防似尙寬緩而祖母之情形則極急切也祖母今年八十有五錦棠今年四十有六是錦棠感激馳驅之日長而依戀庭闈之日短也是以屢奉

廷旨催促實有不克欽遵就道之苦衷轉瞬假期屆滿再  
四思維若僅求

恩展假則祖母衰病彌留何能應期而愈祖母之病一日  
不愈則錦棠之心一日不安一日不安則身一日無用身  
既無用則回任之期實難預必成行與其愆期而獲咎於  
後何如據情而泣訴於前惟有籲求

天恩俯准開錦棠甘肅新疆巡撫員缺

迅賜另簡以專責成俾錦棠得以安心在籍侍奉祖母餘  
年錦棠亦藉以稍舒憂鬱畱此身效力於將來則有生之  
年無非報



國之日犬馬愚忱雖赴湯蹈火甘之如飴矣冒昧瀆陳不勝迫切惶恐之至所有錦棠祖母病勢增劇懇

恩賞准開缺終養緣由呈請據情轉奏前來臣自到任後接見紳耆詢以該撫臣祖母病狀均稱其老病日篤係屬實情茲准來文敘述情形詞尤肫切理合恭摺代

奏伏乞

皇上聖鑒訓示謹

奏

光緒十六年正月初八日內閣奉

上諭邵友濂代奏劉錦棠瀝陳祖母病狀懇恩開缺終養一摺覽奏情詞悱惻出於至誠朝廷良深憫念惟新疆事務重要該撫久膺邊寄威望素孚一時實難遽易生手劉錦棠著毋庸開缺再賞假四箇月並加恩賞給伊祖母人蔘八兩以資頤養該撫其善求醫藥盡心調治一俟親疾就痊卽行馳赴本任用副朕眷念西陲優加倚任至意欽此



謝年終 恩賞摺 光緒十六年正月二十二日護湘撫沈晉祥代奏

奏爲據情代

奏叩謝

天恩恭摺仰祈

聖鑒事竊准請假在籍甘肅新疆撫 臣 劉錦棠文開光緒十五年十二月二十八日承准軍機處咨開十一月二十八日由內交出

恩賞福字荷包銀錢銀鏢食物等項交兵部由驛遞到按照單開數目祇領等因承准此當卽恭設香案望

闕叩頭祇領伏念錦棠薄植輕材久膺疆寄荷

恩慈之遠被准乞假以陳情茲當鳳籥新更復沐

龍綸下逮

九疇敷錫拜

特眷於

奎章萬類包容

凝泰和於

辰極貢金品重赤仄同頒

賜果名嘉瓊芬並屑潤到滴酥之味

寵渥醍醐持將切玉之方潔侔冰雪凡此

鴻施之沛實深鰲戴之忱惟有震省身心刻銘肺腑以期

仰答

高厚於萬一所有感激下忱請代表奏叩謝

天恩等情准此理合據情恭摺代

奏伏乞

皇上聖鑒謹

奏

硃批知道了欽此

五言古詩 卷之八

三

恩賞祖母陳氏緞疋謝

恩摺

三月十五日湘撫張煦代奏

奏爲據情代

奏叩謝

天恩恭摺仰祈

聖鑒事竊准請假在籍甘肅新疆撫

臣

劉錦棠咨稱准前

湖南撫

臣

邵友濂轉交

恩賞各壽婦緞疋一案單開湘鄉縣命婦劉陳氏未屆百齡親見七代五世同堂蒙

恩賞給上用緞一疋改折江綢二件等因錦棠祇領之餘謹卽恭設香案望



闕叩頭謝

恩伏念錦棠祖母陳氏年逾八秩釵荆安儒素家風  
誥捧五花翟茀沐

聖朝

恩露惜桑榆之已迫有負

鴻慈感漫藥之頻

頌久深黿戴茲復躬逢

慶典渥荷

殊施分出

天章璀璨煥雲霞之色謬膺

上賞喬黃生杖履之輝聞

命自

天感

恩無地錦棠惟有仰體

皇仁勉承親志傍藥爐而戲綵萱可忘憂企

黼座以攄丹葵還向日所有感激榮幸下忱咨請代

奏叩謝

天恩等情到臣理合據情恭摺代

奏伏乞

皇上聖鑒謹

奏

硃批知道了欽此

祖母病勢增劇懇暫行開缺摺

三月十五日湘撫張煦代奏

奏為據情恭摺代

奏仰祈

聖鑒事竊准請假在籍甘肅新疆撫

臣

劉錦棠咨稱前將

祖母病勢增劇懇

恩開缺終養各節呈由前湖南撫

臣

邵友濂代奏奉

上諭邵友濂代奏劉錦棠瀝陳祖母病狀懇恩開缺終養一摺覽奏情詞悱惻出於至誠朝廷良深憫念惟新疆事務重要該撫久膺邊寄威望素孚一時實難遽易生手劉錦棠著毋庸開缺再賞假四箇月並加恩賞給伊祖母人

薄八兩以資頤養該撫其善求醫藥盡心調治一俟親疾就痊卽行馳赴本任用副朕眷念西陲優加倚任至意欽此跪誦迴環涕零如雨並准前護撫臣沈晉祥遞到兵部木牌一面薄匣一箇業將叩謝

天恩各情呈請代奏在案伏念錦棠至愚極陋朝廷優加委任謬膺邊寄此次陳情乞養尤復過蒙恩眷不以瀆陳爲干咎且以重闡衰病爲可矜

天語慈祥

鴻恩稠疊雖古仁聖之君厚恤臣工家室殆未有若是之篤至者碎骨粉身不足言報錦棠具有天良豈不知感激

而奮與況邊疆緊要離任已周一年尙復退食委蛇日夜  
徬徨神魂如失皇天后土實鑒此心惟內顧祖母病勢朝  
不保夕錦棠不學於古人仁孝之道未之有聞然至誠惻  
怛人各本於性生何忍於祖母阽危之際離牀蓐而賦長  
征設征車甫經就道而風木之聲遽傳於耳其何以爲心  
其何以自立於世此又烏私之苦萬無可寬者也仰蒙  
聖旨展假四箇月固已至優極渥無以復加矣乃迄今又  
兩月有餘醫藥徧求祖母仍未稍痊轉瞬假期復滿再欲  
輾轉乞假幾無了期尙復成何事體  
慈諭又曰一俟親疾就痊卽行赴任

體恤周詳不加逼迫方之李密之所謂詔書切峻者可見  
孝治之世其

寬大之典遠邁前朝惟祖母衰老病篤奄奄一息痊愈不  
知何時而錦棠以受

恩深重實任封疆之身日復一日月復一月虛膺重寄於  
田間久曠職守於邊省既乖設官之體制尤深內疚於神  
明夫公義私情輕重懸殊惟公義乃畢世之所重私情爲  
一時之所急畢世之所重者相期補報於畢世暫乞紓徐  
於一時一時之所急者稍或蹉跎於一時永貽痛憾於畢  
世念進退之維谷因仰首以悲鳴凡人有疾痛憂患之事

未有不窮極而呼父母者錦棠四顧茫茫如窮人之無歸  
再四思維惟有

高厚之恩可恃以蘇困心衡慮之苦是以不揣冒昧仍呼  
籲於我

皇上之前如孺子痛哭於慈父母之側伏懇

曲加憐憫俯聽微志暫開錦棠甘肅新疆巡撫員缺

另簡賢能以專責成俾要缺不至日久虛懸錦棠亦稍解  
曠職之咎聊紓兼顧之憂庶得謹遵

諭旨善求醫藥盡心調理一俟就痊卽當泥首

天廷求



金華集卷之十一  
三  
賞差使捐軀圖報理得心安犬馬愚忱神人共鑒決不敢  
辜負

天恩稍涉欺罔所有祖母病勢急切懇

恩暫行開缺緣由咨請代奏前來理合據情代

奏伏乞

皇上聖鑒訓示謹

奏

懇辭 賞加太子太保銜片

三月十五日湘撫張煦代奏

再准甘肅新疆撫臣劉錦棠咨稱竊錦棠恭閱邸鈔正月  
一十七日奉

上諭甘肅新疆巡撫劉錦棠著賞加太子太保銜欽此跪  
聆之下感激莫名伏念錦棠忝任封疆之重要莫酬

高厚於涓埃自蒙

鴻慈得遂省親之願久離雁塞何辭曠職之愆大母既荷  
推恩頒

尙方之藥餌錦棠更承

溫諭緩邊域之馳驅已叨非分之榮方塵廢官之懼乃淪

肌浹髓頻驚拜

賜於

龍章而福過災生竊恐貽憂於蚊負況夫勳非蕭瑀何堪  
儀備三師德愧召公敢望班躋六傳庭闈櫻痼疾效劉審  
理之煮藥尙滯征車輔弼號崇階如南郭士之濫竽滋慙  
夢轂伏乞

俯鑒愚忱

收回成命俾寬罪戾曷罄悚惶情實出於肫誠事非故爲  
矯激所有懇辭

賞加太子太保銜緣由咨請代奏前來理合據情代

奏伏乞

聖鑒訓示謹

奏

奏

奏



光緒十六年四月初六日內閣奉

上諭張煦代奏劉錦棠瀝陳祖母病篤懇恩暫行開缺侍  
養並請收回加銜成命各摺片覽奏情辭迫切具見悃忱  
惟新疆爲西陲要地劉錦棠辦理一切深合機宜朝廷正  
資倚任著再賞假四箇月毋庸開缺仍俟伊祖母病體稍  
愈卽行回任以重職守前以行慶宣綸賞加該撫太子太  
保銜酬庸懋賞出自特恩毋庸固辭欽此



賞加太子太保銜謝

恩摺

五月二十七日湘  
撫張煦代奏

奏爲據情代奏叩謝

天恩恭摺仰祈

聖鑒事竊准在籍太子太保甘肅新疆巡撫臣劉錦棠咨  
開前閱邸鈔恭讀正月二十七日

上諭甘肅新疆巡撫劉錦棠著賞加太子太保銜欽此比  
經備文呈請代奏額懇

收回成命五月十五日接到轉准吏部咨行光緒十六年  
五月初二日奉

上諭張煦代奏劉錦棠瀝陳祖母病篤懇恩暫行開缺侍



養並請收回加銜成命各摺片覽奏情詞迫切具見悃忱  
惟新疆爲西陲要地劉錦棠辦理一切深合機宜朝廷正  
資倚任著再賞假四箇月毋庸開缺仍俟伊祖母病體稍  
愈卽行回任以重職守前以行慶宣綸賞加該撫太子太  
保銜酬庸懋賞出自特恩毋庸固辭欽此跪聆之下感悚  
莫名當卽恭設香案望

闕叩頭謝

恩訖伏念錦棠謬膺疆寄未報涓埃屢叨

異數之頒恆切非常之懼茲值同登

壽寓方殷頂祝於臣工復荷

恩綸榮晉頭銜於丞弼間

命而時縈丹悃獻箴而愧列青宮當親病之未痊

推恩展假迺

殊施之渥沛曠職滋慙錦棠惟有益慄冰淵勉圖報稱重  
闈侍奉每瞻雁塞以依馳寸念徬徨冀答

鴻慈之高厚所有感激榮幸下忱請據情轉奏叩謝  
天恩等因准此理合據情恭摺代

奏伏乞

皇上聖鑒謹

奏

皇朝通志卷之二十一

三

陳請開缺終養摺

七月十八日湘撫張煦代奏

奏爲在籍大員屢次陳情懇乞開缺終養謹照錄原咨恭摺代呈仰祈

聖鑒事竊

臣

於五月二十四日接奉

寄諭前因劉錦棠迭請開缺終養兩次賞假諭令俟伊祖母病體稍痊卽行回任茲據楊昌濬奏稱關外行省新立善後百端待舉塔爾巴哈臺尙未定局事極繁重該撫久駐新疆文武各員指臂相聯延盼之心同形焦切請飭伊弟河南候補道劉肅回籍侍養俾該撫得以安心就道等語本日已有旨諭令倪文蔚轉飭劉肅迅回湖南矣著張

照傳諭劉錦棠不必拘定假滿卽行馳回本任朝廷以該撫孝思肫篤曲加體恤該撫務當仰體朕懷移孝作忠以副眷念西陲至意將此由四百里諭令知之欽此欽遵轉行並由臣加函勸令遵

旨酌量訂期起程回任去後旋准該撫臣以祖母病難速痊不忍遠離等語咨請代

奏經臣以既奉

異命未便再爲代陳答復並將原咨退還嗣該撫臣親身來省面懇又經臣當面力勸並婉陳大義乃該撫臣愛親之心根於天性非口舌所能爭仍畱原咨堅請代奏臣情

切桑梓非不知新疆一隅關繫綦重該撫臣在任有年辦理悉合機宜冀其早日就道上紓聖主廬念邊疆之意無如伊祖母衰病纏綿亦屬實情既據面投公牘又未敢壅於

上聞謹將劉錦棠原咨恭錄進呈

御覽請

旨定奪所有臣恭摺代呈緣由伏乞

皇上聖鑒訓示遵行謹

奏



光緒十六年八月十三日內閣鈔出十二日奉

上諭張煦奏在籍大員籲懇開缺終養據情代奏一摺劉錦棠於上年回籍省視祖母嗣據屢次陳情開缺均經加恩展假並諭令伊弟河南候補道劉肅回籍侍養俾該撫得以安心回任朝廷加意體恤不爲不周茲復據奏該撫祖母病益增劇未能遠離仍懇開缺在劉錦棠孝思肫摯原屬出於至誠惟念新疆地方緊要該撫威望素孚整頓一切事宜諸臻妥協實未便准其開缺劉錦棠著再賞假四箇月俟伊祖母病體稍痊卽行馳回本任用副朝廷廕念邊陲優加倚任至意欽此





軍機大臣字寄光緒十六年七月十一日奉

上諭前因新疆地方緊要迭經諭令劉錦棠迅卽回任並  
因該撫祖母年邁令道員劉肅回湘侍奉俾得安心就道  
嗣經倪文蔚奏稱劉肅已於五月三十日起程回湘等語  
現在當已到籍著張煦傳諭劉錦棠卽行回任毋稍遲延  
並著將起程日期由驛馳奏將此由四百里諭令知之欽  
此



請俟假滿後起程赴京摺

十月初六日湘撫張煦代奏

奏爲據情代奏仰祈

聖鑒事竊臣准在籍甘肅新疆撫臣劉錦棠文稱錦棠前

將祖母痊愈難期仍懇

天恩開缺另簡各緣由呈請代奏在案茲准咨開轉准吏部咨光緒十六年八月十二日內閣奉

上諭張煦奏在籍大員籲懇開缺終養據情代奏一摺劉錦棠於上年回籍省視祖母嗣據屢次陳請開缺均經加恩展假並諭令伊弟河南候補道劉肅回籍侍養俾該撫得以安心回任朝廷加意體恤不爲不周茲復據奏該撫

祖母病益增劇未能遠離仍懇開缺在劉錦棠孝思肫摯原屬出於至誠惟念新疆地方緊要該撫威望素孚整頓一切事宜諸臻妥協實未便准其開缺劉錦棠著再賞假四箇月俟伊祖母病體稍痊卽行馳回本任用副朝廷廕念邊陲優加倚任至意欽此恭錄咨行欽遵查照等因伏念錦棠草莽庸愚受

恩深重上年荷蒙

給假歸省後屢次陳情乞養疊沐

鴻施不加訶責

寬予假期每讀

溫諭之慈祥曷禁涕零之如雨自顧此身何才何德

朝廷曲加體量至再至三心非木石能無奮興現雖祖母  
沈疴未起未忍決絕私情棄之而去然公義如此之重實  
有不敢再申前請之勢差幸入秋以來祖母以錦棠日侍  
牀蓐扶持抑搔已周一年雖仍不識錦棠爲孫似尙不若  
前此之目爲外人適錦棠弟肅奉

旨諭令回籍侍養自五月三十日由豫稟報起程因汴梁  
連旬大雨驛路積水阻隔改由周家口乘船趨清淮出長  
江泝流而上已於八月十五日抵家登堂拜謁祖母雖不  
能認識似尙目爲面熟家人自此兄弟更番侍養病勢幸

未增劇此時距

恩旨續假之期尙有數月加緊調理仰蒙

福庇但得平平如故卽當於明年正月假滿後破涕啟行  
明知年近九十之篤病老人自此次拜別慈顏安知尙有  
獲見之一日將求如現在之親侍湯藥杳不可得言之酸  
心然

高天厚地之恩淪肌浹髓何敢再顧烏私致滋罪戾所爲  
情同絕裾不復躊躇者也惟念錦棠一家自祖母以下歷  
承

恩眷有加無已數十年如一日從未一覩

天顏寸心耿耿無時或釋且新疆如常安謐正宜乘此無事之時求領

訓詞稍申孺戀

陛辭後立即馳回本任不致多延時日伏懇

聖慈俞允不勝感激屏營之至所有遵

旨於明年正月假滿後起行先請

陛見即赴本任並聲明弟肅到家日期各緣由呈請代

奏前來理合據情代

奏伏乞

皇上聖鑒謹



奏

硃批劉錦棠著俟假滿後卽行來京陛見欽此

賞祖母匾額綢緞謝

恩摺

光緒十七年正月二十二日相撫張煦代奏

奏爲據情代陳仰祈

聖鑒事竊

臣准在籍甘肅新疆巡撫 臣劉錦棠文稱接准

行知光緒十六年九月二十三日內閣奉

上諭本年朕二旬慶辰業經覃敷闔澤凡在京大員親老年逾八旬者優加賞賚茲據京外各衙門續查太子太保銜尙書銜甘肅新疆巡撫劉錦棠等老親均年逾八旬祿養承歡允宜一體施恩以昭盛典尙書銜甘肅新疆巡撫劉錦棠之祖母陳氏著賞給御書匾額一方紫檀三鑲玉如意一柄大卷江綢袍料二疋大卷八絲緞袍褂料二疋

用示錫類推恩至意欽此旋由驛發遞

恩賞各件到錦棠湘鄉縣原籍當卽恭設香案望  
闕叩頭祇領訖伏念錦棠世沐

殊榮備極優渥愧無建樹莫報涓埃茲值

堯殿長春疇陳五福方效華封上祝

寵賚重闈

日麗天章

宸藻耀庭階之色珠明如意

皇圖開仁壽之祥膺

申錫而綵絢絲綸頌王林而輝增黼黻疊蒙

賞賚彌切悚惶錦棠惟有勉竭庸愚力圖報稱望

彤庭而忭舞載詠南山瞻丹徼以依馳遙殷西向所有錦棠感激榮幸下忱咨請代

奏等因前來理合據情恭摺代

奏叩謝

天恩伏乞

皇上聖鑒謹

奏

五十四年八月二十一日

第

謝年終

恩賞摺

正月二十二日湘撫張煦代奏

奏爲據情代陳叩謝

天恩恭摺仰祈

聖鑒事竊

臣

准請假在籍甘肅新疆巡撫

臣

劉錦棠咨稱

光緒十六年十二月二十七日承准軍機處咨開光緒十六年十一月二十九日由

內交出

恩賞福字荷包銀錢銀鏢食物等項交兵部由驛馳遞按照單開數目祇領等因承准此當卽恭設香案望闕叩頭祇領訖伏念錦棠猥以微材叨逢

盛世屢邀

光寵時切悚惶茲當鳳籥將更忽荷

龍綸下逮

宸翰煥雲霞之色敷錫九疇

覆疇彰天地之仁包涵萬類貢金品重寶並球圖

賜果名嘉

頒來禁苑滴酥同潤

濃恩沾

帝眷之隆屑玉流芬異味拜

天廚之賜凡此

鴻施之沛實深鼇戴之忱惟有震省身心刻銘肺腑以期  
仰答

高厚鴻慈於萬一所有感激下忱咨請代

奏叩謝

天恩等因到臣理合據情恭摺代陳伏乞

皇上聖鑒謹

奏





丁祖母承重憂例應開缺摺

正月二十七日湘撫張煦代奏

再請假在籍甘肅新疆巡撫臣劉錦棠自光緒十五年八月初六日到湘鄉縣本籍省親因伊祖母陳氏久病纏綿業經三次陳情均蒙

恩賞假又經臣於上年十月初六日代奏俟假滿後即行赴京

陛見十二月初六日欽奉

硃批劉錦棠著俟假滿後即行來京陛見欽此當即恭錄咨行去後茲據藩司句樞詳報據署湘鄉縣孫儒卿申稱劉錦棠正擬料理起程赴京聞詎伊祖母陳氏於十七年

正月初九日病故該撫臣係承重嫡長孫例應丁憂呈請

轉詳奏咨開缺等情前來臣覆查無異除分咨吏部及陝

甘督撫臣查照外理合附片陳明伏乞

聖鑒謹

奏

服闋後俟病體稍痊卽行遵

旨赴京摺

光緒十九年四月二十八日湘

撫吳大澂代奏

奏爲據情代

奏仰祈

聖鑒事竊

臣

前據前新疆巡撫

臣

劉錦棠以足疾舉發並

患目昏各情呈請暫緩北上當經恭摺代

奏嗣於光緒十九年三月十一日接回原摺奉

硃批著傳諭劉錦棠一俟病體稍痊卽行來京陛見欽此  
欽遵轉咨去後茲據劉錦棠呈稱欽奉

諭旨跪誦之下感激涕零計自光緒十七年正月初九日

丁憂起至十九年四月初九日已經服闋亟應起程北上以副感

恩圖報之忱惟兩日昏矇近雖漸愈而足疾則積冷如冰少欲行動須人扶掖兼有頭眩自汗便血等證精神異常困憊據醫家云兩足疾根過深調治得法尙可望痊若再延緩必成痼疾清夜自思殊深焦急前此籲懇

聖慈稍爲展緩方慮上違

朝旨寢饋莫安乃蒙

俞允之恩如獲更生之慶天良具在感奮何如自當趕緊調治一俟足能舉步各證稍見痊可立即束裝就道泥首

闕廷瞻仰

天顏跪聆

聖訓不敢稍耽安逸自外

生成等情呈請代奏前來

臣

查劉錦棠尙在中年氣體未

衰所患足軟等證皆由積受風溼稍寬時日俾得安心醫

治自易復元一俟疾體稍痊

臣

當催令北上仰副

聖恩眷念之隆除咨明吏部起復外所有據情代

奏緣由謹繕摺具陳伏乞

皇上聖鑒謹

奏

各事... 卷之二

硃批知道了欽此

三

晉封一等男謝

恩並請詣

闕祝

嘏摺

光緒二十六年三月二十六

日湘撫吳大澂代奏

奏為據情代奏叩謝

天恩並懇人都祝

嘏恭摺仰祈

聖鑒事竊准在籍太子太保尙書銜一等男前甘肅新疆

撫臣劉錦棠咨開恭閱邸鈔欽奉光緒二十年正月初一

日

上諭朕奉

慈禧端佑康頤昭豫莊誠壽恭欽獻皇太后懿旨予六旬

副慶勳公長壽



慶辰在廷臣工業經降旨加恩因念各省文武大臣有久  
膺疆寄卓著勳勞允宜同膺懋賞前甘肅新疆巡撫劉錦  
棠著晉封一等男欽此竊錦棠倥偬陋質躑躅羸軀蒙  
賞假以養疴未宜勤而報

德久已滋慙午夜負疚寅恭乃復跪誦

綸音欽承

布澤

皇太后長生進籙

萬壽無疆

皇上錫類陳詩

一人有慶仰

九重闈闔

敷惠雨以如膏合萬國衣冠沐

恩波而似海凡屬在公鞅掌尙因受

寵驚心矧錦棠職曠采薪形同朽木馬空伏櫪雀未銜環  
感曩時

兌澤頻沾榮邀蒲璧喜此日

坤安上祝秩晉花珊山戴鼈頭襲且遞增十世梁濡鵝翼  
德詎足安眾人陪東門而領西門謠羞竈養由八次而逾  
九次濫愧竽吹理宜籲懇

聖慈

收還成命藉安愚分末減重愆惟念

長樂添籌四海上

南山之頌

中安戩穀千宮稱

北斗之觴白麟亦解呈祥

嵩呼響應赤雁皆來獻瑞

華祝聲騰莫不共沐

龍恩同申虎拜

重輪普照草木生輝錦棠仰託

鴻釐固淪肌而浹髓從茲駑步當應手以回春現在藥石  
頻投冀增起色一俟趨蹌稍勝卽便首塗詣

闕謝

恩隨班祝

嘏虔申

陛見謹聆

聖謨所有感激微忱呈請代

奏前來

臣

查湖南武職大員未經籲請祝

嘏者恪遵

諭旨毋庸再爲代奏惟劉錦棠本係奉

旨催令入都

陛見之員其忠愛感激出於至誠臣未便拘泥仍應勸其早日北上理合據情恭摺代

奏伏乞

皇上聖鑒謹

奏

軍機大臣知會奉

旨畱中欽此